

國學基行水金鑑

六

書叢本基學國

鑑 金 水 行

(六)

錄輯洪澤傅

行發館書印務商

# 行水金鑑卷第一百六

## 運河水

元至正二十五年十月乙巳徐達兵趨秦州浚河通舟師

明太祖實錄

明洪武元年河決曹州從雙河口入魚臺大將軍徐達開場場口入於泗以通運

河防一覽

時薛祥爲京畿都漕運使管長淮大河等衛官軍分司淮安自揚至蔡達濟壩堰皆沙塞崩塌疏通修築晝夜無息役使均平衆皆悅從

黃金標工部尚書薛公傳  
祥字彥卿無爲州人

明太祖洪武四年二月辛未上謂中書省臣曰臨濠爲朕興王之地今置中都宜以傍近州縣通水路漕運者隸之於是省臣議以壽、邳、徐、宿、潁、息、光、六安、信陽九州五河懷遠定遠中立蒙城霍丘英山宿遷睢寧、碭山、靈璧、潁上、泰和、固始、光山、豐沛蕭一十八縣悉隸中都

明太祖實錄

明太祖洪武五年二月辛巳命兩淮都轉運鹽使司移通泰等州批驗所于儀真縣仍疏濬運河以便商

旅

明太祖實錄

明太祖洪武六年傅友德鎮北平歲旱疏陳五事一永平府民接運軍儲由雅洪橋至北平道里頗遠宜通清河涑水故道漕運則用力少而成功多矣十二月庚申工部奏河南開封府自小木至陳州沙河

口十八閘淤塞六十三處宜疏濬以通漕運從之

明太祖實錄

明太祖洪武十三年冬十月乙亥致仕兵部尙書單安仁言由大江入黃泥灘口過儀真縣南壩入轉運河自南壩至朴樹灣約三十里宜濬以通往來舟楫其湖廣江西等處運糧船可由大江黃泥灘口入轉運河過淮安壩以達鳳陽及迤北郡縣其兩淮鹽運船可由揚子橋過縣南灘入黃泥灘出江以達京師其浙江等處運糧船可從下江入深港過揚子橋至轉運河過淮安壩以達鳳陽凡運磚木之船皆自瓜州過堰不相混雜如是則官船無風水之虞民船無停滯之患其轉運河及江都縣深港亦宜考其故道而疏濬之上曰所言雖善然恐此役一興未免重勞民力姑緩之

明太祖實錄

明太祖洪武十四年十一月乙巳浚揚州府官河自揚子橋至黃泥灘凡九千四百三十六丈

明太祖實錄

明太祖洪武十五年十二月癸未浚揚州儀真湖九千一百廿丈置閘壩十三處

明太祖實錄

明太祖洪武十七年閏十月壬寅修築江都縣深港壩浚河道五百六十七丈

明太祖實錄

明太祖洪武二十年春正月癸酉命工部主事楊德禮往高郵督有司修築並湖隄岸因揚州府同知任祥之言堤岸圮壞故有是命

明太祖實錄

王晏洪武二十年歷山東右參政督開運河濱岸有梁山泊者在勝國時塋垣皆甃以巨石公悉取造梁莊諸閘共事者初有難色公曰此非名賢其事不經無補風教今先務爲急吾但知紓民力耳遑問

其他其謀事向方而敢於爲義類此

陳道撰王公傳晏字士寧吁吟人取墜石作關  
紓民力其如虧損陰德何澤及枯骨者庶不如是

明太祖洪武二十四年春正月辛亥北平布政使司左參議周倬言通州白河北接太山諸河水道東南至直沽海口每霖雨時降水澇泛漲橋梁頽圮修築勞民其通州舊有糧船六十餘艘罷運已久宜改爲浮梁於白河之上以便經行十一月己未命景川侯曹震往四川治道路震至瀘州按視有枝河通永寧界鑿石削崖直接其地以通漕運復闢陸路作驛舍郵亭架橋立棧自茂州一道至松潘一道至貴州以達保寧通陝西由是往來者便之

明太祖實錄

是年河決原武縣黑陽山由舊曹縣鄆城兩河口漫過安山而會通河淤乃自濟寧以北陸運至德州

入河

北河續紀

按此河決而未治也故次年命舳艤侯朱壽率舟師海運河

志

明太祖洪武二十六年八月丙戌命崇山侯李新往溧水縣督視有司開臘脂河上面諭之曰兩浙賦稅漕運京師歲實繁浩一自浙河至丹陽捨舟登陸轉輸甚勞一自大江泝流而上風濤之險覆溺者多朕甚憫之今欲自畿甸疏鑿河流以通於浙俾運輸者不勞商旅獲便故特命爾往督其事爾其蒞事惟勤役民勿暴新頓首受命而行暨河成人皆便之

明太祖實錄

崇山侯李新督有司開臘脂河於溧水西達大江東通兩浙以濟漕運河成民甚便之

明史稿

明太祖洪武二十九年二月丙午常州府武進縣言本縣犇牛呂城二壩河道淺澀請浚深以便漕運從之。明太祖實錄

劉辰金華人建文中知鎮江府瀕江田八十餘頃久淪於水賦如故辰請除之京口閘廢轉漕者道新河出江舟數敗辰修故閘公私便之漕河易涸仰練河益水三斗門久廢辰修築之運舟既通河下田益穩。明史稿

辰知鎮江府京口閘廢東南漕運轉新河江陰二港以出江多爲風濤阻溺公乃自京口至呂城百二十里去淤塞甃石作壩修閘順水勢之出入於是公私便之然漕河源淺易涸每仰練河以益水湖有三斗門亦廢公又修築之三斗門成漕運之舟既通湖下之田益穩時浙湖轉輸之民道其境上死者爲收瘞疾者給米命以小舟送出境賴以活者數百人永樂元年以預修國史知故實賜白金文綺龍衣升江西左參政。胡鐵吏部左侍郎劉公墓志

明洪武三十五年即建文四年壬午十一月癸未太宗已登極矣修常州府武進縣剝銀河閘。明太宗實錄

明太宗永樂元年三月戊戌瀋陽中屯衛軍士唐順言衛河之源出衛輝府輝縣西北八里太行山下其流自縣治北經衛輝城下抵直沽入海南距河陸路纔五十餘里若開衛河距黃河百步置倉廩受南方所運糧餉轉至衛河交運公私兩便上曰此策亦是命廷臣更詳議如議可行亦俟民力少甦行之四

月戊午浚松江華亭上海運鹽河金山衛閘港曹溪分水港等處七月丙申戶部尙書郁新等言淮河至黃河多淺灘跌坡饋運艱阻請自淮安用船可載三百石以上者運入淮河沙河至陳州穎岐口跌坡下復以淺船可載二百石以上者運至跌坡上別以大船載入黃河至八柳樹等處令河南車夫運赴衛河轉輸北京從之九月戊子修兗州府鄒城縣沐沂二河決口十月壬戌以河道淤塞革濟寧州之耐牢坡聊城縣之周家店李海務臨清縣之臨清閘會通閘五壩官甲戌修山東膠州水決隄岸十一月丙子修山東濰縣白浪等河決岸丙申浚鎮江府丹徒縣甘露港等處河渠閏十一月庚午浚揚州府江都縣瓜洲壩河道十二月己卯修揚州府江都縣永真沙邊江圩岸明太宗實錄

明太宗永樂二年正月戊申揚州府高郵州耆民言自州北門至張家溝湖岸兩京之要路民田之巨防湖納天長盱眙諸水雨潦漲溢風波衝決隄岸每歲修築旋復傾圮阻絕驛路傷損民田乞遣人相度重爲修理從之五月癸丑修山東鄆平縣小清河隄岸三百八十四丈九月己卯修順天府固安縣渾河決岸十一月癸卯鎮守淮安都指揮施文言淮安諸壩舟航往來每遇天旱壩下淤淺重勞人力近城舊有清江浦二閘比年坍壞乞命有司修砌以便往來從之浚儀真清江壩下水港丙辰工部侍郎趙毅等奏鎮江府民言乞於本處鑿山開河以便漕運約用九十八萬人數月可成請遣官驗視上曰爾任大臣顧不能料制其事而必欲遣人驗視耶數年以來民困爲甚非有不得已之事豈可輕役且

役九十八萬人。卽復用如許人供給之。騷動數十州縣爲百姓植禍矣。豈不殆哉。毅等惶恐頓首謝。遂寢不行。明太宗實錄。

明太宗永樂三年三月壬申修山東歷城縣小清河等處水決堤岸。五月癸亥淮安府海州言臨洪場民歲於筭瀆場界耕種輸作。陸運艱難。州北舊有河上通高橋下接臨洪。近年淤塞。乞疏濬以便舟楫。從之。七月己亥浚淮安府山陽縣運鹽河計一十八里。十一月乙丑浚淮安府支家河長一萬一千九百七十丈。明太宗實錄。

明太宗永樂四年八月壬辰工部言呂梁洪霖雨水決近河路。并圈溝橋一十九丈六尺。宜發民修理。從之。九月癸亥揚州府泰州判官黃通理言。州境舊有運鹽官河。每遇霪雨。輒泛溢傷民田宅。乞於普定秦潼河及西溪南儀阡三處各開水口。使下流經興化、鹽城界入海。仍各置閘。以時啓閉。永爲民利。從之。十月己亥浚蘇州府常熟縣福山塘計三十六里。十一月癸亥戶部言高郵州東河等處塘岸傾圮。江都縣劉家圩港淤塞。命有司發民修浚。十二月丁亥常州府孟瀆河閘官裴讓言。河自蘭陵溝北至閘六千三百三十丈。南至奔牛鎮一千二百二十丈。年久湮塞。艱於漕運。乞發民疏治。命右通政張璉發蘇松鎮江常州民丁十萬浚之。明太宗實錄。

明太宗永樂五年二月辛亥修淮安隄。庚午東昌府言衛河隄岸自臨清至渡口驛潰決凡七處。命工

部遣官修築明太宗實錄

明太宗永樂七年六月癸卯順天府固安縣言漳河決賀家口傷禾稼命工部畱遣官修築明太宗實錄。明太宗永樂八年三月己卯修鎮江府丹陽縣練河塘十二月癸卯蘇州府吳江縣言石塘官路右臨太湖左邊松江南至平望嘉興連年土石坍塌橋梁斷壞請及時修理計用三萬七千四百餘人半月可完從之敕通政趙君任督之務令堅固毋虛勞民力明太宗實錄。

明太宗永樂九年正月丙戌揚州府高郵州言城北張家溝塘岸三十里舊用磚石包砌防遏甓社等九湖及天長諸水近因夏雨浸淫各水暴漲衝決塘岸九百八十丈又自張家溝北至寶應縣南至江都縣東至興化縣界塘岸百餘里間有坍塌乞發丁夫如舊修治皇太子令工部覈實修築二月己亥山東沂州言沐河口水衝決五百三十餘丈請發民修築從之庚戌山東齊東縣知縣張昇言境內小清河納湖雞諸山谿澗之水去歲洪水橫汜陂堰衝決淹沒下固隄官臺等處鹽場及青州郡縣民田請浚上流修隄防使水由故道皇太子令工部速遣官相度修浚己未開會通河道自濟寧至臨清舊通舟楫洪武中沙岸衝決河道淤塞故於陸路置八遞運所每所用民丁三千車二百餘輛歲久民困其役永樂初屢有言開河使者上重民力未許至是濟寧州同知潘叔正言會通河道四百五十餘里至淤塞者三分之一浚而通之非唯山東之民免轉輸之勞實國家無窮之利乃命工部尚書宋禮都督周長往視禮等

還極陳疏浚之便。且言天氣和霽，宜及時用工。於是遣侍郎金純發山東及直隸徐州民丁，繼發應天、鎮江等府民丁併力開浚。民丁皆給糧賞，而蠲其他役。及今年田租，命尙書宋禮總督之。遣吏部侍郎師達以太牢祭山川城隍之神，仍命御史二員監督。三月壬申，浚揚州府瓜洲壩河道，及修通江減水二閘。  
庚辰，修蘇州至嘉興石土塘橋路七十餘里，泄水洞百三十一處。六月辛丑，淮安府沐陽縣知縣王泰言：縣南沐河北連山東，南通淮安。洪武間常疏浚以便轉運，今壅塞四十餘里，轉輸既艱，水復爲患。乞於農隙浚治從之。  
乙卯，會通河成。河以汶泗爲源，汶水出寧陽縣，泗水出兗州府，至濟寧州而合置天井閘以分其流。南流達於淮，而河則其西北流也。由開河過東昌府入臨清縣，計三百八十五里，深一丈三尺，廣三丈二尺。役軍夫三十萬用工十旬，蠲租稅百一十萬二千五百有奇。自濟寧至臨清置閘十五，閘置官立水則以時啓閉，舟行便之。  
八月甲午，浚常州府江陰縣青陽等處河道。壬寅，濟寧州同知潘叔正及耆民百三十七人以會通河成，詣闕謝恩。上以開河之議肇自叔正，賜紗衣一襲，鈔一錠。耆民人五錠。  
庚戌，工部尙書宋禮等百六人開會通河畢，還京師。命禮部定賞格。禮部言都督周長循私廢公，虐害軍夫，不當給賞。其餘宜分四等。總督官尙書宋禮等三員人賞鈔二百錠，綵幣二表裏，續差管事興安伯徐亨等三員人賞鈔百錠，綵幣一表裏，分遣管工戶部郎中竇奇等五十四員人賞鈔四十錠。工部辦事官蘭芳等三十五員人賞鈔十錠，命如所定給之。  
甲寅，巡按北京監察御史朱敏言：大名等府

漳衛二水決隄岸淹田禾請發民修築從之。戊午工部尙書宋禮言會通河以汶泗爲源夏秋霖潦泛溢則馬常泊之流亦入焉汶泗合流至濟寧分爲二河一入徐州一入臨清河流淺深舟楫通塞繫乎泊水之消長然泊水夏秋有餘冬春不足非經理河源及引別水以益之必有淺澀之患今汶河上流自寧陽縣堽城閘已築壩堰使其水盡入新河東平州之東境有沙河一道本汶河支流至十路口通馬常泊比年流沙淤塞河口宜趁時開浚况沙河至十路口故道具存不必施工河口當浚者僅三里河中宜築堰計百八十丈從之。十一月丁丑修浙江仁和海寧海鹽三縣土石塘岸萬一千一百八十五丈閨十二月己卯革常州府武進縣之剩銀河閘時河淤塞已別開孟瀆河故革之。明太宗實錄

宋禮字大本永寧人洪武中以國子生爲山西按察司僉事永樂二年拜工部尙書七年丁母憂詔留視事九年命開會通河會通河者元至元中以壽張尹韓仲暉言自東平安民山鑿河至臨清引汶絕濟屬之衛河爲轉漕道然岸狹水淺不任重載故終元世海運爲多明初輸餉遼東北平專用海道洪武二十四年河決原武絕安山湖會通遂淤成祖初建北京河海兼運海運險遠多失亡而河運則由江淮達陽武發山西河南丁夫陸輓至衛輝入河歷八遞運所民苦其勞至是濟寧州同知潘叔正上言舊會通河四百五十餘里淤者乃三之一濬之便于是命禮及刑部侍郎金純都督周長往治之至則發山東及徐州應天鎮江民三十萬蠲租一百十萬二千石有奇二十旬而河成初禮以會通之源

必資汶水乃用汶上老人白英策築堽城及戴村壩橫亘五里遏汶流使無南入洸而北歸海匯諸泉之水盡出汶上至南旺中分之爲二道南流接徐沛十之四北流達臨清十之六南旺者地勢高決其水南北皆注所謂水脊也又相地置閘以時蓄洩自分水北至臨清地降九十尺置閘十有七而達於衛南至沾頭地降百十有六尺閘二十有一而達於淮禮又奏濬沙河入馬常泊以益於汶是年興安伯徐亨工部侍郎蔣廷瓊濬祥符魚王口至中灤下復舊黃河道命禮兼董之明年命相度衛河水患奏請自魏家灣開支河二泄水入土河復自德州西北開支河一泄水入舊黃河使至海豐大沽河入海帝命俟秋後成之禮等還京論漕渠功禮第一賜寶錪文繡以潘叔正首建河議賜衣及鈔旌其功金純字德修泗州人國子監生歷刑部左侍郎永樂九年命與宋禮同治會通河又同徐亨蔣廷瓊濬魚王口黃河故道初太祖用兵梁晉間使大將軍達開場口通河於泗又開濟寧西耐牢坡引曹鄆河水以通中原之運其後故道寢塞至是純疏治之自開封北引水達鄆城入場口出穀亭北十里爲永通廣運二閘還改禮部左侍郎進禮部尚書明史稿

周長天長人從靖難歷官督府

永樂九年奉命同宋禮治漕駐濟寧

修浚會通河卒贈萊陽伯

謚忠毅

潘叔正仙居人永樂九年由太學生任濟寧州同知奏請開漕渠自濟寧抵臨清以通東南漕輶朝

廷嘉之賜寶錪錦幣山東全河備考

是年夏五月甲申罷築漳河隄防先因臨漳主簿趙永中言去年漳河泛溢決張固村河口與釜陽河合流低下田土悉爲汪浸今若復修隄防或終決潰是虛負民力也乞令沮洳之民別於漳河之旁近擇高阜荒地開種從之。河南通志

明太宗永樂十年正月己酉巡按山東監察御史許堪言去秋衛河水溢河岸低窪之處四散漫衍其時雖略修理今已復有倒塌者自臨清至直沽大率皆然乞勅有司預期修理上命工部移文尙書宋禮相度措置四月庚申凌北京通流寺四閘河道共一萬七百三十七丈壬戌尙書宋禮奏近因御史許堪言衛河水患命臣相度措置臣嘗因衛輝至直沽視河岸低薄非止一處竊謂若不究其源析其流但務修築隄岸恐水復衝坍不免連年動勞民力今欲除患須定長久之計臣先視會通河至魏家灣與士河相連宜於彼開二小河以泄於土河則雖遇水漲下流衛河自然無漫衍之患見已分撥軍夫用工今復視德州城西北亦可開泄水小河一道蓋自衛河岸東北至舊黃河一十二里內五里舊有溝渠五里係古路二里係平地今開通泄水以入舊黃河則至海豐縣大沽河入海凡四百五十七里約用軍夫三千餘人十日可完上諭工部臣曰禮所言誠當但今農務方興可令俟秋成後爲之十月甲寅修山東安丘縣紅河等處水決隄岸戊午修揚州府海門縣捍潮隄岸縣故有隄東抵海南並江延袤百三十餘里年久決墳有司奏請修築上命平江伯陳瑄督丁夫四十萬築之計萬八千餘丈壬申凌山東平

度州濰縣白浪河。十一月丙戌修揚州府儀真縣緣江隄岸及浚夾港等處河道。戊戌北京行太僕寺卿楊砥言吳橋東光興濟交河諸縣及天津等衛屯田雨水決隄傷稼切見德州良店驛東南二十五里有黃河故道州南有土河與舊河通若於二處開河置閘則水勢分可以便民時土河已命置閘上命工部侍郎蘭芳往經理之德州東有古黃河南有鬲津枯河即枯河也河間府獻縣言夏雨霖淫西山暴雨衝決真定之饒陽武強恭儉等處隄岸渰沒田廬乞集夫修築從之丙午浚鎮江府京口新港甘露三港達於江十二月甲寅修靜海縣至青縣河隄癸亥保定府安州奏大雨決直亭等河口八十九處計用六千三百人修築一月可完上以天氣寒沴命俟春暖築之辛未湖廣華容縣言縣安津等四十六處水決隄防傷民禾稼方今農隙可以修築然本縣民少未易成功上曰東作在邇亟興旁縣民丁併力修之

明太宗實錄

蘭芳夏縣人從宋禮治會通河復爲工部主事以禮薦遷右侍郎亡何行太僕卿楊砥言吳橋東光興濟交河及天津屯田雨水決隄傷稼乞開德州良店東南黃河故道以分水勢復命芳往治之所經郡邑有不便民者輒疏以聞楊砥禮部左侍郎坐巡視河渠失職降工部主事歷太僕寺卿吳橋至天津等衛大水決隄傷稼砥請開德州東南黃河故道及土河以殺水勢帝命工部侍郎蘭芳經理之

史記

稿

太祖建都金陵四方運舟悉由大江至洪武十三年海運遼東以供軍餉文皇肇建北京江南糧船一

由江入海出直沽口白河運至通州。一由江入淮歷黃河至陽武縣陸運至衛輝府。由衛河運至通州。永樂九年以濟寧州同知潘叔正言命工部尚書宋禮都督周長等發山東丁夫十六萬五千濬元會通河自濟寧至臨清三百八十五里漕舟始達於通州。而永樂十年宋禮以海船造辦太迫議造淺船五百艘撥運淮揚徐兗等處歲糧一百萬石由會通價運以補海運一年之數。永樂十三年始罷。皇帝詔明

紀略。

明太宗永樂十一年正月丁亥蘇州府同知柳敬中言崑山之太平河東通大海西接福興河上達楊城湖爲利最博近年淤塞旱潦俱不便今欲疏浚約用人七萬八千四百計二十五日可完上曰役久則民勞遲則妨農其徵旁近民夫十萬亟成之庚子順天府保定縣言去年秋淫雨決河岸五十四處接文安大成二縣之界乞以三縣民協力修築從之二月壬戌修河間府水決隄岸三月癸未應天府言新河口圩岸爲風濤衝齧四十餘丈皇太子命工部修築。明太宗實錄。

明太宗永樂十二年八月甲辰浚淮安府海州城南官河二百四十里丁未修通州三河等處水決隄岸九月丁卯修山東聊城縣龍灣河及濮州紅船口范縣曹村河隄岸丙子順天府武清縣言河決要兒渡口六百五十餘丈命工部遣官修築辛巳修鳳陽府安豐塘水門十六座及牛角壩至新倉鋪傾塌隄岸萬三千五百餘丈十月甲午常州府江陰縣請浚萬歲河及塘涇等河從之十一月辛亥

凌蘇州府崑山縣太平河。明太宗實錄

是年平江伯陳瑄請鑿徐呂二洪以通漕運更於洪口建閘。按宋元祐四年京東轉運司言清河與江浙淮南諸路相通因徐州呂梁百步兩洪湍淺險惡多壞舟楫水手牛驢牽戶盤剝人等邀阻百端商賈不行朝廷已委官度地勢穿鑿今若開修月河石堤上下置閘以時啓閉通放舟船實爲長利此即瑄所鑿之道而當時開鑿之官邈不可考。南河全考

明太宗永樂十三年二月己巳朔凌揚州府瓜洲壩河道一至瓜州巡檢司一至江口通六百餘丈。三月辛亥山西解州言硝池水溢決豁口等處流入鹽河蓋由姚暹渠凍水河并流水道淤塞乞發民修治從之。五月乙丑開清江浦河道凡漕運北京舟至淮安過壩度淮以達清河口挽運者不勝勞平江伯陳瑄時總漕運故老爲瑄言淮安城西有管家湖自湖至淮河鴨陳口僅二十里與清河口相直宜鑿河引湖水入淮以通漕舟瑄以聞遂發軍民開河置四閘曰移風曰清江曰福興曰新莊以時啓閉人甚便之。十二月乙丑河南彰德府磁州言今夏多雨滏漳二河水溢漂民廬舍渰沒田稼間有高阜稼亦不實乞免民間今歲稅糧從之。明太宗實錄

是年建淮安五壩運船經壩入淮仁字壩義字壩在新城東門外東北自城南引湖水抵壩口外卽淮河遇清江口淤塞運船經此入淮禮字壩智字壩信字壩在新城西門外西北引湖水抵壩口外卽

淮河遇清江口淤塞。則官民商船經此達於淮河全

考。

明太宗永樂十四年正月庚午。東昌府臨清縣臨清壩成。置壩官一員。四月壬午。設直隸淮安府山陽縣之清河。福興。清河縣之新莊。邳州之乾溝。徐州之沽頭上。沽頭下。沛縣之金溝。山東濟寧州之谷亭。孟陽泊。魯橋十閘。置閘官各一員。五月庚子。修揚州府邵伯鎮上下二閘。明太宗實錄。

是年平江伯陳瑄疏濬故沙河。置閘通舟。先是漕至淮安。悉從府東北車壩入淮。逆水行六十里。至是瑄因宋喬維嶽所開沙河舊渠。益加疏治。置閘通舟。踰年而功成。漕人德之。爲立祠焉。南河全考。

明太宗永樂十五年五月乙未。遣官巡視北京通州至儀真河道。明太宗實錄。

劉觀都察院左都御史。永樂十五年督浚河漕十九年巡撫陝西。明史稿。

明太宗永樂十七年秋七月庚申。遣鎮遠侯顧興祖巡視呂梁洪初。上以洪險隘。舟楫邂逅多傾覆。特命忻城伯趙彝鎮徐州。兼理洪道。而彝以貪縱廢事。至是復遣興祖巡視。仍以敕諭彝曰。朕急於利民。念徐州呂梁洪險阨。命爾兼理。爾乃溺於酒色貨賄。坐視民患。恬不究心。得免於罪乎。今姑宥不問。宜改志易行。以蓋前愆。明太宗實錄。

明太宗永樂十九年九月丙寅。修直隸高郵州新開湖塘岸。十月丁酉。修浙江海寧等縣塘岸。明太宗實錄。

趙泰。永樂中爲常州府同知。浚孟瀆。得勝二河。作魏村閘。諸所興築。民無言勞者。遷工部郎中。奉命塞

東昌決河周忱薦爲協同都運益勤其職。

明史稿

永樂二十二年十月辛卯。仁宗已登極矣。平江伯陳瑄上言七事。一蘇民力。今天下歲運糧餉。惟湖廣、浙江、江西三布政司及直隸蘇松等府州去北京甚遠。又河道有洪閘壩及淺凍之阻。往復踰歲。所費數倍。正糧上通公租。下妨農務。皆由於此。乞令運於近便。淮安、徐州等處交納。別令官軍接運至北京。如此則民力可蘇。而農務不妨。上覽奏以付翰林臣曰。瑄言皆當。令所司速行。明仁宗實錄

# 行水金鑑卷第一百七

## 運河水

明洪熙元年秋七月戊辰朔。

宣宗已登極矣。

順天府通州武清、固安、漷縣各奏六月二十二日驟雨。河水溢衝決

河西務、白浮、宋家口隄岸。

丙戌河南臨漳縣奏六月大雨漳滏二河皆漲衝決三家等村隄岸二十四處。

上命行在工部郎發所在軍民修築。

辛卯真定府奏六月以來霖雨滹沱等河皆漲衝決隄岸定晉

深三州藁城、無極、饒陽、新樂、寧晉五縣低田皆沒。

上命行在戶部遣人勘視。

丙申北京順天河間保定

三府順義、懷柔、肅寧、任丘、靜海、慶都、清苑、雄八縣及永平府灤州各奏

今年夏秋多雨。河水泛溢淹沒田

苗。命戶部遣人勘視。

十一月癸亥濬儀真瓜州壩河。先是平江伯陳瑄奏儀真瓜洲壩下河道年久淤

塞。請發附近軍民疏濬。

上以東作方興姑俟農隙至是命鎮江、揚州、常州三府儀真揚州、鎮江三衛共以

軍民二萬疏濬。仍命瑄董之。

癸巳行在工部奏去年冬平江伯陳瑄總軍夫疏濬儀真瓜洲壩下河道。

至歲終罷役。今尚有未疏導者。請仍以舊集軍夫及時用工從之。

明宣宗實錄。

明宣宗宣德三年六月庚寅順天府武清固安二縣言霖雨連旬。洪水衝決河西務及當渠里秦家口堤岸。傷民田禾。上命二縣民及屯軍合力亟修。

丁酉霖雨通州河溢及城趾深一丈餘城壞者一百三十

餘丈。甲辰巡按北直隸監察御史張瑩奏五月六月連雨不已河決隄岸溺死軍民壞通州良鄉等處官民屋宇及淹沒宛平大興順義大城保定文安永清寶坻香河霸州并保定等府新城等縣田苗上諭尚書夏原吉曰災不虛至必有其咎宜勉思寬恤之道丁未命左都御史劉觀巡視河道敕諭之曰比年以來緣河提督官徇私滅公貪弊百出侍郎曹本催督秋糧所至諸閘作威肆害唯以所督運者得度其他處運糧及運民商賈皆不得行舟楫積滯雨水緣發傷壞者多今特命卿自北京直抵南京巡視凡河道淤淺閘壩損壞躬自提督修浚務俾舟楫順利輸運無阻公私兩便卿其夙夜盡心無怠所事庶稱委任十二月庚辰修盧溝橋凌水所決河口行在工部言通州要兒渡河渡水從東注而正河淺澁舟行不便請急修築從之明宣宗實錄

明宣宗宣德四年正月戊辰平江伯陳瑄言山東濟寧以北舊河自長溝至棗林閘一百二十里沙土淤澇漕舟難行今凍漸解餽運將興約計用十二萬人疏濬半月可成命山東起集民兵興今運木軍士相兼用工二月戊寅命隆平侯張信同太監沐敬浚河西務河道及修隄岸先是河西務要兒渡等處河岸衝決命行在工部修築水急民少久無成功至是命信等往督發在京操備軍士五萬一千人益之四月丁亥上語右都御史顧佐等曰臨清以南諸閘專爲蓄水以便行舟比聞閘官軟罷多爲權勢所脅不時開放輕泄水利強梁者卽度良善者候經旬日甚至忿鬪溺死者有之爾卽揭榜禁約惟進薦新物

者舟行不禁。其餘不分公私。必候積水及則。方得開閘。若有公事不可緩者。卽於所在官司轉給馬驥以行。有仍前脅制聽從者。皆論罪不貸。六月己卯。命山東三司遣官專理河道。時總兵官平江伯陳瑄奏。濟寧長溝至棗林閘。河道淤淺。漕運不便。初朝廷專命侍郎蘭芳及山東三司遣官督視疏濬。往來無阻。比年不遣大臣。惟都司按察司有官如舊督視。而布政司亦不遣官。乞令遣官如故。仍乞敕三司所遣官專理河道。不與他事。庶幾以便漕運。從之。十一月壬子。直隸廣平府成安縣奏。本縣今年四月五月苦雨。漳滏二河泛溢。渰沒田苗一百二十八頃有奇。上命行在戶部覆視。免其秋租。丙辰。總兵官平江伯陳瑄奏。自徐州至濟寧。河水多淺。轉運甚難。今遣官巡視。謝溝胡陵城八里灣。南陽淺。皆當置閘。其徂來諸山泉源所出。舊有湖塘。今多淤塞。乞加修濬。庶有停蓄。得以通利往來。從之。明宣宗實錄

明宣宗宣德五年五月癸卯。總兵官平江伯陳瑄言。淮安西湖河岸。乃牽挽舟船往來通路。比因風浪衝激。岸多崩塌。椿木下存。淮安府滿浦五壩間廢已久。其官吏壩夫俱無差役。乞令守視西湖隄岸。遇有損壞。就令修治。從之。丁卯。命永康侯徐安行在工部侍郎羅汝敬。自張家灣抵直沽。緣河提督運木。敕令設法。俾軍民商賈舟楫通行。不相妨礙。如河岸衝決。就督軍夫修築。七月丁巳。行在吏部郎中趙新自江西還。言臨清河道穿狹。往來舟楫阻滯。廣積倉納糧民船。離倉灣泊。負米上倉甚難。乞遣官會平江伯陳瑄於倉東開月河泊船。于河北置壩一所。則車船往來皆便。上諭行在戶部臣曰。開河置閘。令平江伯

計議用人力多少，即及時興工。九月壬子，直隸鉅鹿縣奏：六月苦雨，漳河泛溢，衝決隄堰，瀕河低田皆被災。上命行在戶部臣曰：凡被災傷處，皆覆勘除其租。十月癸酉，總兵官平江伯陳瑄言：臨清至安山河道，春夏水淺，舟難行。張秋西南舊有汶河通汴，朝廷嘗遣官修治，遇水小時于金龍口堰水入河下注臨清，以便漕運。比年缺官，遂失水利，漕運實難。乞仍其舊。上命行在戶部從其言。明宣宗實錄

明宣宗宣德六年二月戊戌，命濬金龍口引河水達徐州，以便漕運用。御史白珪之言也。河南布政司言：祥符縣舊有新開河，直抵黃陵岡，凡四百五十餘里，中多淤塞，請加疏濬。從之。庚申，巡撫侍郎趙詢言五事：一揚州儀真設五壩，以通江南舟楫；二壩專過官船及官運竹木諸物；餘三壩專過糧船；民船晝夜往來，亦常阻滯。有旬日不得渡者。又壩下河窄，舟無泊處，乞令有司衛軍再開二壩，以便舟行泊及增開河一道，上覽之。謂侍臣曰：置壩開河，令六部會議以聞。五月壬申，順天府奏：霸州保定縣地低窪，臨邊渾河往者河岸缺壞，皆是保定文安大城諸縣民夫同軍衛修築。今河水衝決，岸土漸薄，且有坍塌之處。若水溢決潰，必傷田苗。請如舊集衆預修，庶幾有備無患。從之。六月丁未，順天府固安縣奏：今夏久雨，渾河漲溢，衝決徐家等口。上命工部撥工修築之。七月壬寅，疏濬沱舊河。時巡按章聰言：真定府滹沱淤塞，比山水泛濫，又衝壞河岸及軍民廬舍。舊有護城河隄，亦被冲決，宜令修築。八月己未，浚白塔河及儀真等壩河。先是御史陳祚言：白塔河宜開浚，置閘。又侍郎趙新言：宜浚白塔河及儀真舊江口鑰。

匙河黃泥灘清江閘俱宜浚導上遣主事潘厚及揚州淮安府官審視仍與平江伯陳瑄議可否及所用人力至是厚還奏開浚實便白墻河儀真壩河約用四萬五千八百人計四十日可完清江閘河用一萬八千人計十五日可完上從之於是工部請發揚州淮安軍夫先開白塔河置閘工畢就浚清江閘儀真鑰匙河上曰三處用工勞人太甚其儀真鑰匙河俟明年農隙修浚九月戊子直隸武進縣民奏閩浙官民舟船及今漕運必由本縣孟瀆河出逆水行三百餘里始達瓜洲壩往往爲風浪漂溺縣舊有新河四十餘里出江正對揚州府泰興縣新河入至泰州壩一百二十餘里至揚子灣出運糧大河比今白墻河尤爲便利第歲久泥淤難通重載乞加修浚實爲便利命平江伯陳瑄侍郎周忱審計十月乙未濟川衛奏六月苦雨河水泛溢溺死屯軍十七人淹田稼一十六頃甲辰蘇州府教諭唐敏言常熟縣舊有耿涇塘南接梅里塘通昆明湖北通揚子大江旱歲資其灌溉年深壅塞洪武中常發長洲等縣民浚導民獲其利今復壅塞請如舊例發民浚導從之明宣宗實錄

明宣宗宣德七年正月己丑重建大興縣平津閘修通州羊營閘橋時平橋之水衝閘隄岸皆圮羊營者輓運所經之路橋壞已久行在戶部以聞故有是命三月壬戌水決固安縣馬莊等處隄岸命順天府發民修築行在工部尙書李友直奏通州至直沽河道紓曲尤多灘淺舟行阻滯永樂中嘗命侯伯一人總督浚治乃得通行請如故事上命行在戶部侍郎王佐往督之七月辛未順天府霸州三河香河

豐潤、漷、東安、永清六縣及永平府灤州各奏今夏苦雨河水漲溢低田所種黍穀俱傷無收。壬申置呂梁漕渠石閘初平江伯陳瑄以呂梁上洪地陡水急漕舟難行奏准令民于舊洪西岸鑿梁渠深二丈闊五丈有奇夏秋有水可以行舟至是復欲深鑿置石閘二時其啓閉以節水庶幾往來無虞事聞命附近軍衛及山東布政司量發民夫工匠協力成之。十一月辛酉初行在戶部右侍郎王佐言通州至河西務河道淺狹漕船動以萬計兼四方商旅舟楫往來無港汊可泊張家灣之西舊有渾河若疏濬近京師一二十里更加充廣瀦爲巨浸令可泊船公私俱便命都督馮斌尚書李友直同佐審視至是斌等以圖進上覽之謂其役重大命姑止之。明宣宗實錄

宣德七年平江伯陳瑄築高郵寶應范光白馬諸湖長堤以度牽道又開揚州白墻河置新閘潘家莊大橋江口四閘令江南糧船從常州府西北孟瀆河過江入白墻河至灣頭達漕河以省瓜洲盤壩之費初江南舟由瓜洲車壩入漕河自白墻河開瓜壩棄不用近白墻置壩舟行瓜儀南河全考

明宣宗宣德八年九月丙寅平江伯陳瑄卒瑄永樂中歲董漕事時以海運艱險浚山東舊河通北京瑄建議造平底淺舟以運人便之歲增運至三百萬石又建議於淮安城北開清江浦有管家河入鴨陳口以達清河免過壩及風濤之患又緣管家河築隄十餘里以蓄水益河且便行者於清江浦江上及徐州臨清通州皆置倉受糧以次轉運疏儀真瓜洲壩下渠鑿呂梁徐州洪傍亂石於刁陽湖南旺湖皆築隄

緣河多置閘。以時閉泄。利舟楫。凡所經營。俱有條理。明宣宗實錄

陳瑄字彥純。合肥人。成祖卽位。封平江伯。先是漕舟道海島。島人恐多閉匿。瑄招令互市。平其直。人交便之。海溢隄圮。自海門至鹽城。凡百三十里。命瑄以四十萬卒築治之。爲捍潮隄。萬八千餘丈。瑄言嘉定瀕海地。江流衝會。海舟停泊。無高山大陵可依。請於青浦築土山。方百丈。高三十餘丈。立堠表識。既成。賜名寶山。帝親爲文記之。宋禮旣治。會通河成。朝廷議罷海運。仍以瑄董漕運。議造淺船二千餘艘。初運百二萬石。寢至五百萬石。國用以饒。時江南漕舟抵淮安。率陸運過壩。踰淮達清河。勞費甚鉅。瑄用故老言。自淮安城西管家湖鑿渠二十里。爲清江浦導湖水入淮。築四閘。以洩宣之。又緣湖十里築隄引舟。由是漕舟直達於河。省費不訾。其後復濬徐州至濟寧河。又以呂梁洪險惡。於西別鑿一渠。置二閘。蓄水通漕。漕舟便之。又築沛縣刁陽湖。濟寧南旺湖長隄。開泰州白塔河通大江。又築高郵湖隄。於隄內鑿渠四十里。避風濤之險。又自淮至臨清。相水勢。置閘四十有七。作常盈倉四十區。於淮上及徐州、臨清、通州皆置倉。便轉輸。慮漕舟膠淺。自淮至通。置舍五百六十八。舍置卒導舟避淺。復緣河隄鑿井樹木。以便行人。凡所規畫精密宏遠。自理漕河者三十年。舉無遺策。終明之世。漕運賴之。卒封平江侯。謚恭襄。明史稿

平江伯陳恭襄公瑄。旣通運河。緣隄皆樹楊棗二木。並淮北所宜。且楊枝可薪。棗實可噉。又易長多陰。

悉聽運夫爲利。其後土民并根伐之。其聚近官舍者。並輸入官。運夫既不敢謀。而官司亦不復問矣。明良記

明宣宗宣德九年六月丙辰行在工部尙書吳中奏北京城東南有兩水磨及通惠河諸閘皆爲河水所壞今南門外舊有減水河若加疏鑿長二十餘丈卽與郊壇後河通流可泄水勢上曰盛夏炎暑未宜疲勞民姑緩之庚午水決北京渾河東岸自狼窩口至小屯廠乙亥右副總兵都指揮僉事吳亮言督糧船萬餘艘已達北河而河水泛溢難進且河西務東西上下水決隄防一十五處奔流迅激勢益猛悍重載之舟恐失利乞早修築上命行在工部發軍民修築命豐城侯李賢總督之明宣宗實錄

明宣德十年六月甲辰英宗已卽位矣直隸廣平府永平縣縣丞李祐奏請修閉漳河以防民患疏通衛河以濟舟楫事下行在工部請從所言其漳衛二河宜遣本部官一人往會所在官司發軍民從宜濬治上命河道不必遣官卽令所在軍衛有司理之七月己卯修桑乾河橋通州直沽要兒渡口等處隄岸九月壬辰儻運糧儲總兵官及各處巡撫侍郎與羣臣會議軍民利益及正統元年合行事宜內一淮安清江浦淮河口及濟寧至東昌運河淺滯宜加疏濬一徐州呂梁洪原引睢水入焉今睢水過隋隄會汴入淮各洪淺狹宜于鳳池口或歸德新隄處設閘復引睢水以濟各洪一沙灣張秋運河舊引黃河支流自金龍口入焉今年久沙聚河水壅塞而運河幾絕宜加疏鑿一彰德河往時東入衛河至臨清與運河會

今北流入滹沱而衛河亦淺宜障而東之上以所議皆當從之

明英宗實錄

明英宗正統元年七月乙未命行在工部左侍郎李庸修狼窩口等處隄先是大雨浹旬水溢渾河狼窩口及盧溝橋小屯廠西湖東笆口高梁等閘隄岸皆決命庸治之至是庸奏請工匠千五百人役夫二萬人上從所請且諭之曰此皆要害汝其盡心理之必完必固毋徒勞民己酉運河要兒渡決行在工部奏請令副總兵都督僉事武興發漕運軍士及近河軍衛有司發丁夫併力修築上以漕卒不可重勞特敕太監沐敬安遠侯柳溥尚書李友直別爲從宜區處九月甲午直隸河間府獻縣奏滹沱河溢大郭龍窩口隄乞命河間府遣官及河間等衛與獻縣協力修築之儻運糧儲總兵官及各處巡撫侍郎至京會議軍民利便事宜以聞一鎮江府新港壩至常州奔牛壩運河一百五十里原有水車車捲江潮灌注河內通利舟楫浸溉田禾年久廢弛宜命巡撫侍郎提督有司支給官錢置車給壩官領之以時灌注通漕溉田一浙江等處軍民運船俱由常州夏港孟瀆河出或河道淺澗爭占攬越宜專委工部主事一員提督令軍民糧船務循資次爭占攬越者罪之至事閒之時仍聽巡撫侍郎差遣催糧一東南漕運船俱於瓜洲過壩原有東西二港置壩一十五座永樂中營造立廠貯木東港淤塞止存西港七壩比年大江風浪險惡糧船無港收泊多至失所請以堆貯木植歸併附近收回看廠內外官員革去廠房仍疏東港修築舊壩以通漕運一金龍口水接張秋大黃寺鳳池口水接徐州呂梁二洪俱是引水通運之處宜

令工部委官一員巡視提督遇有淤塞會同河南三司鳩工疏濬一、徐呂二洪中溜穿狹水淺石峻重船至彼剝空方可往來洪西原有小河運木剝淺甚爲便利宜於農隙之時量起附近軍夫命管洪官提督疏濬合用剝船水車令江西湖廣浙江衛所給之仍令淮安船廠改造小船備用上命俱准行之。愚按第一條車水灌田甚有益於農民宜聽民自爲車戽可也若以之通漕則甚不可徒爲擾民之事究與漕事無濟後之人不可因其言而誤用之

明英宗實錄

明英宗正統二年正月戊午減省直隸揚州府邵伯鎮閘壩官吏并江都等縣守塘夫先是揚州府奏邵伯鎮二閘一壩各設官吏人夫以防高郵湖水泛溢今湖水旣平往來無虞乞裁其半又江都儀真二縣有雷公上下白城陳公四塘舊設夫三百三十五人守之今運河轉輸不絕塘水宜洩入河夫可盡罷事下巡撫侍郎曹弘覆實至是弘奏塘水無源若盡洩之則涸矣仍留二百人時其蓄洩以濟運河但舊夫隸鹽運司今宜改隸揚州府爲便其邵伯鎮閘壩官吏各一人夫九十人俱宜減省從之二月癸酉以運河要兒渡決敕五軍各營發軍一萬工部發畿內夫一萬往築之三月丙辰行在工部奏運河時有淤淺恐妨糧船往來乞命官總督上以河道重事濟寧以南敕侍郎鄭辰治之以北敕副都御史賈諒治之王瑜武興亦令更相往來協心提督務使河通人便且須處分得宜毋重勞擾三月庚戌行在工部奏要兒渡口修隄已完又新開河人甚便之乞令武清縣復民三十家常巡視其隄毋致傾壞且立神廟以鎮之上從其請賜號爲通濟河之神九月乙卯山東寧海州壽張東阿汶上陽穀鄆城范等縣各奏

六月以來淫雨河漲衝決隄防滯漂田廬牲畜等物上命行在戶部遣官覆視賑恤其民

明英宗實錄

明英宗正統三年三月壬子陞山東按察司僉事袁文爲本司副使文提督濟寧等處河道興水利以通輸運民便之九載任滿東昌等府耆民二千餘人奏乞留之故有是命八月己未築高郵湖隄隄長四百二十五丈舊用土築遇風撞激輒敗間有木樞葦束蔽護亦不經久至是甃以磚石復以糯米糊和灰以固之始堅緻可久矣九月辛卯巡按山東監察御史陳韶奏膠州新沽二河東平州嘉祥等縣皆因大雨隄岸衝決民居渰沒濟寧州城北門及清寧衛軍器局亦被灌塌上命布政司及管河官俟農隙發民修築九月庚戌增置山東東昌府通判一員專理河道以本府通判戴浩言所屬河道八百餘里壩閘十有一所督理疏濬必得專責故也

明英宗實錄

明英宗正統四年六月壬午小屯廠西隄爲渾河水所決通州至直沽隄閘三十一處爲雨潦所決詔發附近丁夫修築以工部侍郎李庸董之七月庚戌久雨滹沱沁漳等水決饒陽醴女隄獻縣郭家口隄衛輝彰德等處隄有司以聞詔隨宜修築八月丙子朔久雨白溝渾河二水溢決順天府保定縣及保定府安州隄五十餘處有司乞借附近丁夫協力修理從之壬午先是雨水決河西務隄岸發順天府寶坻等縣民夫修築至是行在大理寺右少卿李畛奉敕存問被災州縣具疏請罷修不急隄堰徵回督工官員從之九月壬子直隸深州滹沱河決渰民居田稼百餘里命有司修築之甲子應天府奏所屬

溧水、溧陽、句容、上元、江寧五縣因天雨山水泛漲衝淹人口頭畜倉庫糧鈔官民房屋田地已委官賑濟踏勘謹具以聞十月壬午順天府大興縣請修平津閘河間府青縣請築衛河隄岸俱從之。明英宗實錄

正統四年都督武興奏揚州白塙河泄水閉不行仍從瓜塙過船惑於浮言故也。南河全考

明英宗正統五年正月壬子初監察御史李匡等言儀真瓜洲二塙下港淺狹水落則大舟俱艤於江宜浚其港邵伯至寶應湖隄或決輒壞民田宜令漕舟歸者載石付所司築隄事下督漕總兵官都督僉事武興等覆之至是興奏塙下港以湖泥淤淺農暇輒浚以爲常湖隄壞者方興役築塞若欲盡甃以石又役漕卒恐勞力費過當也上從其言江浙七府漕糧由瓜入運江廣及江南等府由儀入運若屯畿江外屬淮堪廣開浚不可緩湖隄用石爲能堅久但不可役及漕卒上從其言何其當也

二月壬午初直隸淮安府知府彭遠言永樂中平江伯陳瑄總督漕運於淮安西湖中築隄十餘里爲輓舟路令淮安滿浦南鎮三塙夫巡視之又令漕卒順載小木暨土積之隄上遇隄壞卽修今塙夫止役故隄弗完請仍行瑄故事事下巡按御史及總督漕運總兵官覈實至是御史李彬等奏宜令淮安府邳州等州縣發丁夫於旁近地採雜木運之河塙候漕舟還令載以往若土則令漕舟及商舟皆載以輸從之三月乙巳直隸淮安府鹽城縣奏伍祐新興二場運河壅塞阻商旅行舟乞浚之事下行在工部覆奏請下淮安府俟豐年興役從之七月壬寅山東兗州諸府自六月迨今淫雨連綿湖河泛溢事聞上命行在戶部遣官視之丁卯修宿遷縣邵店社至黃墩社一帶隄九月辛亥修河西務及直沽等處河隄十月丁丑命修香河縣白河隄從知縣張嵩言河水衝決民田被渰故也明英宗實錄

# 行水金鑑卷第一百八

## 運河水

明英宗正統六年二月辛巳直隸高郵州知州韓簡言州管河西接新開河東通興化縣舊設上下二閘以時啓閉舟行甚便今閘壞河不通且子嬰溝塞溝旁田皆荒蕪又減水陰洞常閉塞其岸東田旱潦輒不收請俱浚治之事下行在工部請令揚州府覈實興役毋輕擾民從之五月癸亥徙張家灣至河西務沿河民舍三百十三家以礙運船牽路故也六月壬辰漕運右參將都指揮僉事湯節言徐州至濟寧諸閘本積水以便漕舟今使客枯威至卽起閘吏胥莫能禁臣見徐州呂梁二洪剝淺小船可令給與各閘傳送使客庶利於積水從之七月甲寅漕運右參將都指揮僉事湯節言閘河水淺糧艘不能進緣河南金龍口及山東徂徠金溝等泉缺官提督疏濬之故臣請遴選廉幹官分投提督及移文河南山東各委官及時疏理上皆從之八月癸酉命修高郵州北門起至張家溝一帶河隄十二月丁酉命廟祀平江恭襄侯陳瑄初瑄爲總兵官督糧運疏鑿清江浦等處增設移風等閘堅築隄防以蓄水行舟立常盈倉積糧甚多及沒民感其惠於清江浦東立祠堂憩像崇奉禱者屢有靈應至是上聞命有司春秋致祭明英宗實錄·楊士奇作瑄神道碑·言公疏清江浦·引水由管家湖入鴨陳口達淮·以免淮河風濤之患·就管家河築隄亘十里·以便引舟·浚儀真瓜洲二壩·湖港之湮·鑿呂梁徐州二洪巨石·以平水勢·築沛縣刁陽湖、

濟寧南旺湖長堤。開泰州白塔河通大江。築高郵湖隄。隄內鑿渠亘四十里。自淮至臨清。船擣四十有七。建倉置舍。以便漕舟。緣隄鑿井樹木。以便夏月行者。種種河政。俱堪不朽。宜乎血食千秋也。

明英宗正統七年七月癸亥久雨水決武清縣匡兒港。漷縣中馬頭小蒙鄃。河西務上馬頭隄岸共三十二處。詔修其易爲功者。其功力繁多者。計費以聞。癸未修築淮安西湖中路十餘里。以便漕運。明英宗實錄

正統七年參將湯節因洪水迅急數壞舟楫。建議於徐州洪之上流築堰。逼水悉歸月河。於月河南口設閘。以壅積水勢。至景泰間水漲閘壞。南河全考

明英宗正統八年三月壬午濬瓜洲壩東港。洪武間瓜洲壩有東西二港。永樂間廢東港壩爲廠。以貯木材。正統初廷臣議徙木濬港未果。至是督漕總兵官都督僉事武興言壩廢港塞。非唯舟楫往來遲延。且艤泊大江。有風濤之虞。請俟秋成於鎮江揚州二府僉夫七千餘人修復從之。乙酉漕運總兵官都督僉事武興巡撫侍郎周忱等奏常州府武進縣民言漕舟出夏港泝大江。風濤險阻害不可勝言。常州西城有德勝新河北入江。江北揚州府泰興縣有北新河。中間有淤淺者。俱宜浚之。以避大江險阻。浙江都司署都指揮僉事蕭華言永樂宣德間漕舟自常州府孟瀆河出江入白墮河。江行不踰半日。今孟瀆河淤淺。請浚之。廣東按察司知事黃武。浙江處州衛指揮使牛通皆以爲言。事下臣等計議。華等所言皆有據。請先浚孟瀆河。其白墮河有四閘。可於其中大橋閘築壩。候運河水泛則啓閘行舟。水落則仍閉塞。德勝河亦宜修浚。惟北新河計當役一十五萬五千人。一月方完。比者連年災傷。不可興大役。請俟浚理孟

瀆河、白塘河、德勝河完再議上從之。明英宗實錄

閏七月辛巳工部右侍郎王佑言臣奉敕與太監阮安往視水決河岸自蒲溝兒至漷縣二十餘處其要兒渡尤甚乞發丁夫物料修築爲便從之庚子工部言河南山水泛溢灌衛河沒衛輝開封懷慶彰德民舍壞宣武衛懷慶守禦所城上命所在隨宜修理民失所者撫恤之八月壬子革臨清壩官初平江伯陳瑄奏設臨清閘壩遂廢至是乃革其官八月辛未直隸固安縣奏請築水屯廠等隄從之十

月丙午修德州耿家灣等處隄十二月戊申疏常州鎮江運河。明英宗實錄

明英宗正統十年五月丙子漕運參將都指揮僉事湯節言滕縣七里河近者淤塞水不至運河致糧船不能進乞濬自沛縣魏家潭直抵雞鳴臺流出運河仍置閘以時開閉其沙河泥溝泉河濟寧州盧家溝等泉源鄒縣淵源舊泉河口亦宜疏通各置小閘蓄水事下工部尙書王登言宜令所司按實起夫疏濬從之九月丙申河南按察司副使榮華言運河沽頭上閘至金溝閘幾十里淤淺糧船停滯雖減糧挑淺然終非長久計宜於淺處置金溝上閘如遇沽頭上閘糧船膠淺卽啓二閘兩水交下積水必深可無停滯又呂梁上洪之西舊有石閘二因水勢陡險無船經行徒爲虛設宜拆之以爲金溝上閘庶不勞他費事下工部尙書王登等請移文漕運總兵官都督武興勘視宜否從之十二月辛酉湖廣廣濟縣奏

本縣及附近黃梅縣每歲輸運秋糧於望牛墩常不下三萬餘石皆雇小車盤運一車止載四石而雇直二斗及天陰雨雇直倍之民實不堪臣見本縣連城湖港廖家口舊有溝直抵望牛墩第沙塞水淺不能行船請同黃梅縣各率夫役疏濬用船載運實爲民便從之

明英宗實錄

明英宗正統十一年三月癸巳巡按直隸監察御史奏淮安府滿浦淮安南鎮三壩舊以無閘而設後立移風等五閘其三壩皆廢不用揚州邵伯閘壩舊以築隄恐泄水利而設今隄已完其閘壩亦皆不用白塔河大橋潘家莊新開江口等閘舊以地勢斗峻泄水而設今築塞年久其所設官吏人夫皆冗濫乞減省之事下工部覆奏滿浦淮安南鎮每壩留官吏各一員人夫去其半邵伯閘壩官吏革去止留夫四十名隸邵伯驛大橋潘家莊二閘官吏革去其夫隸新開江口二閘從之

明英宗實錄

明英宗正統十三年二月乙巳徐州呂梁二洪皆分黃河水以通舟楫其泰皇寺巴河原係分水之處年久淤塞水脈微細先此都督同知武興奏請疏濬以冬寒土堅而止至是復請上命所司發軍夫濬之丙寅湖廣五開衛奏本衛地臨苗境山路險側軍餉難於轉輸去衛三十餘里有水下通靖州江其中亂石沙灘二十餘處計役五百人疏濬一月有餘可以成功於轉輸甚便從之三月戊子監察御史林廷舉言漳河自山西沁州發源七十餘溝會而爲一至肥鄉縣等處隄岸逼隘水勢湍激以故爲民患元時分支流入衛河以殺其勢永樂間漂塞舊跡尚存去廣平大留村十八里宜發丁夫鑿通仍於漳河置閘

遇水轉入之。其肥鄉等處，亦宜疏廣之。如此，非惟漳河水減，可免居民之患，而衛河日增，亦足爲漕舟之便。從之。

是年秋，河決滎陽，東過開封城之西南，經曹濮以入運河，決張秋地，至兗州府沙灣之東隄大洪口而決。濟、汶諸水皆從之。又經蒙城縣，至懷遠界，入於淮海。會通河遂淤。治水之閘疏水之渠，渠起張秋金隄之首，東南行凡數百里，經瀆淵以接河沁。名渠曰廣濟，閘曰通源。凡河流之旁出而不順者，則堰之。堰有九長，袤皆萬丈。九堰既設，其水遂不東衝沙灣，乃更北出以濟漕渠之涸。由是遂濬漕渠，由沙灣而北，至於臨清。凡二百四十里，南至於濟寧。凡二百一十里，復作淤水之閘於東昌之龍灣。凡八役夫五萬八千有奇，材九萬六千有奇，竹以竿計倍之，鐵十三萬斤有奇，鋌三千組，百八釜三千八百有奇，麻百萬疊，倍之糞桔又倍之，石若土則不可以數計，糧五萬石。續文獻通考

是年秋七月，河決滎陽，經曹濮，衝張秋，潰沙灣東隄，奪濟、汶入海。尋東過開封城西南，經陳留自毫入渦口，又經蒙城至淮遠界，入淮。命工部尚書石璞治之，弗就。尋復以侍郎王永和代璞。舊，黃河在開封城北四十里。洪武二十四年，河決原武，東經開封，又南經潁上，東至壽州正陽鎮，全入於淮。而元會通河遂淤。永樂九年，尚書宋禮、濬會通河，開新河，自汝上縣袁家口左徙二十里，至壽張之沙灣，接舊河。九閱月而績成。侍郎金純從汴城金龍口下達場塢口，經二洪，南入淮。漕事定，爲罷海運。至是又決滎

陽過開封城西南而城北之新河又淤。自是汴城在河北矣。隋唐以前，河與淮分自入海。宋中葉以後，河合于淮以趨海。然前代河決不過壞民田廬，至明則妨漕矣。故視古尤急。紀事本末

明英宗正統十四年春正月辛卯修山東金口堰。三月癸巳工部右侍郎王永和奏黑洋山西灣已通。其水由泰黃寺資運河東昌之水復置分水閘設三空放水自大清河入海。其八柳樹猶未宜用工沙灣隄宜常啓分水閘二空以泄上流之水則不爲後患。上皆從之仍戒永和等速修完以休軍夫毋久憊人誤其生業。四月辛未修直隸高郵州甎河塘。九月庚辰巡按直隸監察御史錢清等言臨清四閘爲黃河水決上下船皆失利其南舊有撞圈灣河可濬之令船自此達衛河爲便工部請下委官主事黃瓊等議行從之。明英宗實錄

明景帝景泰元年四月癸巳監察御史陳全言初黃河水決山東沙灣隄已修其大半止留西岸二缺口泄水近者東阿縣以西大洪口鯉連河水落河身漸露與缺口相去甚近恐將會通河水落掣入東去不便漕運乞築其二缺口爲便從之五月癸酉久雨決通濟河東西岸命有司修築之七月丁巳直隸江都儀真二縣以水災聞命所司修其圩壩之被決恤其人民之被災者十二月丁酉工部奏通州抵徐州運河一帶皆淤塞不通不預疏濬恐妨漕運徐州等處請敕僉都御史王竑通州等處宜遣在京大臣一員提督疏濬詔不必遣大臣其令都察院擇御史廉能者一人往理之。明英宗實錄

是年設淮安漕運都御史兼理通州至儀真河道明會典

明景帝景泰二年正月甲子濬直隸鎮江常州運河。二月壬午敕山東左參政王驥按察司僉事王琬督率浚沙灣運河以河決水淺故也。丙戌巡按直隸監察御史陳全奏運河沙灣常以衝決修置土壩故今損壞不能蓄水致妨漕運請以拆毀舊船改造板閘二座從之。六月戊辰朔勅巡撫山東河南左副都御史洪英右副都御史王暹曰近者黃河衝決水失故道自臨清抵徐州以南漕運艱難爾等卽各督兩處三司官從長計議相度地形水勢畫圖計工量起軍民夫河南疏滌故道淤塞或取捷徑分引水勢灌注徐州以南山東因其水勢緩處修築岸口使分灌南北濟寧臨清閘河應用物料俱聽爾等從宜措辦務令水歸漕河軍民儉運商旅往來無阻爾等欽哉毋負朕命七月庚申初以河決沙灣水皆東注徐呂二洪淺澀敕右副都御史王暹處置至是暹上言黃河自崑崙發源流入中國其所經歷之處自陝州以西有山峽不能爲害陝州以東則地勢平緩水易泛溢故爲害甚多國朝自洪武二十四年河改流從汴梁北相離四五里許東南轉至鳳陽入淮者爲大黃河其支流分出徐州以南者爲小黃河以通漕運自正統十三年以來河復故道從黑洋山復徑趨沙灣入海止存小黃河從徐州出岸高水低隨濬隨塞故徐州之南不得飽水臣等遵聖諭自黑洋山東南直至徐州督同河南三司疏濬其臨清以南可令副都御史洪英督同山東三司疏浚從之。八月壬辰給事中張文質劾巡撫都御史王暹洪英治水

無績。且言濟寧以西耐牢坡閘南直抵魚臺縣南陽閘有塌場河可引水濟徐呂二洪沙灣之決可於潘家渡以北濬支流以減水勢其沙灣浮橋以西開築河口閘座引水以灌臨清宜別命官以責其成詔不允仍令遲英調度慎無偏執誤事十月己丑浙江台州衛百戶王武奏徐州洪先因巖石崎嶇舟船失利平江伯陳瑄於洪東設二閘行船後以閘逼水急仍於舊洪行船近者黃河水小洪閘淺涸臣見舊閘北有土岸長二百餘步可鑿成河道將閘移置此處則水勢平緩舟楫可行事下工部覆奏令總督漕運右僉都御史王洪相度處置從之明英宗實錄

王暹巡撫河南奉勅修築沙灣奏修河用工次第宜自黑洋山抵蕭縣每十里置舖專人提督修治姚襄

撰王公墓表

明景帝景泰三年正月己卯監察御史練綱言江南漕船俱從江陰夏港并孟瀆河出大江遡流三百里抵瓜洲往往風水失利今江南岸有南新河在常州府城西江北岸有北新河在泰興縣正相對江北又有白塔河在江都縣與江南孟瀆河參差相對若由此二處橫渡江面甚近但北新河白塔河淤塞俱用疏濬北新河須二十萬夫白塔河須七萬夫可就宣德間曾於白塔河置閘潮漲入閘則沙土積塞潮落啓閘則運河水洩今可易閘以壩章下工部覆奏綱言是當以蘇松常鎮揚淮六府共事帝以未經按視令移文尚書石璞措置丙辰山東右參議劉整僉事王琬以沙灣河決率丁壯塞之日久無功人多逃

逸爲右僉都御史王竑所劾。詔宥其罪。俾隨尙書石璞立功自効。五月丙申築沙灣隄成。自河決沙灣水徑趨海。運河膠淺。或言沙灣以南地高水不得南入運河。或云引耐牢坡水可灌運河。但不免經沙灣。宜別開河以避其衝決之勢。或云引耐牢坡水南去。則自此以北枯澀矣。或言沙灣水勢湍急。石鐵沉下若羽。非人力可爲。宜以戒行僧道設齋醮符呪。其說荒唐可發一笑。命工部尙書兼大理寺卿石璞往治之。封河神

爲朝宗順正惠通靈顯廣濟河伯之神。璞至。以決口未易築濬。自黑洋山至徐州以通漕舟。而沙灣之決如故。乃命內官黎賢、阮落、御史彭誼、往協璞等於沙灣築石隄以禦決河。開月河二引水以益運河。且殺其決勢。至是水流漸微細。克築塞之。六月大雨浹旬。河復決沙灣北馬頭七十餘丈。掣運河之水以東。旁近田地悉皆淹没。七月戊戌。河南按察司僉事劉清奏。沁河至武陟入黃河。正統四年。沁河決馬曲灣入衛河。因此沁河、黃河、衛河三水相通。舟楫往來。將及半年。今決口已塞。衛河膠淺。運船皆由黃河常遭沈溺。請敕廷臣相沁河原決之處。濬其水以資衛河。使軍民運船。或由黃河或衛河視其遠近之便。而爲轉輸長久之計。事下工部。請移文巡撫右都御史王暹率三司官議其利否。而爲行止從之。八月甲子。直隸清河縣儒學訓導唐學成言。臨清河涸。自沙灣決而然。其所以決者。以地下隄薄。黃河徑趨甚急。勢莫能禦。故今年四月修完。而五月卽決也。沙灣決而臨清寧有不涸者乎。臨清至沙灣有閘十二。有水之日。其勢甚陡。請俟今秋漕運畢日。洩乾閘河於臨清。月河以通船。不必由閘。其臨清以南俱從月河。

疏濬不動原閘，直抵沙灣。其隄岸低薄者培厚之。河道狹窄者濬廣之。如此則水勢自緩，衝決無由而漕運通矣。章下工部，請令學成往同巡撫山東右都御史洪英及巡河御史有司等官相度宜否。從之。乙丑，山東兗州府奏雨水泛漲，禾稼渰沒，人民缺食，糧草無徵。御史羅澄亦奏，徐州抵濟寧一帶平地水高一丈，民居盡皆坍塌，老稚妻孥流離道路。事下戶部，請差官赴山東會同巡撫官右都御史洪英於各府縣設法賑卹，從之。浙江參政胡清言：直隸鎮江府有河，通常州府河有新港，奔牛等壩，止能容小船往來，而輸運糧草大船俱涉歷大江，風濤不測，常致損溺。請勅有司開疏其河，革去其壩，惟置石閘以蓄水，則船通而害除矣。事下工部，移文覈實，咸以爲便，從之。丁丑，先是總兵官都督僉事徐恭奏，沙灣北馬頭復決，乞勅有司修築。詔巡撫山東右都御史洪英督三司官理之。至是英言水勢洶湧，未易用工，請候冬月水消，量添夫料修築，奏下工部，請如英言，從之。九月癸卯，山東右參議劉整奏，臣同僉事王琬專理河道，北抵河間之吳橋，南至徐州之沛縣，道路一千餘里，閘壩四十餘座，臣等不能周歷，凡有急務，必移文各州縣官，奈各官不卽躬視修理，止令陰陽醫生等董率夫役，致常逃竄誤事。乞敕吏部於臨河府州縣各添設官一員，專理河道，仍賜臣等敕提督修理。庶事有統屬，不致乖誤。從之。戊申，敕山東布政司右參議劉整、按察司僉事王琬修築沙灣隄岸，以已完之隄又復衝決也。壬子，初訓導陳冕以治沙灣河陞教授。至是沙灣復決，冕奏欲息斯患，在用臣言。事下工部，惡冕妄詐，請遣人送往山東巡撫都御

等官處責其成功否。則械送京師懲治。詔從之。給事中陳嘉猷言。朝廷嘗降榜求治河之略。然而未有言者也。冕嘗有修治之績矣。今以爲言而工部嫉之。必欲置諸有罪之地。臣惟河決莫大之患。若仗一人之力而能成功。則原遣諸臣已成之於曩昔。而無復告患於今日矣。況區區一冕。而使之受制於巡撫等官。望其有効。不亦難哉。且冕所言。皆爲朝廷也。若以言而見罪。臣恐聖諭雖切。人皆緘口不言。其河道通行方略。終不得以上聞。而其他利病。有甚於此者。孰肯復言哉。一冕不足惜。而所關國體甚重。伏望令冕協同巡撫等官。設法築修。爲巡撫者。毋賤其卑而自尊。爲冕者。亦毋是其言而自肆。在和同計議以求成功。果有優績。量加賞擢。若然。臣將見天下之人。有長策者。俱爲陛下言也。又何憂乎河道之功之不成哉。從之。十二月癸巳。以沙灣河決久未成功。而運河膠淺。有妨漕運。復敕內官黎賢、武良、工部左侍郎趙榮往理之。丙辰。遣工部左侍郎趙榮祭河伯之神。以疏濬東昌沙灣故也。明英宗實錄

是年春二月。河決沙隄灣。命左都御史王文巡視河道。

明紀事本末

趙榮字孟仁。景泰中遷工部侍郎。張秋河決。命榮董治之。卒復故道。天順初升本部尙書。

獻徵錄

明景帝景泰四年正月壬午。河復決沙灣新塞口之南。二月乙未。以沙灣累修累決。詔加封河神爲朝宗。順正惠通靈顯廣濟大河之神。戊戌。工部左侍郎趙榮言。黃河之趨運河勢甚峻急。而沙灣抵張秋舊岸低薄。故此方築完。彼復決溢。不爲長計。恐其患終不息也。臣等議請於新決之處。用石置減水壩。以

殺其勢使東入鹽河則運河之水可蓄以通運舟矣然後加高厚其隄岸填實其缺口庶無後患從之仍命京廠給鐵牛十八鐵牌十二與之四月戊子朔復築沙灣決口畢工監察御史彭誼言河隄僅完人力實罷今民夫雖已疎放寧家而原設看橋撈淺者猶供役且貧難無食乞每人月給糧三斗從之五月癸酉山東布政司右參議陳雲鵬奏運河之水偶爾泛漲三月四日敗沙灣減水壩越七日又敗南分水墩自是抵五月水益浩瀚墩岸橋梁皆被衝壞而北馬頭決五丈有奇漕舟今雖暫通臣恐此後水勢益大一帶隄岸皆未能必其無虞宜預積工料爲修築計竹木之類已於浙江等處順帶其石料柴草動億萬計雖有山東諸司罪人折納恐不足用臣謂在京造作已息請以山東河南南直隸等處該班石鐵等匠量發前來於附近山場採運准其班次其河南囚犯亦如山東之例運石於沙灣贖罪事下工部言河南北直隸旱潦人民艱食聽其於山東起取匠二萬人採運物料務在修築堅完漕運不阻從之乙酉沙灣大雷雨決北馬頭河岸四十餘丈運河水掣入鹽河漕運之舟悉阻不行七月乙丑命太子太保兼工部尚書石璞往治沙灣決河時有旨命工部司務吳福往治已就道給事中國盛等言沙灣之決累敕大臣尙不能爲經久計吳福庸下豈能濟事況決口甚大費用工料甚繁亦不宜獨仗山東其河南并南北直隸人匠淮安臨清及龍江瓦屑壩諸抽分木料亦宜許其取用詔是之乃徵福還而以璞往監察御史練綱言沙灣之決昨見教諭彭墳請立閘以節制水勢開河以分析上派其言頗似近理又往來

舟人淹留日久必皆愁困躁急但得設法前進雖或稍傷其財力無不樂趨事功者可因而借用之詔是其言令與尙書石璞措置丁卯河南右參議豐慶言江南漕船阻於張秋之決計無所出臣請自淮安清河口入黃河至開封府榮澤縣河口轉至衛輝府胙城縣泊於沙門陸輓三十里至衛河船運至京往時議者以河道初改恐阻礙不行今河道已通數年往來船不絕豈糧船獨不可行章上命總督漕運都督僉事徐恭等覆實回報壬午漕運總兵官都督僉事徐恭奏沙灣河決水皆東注以致運河無水舟不得進者過半雖設法令漕運軍民挑濬月河築隄遏水北流然北高東下時遇東南風則水暫北上舟可通行設遇西北風則水仍東注舟不得動況秋氣已深西北之風常多經旬累日舟行不過數里誠恐天寒水凍不敢必其得達京師乞早爲定計事下戶部議宜敕恭與石璞王竑計補如舟可前進則令運赴通州上納如不得進則令沙灣以北者於臨清上納以南者於東昌及濟寧上納漕輓軍民令回本處運次年糧儲從之

明英宗實錄



# 行水金鑑卷第一百九

## 運河水

明景帝景泰四年八月辛卯河南按察司僉事劉清奏東南漕舟水淺弗能進可自淮入黃河至滎澤轉入沁河經武陟縣馬曲灣裝載岡頭濬一百十九里以通衛河張秋之決由沁水合黃河遂成奔急之勢若引沁水入衛河則張秋無衝決之患矣行人王晏亦言開岡頭置閘分沁水使南入黃河北達衛河水漲卽閉閘如此漕運可永無患衛輝稅糧十四萬餘每一石令民出石一尺可得一萬四千餘尺糧一石令挑河二尺可挑一百六十餘里今所濬地不過百三十里免衛輝一府糧可成其事何恤此小費而棄莫大之利也章上詔令總督漕運右僉都御史王竑等覆奏以聞丙午太子太保兼工部尙書石璞得請歸省給事中國盛等劾奏璞奉命往治沙灣未有成效正宜日夜勤勞求副上意乃詐以母老詭辭請去於三過其門不入者異矣宜下法司治罪詔工部移文令璞速赴沙灣毋致誤事九月庚申常州府江陰縣民言本處順塘河長十里許東接永利倉運河西通夏港及揚子江可通舟楫灌漑田畝近爲沙土淤塞乞敕巡撫侍郎李敏勘實開通以爲民利從之乙丑沙灣之決尙書石璞等鑿一河長三里以避決口上下與運河通其決口亦築攔截今新河運河俱可行船至是以畢工聞工部欲取璞回帝恐不

能經久令璞且留處置。十月乙酉吏部言太子太保兼工部尚書石璞奏保東昌府推官田峻魚臺縣典史彭旭俱有才能乞各陞一級俾專理修河緣近河府縣已增管河官員難從所保帝曰璞整修河道未見成功惟務濫保官員本當究問但無他故姑恕之十月甲午陞右春坊右諭德兼翰林院侍講徐有貞爲都察院左僉都御史往治沙灣。明英宗實錄·石尚書以沙灣之決·鑿新河以通運河·俱可行船矣·乃奏保一推官一典史各陞一級而不可得·奉嚴旨責其濫保·可見當時之慎重名器者

是年二月築沙灣決口功成五月復大決北馬頭河岸四十餘丈運道絕復遣石璞往十月命都御史徐有貞治之始塞乃於開封金龍口筑瓦箱開渠三十里引黃河水東北入漕河以濟運。北河續記

是年塞沙灣決口更作九堰八閘以制水勢通漕類編

先是河溢滎陽自開封城北經曹濮以入運河至兗州沙灣之東隄大洪口而決濟汝諸水皆從之入海會通河遂淤漕運艱阻工部尚書石璞侍郎王永和都御史王文相繼治之凡七年皆績弗成乃集廷臣議於文淵閣舉可治水者以有貞名上乃進有貞都察院左僉都御史治之河以決故涸而有貞至方冬月水暴漲公私之艘畢達治河卒踰數萬人悉與之期而遣之乃乘輕航究河源遂踰濟汝至衛汴循大河道濮范還上疏曰臣聞平水土要在知天時地理人事而已蓋河自雍而豫出險即平水勢既肆又由豫而兗土益疎水益肆沙灣之東所謂大洪口者適當其衝于是決而奪濟汝入海之路

以去諸水從之而洩隄潰渠淤澇則溢旱則涸此漕途所由阻然欲驟堰則潰者益潰澇者益澇今請先疏下流水勢平乃治決決止乃濬淤多爲之方以時節宣俾無溢涸必如是而後有成上從之

事本明紀

未

明景帝景泰五年七月癸丑白溝河漲決保定杜村口隄詔有司俟水降修築己巳直隸揚州府奏六月大風雨湖水泛溢決高郵寶應隄岸命左副都御史王竑督有司修築之八月戊戌湖南巡按御史張瀾奏先於原武縣黃河東岸開二河合黑洋山舊河道引水濟徐呂二洪今黃河改決而北其新開二河淤塞不通臣恐徐呂乏水有妨漕運請於黑洋山北黃河糾迴之處自其缺口改挑一河以接舊道用灌徐呂其工可二萬人其期可一月完從之九月辛亥先是沁河決武陟馬曲灣堤五百九十餘丈漫流新鄉獲嘉入衛河沒民田廬甚衆至是詔有司修築之庚午總督漕運都督徐恭左副都御史王竑言運河膠淺南北軍民糧船蟻聚臨清閘上下者不下萬數蓋因黃河上源水塞亦以沙灣閘口未塞而修治者之弗克事也臣唯治理之要有經有權經者常行不易之道權者一時通變之宜以沙灣閘口不可合留之以洩大水之勢經也姑塞沙灣閘口引水注運河以通漕舟權也苟唯常道是執臣見糧船淺凍不唯有誤今歲之糧來年之計亦必誤矣請敕左僉都御史徐有貞將閘口趁今水小急督工築塞庶不敗事詔是之勅有貞務博詢衆策毋僻守己見有貞言臨清河淺自昔已然非爲閘口未塞也亦非臣

僻守已見而固欲不塞也。竑等不察而以塞闕口爲急殊不知秋冬雖僅能閉明年春夏亦必復決勞費徒施而無用此臣所以不敢邀近功也如塞而無患臣雖至愚寧不早爲之詔從有貞言糧運亦無阻焉戊寅戶科右給事中何陸言臣往年使河南見衛輝南沁河有漏港今年水溢決已成河商船皆由之往來其臨清屯聚膠淺之舟若令其從漏港出沁河入黃河順流而下不二十日可至淮乞遣官往勘果如臣言卽令以卸糧空船從漏港試其險易庶事有變通船無阻滯章入詔不必遣官其令都御史王竑徐有貞理之十月丁亥工部奏近聞儀真瓜洲二壩每遇冬春潮水退縮之時往來舟船膠淺難行宜於二壩下各置閘於潮水漲時閉閘蓄水用通舟船從之辛卯先是行人王晏請疏沁河漕運詔以其事廉問於有司及鄰河故老皆言弗利至是晏復備陳地勢水性之宜以質廉報之非帝命工部會文武臣議少傅兼太子太師吏部尚書王直等言地形水勢非可遙度宜遣官往彼相度利害詢知衆議必愾乎公無患於後或如晏言或外有長策奏報區處詔是之命工部右侍郎趙榮同晏往旣而榮亦言弗利請治晏罪詔宥之十一月辛亥詔修南京河口隄岸丙子左僉都御史徐有貞言沙灣治河三策一置造水門臣聞水之性可使之通流不可使之堙塞昔禹鑿龍門闢伊闕無非爲疏導計故漢武之堙瓠子終弗成功漢明之疏汴渠逾年著績此其明驗也世之言治水者雖多獨樂浪王景所述著水門之法可取蓋沙灣地土皆沙易致坍決故作壩作閘皆非善計臣請依景法爲之而加損益於其間置門於水

而實其底令高長水五尺水小則可拘之以濟運河水大則疏之使趨於海如是則有流通之利無堙塞之患矣一開分水河凡水勢大者宜分小者宜合分以去其害合以取其利今黃河之勢大故恆衝決運河之勢小故恆乾淺必分黃河水合運河則可去其害而取其利請相黃河地形水勢於可分之處開成廣濟河一道下穿濮陽博陵二泊及舊沙河二十餘里上連東西影牆及小嶺等地又數十餘里其內則有古大金隄可倚以爲固其外則有八百里梁山泊可恃以爲泄至於新置二閘亦堅牢可以宣節之使黃河水大不至泛溢爲害小亦不致乾淺以阻漕運一挑浚運河臣唯水行地中避高趨卑勢莫能遏故河道深則能蓄水淺則弗能今運河自永樂間尙書宋禮卽會通河浚之其深三丈其水丈餘但以流沙恆多淤塞後平江伯陳瑄爲設淺舖又督軍丁兼挑故常疏通久乃廢弛而河沙益淤不已漸至淺狹今之河底乃與昔之岸平其視鹽河上下固懸絕上比黃河來處亦差丈餘下比衛河接處亦差數尺所以取水則難走水則易誠宜浚之如舊章入詔工部移文詣有貞使卽如其言行之明英宗實錄

治河時有撓其議者曰不能塞河令不爲患而開之令爲患耶上遣中使問有貞貞出二壺一竅五竅者各一注水而並瀉之五竅者先涸於是使者曉然知疏策之爲良也歸報命而議決於是有貞作治水閘疏水渠渠起張秋金隄西南行九里至濮陽灤經博陵壽張沙河至東西影塘渠成賜名廣濟凡河流之旁有不順者堰之堰有九長袤皆至萬丈架濤截流柵木落竹以石實之而鍵以鐵曰合土木

火金平水性也。又作放水閘於東昌龍灣魏灣閘有八度水盈過丈則洩皆通古河以入海上制其原下放其流既節且宣用平水道當是時蠲灤河民牧馬庸役以專力河防役丁夫五萬八千決口始塞復於開封金龍口銅瓦箱等處開渠二十里引河水濟運事不中制役以有成。南河全考

景泰五年甲戌陳泰遷左僉都御史疏理徐州呂梁二洪及運河明史稿

明景帝景泰六年二月壬午工部右侍郎趙榮奏先奉敕會山東河南三司相度河道榮發身不由科目衆或慢之榮含怒以山東三司正官不親至委官後期辱罷之又以其委官不卽遣人探河水淺深自攝衣涉水探之以所過有司供需稍不謹輒杖之山東三司都指揮王信左布政使龔理按察使劉孜及其委官署都指揮陳忠參議梅森僉事胡鼎等因各上章言榮單馬馳走軍民驚疑杖傷縣官鬻廩米於民多取直等狀巡撫尙書薛希璉巡按御史張琛亦以聞帝命左僉都御史徐有貞覆之具得其情事下法司議榮辱罷三司自探河水雖若失大體然終爲急於國事鬻米乃辦事官爲之榮失於鈐束信等輒敢侮榮如兒戲誣榮爲風顛構造危言抗拒敕旨宜命錦衣衛執之明正其罪希璉及琛符同信等奏榮亦宜附過奏入帝曰此輩以私忿相訐奏本當究問但時方用工河道恐益稽慢榮置不問信等令巡按御史責取招狀俾悉心修理務期成功若再誤事不宥壬寅湖廣華容縣醫學訓科王正中言本縣民歲運京儲皆經行洞庭湖春夏水漲人多被溺秋冬水涸舟復不通往返搬運勞苦萬狀臣見附近有河一

道昔晉杜預所開者但淤淺少水乞敕有司於農閒之日督率工役如舊疏浚使運船悉由此達大江之京倉實爲民便帝命工部移文有司視其果利無害而後爲之三月己巳先是帝諭工部臣曰國家重務在漕運今裏河自沙灣抵臨清皆淤塞不通爾工部其集文武議其疏治方略以聞於是太子少師工部尙書江淵會同五府六部官議言運河之阻在疏浚之而已但今山東河南人力已罷且農事伊始難起夫役請將在京存操步隊官軍五萬人敕內臣及文武大臣各一人往同僉都御史徐有貞計度疏浚期明年二月興工四月可畢其器具乞量給銀兩令自置之仍先敕河南山東有司預積物料蓄軍糧以待帝遂敕有貞集河南山東殷實餘夫民壯各一萬人先治之有貞言宜以漸疏浚工力相繼若官軍一動糧儲銀兩輒有千萬之費遇水漲則復坐費無所施智今泄口已合決隄已堅挑河者已如命用工臣請仍舊例置擗淺夫唯用沿河州縣之民免其徭役牧養之事使專事於此付管河官督領役小則量數起之役大則舉戶皆行其非近河之人皆休放使力農如此將遠者得安生業近者甘事河道不久利無弊者吾未之信也帝以爲然工部之議遂寢五月辛亥左僉都御史徐有貞奏運河疏濬功成帝謂工部曰河雖暫通恐不能久其移文有貞尙宜督沿河夫役以時挑浚勿致阻滯舟船七月乙亥築沙灣決口成沙灣之決垂十年至是會黃河南流入淮左僉都御史徐有貞始克奏功凡費木鐵竹石等物累數萬計工五百五十五日帝以河道雖完尙恐未堅命有貞明年春仍往視之丙戌命修直隸容城縣

白溝河杜村口及固安縣楊家等口決隄。八月丁巳管河主事李蕃奏初爲徐呂二洪水淺鑿陽武脾沙岡引黃河之水然後舟楫流通近又見起夫浚封丘縣新集等處分脾沙岡水以濟沙灣緣脾沙岡水微細不能兼濟二處恐沙灣得水而徐呂乾澀得一失一非計之善況新集地高費用頗多乞敕左僉都御史徐有貞等量度處置從之。九月戊子右僉都御史陳泰奉敕督浚儀真瓜洲江都高郵寶應及淮安一帶河道至是以工完上聞凡浚河一百八十里築決口九處壩三座役人夫六萬餘十二月甲寅復命左僉都御史徐有貞巡視沙灣戊午免徵沿河濟寧等十三州縣修河民所負官馬并雜科役以左僉都御史徐有貞奏力役方勤不宜并取故也。丁卯挑通濟河西岸沙灘及築東岸缺隄。明英宗實錄

陸瑜爲山東右布政河決張秋朝命僉都御史徐有貞塞之委公督其役時工匠集者數萬爲設方略編荆爲筐實以土石沈而築之水患遂息尋轉左何喬新撰刑部尚書康僖陸公神道碑

明景帝景泰七年九月戊辰朔以右僉都御史陳泰巡撫南直隸蘇松等處時在揚州疏濬河道巡撫鄒來學卒戶部以聞故命泰代之辛巳左僉都御史徐有貞奏京畿及山東自七月大雨至八月諸河水溢雖高阜亦有丈餘隄岸衝決民田廬淹沒商船漂溺者無算幸新造水門一帶隄堰無患其衝決不甚害者臣已率有司督工修理唯感應祠舊隄所決既大所係尤要必置禦水埽如水門埽堰之制仍於濟寧抵臨清增置減水閘始可經久其修築人夫乞免他徭仍人給口糧庶易成績帝是之仍敕有貞等督

軍衛有司措置物料務在堅完勿遺後患。十二月癸卯陞徐有貞爲左副都御史。有貞以修河竣事回京入見。帝顧問良久。獎勞甚至。因命吏部特陞之。明英宗實錄

是年僉都御史徐有貞治河功成。先是有貞疏上。旣報可。乃鳩工而前所遣卒亦依期至。乃爲渠以疏之中置閘以節宣之。渠起金隄張秋之首西南行九里至濮陽灤。又九里至博陵坡。又六里至壽張沙河。又八里至東西影塘。又十有五里至白嶺灣。又三里至李峯。由李峯而上。又二十里至蓮花池。又三十里至大瀦潭。乃踰范暨濮。又上而西。凡數百里。經澶淵以接河沁。有貞曰。河沁之水過則害。微則利。乃節其過而導其微。用平水勢既成。渠名廣濟。閘名通源。渠有分合。而閘有上下。凡河流之旁出而不順者。則堰之。堰有九。長各萬丈。九堰旣設。水遂不東衝沙灣。而更北出濟漕渠。阿西郵東。曹南鄆北。出沮洳而資灌溉者。爲田百數千萬頃。凡堰楗以水門。繚以虹隄。堰之崇三十餘尺。其厚什之長百之。門之廣三十六丈。厚倍之。隄之厚如門。崇如堰。長倍之。架濤截流。柵木絡竹。實之石。而楗以鐵蓋合五行。用平水性。而導汝泗之原出諸山匯瀆濮之流納諸澤。又濬漕渠出沙灣北至臨清。凡二百四十里。南至濟寧。凡三百一十里。復建閘於東昌之龍灣。魏灣者八。積水過丈。則開而洩之。皆道古河以入於海。用平水道。初議者欲棄渠勿治。而由河沁及海以漕。又欲出京軍疏河。有貞因奏蠲瀕河民馬牧庸役。專力河防。以省軍費紓民力。工部請如有貞言。不中制。以是得有功。蓋三年而告成。進副都御史。明紀事本

宋

徐有貞字元玉初名珵吳人宣德八年進士景泰三年遷右諭德河決沙灣七載前後治者皆無功廷臣共舉有貞乃擢左僉都御史治之至張秋相度水勢條上三策一置水門一開支河一濬運河議既定督漕都御史王竑以漕渠淤淺滯運艘請急塞決口帝敕有貞如竑議有貞守便宜言臨清河淺舊矣非因決口未塞也漕臣但知塞決口爲急不知秋冬雖塞來春必復決徒勞無益臣不敢邀近功詔從其言有貞於是大集民夫躬親督率閱五百五十日而工成也帝以轉漕爲急命廷臣議方略工部尙書江淵等請遣中官偕文武大臣督京軍五萬人往助役期三月畢工有貞言京軍一出日費不貲遇漲則束手坐視無所施力今泄口已合決隄已堅但用沿河民夫自足集事廷議遂寢事竣召還佐院事帝厚勞之復出巡視漕河濟寧十三州縣河夫多負官馬及他雜辦所司趣之亟有貞爲言免之七年秋山東大水河隄多壞惟有貞所築如故有貞乃修舊隄決口自臨清抵濟寧各置減水閘水患悉平還朝帝召見獎勞有加進左副都御史明史稿

武功在張秋治水久未就功問於王尙書來尙書曰分水勢尋水源武功於是先開數渠引水散爲各支流去而時或泛濫其害終在再三求源發處不得乃投以物使人離數十里候之物復浮出如是者數處武功曰水流則不受物源不在是再投之一處不浮曰此乃真水源也以百計塞之皆莫效下以

土石若無者聞一僧有道武功就往謁之間術僧不肯言強之但曰聖人無欲武功歸思而不得數日忽悟曰此下殆有龍窟龍所欲者珠也吾能使之去於是鑄長鐵柱洞釜底貫而下焉水始受塞不踰時遂成平陸蓋鐵汁能蝕珠龍愛珠故去也武功時時爲人道之

楊循吉  
蘇談

明英宗天順元年十二月丁巳尙寶司少卿凌信奏江南運糧者泛大江至瓜洲壩有風浪之險宜從鎮江府裏河而裏河自新港至奔牛一百六十餘里河道淺狹又有三壩大船不利車盤七里港口又有金山橫阻江水不得入以故糧船多冒險損壞宜通七里港口引江水灌入濬新港至奔牛一帶爲便奏下工部覆奏宜令管理糧儲河道官僉都御史李秉及郎中沈彬提調附近有司通濬從之

明英宗  
實錄

是年令

總兵官兼理河道

明會  
典

明英宗天順二年三月癸丑管河主事陳湊奏濟寧州濟安閘水勢陡峻損壞船隻可移入二十餘步其舊閘岸改砌月樣以順水性令不得撞激上命所司勘實移之十二月己巳先是直隸大河衛百戶閔恭奏南京並直隸各衛歲運薊州等衛倉糧三十萬石駕船三百五十隻用旗軍六千三百人越大海七十餘里風濤險惡滯流旬月及有順風開船行至中途忽爾又值風變人船糧米多被沈溺實非漕運之便臣見新開沽河北望薊州正與水套沽河相對止有四十餘里河徑水深堪行舟楫但其間十里之地阻隔若挑通之由此償運則海濤之患可免雖勞人力於一時實千百年之計也事下工部請移文鎮守

薊州總兵巡按直隸御史勘其利否至是都督僉事宗勝監察御史李敏皆報恭言善其河應挑闊五丈深一丈五尺於附近天津永平薊州寶坻等衛府州縣發一萬人夫委官督領俟明年春和農暇之日興工然各處軍民艱辛者多宜一月人與行糧三斗仍官給器具庶無勞損而功易成從之明英宗實錄

崔恭天順二年遷右副都御史巡撫蘇松諸府與都督徐公浚儀真漕河又浚常鎮河避江險已大治吳淞江起崑山夏界口至上海白鶴江又自白鶴江至嘉定卞家渡迄莊家涇凡浚萬四千二百餘丈

又浚曹家港蒲匯塘新涇諸水民賴其利明史稿

林鶚天順初知鎮江府漕故經孟瀆險甚巡撫崔恭議鑿河自七里港引金山上流通丹陽避之鶚言道里遠多石且壞民廬墓請按京口閘甘露壩故迹浚之令通舟春夏啓閘秋冬度壩功力省便恭從其議遂爲永利明史稿

明英宗天順三年四月辛巳工部奏國家大計莫先於糧運今聞自通州以南直抵揚州河道膠淺糧運難行宜馳文於管河道官令量起附近衛所府州縣軍民設法疏濬其水塘泉源亦宜疏通以濟運河從之明英宗實錄

天順三年戶部尚書楊鼎上言阿羅出住牧河套數入寇掠費用浩繁凡銀兩引鹽收馬徵運之法盡行尙爲未足又起預徵之例民困財竭所不忍言惟黃河乃漢唐漕運河卽今鹽船木筏往來不絕其

間雖有三門析津之險。而古人倒倉之法爲當。三門之上有小河徑通延綏。如以所運糧草各貯水次。遡流償運。庶幾軍餉可足。民力亦蘇。或摘漕糧數千石赴陝就令教習山西陝西河南之人待舟楫通後。乃許迴運。且可順帶解鹽數十萬以充淮課。則國利有增矣。詔從之後阻不行。然倪岳許論嘗欲通舟河漕渭轉漕邊鎮要皆經史所載。非鑿空之說也。陝西通志



# 行水金鑑卷第一百十

## 運河水

明英宗天順五年二月丙戌漕運總兵官右都督徐恭奏運河諸閘多狹隘臨清一閘尤甚而近造糧船高大閘殆不能容請敕山東軍衛有司積工措料修移舊閘五十丈濬深三尺六寸增廣三尺庶不阻漕運上曰臨清南北要衝之地其閘乃淺狹如此卽令有司修築之乙未陝西按察司僉事李觀言涇水出涇陽仲山谷道高陵至櫟陽入渭袤二百里晉漢穿渠溉田萬頃宋元俱設官主之今雖有瓠口鄭白二渠督其事者不職隄堰摧決溝洫壅滯民弗蒙其利官稅因之拖欠乞敕布按二司堂上官督同被利州縣人夫依時疏鑿上命有司浚之七月乙丑修河西務要兒渡口

明英宗實錄

明英宗天順六年三月丁巳命疏浚淮安以南運河

明英宗實錄

明英宗天順八年正月己未命修高郵湖岸三十餘里以年久風浪撞激其磚石椿木皆脫落故也

明英宗實錄

• 錄

明天順八年七月壬申時憲宗已登極矣都察院都事金景輝言會通河自安山北至臨清二百五十餘里僅有汝水若春月少雨則水脈漸微而舟行淺滯其汴梁城北陳橋舊有古河一道北由長垣經曹州至鉅野

縣安興墓巡檢司地界乃出會通河合汶水通臨清每秋水溢有舟往來其間唯陳橋迤西一舍許水道淺狹水小之際不能流通請興工開浚亦可分引沁水仍置二閘以司啓閉則徐州臨清二河均得利濟而衛河之水亦皆增長且長垣曹鄆諸處糧稅可免飛輓之勞而江淮民舟又可由徐之浮橋達於陳橋至臨清而無濟寧一路壅塞之苦其利多矣事下工部請按實以聞十二月壬午工部主事郭昇請修臨清新開上閘從之乙未直隸邳州知州孟琳奏本州榆行諸社俱臨沂河以久雨河岸爲水所崩者二十有八處諸社卑田渰沒殆盡乞量興工役修築工部覆奏從之明憲宗實錄

明憲成化元年三月戊申朔浚通濟河要兒渡口命工部主事蔣瑄都督同知陳達董其役五月庚午總督漕運副都御史陳恭請修築高郵湖岸自杭家嘴北起至張家溝鎮南止凡三十里有奇從之

明憲

錄實

明憲成化二年四月辛酉浚薊州等處新開沽河十二月甲子命御史一員提督通州迤南抵臨清及衛輝一帶河道先是命巡鹽御史兼巡河道至是總督漕運右副都御史滕昭言河道淺澀非專任不能疏通工部請如所言從之九月丙子戶部會官議南京管糧都御史及漕運總兵等官所言事宜一兗州府城東舊有金口壩蓄水接濟運河每遇山水泛漲輒衝決費工修築宜將濟兗二府原設泉夫秋冬空閒之時采石塊包砌前壩一通州直抵儀真瓜洲一帶河岸壩堰閘座近年多有坍塌損壞蓋沿河

軍衛有司官不遵舊例以時修築遂致河道淤淺阻滯船行乞各委堂上佐貳官專一修理以便漕運議上俱從之。明憲宗實錄

明憲宗成化三年七月戊辰總督漕運右副都御史滕昭言儀真瓜洲孟瀆諸處河港乃貢賦必由之道舊因淺滯命旁近揚州鎮江常州諸府衛興工疏浚是後著令三年一浚然所司怠玩浚不以時直至窮冬召衆興役則手足皺瘃雖浚無實徒爲勞耳請自後每於冬初卽爲興工從之九月壬申戶部會六部等衙門官議漕運總兵及各處巡撫等官所言事宜條奏一徐呂二洪全藉河南脾沙岡等處水灌注接濟運船先年設主事一員後又添設河南參議一員專理近乃罷去兼管於河南布政司分巡官以致二源淤塞水利不興請如舊增置參議爲便一濟寧州小長溝至開河驛隄上接汶泗等河下通黑馬等溝導引泉水以濟糧運元時州之西蓄孫村南望二湖之水設減水閘十餘座水大量爲減泄小則流入官河甚利今久失修葺日就坍塌且每歲山水先壞隄岸春時無水接洽夏則漫流渰沒田禾舟楫難行請如前修築一儀真至通州俱係運道而淮揚一帶水路各有專官管理唯是直河至通州俱係運道事多廢墜請令張家灣收輒主事督同所在軍衛有司委官提調各淺夫老以時採取椿草每春糧運之時遇有水淺漫流如法築置壩堰逼水歸洪庶糧運無滯流之患上皆準議行之明憲宗實錄

明憲宗成化四年六月癸卯工部管洪主事郭昇奏徐州洪勢最險自昔兩隄庫隘稍遇水漲舟行無路

往來甚艱。而閩河上口一壩勢亦如之。雖頻年修築。亦唯取辦一時。殊非經久之策。又如外洪翻船等石。裏洪壩下一灣尤爲險惡。屢壞行舟。今欲以大石修砌兩隄。其外則錮以鐵錠。其內則填以雜石。而又鑿去外洪翻船惡石。用石鋪平裏洪隄岸。以便來往。須勸率往來中外官員及遠近客商。以給其費。量倩所屬各淺夫及本洪溜夫。以供其役。工部以聞。詔可。明憲宗實錄。洪形象川字。有三。曰中洪、外洪、裏洪。在徐州。

明憲成化五年三月丁未。工部奏自通州抵天津衛河道淤塞。漕運不通。宜加疏浚。其自天津迤南。直至揚州一帶河道。亦有淤淺。宜敕總督官通行疏通。以便漕運。從之。明憲宗實錄。

明憲成化六年七月庚子。監察御史康驥奏。請疏濬張家灣橫河口小灣套。以泊運船。修墊自京城抵通州往來要路。以便糧運。上命俟年豐爲之。壬寅。工部奏。通州至武清縣蔡家口河口并隄岸。被水衝開一十九處。宜起倩兵民并工修築。以便漕運。上從之。命侍郎李顥董其役。癸卯。巡按直隸御史張誥奏。請修築靜海以南。臨清以北一帶河口之被水衝場者。以便漕運。從之。九月己丑。鎮守密雲署都指揮僉事王榮奏。山水泛溢。衝塌古北口潮河白河龍王峪沿邊一帶關城墩寨隄壩。及密雲中衛南北城垣。請撥軍修繕從之。十月己酉。戶部會官議。巡撫漕運等官所陳事宜。一運糧船隻。凡遇淤淺之處。宜行漕運衙門令各該把總都指揮指揮等官督各管糧船旗軍及當地淺夫。併力挑擣淤沙。疏通河洪。使前船既過。後船接續而行。違者究問。明憲宗實錄。

明憲宗成化七年正月甲申總督漕運兼巡撫淮揚等處右副都御史陳濂奏運河一帶濟寧居中而南北分流久不疏浚蓄水不多况兩京往來內外官多不恤國計不候各閘積水滿板輒欲開放以便己私而南京進貢內臣尤甚以此走洩水利阻滯糧運今欲會同山東巡撫守臣計工挑浚且請旨禁約事下工部覆奏從之十月乙亥改南京刑部左侍郎王恕爲刑部左侍郎奉敕總理河道陞工部員外郎郭昇爲郎中山東按察司僉事陳善爲副使與工部郎中陸鏞分理之時太監韋煥等奏運河淤淺請量增昇等職專理河道事下戶部會同吏部尙書姚夔等擬議覆奏以爲太宗皇帝肇建北京以元人海運非便命平江伯陳瑄經略糧運河道是以六七十年間漕運通利京儲山峙其良法美意度越前代近年以來河道舊規日以廢弛灘沙壅塞不加挑洗泉源漫伏不加摻滌湖泊占爲田園鋪舍廢爲荒落人夫虛設樹井皆枯運船遇淺動經旬日轉僱盤剝財殫力耗及至通州雨水淫潦僦車費多出息稱貸勞苦萬狀皆以河道阻礙所致因循既久日壞一日殊非經國利便煥所言誠爲急務然自通州至儀真瓜洲二三千里往來修治非一二能辦况首尾不接歲月不常時無統制功難責成今宜進昇郎中專理沛縣至儀真瓜洲一帶善副使專理山東地方見管通州河道郎中陸鏞專理通州至德州一帶仍簡命風力大臣一員賜敕總理其事凡河道事宜根究本末以次修復其舊務爲久便禁侵占阻滯者仍須審度人情事勢隨其緩急輕重以爲先後他有便宜方略可奉行者聽斟酌之限以三年底於成效不得虛應故

事致誤國計上從其議賜恕敕曰朕唯京師糧儲仰給東南漕運自平江伯陳瑄經理河道之後管河者多不得人舊規日以廢弛糧船阻淺轉輸延遲若非委任責成豈不有誤國計今分官管理一帶河道特命爾總理其事爾宜往來巡視嚴督各官并一帶軍衛有司人等用心整理閘壩損壞者修之河道淤塞者浚之河泊務謹隄防泉源毋令淺澀沿河淺鋪樹井及一應河道事宜但係平江伯舊規者一一修復不許諸人侵占阻滯凡有便宜方略可舉行者悉聽爾斟酌施行一應官員人等敢有違誤者或量情懲治或具奏拏問爾仍須審度人情事勢隨其緩急輕重以爲後先毋怠以廢事限以三年務底成績如或因循不理致誤國計責有攸歸爾其勉之慎之丙戌戶部尙書楊鼎工部侍郎喬毅上浚通惠河舊道事宜先是漕運總兵官都督楊茂奏每歲漕運自張家灣舍舟陸運遇雨泥濘每車僱銀一兩僅載八九石其費皆出於軍看得通州至京城四十餘里古有通惠河故道石閘尙存永樂間曾於此河船運大木以此度之船亦可行先年曾奏欲於此河積水般運又有議欲於三里河從張家灣烟墩橋以西疏挑二十里灣泊糧船以避水患者二事俱未施行今此河道通流其水約深二尺不勞疏挑唯用閘蓄水令運糧衛所每船二十五隻造一剝船自備米袋挨次剝運如此則運士得省腳費而困憊少蘇矣事下工部尙書王復同太傅會昌侯繼宗吏部尙書姚夔等官議得古通惠河道閘座設若開通修砌可以泊船可以運糧誠有益於國計但地形水勢高下并合用軍夫物料俱難約度宜請旨簡命戶工

二部堂上官各一員會漕運參將袁佑率識達水利官匠前往相度如果相應就將該用軍夫物料修理事宜具奏會議定奪上以命鼎毅遂同參將袁佑等親詣昌平縣元人引水去處及宛平大興通州地方閘二十四座以通水道但元時水在宮牆外船得進入城內海子灣泊今水從皇城中金水河流出難循故道行船須用從宜改圖除元人舊引昌平東南山白浮泉水往西逆流經過祖宗山陵恐於地理不宜及一畝泉水經過白羊口山溝雨水衝截俱難導引外及勘得城南三里河至張家灣運河口袤延六十餘里舊無河源正統間因修城濠作壩蓄水兼恐雨多水溢故於正陽橋東南低窪處開通濠口以泄其水始有三里河名自濠口三里至八里始接渾河舊渠兩岸多人家廬舍墳墓流向十里迤南全接舊河入張家灣白河其水深處止有二三尺淺處一尺餘闊處僅丈餘窄處未及一丈今若用此河行船凡河身窄狹淤淺處必用浚深開闊凡遇人家房垣墳所必須拆毀那移且以今寬處一丈計之水深二尺若散於五尺之寬止深四寸况春夏天旱泉脈易乾流水更少糧船剝船俱難行使兼且沿河隄岸高者必須剷削低者缺者必須增築填塞又有走沙急湍處俱要創閘派夫修挑倘水淺少又須增引別處水來相濟若引西河之水則自河口迤西直至西湖隄岸未免添置閘座若引草橋之水必須於大祀壇邊一路創鑿溝渠亦恐有礙况其源又止彰義門外玉匠局等處馬跑等地泉亦不深遠大抵此河天旱則淤

壅淺澀雨潦則散漫衝突徒勞人力率難成功決不可開况元人開此河曾用金口之水其勢洶湧衝沒民舍船不能行卒爲廢河此乃不可行之明驗也今會勘得玉泉龍泉及月兒柳沙等泉諸水其源皆出於西北一帶山麓堪以導引匯於西湖見今大半流出清河若從西湖源頭將分水青龍閘閉住引至玉泉諸水從高梁河量其分數一半仍從皇城金水河流出其餘從都城外濠流轉通會流於正陽門東城濠再將泄入三里河水閘住併流入大通橋閘河隨時開閉天旱水小則閉閘灌水短運剝船雨澇水大則開閘泄水放行大舟况河道閘座見存不用增造官吏閘夫見有不須添設臣等勘時曾將慶豐平津通流等閘下板七葉剝船已驗可行若板下至官定水則其大船亦可通行止是閘座河渠間有決壞淤淺處要逐加修浚較之欲創三里河工程甚省况前元開創此河漕運七八十年公私便宜後來廢弛今若復興則舟楫得以環城灣泊糧儲得以近倉上納在內食糧官軍得以就近關給通州該上糧儲又得運來都城與夫天下百官之朝覲四方外夷之貢獻其行李方物皆得直抵都城下卸此事舉行定實天意暢快人心歡悅足以壯觀我聖朝京師萬萬年太平之氣象也伏望聖明早賜裁處乞敕各該衙門會計物料量撥官匠并在營見操官軍人等自西山玉泉一帶并都城周圍濠塹大通橋直抵通州張家灣一路河道分工逐一修浚如此則不惟損一時糧運之腳價實足以垂萬世無窮之利益矣疏入命下所司十一月癸丑霸州知州蔣愷固安縣知縣賈貴各奏霸州城北古有草橋界河一道上接渾河下至

小直沽順流東注於海。永樂間渾河改往西南流道經固安、新城、雄縣沿至霸州新河一帶水勢不順漸已淤塞累衝決爲居民患近者衝決孫家口東流入河又東抵三角淀小直沽入海乃其故道請因其自然就下之勢修築隄岸使順流注海免貽後患上命順天府官勘實從之。明憲宗實錄

王恕遷刑部右侍郎父憂服除以原官總督河道浚高郵邵伯諸河修雷公上下勾城陳公四塘水閘旋改南京戶部左侍郎明史稿。

明憲成化八年正月己未工部奏漕運總兵官楊茂先乞敕通州至大通橋舊河石閘以免官軍車運之費有旨命戶部尚書楊鼎等勘報鼎等報云自西山玉泉并京城壕塹抵張家灣一路河道俱宜修浚已准撥官軍九萬餘名修理矣會有災異停各項工役而修河一事宜取旨上命依原擬量撥官軍四萬令總兵官趙輔郭登統領先浚京城壕塹仍以太監王順工部尚書王復兼董其役其通州一路俟工完以聞二月戊辰朔鎮守永平山海總兵官東寧伯焦壽言薊州新開沽河淤塞一千二百丈糧運不通而欲照先年奏准三年一浚事例於順天永平二府及東勝等衛起撥軍民興工緣今災傷人民缺食且農事將興欲行巡按御史親詣其城勘視酌量暫濟漕運候明年三月以後并工疏浚庶於民力少蘇邊運亦濟從之八月癸巳修築淮安抵儀真瓜洲湖河隄岸衝決者一十五處明憲宗實錄。

是年河道侍郎王恕請治揚州至淮安湖塘造閘確引塘水接濟運河。南河全考

明憲宗成化九年正月辛亥巡按直隸御史婁謙言漕河自通州直抵臨清多淤淺請於通州一帶各設管河官一員及委軍衛官相兼管理疏通并令捕盜事下河道侍郎王恕議以爲當工部遂請移文吏部於順天河間淮揚四府各添設管河通判一員通州等州各設判官一員各該衛所俱推選廉幹官相兼管理仍行總理管河等官往來提督奏上上曰河道只仍舊委官管理不必添設己未總督漕運平江伯陳銳奏儀真瓜洲運河原無水源全賴揚州雷公陳公二塘及高郵寶應邵伯等湖積水接濟清河迤北至徐呂二洪則藉河南黃河鳳池口金龍口沁河等處諸水濟寧南北閘河則賴徂徠沂泗泰山曲阜等處諸泉源并昭陽南旺孫村等湖水近所司視爲泛常不爲疏浚修築是致水利不通糧運有阻揆厥所由蓋因通州至儀真相離二三千里往來巡視非一二人力所能辦宜酌量遠近自通州至德州責令郎中陸鏞專理自德州至濟寧則責之副使陳善自沛縣至儀真則責之郎中郭昇仍敕大臣一員總督其事庶事體歸一而工力可成工部議以爲宜從之三月丙申總河侍郎王恕言淮安南抵儀真瓜洲湖河隄岸被水衝決者一十五處其餘坍塌者二百餘里及儀真三壩衝倒修理物料俱揚州出辦今連年災傷民力不給欲於池州安慶二府支取遺輶并南京龍江瓦屑壩二竹木局所抽分支作椿木令南京兵部馬快船運送事下工部請行南京工部查勘定奪從之

明憲宗實錄

李恭敏公鑑湯陰人成化壬辰進士爲都水司主事管河臨清改作板閘郭朴撰工部尙書李公傳改刑部郎中從

侍郎何喬新賑荒山西開麗澤渠以灌田進鴻臚少卿

明史稿

明憲宗成化十年八月辛亥戶部會官議覆漕運巡撫等官所言事宜一睢寧縣所管運河北自徐州南至宿遷二百餘里水多淺澀宜添設管理河道官一員其通州儀真一帶管河官止令專理河道不許別有差委一江浦縣地方北城圩舊有古溝河一道北通滁河其浦子口城東亦有黑水泉古溝一道南入大江兩溝之間中有岡隴截斷若因其舊蹟去其岡隴開成河道旱則可引江潮以資灌溉潦則可殺水勢宜行令巡視屯田御史督同應天府及浦子口橫海等五衛軍民開通務責成效疏入從之

明憲宗實錄

明憲宗成化十一年八月辛巳命浚舊通會河敕平江伯陳銳右副都御史李裕戶部左侍郎翁世資工部左侍郎王詔督漕卒疏浚先是銳等奏通州至京舊有運河一道廢閘尚存但年久淤塞損壞欲照尙書楊鼎奏准事理就借漕卒用工疏浚閉閘積水以運糧儲至是特令銳等會議提督漕卒自下流爲始疏浚壅塞修閘造船合用糧料匠作於各司取用務求成功仍委附近公差御史察其不聽約束者以聞

九月己酉巡撫山東左僉都御史牟偉奏山東舊有小清河上接濟南趵突等泉下通樂安沿海高家港等鹽場大清河上接東平坎河等泉下通濱州海豐利津富國等鹽場後因淤塞衝決舟楫不通民苦船剝兼雨水渰沒其患尤甚近勸農參政唐漸爲之修浚造閘水利始通繼今非得人提督恐久而或廢乞令漸兼治水利後繼任者亦如之詔可十月癸未增設工部管理河道官一員漕運總兵官平江伯

陳銳等奏比奉詔疏浚通州至京河道工將就緒請設官理之并提督青龍等橋廣源等閘及西山一帶泉源時工部郎中陸鏞丁憂服闋因以命之十二月辛卯置儀真縣河港三閘先是工部郎中郭昇奏江南進貢糧運等船至儀真壩雖夏月潮盛亦須人力絞輓方能達河少有錯失船卽損壞而裏河壩岸恐爲潮水衝決多開缺口以殺其勢水退復修爲費甚大儀真縣羅泗橋舊有通江河港上至裏河幾四里許潮大之時內外水勢相等此港可置三閘潮來先啓臨江閘使船隨潮而進俟潮旣平乃啓中二閘放之如此不惟往來舟船利便而裏河水勢亦卽疏洩不待決口重費也詔可之昇會督漕都御史李裕勘議修完而儀真店戶惡其奪己利賄囑所司假以走洩水利閉之至是昇復條陳開閘之利不開之患工部覆奏以昇言誠有益經久之策宜允所請從之明憲宗實錄

明憲成化十二年二月己丑工部言永平府暨通州等衛各奏原派疏浚通惠河并直沽新開沽人夫地方多有遠近欲得彼此相易爲便會保定等縣亦言各縣河岸衝決數多有妨耕種乞存留原派協濟通惠河人夫以便修築而本部委官徐九思等亦各言蘆溝橋及直沽天津迤北南營要兒渡口一帶河道衝決淤塞有妨漕運比之通惠河尤急宜如所奏准其存留移易其直沽蘆溝一帶河岸道路亦宜酌量緩急暫撥通惠河人夫用工唯要兒等渡則照原定人夫不必更動爲便從之五月壬戌漕運總兵官平江伯陳銳等奏邇者修造通惠河閘成欲將山東泉源河道并通州等處水關閘座與永通橋閘俱

量爲疏浚修改以便漕運上從其議下所司知之。六月丁亥浚通惠河成自都城東大通橋至張家灣  
渾河口六十里興卒七千人費城磚二十萬石灰一百五十萬斤閘板椿木四萬餘株鐵桐油各數萬計  
浚泉三增閘四凡十月而畢漕舟稍通都人聚觀增平江伯陳銳祿米歲二百石賞侍郎翁世資王詔綵  
綬表裏銳又爲浚河官乞恩乃命邳州衛指揮僉事單鏞高郵州判官林烈等十員俱陞署職一級其餘  
職役匠卒皆賜綵綬絹布有差是河之源在元時引昌平縣之三泉俱不深廣今三泉俱有故難引獨引  
西湖一泉又僅分其半而河制窄狹漕舟首尾相衝至者僅數十艘而已無停泊之處又沙水易淤雨則  
漲淤旱則淺涸不踰二載而淺澀如舊舟不復通然銳之所增祿米猶歲給不絕識者愧之丙申陞山  
東兗州府通判陳翼爲順天府通判專理通州以上河道并西山一帶泉源漕運總兵官平江伯陳銳等  
言翼長於治水嘗疏濟寧州永通河改修耐牢坡等閘具有成績故有是命七月丙午總漕李裕等奏  
新開揚州白塔河潮水往來恐久而淤淺宜下所司與瓜洲儀真諸河皆三年一浚又言江南孟瀆河亦  
多淤淺乞下巡撫巡按等官勘驗疏浚以便漕運工部覆奏從之甲寅增設直隸江都縣留潮通江二  
閘九月丙辰漕運總兵官平江伯陳銳奏通惠河雖已通行然其間猶有未畢工者欲再疏浚使加深

闊擬摘江北運糧衛所軍約一萬名委都指揮等官督管於明年二月興工乞官給以廩給口糧食鹽從

之明憲宗實錄



# 行水金鑑卷第一百十一

## 運河水

明憲宗成化十三年七月戊子管理河道工部郎中楊恭奏六月以來久雨水溢運河東西兩岸衝決甚多有妨糧運乞撥京營官軍修築仍命文武大臣董之庶克濟事章下工部議宜移文都督同知陳達同楊恭於通州直隸天津等衛附近處所量起軍餘三千名順天府沿河州縣起民夫一千名相兼隄淺人夫并工修築以便漕運并行戶部每名給興行糧仍令董工官盡心提督務在堅厚以圖經久從之明憲宗實錄

李裕成化中進右副都御史總督漕運兼巡撫江北諸府浚白塔孟瀆二河以便漕張秋南旺及淮安西湖舊編木捍衝激勞費無已裕與郎中楊恭等謀易以石遂爲永利明史稿

明憲宗成化十四年二月丙午管河郎中楊恭奏兗州汶上縣直抵濟寧運河隄岸衝決一百一十里今欲葺理每夫一名乞月支口糧三斗從之三月辛卯太監汪直言高郵邵伯寶應白馬四湖每遇西北風作則糧運官民等船多被隄石椿木衝破漂沒宜築重隄於隄之東積水行舟以避浪工部議合行漕運總兵巡撫等官相度增築從之明憲宗實錄

明憲宗成化十五年九月壬申詔修南京內外河道先是南京監察御史何舜賓奏南京城內外河道淤淺宜發丁夫疏浚下南京工部督守備等官按視以爲宜如所奏其工力於京民丁多而家富者量役之及浙江蘇松等府大戶運糧至京亦令量助仍令舜賓等管理聽其設法以補不給從之十月壬子陞工部郎中楊恭爲通政司右通政仍管河道恭管理北河直抵濟寧一帶河道六年考滿漕運總兵等官奏保陞職仍舊任事吏部議擬通政司參議詔曰恭旣管河勤能准陞右通政恭在河道承奉太監汪直故有不次之擢也明憲宗實錄恭於二十三年以京察閒住亦見實錄

明憲宗成化十六年九月□□戶部會官議漕運及巡撫等官所凍事宜一大名府元城縣小灘官軍兌糧河道淤淺宜於元城館陶二縣增置主簿一員職專疏濬

是年贊呂梁洪二石堤長七十餘丈築石壩一百六十五丈復於壩西築隄二十餘丈呂梁洪在徐州東南六十里有上下二洪相距七里亦運道要害南河全考二洪在萬曆二十四年以前最爲險要自李化龍開泇河而二洪不爲運路矣

明憲宗成化十七年五月庚辰南京工部員外郎吳理言近御史何舜賓建議乞疏濬南京河道以便糧運今天時亢旱人心靡寧乞暫爲停止以蘇民困事下工部覆奏請如理言候豐年再陳區處上曰河寶淤淺宜在疏濬惟慎擇官董之不必止也明憲宗實錄

成化十七年旣塞河南決口又自揚州鑿河四十里以泄積潦蠲災賑饑伐材爲屋以居流民比還民

遮道留之。王整撰兵部尚書薛公神道碑

明憲宗成化十八年二月己未工部以管河右通政楊恭巡河監察御史趙英會勘漕運總兵官陳銳所奏欲於臨清縣南三里開通月河分減水勢誠爲利便但言東平州戴村修砌減水石堰欲行山東科派夫料而歲荒不能給宜於銳原借本部修路銀內支用或人力不足於附近無災縣分取之庶事易集而民不勞從之秋八月久雨衛漳滹沱等河漲溢運河口岸多決自清平縣至天津衛凡八十六處大蒙等村屯凡九處。

明憲宗實錄

明憲宗成化十九年九月丁巳戶部會官議奏漕運巡撫等官所上事宜一武陟等縣沁河其源出太行山下流接徐州運河舊各縣無管河官巡視修理遇夏秋水泛堤岸多被衝決請於武陟新鄉獲嘉原武陽武封丘祥符等縣各增設主簿一員專巡河道如議。

明憲宗實錄

明憲宗成化二十年十月丁巳停總理河道通政司右通政楊恭俸三月以漕河淺澗運船多過期不至爲戶部所參奏也十二月戊午吏部尚書兼華蓋殿大學士萬安等言我朝建都於北上下供用多取給江南然必藉船運而後可達京師是運道水利所係甚重如河南懷慶府地方築隄障沁水以濟徐呂二洪及邳州宿遷桃源運道山東兗州等處導引汶泗洸河諸泉以濟濟寧上下運道今沁水衝決隄岸流入黃河汶泗洸諸泉歲久不浚亦多壅塞以致河身淺澗糧運稽遲及四方進貢方物等船不便往來

雖工部亦嘗奏行兩地巡撫巡按管河官員督工修理。但恐仍前泛視來歲運道。不得水利接濟。所誤非輕。請敕工部重臣一員。選領諳練屬官一員。詣彼會撫。按督有司。一一踏勘衝決壅塞之處。修築疏浚。上是之命。工部侍郎杜謙率其屬郎中蕭冕員外郎李濬往董其事。因敕謙曰。朕唯國家公私物用。取給江南。而運道水利關係甚重。近年以來。河水淤淺。加以天旱。沁水決入黃河。汶泗洸諸泉又多壅塞。以致水利不通。有妨漕運。特命爾謙自通州臨清直抵淮揚一帶。會同山東河南巡撫。巡按督責三司府衛官并管河管泉官員逐一踏勘。凡係蓄水接濟運河堤岸。何處衝決。所當修築。泉源何處壅塞。所當疏浚。及會計合用工作木料。預爲措辦。待明年凍開。相度事勢緩急。工程小大。起集軍民。趁時修理。務俾水利通行。舟楫無阻。斯爲有益。此誠國家大計。凡事有相關及。敕內該載不盡者。聽爾計議便宜而行。文武官敢有怠慢誤事者。輕則量情責罰。重則文職五品以下徑自執送問刑衙門問理。四品以上并方面軍職參奏執問。各巡撫巡按有不用心者。亦具實來聞。明憲宗實錄

明憲成化二十一年正月庚戌。詔修河夫。月給米人三斗。時遣工部左侍郎杜謙自通州抵淮揚督修。謙以所在民饑。請量給官廩。戶部議如其言從之。七月辛未。工部左侍郎杜謙奏奉敕修浚河南山東等處運道。沁、衛二水已經相度。緩急修浚頗有次第。臣今竊究其弊。緣無大臣總理。雖有管河官員。多爲親臨上司改委顧彼失此。不得專於職務。乞如侍郎王恕總理河道事例。增設工部侍郎一員。其沁、衛二

河河水經涉地遠遇有旱澇人夫浚治無官管攝乞如山東泉源事例增設主事一員及臨清以北至德州俱無管河官乞依臨清以南事例增設管河判官主簿一員本部議覆上曰侍郎不必增設餘如所議

明憲宗  
實錄

杜謙字益之昌黎人景泰甲戌進士授工部主事卽涖徐呂二洪洪當運道中迅流立石鬱如齒列盤渦盪滌舟稍失制則人與貨俱沒公至相其地勢詢其水患稍加平治舟賴以濟歲適歉山東淮北流離飢餓之民叢集兩岸隨舟上下號呼乞食公設法勸率得米爲淖糜以食之全活甚衆後佐工部時漕河淤塞糧道不繼衆議舉公往任修浚之事公自通州循河流以抵淮揚相地勢去淤塞導源泉修閘壩漕河復通竣事復命上嘉之有文綺楮幣之賜

杜公墓志

成化壬辰銳鎮淮揚挂漕運印己亥於淮河壩改石閘修造移風清江福興四閘包砌塘岸疏通泉源辛丑仍於濟寧分水龍王廟自南距北可十里各置一閘以節蓄水利總漕事十四年河道之修築轉漕之利弊政事之得失前後建百有餘章廿一年乙巳改管南京中府事

陳鋗平江伯傳

明憲宗成化廿三年二月庚辰工部奏直沽迤東海口新開沽河道例應三年一浚宜遣官并行巡撫都御史李田等如例起夫六千給以口糧并工疏浚從之

明憲宗  
實錄

明成化間開濟寧西湖自耐牢坡至場場口長九十里汶水入焉改耐牢坡閘名永通

北河續記

成化間有議疏天津水運至宣大省兵餉主事楊讚相度地有游沙不可濬水勢相懸有至二百丈又多天險人力難施遂止朱國楨湧惶小品。

明孝宗弘治元年二月辛亥修儀真瓜洲二處壩下河口及淮安府福興閘。八月丁巳南京守備太監蔣琮奏揚州儀真地方羅泗橋舊有通江港可開閘放船成化間巡河工部郎中郭昇奏濬通河面置二閘潮滿則開潮退則閉船隻經過無復盤費損傷之患時有奸豪侵占牽路於沿河水次起蓋浮鋪爲買賣者恐斯閘一開必致折改往往以河水易洩爲辭欲聽其成昇因力辨浮議條陳五利冀以行之久遠而司漕運者誤聽奸詞擅行築塞致令往來船艘仍前受害近壩居民謂爲得計就於臨河牽路起蓋文天祥祠宇欲使後來不敢輕易改拆而守備指揮亦於閘上擅自蓋亭索取財物乞依前修濬開放及將奸豪侵占牽路所蓋舖屋祠宇俱爲拆改則奸弊可革便利可興工部覆奏命巡撫官會同總兵官從公勘議以聞明孝宗實錄。

明孝宗宏治二年四月丙午修濬沱河白馬口及近城隄共三千九百餘丈明孝宗實錄。

宏治二年河失故道泛及汴堤巡撫大臣具疏奏聞事下工部集議舉可以治水者令刑部左侍郎白公昂居南京兵部僉以其名對詔可乃改公戶部遣人特敕賜之以行公受命乃言河患甚急非臣一人所能獨治唯郎中婁性爲臣屬官其才可任詔亦可於是婁君往受公謀畫以河舊自歸德府之欽

馬池東入睢水。經宿州靈璧至宿遷小河口入泗。唯睢淺隘不能受。故其勢瀰漫橫溢。并及永城、夏邑、蕭縣、碭山、睢寧等處。其治之無緩。婁君以爲然。乃協謀于巡按憲臣。命鳳陽知府章銳相其便宜。以興工役。而推官李渭、宿州知州萬本分行治之。自宿遷而上。至歸德而止。並加疏浚。使淺者以深。隘者以闊。其旁民居田畝悉築堤以護。其崇一丈。又於符離橋南鑿月河一道。長五百丈。闊十丈。深二丈五尺。沿河置減水閘七。及浚渠一。皆爲防河計也。凡役工夫三萬人。經始於三年之夏五月。至秋八月而畢。

宿州志

吳瑞字德徵。成化乙未進士。宏治己酉歷工部郎中。治濟寧以南河道。值久旱。舟膠不前。公知之。兼程抵任。相宜從事。鑿新河。浚舊河。增壩閘。時蓄洩水通而舟前。軍民稱便。高郵甓社湖風濤覆舟。舟人多溺死。公度傍湖田鑿複河。延袤四十里。遇風舟由複河可免覆溺。功成而田賦額存。民患之。同事者議撥荒田補賦。公以爲非便。上疏乞蠲除下戶部議。卒如公疏。至今利賴。辛亥以疾乞歸。

黃雲標吳郎中墓志

明孝宗弘治三年二月辛卯。疏浚直沽迤東海口。并新開沽一帶河道。十一月癸未。侍郎白昂奏處置河道事宜。乞令揚州府管河通判常居瓜洲。總管閘壩。不許回府營幹他事。南北直隸山東府州縣管河官。令其沿河居住。管理河道。不許別有差委。其兗州府通判。則令常居南旺分水地方。專管撈淺并提調各閘。若山東布政司勸農參政。則令兼管河道修理疏濬事。下兵部覆奏從之。

明孝宗實錄

白公昂見高郵之甓社湖風浪時作多覆舟或舟觸岸輒壞議卽其東開複河以避其患河成舟安行無險名其河曰康濟人思公惠別名白公堤吳寬白公傳。

白公昂視運道自山東抵揚州議所以濬治時監察御史孫君衍工部郎中吳君瑞董河事與巡撫右副都御史李公鼎漕帥署都督僉事都公勝署都指揮同知郭君鋐合議高郵州運道九年里入新開河湖東直南北爲隄舟行其下自國初以來障以椿木固以磚石決而復修者不知其幾其西北則與七里張良甓社石臼平阿諸湖通縈迴數百里每西風大作波濤洶湧舟與沿隄故椿石遇輒壞多沉溺前此董河事者嘗議修湖東鑿復河以避風濤便往來不果行今欲舉運河便利宜莫先於此者白公議運遂相地興工開鑿起州北三里之杭家嘴至張家溝而止長竟湖廣十丈深一丈有奇而兩岸皆壅土爲隄椿木磚石之固如河岸首尾有閘與湖通岸之東又爲閘四涵洞一每湖水盛時使從減殺焉以三年三月始事凡四閱月而成自是舟經高郵者人獲康濟白因采衆議聞之上名曰康濟河

劉健高郵州新開  
康濟河記略

四年漕運總兵官都勝請濬揚州揚子橋灣頭河道發丁夫萬餘渠中掘得都巡檢漢壽亭侯都統制觀察使印四顆南河全考

明孝宗宏治五年六月己未南京戶科給事中羅璽等應詔言五事一理漕河金溝淺之阻宜於大河西

岸開河避之。南旺湖之阻宜於孫村西岸開河避之。八月丙寅，惜薪司左司副何鼎奏：通州倉貯糧一時權宜，初非經久。軍士不便於關支，警急不便於防守。請於都城隙地增置倉廩，移通州倉糧於其中，且請修濬大通橋以東石閘河道，令漕舟直至橋下，以省轉輓之勞。戶部會議以爲京倉之建固善，但時詘未可舉。贏河閘之說果便，然後施行從之。九月己巳朔，直隸鳳陽府知府章銳應詔言六事：一、謹河防，沛縣迤北臨清迤南閘座多被附近無籍小人作弊，有於始建之時通同匠作將閘底高起致水搏激，又有陽雖閉蓄陰實泄放，乞敕各處管河郎中、御史等官禁治下所司知之。明孝宗實錄

李景繁字邦泰，儀封人。成化五年進士，歷都水郎中管漕河。時漕塞自儀真入淮，凡三百里舟膠不行。有詔命都御史暨郎中治，景繁獨任之。募夫八萬人，初濬邵伯湖、揚子橋、三汊河，廣皆六丈。次濬廣陵驛東，廣倍於三汊。次濬樸樹灣，廣三倍於初次。濬儀真瓜洲二壩，廣倍於樸樹者三。深於舊者各五景，繁行瓜洲隄上。見東南多沮洳區，問土人此何所也。曰：江湖之匯也。景繁導之自古劄港劉家灣入漕渠。曰：今漕渠非得巨流濟之，舟終不可行。如值江潮時，開壩閘恣江北走，已卽塞之。天復大雨，漕事成矣。土人曰：河亢而江下，非壩障之，則河水悉倒流入江。漕渠益淺，都御史而下咸謂李策非善。景繁曰：江水故平，潮至則悍激耳。潮退水亦易制也。遂下令有司具土暨石，潮至大決壩閘，江水奔漕，水聲洶洶如雷。景繁乃塞壩，閱數日會大雨，漕渠水瀾瀾襄岸，舟乃大行。河經徐州、靈州，將噬居人震恐。景繁

又作石堤。河不能爲害。宏治六年遷山西右參議理儲轉四川右參政致仕。

朱陸櫟山西參政李公傳

明孝宗宏治六年十月戊辰巡撫河南都御史徐恪奏言河南府有伊洛二渠彰德府有高平萬金二渠懷慶府有廣濟渠及方口堰許州有聚祇河渠南陽府有召公等渠汝寧府有桃陂等堰其他故渠廢堰在在有之濬治之功灌溉之利故老相傳舊志所載不可誣也雖行分守等官疏導然事非專委難以責成請敕布政司撫民參政朱瑄專領其事從之賜瑄敕曰邇者官奏河南郡縣踰時不雨輒赤地相望流移載道水利一事所當預圖其河南等府伊洛等渠歲久湮蕪多被王府屯營侵塞及勢要之家占作碾磨雖已行令分守分巡官提督修舉然不責攸歸未免顧此失彼且更代不一難以責成以爾素有才謀不避艱險可委專理爾其親詣前項渠堰再行酌量時宜以次興舉合用木石等料於各該田多有力之家從公勸諭或別爲措置量起所在附近軍民人夫相兼整理選委的當官員人等提調務臻實效無事虛文原置閘處仍舊置立以時啓閉仍將得利之家地土頃畝逐一勘明籍記在官遇旱則官爲斟酌驗畝分水以杜紛爭以後堙塞就令得利軍民併工開濬有潰決之處亦就培築隄防務圖經久其豪強軍民敢有仍前截水安置碾磨占作稻田者依律究問故敕甲申增設工部主事一員管理沽頭上中下三閘先是大理寺左少卿屠勳言沽頭水勢最爲易涸從來嘗設主事管理人以爲便近因革去往來有勢力者不時啓閉民船動淹旬月乞敕工部移文管河郎中常川在彼管理工部覆奏以爲管河郎中自

濟寧以至儀真所經地方千有餘里。若坐守一方。不免顧此失彼。宜仍設主事一員專理。從之。

明孝宗實錄

宏治癸丑河決張秋。甲寅六月公奉敕往治之。加太子太保。乙卯回京。加太保兼太子太傅。

陳鎬平江伯傳

明孝宗宏治七年三月壬子工部言頃河決張秋。命右副都御史劉大夏往治之。今聞河防修築未完。自臨清至沛縣。運河俱淤淺。而管河郎中陳綺方在彼督役。恐不能周歷諸地。本部欲遣屬官有幹局者往會大夏計處。以相其成。遇淤淺之所。則多方疏濬。事畢而還。從之。  
五月卽命內官太監李興、平江伯陳銳同來治河。語在河水。七月乙丑。高郵康濟河成。初南京兵部左侍郎白昂奏。凡高郵湖行船最忌西北風。往來舟楫多致覆溺。若於磚塘內開複河一道。引水行舟可免風濤之患。於是巡河監察御史孫衍。管河郎中吳瑞。因其挑濬并置閘堰。築隄岸以利牽挽。往來稱便焉。  
康濟河於三年告成。見前劉健記。而實錄紀於七年。蓋至是始得聞於上也。十月戊寅副使楊茂元奏。山東連年荒旱。今歲積雨爲災。兼修塞張秋決河。供給不貲。差科繁數。請取回鎮守臨清右監丞李全別用。兵部覆奏。謂臨清鎮守官嘗取回別用。一旦復設中外駭訝。宜從茂元所請。凡在臨清內外供給亦請悉從節省。上曰。臨清地方亦須用人鎮守。李全不必取回。餘如議行之。十二月壬申陞山東布政司左參政張縉爲通政司右通政。提調沙河至德州河道。太監李興等言縉修河有功。今決河已塞。仍須令管理河道。因以命之。  
明孝宗實錄

張縉爲山東參政。宏治癸丑河決張秋。上命平江伯陳銳都御史劉大夏治之。百需悉委調度。甲寅功

成。遂陞其秩爲通政司右通政屬之行河時衝決之餘溝防不治縉相其緩急以漸修浚無所遺。又於決口之東斂石岸數里以圖勿壞。又新築南旺東堤樹柳其上每歲夏秋水溢輓卒得分行無阻至今便之。

雷禮戶部尙書張縉傳

明孝宗宏治八年十月丙寅內官監太監李興平江伯陳銳都御史劉大夏奏河防糧運六事一謂漕河水利全藉山東諸泉每年夏秋瀦蓄南旺等湖至旱乾時以濟糧舟近豪強軍民或決堤泄水以圖栽蒔或阻遏泉源以資灌溉乞照先年侍郎白昂奏行事例禁治一謂南北運河止是汶水分流接濟春夏旱乾水源微細必藉各閘積水以時啓閉庶可行船往往官員隨到隨開以致糧運阻滯乞申明列聖詔旨嚴加榜示一謂管河官員責任太輕事多掣肘乞敕河南管河副使張鼐大名府帶管隄防參政李瓊俱照管河管屯官事例常川巡視聽其便宜行事巡撫等衙門不得有所阻撓一謂安平鎮黃陵岡荆隆口及新築于家店以下隄防俱用人守視水涸則積土備用水漲則防護修築若有重大工程臨時調附近丁夫協同修理一謂大名府所築長隄必須遞年增修庶保經久乞行參政李瓊以所屬隄北人戶編定班次每年農隙之時調發若干增修一月疎放隄北軍屯與寄居人戶亦一體從輕編定輪流調發庶免起夫科擾之弊一謂濟寧迤北南旺開河戴家廟一帶比之他處最要而安平鎮地方土脈疎薄新築決口尤須提調官員不時檢點今自濟寧直抵通州相去一千八百餘里而天津北上逆水尤難若止責興

一人提調恐致誤事乞敕該部依臣等前奏仍分其地爲三南北各設工部郎中一員中間增設通政一員提調下工部覆奏俱從之

明孝宗實錄

喬縉字廷儀洛陽人成化八年進士爲都水司主事督理山東泉源初漕由魚臺至臨清行汎汶沂泗四水其地復有泉百七十餘道會於四水而分流於漕渠爲閘凡三十有六設守津吏以時啓閉爲淺二百二十各有津老以時疏治然歲遠法弛諸泉湮塞或爲豪宦侵匿漕運屢屢告艱縉行郡得堙塞泉四百有奇侵匿泉二百有奇合六百餘泉會於四水漕運大濟工部以續奏改兵部職方歷四川參

議

朱睦㮮作  
喬公傳



# 行水金鑑卷第一百十二

## 運河水

明孝宗宏治九年四月庚子巡按直隸監察御史鄧璋言高郵湖爲運河喉襟之地而自杭家閘迄於張家鎮凡三十餘里其隄面故輒爲風濤所噬屢修輒壞勞費無算宜易以石庶幾可久而新修康濟河西岸亦須預爲營築以免衝決之虞河之北閘仍宜北遷五里許庶舟行可以盡避湖面之險事下工部請如所擬以淮揚廬鳳等府贖罪米價并兩淮運司餘鹽價銀一萬八千兩爲買石之價工匠日食則移文儀真淮安批驗鹽引所并淮揚鈔關勸借商船米給之事畢卽止上從之仍諭令營築期於堅固經久不得虛費物力明孝宗實錄

明孝宗宏治十年十月丙戌總督漕運都御史李蕙請於瓜洲新壩至倉壩一壩至四壩港口儀真鑰匙河及歇馬亭各建一閘以便糧運工部覆奏謂二壩邊臨大江潮長則壩低水高固易於車放潮落則壩高水低殊不爲便莫若於江口總港內各建一閘潮平之時下板蓄水令與壩相平爲便從之明孝宗實錄

明孝宗宏治十二年七月甲子刑科右給事中周旋言六事一通運道南旺湖上游舊有湖數里足以蓄水今其隄岸淤漲又爲豪右所據蓄水無地湖流乾涸有阻糧運乞遣官查勘開濬下所司知之九月

戊午工部覆奏刑科給事中周旋所言疏濬南旺湖事謂管河右通政張縉留心水利亦已得人若又差官不免掣肘宜令縉自行處置修濬爲便從之十月壬子巡按直隸監察御史史戴德奏修築泰州運河隄岸三千二百一十二丈請令所司給役夫工僱之直從之

明孝宗實錄

明孝宗宏治十三年三月乙丑四川平茶峒長官司吏目許澣陳四事一通剝運以蘇漕卒之罷都城西山之水流注通州白河向年浚之通漕運糧船至大通橋矣但以河狹岸峻沙土易壅不能久耳設欲浚堀深廣恐犯拘忌今擬止於河身仍舊惟於舊閘壩上及張灣河口量增壩堰略高數尺引水貯滿其旁各爲減閘以洩潦漲每壩之上置造剝船如浙江省河船式每遇糧船到壩以之遞送每壩倒換無間陰晴民間有能造船裝載者亦聽其便仍於大通橋南一帶創造揚房暫上堆停旋令小車驢羸運入各倉收納甚爲利便竊計車運工價若遇泥濘時每遇一石約銀一錢以剝船運之每船貯米一百餘石每石止錢幾文較之車價奚止倍蓰乞敕該部講議舟車利便定爲經久之規以濟民用下其奏於所司

明孝宗宗實

錄

宏治庚申高郵諸湖堤久且壞總督漕運張公敷華爲深溝數道以緩湖水寶應地多平窪公趣令築

隄隄成而水至

李東陽撰都察院左都御史簡肅張公神道碑

字公實安福人天順甲申進士

明孝宗宏治十四年正月辛未巡撫直隸蘇松等處都察院都御史彭禮等奏鎮江府所屬運河南抵奔

牛壩北至新港壩先因河道淺狹運船俱從孟瀆河大江經行徑抵瓜洲遞年起夫四千往瓜洲壩挑淺近年運河既通亦用夫疏濬又往瓜洲挑淺民實勞於重役乞令本府人夫止於本處挑濬其瓜洲壩一帶運河令江北揚州府屬并附近州縣人夫撈淺庶民無重役之勞事下工部請行總督漕運都御史張敷華議處以聞從之二月乙未停革蘇松常鎮四府導河夫役初管河工主事姚文灝奏於四府每歲均徭外令民納傴役銀以備治水之用謂之導河夫其後官吏因之侵刻民甚病之至是巡撫都御史彭禮以爲言命革之三月辛未修築安平鎮瀕河隄岸從管河通政韓鼎奏也

明孝宗實錄

高貫字曾唯江陰人宏治己未進士辛酉爲都水主事分治三沾諸閘多所興革其大者釐正蕭礪豐沛歲役夫修昭陽湖隄匯泉以濟漕涸又修沾頭南北堤爲橫流蔽民田獲利流移復歸往來怙勢者聞風斂戢隱然爲河渠重者三年改戶部

邵寶按司副使高君墓志

明孝宗宏治十六年正月戊寅工部管理河道郎中商良輔以直隸河間天津等處堤岸水衝決者一百四十一處請量撥人夫用本府原收折色椿草料銀兩支買物料并工修築從之八月壬戌修通州至儀真一帶河道十二月辛酉巡撫山東都御史徐源奏漕河地勢濟寧最高必引受汶泗上源以爲接濟然上源要處莫如洸河其口在寧陽縣堽城石瀨之上元時於此治閘作堰遏水入河我朝因之至成化間以土堰歲費椿草丁夫乃易以石以爲一勞永逸殊不知元漕副馬之貞勒言於石以戒後人切勿

妄興石壩以遺大患蓋土堰之利水小則竭水入洸水大則嚴閉閘口以防壅沙聽水徑自壞壞西流故雖歲一勞民而洸河自通自石堰一成水遂橫逆石堰既壞民田亦衝洸河沙塞雖有閘門壓不能啓洸水不復入洸河之貞之言至是愈驗乞簡命大臣一員經畫拆毀石堰移於上源仍作土堰以復舊規及將洸河壅沙自洸口至濟寧百三十里分工挑濬堽城迤西春城口子衝決堤岸併工修築事下工部會廷臣議以爲難行上令更議工部言本部主事張文淵亦言堽城石壩爲漕運之害欲將壩閘革去使汶水由分水河口接濟南旺一帶河道宜併行勘處上曰運河重事卽差堂上官一員往巡撫并管河等官從公勘議奏聞處置於是工部右侍郎李鍾奉命以行明孝宗實錄

明孝宗宏治十七年二月乙未工部覆奏禮科右給事中王鎮等所言河道事謂河道艱澀有妨糧運不但清河等處而自通州至儀真一帶運河隄岸亦恐淤決請令漕運管河等官各督所屬修濬從之閏四月庚午工部右侍郎李鍾會巡撫山東都御史徐源及管理河道等官勘報源所奏寧陽縣閘壩謂堽城石壩湫口七處水小則從各口順流水大則從壩上漫出一可以阻場淤沙不爲南旺湖之害一可以減殺水勢不慮戴村壩之衝難以拆毀但今三十餘年約損三分之一合趁時修補其近壩上下積沙宜令挑撈舊堽城壩稍東有元時舊閘一座比因濟寧迤北不通漕道故置閘壩開濬洸河引水直入濟寧南流接濟徐呂二處運河東平州戴村社地方汶水入海故道永樂間始橫築一壩以遏汶水盡入南旺

湖龍王廟前分流。南接濟寧。北達臨清。漕河遂通。今據分水龍王廟前起至濟寧天津閘。通計九十里。水共高三丈有奇。緣水性就下。若將洸河濬深。則汶水盡出濟寧南流。徐呂恐濟寧迤北直至臨清四百餘里。仍復乾涸。必梗漕運。又洸河上截。自舊堽城壩口起。至柳泉共九十餘里。廢棄年久。無益運河。不必挑濬。自柳泉起至濟寧。係汶泗諸水會流之處。內四十餘里淤塞者半。應合疏通。導引二水專接濟寧迤南運河。又春城口子外障汶水。內防民田。委是低薄。走泄水利。渰沒禾苗。并戴村壩一道。俱係緊關去處。應合修築。乞將堽城、戴村二壩。令管泉主事歐陽瓊、參政冒政、春城口子令參政崔巖、洸河令僉事袁經、分地督理。仍聽徐源親臨閱視。章上工部覆奏。請令徐源并管河通政韓鼎及管泉主事歐陽瓊、右參政冒政管理修浚從之。十月壬申。總督漕運都御史張縉奏。揚州、淮安一帶運河。七月以後。雨水不通。至今乾淺。恐深冬無雪。來年運船必至阻礙。乞令所司疏濬。及將清江口築塞。淮安府仁信等壩修完。以蓄水利。命所司知之。十一月乙巳。都察院右副都御史王沂卒。沂字希曾。武進人。成化十一年進士。宏治十四年巡撫真定等府。時滹沱河水溢壞民田廬舍。奏請築隄捍之。三疏乞休。不允。卒官。十二月癸未。工部覆議漕運巡撫等官會議事。一復漕河以通糧運。浙江蘇松等處運糧船隻。俱由夏港口并孟瀆河出江。二三百餘里方到瓜洲。其大江中有黃圖等山。風濤險惡。往年糧運。皆由常州府奔牛壩直抵鎮江府京口閘。不過一百五十餘里。經過江面。就抵瓜洲。近年以來。此河淤淺。宜下所司。起附近軍民夫。併力疏濬。

及考究事實修復練湖導引水源以防歲旱仍三年兩次疏濬務成永久之計命河道開座宜亟修治不許遲誤。明孝宗實錄

明孝宗宏治十八年正月庚戌管理河道工部郎中張瑋奏高郵等州縣原設石閘石橋涵洞蓋專爲湖河之計將以時其啓閉而蓄洩水利比來爲近堤人家私立洞口掌理遇水溢則竊自閉塞水消又竊空堤岸以致衝決遺患動費財力不可勝計乞將涵洞築塞每五里改砌減水石閘一座以絕盜決之弊工部請如所奏下巡撫等官勘處以聞從之三月庚子管理河道工部郎中張瑋奏徐呂二洪上流消縮致運河艱阻乞令河南巡撫按等官於歸德州決口等處議開濬築塞之宜令工部覆奏從之。明孝宗實錄

合肥郭鋐總漕運累進都督同知嘗浚通州河二十里置壩令淺船搬運歲省白金數萬當孝宗時鋐筦漕十三年明史

泰陵復土戶部郎嚴經督役轉輸爲艱經言以舟自潞河達天壽山甚徑且安從之省費萬計今不知可行否。湧幢小品

明武宗正德元年二月庚申命工部修築盧溝橋堤岸以去年六月爲水衝壞六百餘丈故也三月丙申添設汶上縣袁家口寺前鋪二石閘以其地在南旺之南開河之北地勢高下懸絕至春末水淺舟膠漕運阻滯故也十月戊申濬滏陽河河舊在順德府任縣新店村之東北源出磁州經永年曲周平鄉

至穆家口會百泉等河北流兩岸皆徵糧地景泰間漳水併入漫流衝曲周等縣地方沿河各築隄以備泛溢成化間舊河淤塞於村之西南衝決爲新河合沙洺等河入穆家口兩岸亦築堤備之宏治初漳水徙入御河民棄堤不復修理近年漳水復入新河西岸地皆渰沒任縣民高陽等以爲言下巡撫官勘處至是具奏言穆家口乃衆河之委請從此先濬乃并濬舊河新河令兩處分流以殺其勢堤岸亦漸加修築庶民患可除工部覆奏從之十二月己巳命戶部郎中郝海工部員外郎畢昭會同漕運參將梁璽修理會通河仍戒其毋得怠緩河起大通橋迄於張家灣有閘數座然地形高下懸絕蓄水甚難卒不能通行舟楫明武宗實錄

洪鍾字宣之錢塘人成化十一年進士正德初由巡撫貴州召督漕運明年就進右都御史蘇松浙江運舟由下港口及孟瀆河泝大江以達瓜洲遠涉之苦甚不能堪甚至於漂沒鍾言孟瀆對江有夾河可抵白塔河口舊有四閘行數十里至宜陵鎮北抵揚州甚爲徑捷急宜開濬爲便從之改掌南京都察院明史稿

明武宗正德二年三月辛酉添設清江浦新壩閘二座議者謂春冬淮水退消清江浦淤淺外河與裏河湖水高下縣隔設壩盤剝舟行未便宜將壩改作內外二閘以時啓閉節水通舟事下工部覆議從之六月辛未復開白塔河及江口大橋潘家通江四閘先是總督漕運都御史洪鍾言蘇松運舟由下港口

并孟瀆河汎大江以達於瓜州者遠涉二百八十餘里往往覆於風浪惟孟瀆河對江有夾河可抵白塔河口舊設四閘經四十里至宜陵鎮再折而北卽抵揚州運河於舟行甚便請開濬如舊至是成 九月丙午戶部郎中郝海工部員外郎畢昭等奏修復大通橋至通州河道及閘十二壩四十一凡用銀四萬五百七十兩有奇議者謂漕粟自張家灣入京僦車甚費故欲開河通船以免陸運之艱然地形水勢高下懸絕河雖開而無所濟也。明武宗實錄

明武宗正德四年九月辛亥後軍都督府都督同知郭鋐卒鋐字彥和其先廬之合肥人初嗣指揮使成化丙午充漕運參將宏治乙卯陞署都督僉事充總兵官總督漕運兼鎮守淮安復進都督同知奉命濬通州官河廿餘里置減水壩令淺船搬運歲可省數萬緡但頗不拘小節傲物自雄人以是短之正德丁卯被召還理府事至是卒。明武宗實錄

明武宗正德五年五月庚午工部議覆漕運都御史屈直等奏揚州淮安一帶湖河設有涵洞等溝減水等閘以便蓄洩總爲漕河計也近管河官多不得人沿河種藝軍民雨多則固閉閘洞不使洩水天旱則盜水以資灌溉欲將前項閘洞如法築塞仍行各管河官自通州直抵揚州有仍蹈前弊者田入官受財者永戍邊衛詔准擬仍命出榜禁約 六月乙酉罷濬沽河之役先是巡撫僉都御史劉聰等建議令工部委官開濬自沽河抵鴻鵠河以便輸運至是工部言其非便罷之 八月庚戌命鎮遠侯顧仕隆充

總兵官提督漕運兼鎮守淮安地方

明武宗實錄

榮靖公顧仕隆督漕疏開會通河司空王公輒申請之至今稱便蓋唐都關中宋都河南皆由汴由渭直達京師未聞有貯國儲於五十里之外者國初僅有神武中衛小倉耳因漕運後期暫將京儲收貯通州以待轉輸因循苟且歲月遷延權勢家車輛日伺而乘上之急牙僧趨起吏胥破冒猶其小者邊關塞堡間道可通倘有爲之嚮道者而輕騎疾馳者卒至或據倉廩或肆燒燬國儲不一空乎且京城大通橋至張家灣一帶河流爲元時轉運通渠也當都水監郭守敬疏鑿通州通惠河引水置閘興工之日世祖命丞相以下皆親畚鍤爲之倡永樂間亦循故道抵京竟爲浮言所沮正德元年始一行之奸徒倡議復中止夫運糧至農務興秋雨降泥濘不得前輿人索厚直費且不貲節浮費以紓民困興國家自然無窮之利杜後世意外不測之虞計無過於此者嘉靖庚戌虜果薄近郊闢通州廩粟賴此舉也而同人咸服公之淵遠大略云

謝廷諒謹述侯顧公傳

明武宗正德六年五月辛亥革慶豐通流等閘新設閘夫及剝船以工部奏河爲沙淤剝運不便也十月丙辰戶部議奏近年運船爲流賊焚劫以致國賦虧損貨物踴貴今日勢未可計日乎恐饑饉流移之人又復竊發宜如前議遣大臣整理河道凡有補於漕運者悉聽經畫因舉捕盜都御史陳天祥漕運都御史張縉及蘇松巡撫張鳳可分任詔東昌以北屬祥徐州以南屬縉不妨原職東昌至沛縣屬鳳

明武宗實錄

錄

葉天球字良器婺源人進士知東昌府府北有減水閘蓋洩聊堂莘三邑流潦入運河者也歲久閘圮

淫雨漫漶廣沒民田公請以椿草折銀復建之害由此息調簡登州歷四川參政

呂柟作公  
墓志

明武宗正德十二年七月壬辰大學士梁儲等言今年四五月以後各處水患非常鳳陽臨淮天長五河盱眙等縣軍民房屋盡被衝塌田野禾稼淹沒無存老稚男婦溺死甚衆淮揚等處爲南北襟喉之地自儀真以北至於清河遠近一望茫茫無畔岸房屋坍塌人畜漂溺難以數計淮安新舊城內駕船行走居民半栖船上河堤決口阻壞船隻後幫糧運無計前行京城內外順天河間真保等府驟雨連旬數十年以來所未有者通州張家灣一帶彌望皆水衝壞糧船漂流皇木不知其幾疏入不省八月戊寅巡按直隸御史吳闇言長蘆濟寧諸處沿河夫役本以備疏濬修築之用及至冬月寒凍不用其力乃徵椿草銀其法未爲不善但因循既久實去名存欲乞今後沿河夫役量留三分聽用冬月仍徵椿草餘七分官收其直管河副使以時督令所屬收買備工公私兩便又見通州至天津河道淤塞夫役逃竄盜賊竊發奸弊多端蓋由其地軍民雜處官無專職所致乞照成化年例添設順天府通判一員卽河西務爲治所專治天津一帶河道夫役兼捕盜理訟以安畿甸疏下工部覆議皆從之

明武宗  
實錄

明武宗正德十四年正月乙巳命工部管河郎中畢濟時會山東巡河分守等官疏濬南旺一帶河道時

淤墾者八十餘里。運船滯不得通故也。三月丁未修浚運河。先是都御史臧鳳奏近年以來常州一帶河流漸微。高郵諸湖水溢堤決。徐北兩岸渰沒。南旺上下又復淤淺。漕舟遲阻。職此之由。乞令總理河道并巡撫管河等官及時挑濬修築。工部議覆從之。仍敕都御史龔宏督其事。明武宗實錄

正德十六年漕運都御史臧鳳請修復五塘灌民田資糧運管河郎中楊最奏寶應湖極險當准高郵康濟河事例修築越河以免沉溺。按五塘儀真陳公塘江都上下雷塘小新塘句城塘而寶應越河則御史王鼎聞人銓員外范韶按察司仲本皆以爲言。萬曆十二年始行開挑焉。河南全考

正德十六年六月丙戌。世宗已登極矣。工部都水司郎中楊最言寶應縣范光湖西南高東北下往來糧運等船入湖行三十餘里始出東北堤岸去湖面僅三尺許每雨潦風急輒至衝決不惟糧運阻礙兼鹽城興化通泰等州縣良田悉遭渰沒請如昔年刑部侍郎白昂修築高郵康濟河例專敕大臣一員加修內河仍將舊堤增石積土以爲外堤一勞永逸可保百年無患是爲上策其次莫如照湖壘密次椿柵數層以爲備塘抵障風波而舊堤重加修葺亦可支持數年若但如年例修補漏缺苟冀無事一遇淫潦驟發卽無所措其手足策之下也疏上用其次策。楊最字叔之·射洪人·正德十二年進士七月庚申南京給事中陳江上言三事一恤民隱言儀真以北張家灣以南諸瀕河地方疲困已極復被水災宜加優恤令民無出今年租稅下戶部復言瀕河諸郡詔書已減半稅不得悉蠲致虧國計上是之九月辛亥工部覆遮洋運糧指揮王瓊奏

直沽東北有新河以轉輸薊州所司玩愒不及時疏導河流阻澗必候潮至舟乃可行以致邊關糧餉往往告匱請敕管河郎中及天津兵備副使親督所司濬使深廣以通歲漕從之

明世宗實錄

明世宗嘉靖元年正月壬戌命主事江珊等督理新河工程先是海口淤塞漕舟從天津出海復折入梁河而達薊州道遠水湍舟數爲敗議者謂直沽東北岸有二道一曰新開一曰水套北接梁河徑四十里可以疏濬成河改由北道無涉海之慮謂之新河行之天順間民大稱便歲久湮塞漕臣以爲言工部覆議於治河郎中之外別委清廉主事一員會官督濬疏珊名以請從之二月己亥兵部覆管河郎中畢濟時疏一言臨清以北沿河所屬半爲軍屯今軍屯之地舖舍盡毀官柳盡伐堤岸不修河洪不濬軍民船泊盜劫爲常皆爲武職廉勤者少而撫按又委以別差軍士缺伍者多而丁壯率編以他役遂視河道爲泛常耳今宜依軍政考選例擇廉勤指揮一員專理河道一言南京進貢快船宜遵明詔裁定數目申明禁例不許勒抑夫錢拒閑閘座阻撓運道詔從之秋七月乙巳朔塞東鹿城西滹沱河決口築護城隄修晉州紫城口隄成九月乙卯修撰唐皋疏言比見運河地勢高其水易涸丁夫挑淺沿岸挑泥是以隨挑隨淤終歲不休宜倣嘉湖取淖壅桑之法以舟運泥至近岸別令人轉運務去河灘遠則一歲之役可免數歲勞又山東泉脈甚衆頃管河官類多轉委於人疏導無方以致泉流散漫不入於河乞敕分司主事親督其役如法疏濬庶衆流成川亦運道之一助也事下工部議覆從之丙辰南京貴州道監

察御史譚魯奏言河南山東修河人夫每歲以數十萬計皆近河貧民奔走窮年不得休息請令管河官通行合屬地方均派上中二則人戶徵銀僱役便工部覆議從之十一月丙午戶部上言河道通塞關係漕運請預加經理爲來年計仍申明禁約進鮮等項船隻及內外官員有倚勢阻撓者參奏治罪上然之命亟如議實行十二月乙酉戶部覆提督漕運總兵官楊洪奏言今運道淤淺查得閘河白河一帶各有額派挑淺夫役官司因循廢弛以致漕舟困於起剝軍吏因而蠹耗請行總督河道及管理泉閘諸臣時時臨閱淺處督工疏濬仍令所在軍衛有司驗視漕舟修補破敝以備後運從之明世宗實錄



# 行水金鑑卷第一百十三

## 運河水

明世宗嘉靖二年三月庚戌御史向信言大通橋至張家灣舊有廣利等八閘今宜修復以紓民陸輓之苦又濟寧至臨清在在有淺而長溝靳家口尤甚宜於兩處建閘以時蓄洩工部議行河道侍郎相度以聞從之五月丁亥總理河道侍郎李瓚以天旱水澀漕舟不通自劾乞休不允庚寅儀真江都二縣有官塘五區築閘蓄水以溉民田後豪民規以爲業古蹟廢壞真揚之間運道梗阻御史秦鉞請浚之部覆得旨命總理河道侍郎及管河郎中相視修築占種盜決者處以重法仍追地租入官十二月辛丑裁革湖陵沽頭金溝謝溝新興黃家等八閘官吏量存溜夫添設長溝淺靳家口閘明世宗實錄

明世宗嘉靖三年春正月戊子把總運糧指揮使劉翹乞挑濬海口新河以便漕運工部覆議從之十

二月壬寅總理河道侍郎李瓚言前年河決安平故開北河以殺水勢中間建閘四淺鋪二十設閘官四員閘夫二百二十名淺鋪夫二百名今河歸故漕前項官夫並宜裁省工部覆議從之明世宗實錄宗器漢州人瓚字丙辰進士歷戶部

尙書提督倉場

明世宗嘉靖五年六月丁卯工部郎中陳毓賢言揚州寶應縣范光湖爲糧運必由之路湖四面甚廣水

勢瀰漫僅以三尺之隄障之一旦積雨水發則橫奔衝決不惟阻糧運而河隄以東田土俱成巨浸此第一患也臣以爲障水固所當先洩水亦不可緩請於河隄以東修築月河以分水勢如工費浩繁財力有限則請自淮安而下自寶應至高郵建平閘數處以洩其流亦中策也得旨令治河都御史章拯督漕都御史高友璣會議相度果開築月河有益卽定計爲之毋惜小費明世宗實錄

是年御史戴金請濬隄下久壅河道按子嬰溝接潼河下廣洋湖長沙溝通官莊亦入廣洋湖劉家溝通瓦溝溪望直溝出官河三里溝通七里溝出葛頭溝寶應縣東門外起至流星溝君師廟起至章思蕩葛頭溝起至射陽湖以便泄水以通舟楫南河全考子嬰溝在寶應縣南六十里子嬰鋪北西通運河北接潼河潼河在縣東南六十里西南接子嬰溝東北入廣洋湖廣洋湖在縣東南五十里射陽湖在縣東六十里卽射陂也自固晉至喻口白沙入海湖西至固晉屬山陽東至上射陽屬寶應

明世宗嘉靖六年三月庚辰漕運都御史高友璣疏言徐邳下至清河乃運道所經實北南喉襟要地頃年以來黃河泛溢地方遭患民不聊生近日沛縣官河流沙壅漲船隻難通該御史等官戴金等奏稱黃河入淮之道有三渦河白河二道爲上源年久堙塞其水併入汴河是以徐州之南獨受其患若小壩至宿遷小河一帶并賈魯河駕鷺口文家集壅塞去處逐一挑浚則趨進之水不止而徐州水患可以少殺十月戊午御史吳仲言通州運河元時郭守敬創建已有明效先朝漕運名臣平江伯陳銳等亦累以爲請今通流等八閘遺蹟尙存原設官夫具在因而成之爲力甚易而權勢罔利之家從中撓之或倡風

水之說或謂絕澠民之利皆不足信誠令閘運歲可省腳價二十餘萬又漢唐宋時漕皆從汴渭直達京師未有貯國儲於五十里之外者今令京軍支糧通州率稱不便而密雲諸處皆有間道可通設虜因鄉導輕騎疾馳旋日可至燒燬倉庾則國儲一空京師坐困此非細故請以臣言下戶工二部定議修浚倅舟夫略運百萬試之與陸運兼行俟次第就渠徑達京倉此興無窮之利而杜不測之虞於計便上曰疏濬閘河誠轉漕便計自永樂以來屢議修復因大小臣工不肯實心任事以致因循至今爲奸人嗜利者所阻今轉輸日煩軍民交敝苟有息肩之策何憚紛更戶工二部其各委堂上官一員會通運官及御史吳仲等親行相度地形計處工力以聞若大事可成則勞費不足計國計有補則浮言不足恤如有奸豪阻議之人聽廠衛緝治如律因命戶部侍郎王軌工部侍郎何詔及御史吳仲等董其事至是軌等言地形從大通橋至白河高可六丈若大興工浚之深至七丈通引白河則漕船可直達京城諸閘可盡罷此永久之利然未易議也爲今之計惟應修浚河閘然從通流閘經二水門南浦土橋廣利三閘皆衢市閘中不便轉般從溫泥河濱舊小河廢壩西不一里至堰水小壩誠修築之令通普濟閘則徑易可省四閘兩閘轉般之難閘壩皆宜添設官吏人夫守視臣等竊計修閘浚渠築壩之費當用銀一萬五閘置船各六十一船日運糧萬石造船之費可一萬五百通漕糧二百三十萬石歲腳價可十萬三千五百若糧多船少聽以車轉水陸并進通軍事易竣亦可早還宜令戶工二部各舉屬官一人兵部推都指揮一人

充參將專司修理轉運諸務會同巡倉御史各奉敕行事募軍餘萬人作之務在堅久每閘壩各置公廨其費取之修倉餘銀巡倉贓罰及所省腳價其木石等取之各廠又言通州京輔重地軍民坌集亦當積蓄以安人心不宜過慮自起驚疑河源自西山經流大內至大通橋或旱澆乾溢啓閉通塞亦非外人所能與候上裁擇時上意已決命戶工二部亟如所擬舉行卽於今冬具儲工料以來春興工仍敕諸臣協心共事勿偏執異同致妨經國大計壬寅總理河道侍郎章拯言西水支流原自豐縣漫溢至沛橫貫運河衝決隄岸其勢徑趨昭陽湖以此運河南流勢緩停淤沙泥幾與岸平今故道疏築已通而東岸勢卑土疏善崩秋水泛漲恐復淤決乞僉復蕭碭原額淺夫專令在沛時常防守仍令徐州管河判官督同沛縣主簿閘官往來閱視隨宜疏築凡遇秋水時至徐州管洪主事量調徐呂二洪夫役協力修濬其管河等官有能平治得宜三年無患者超格賞擢工部覆奏從之十一月乙亥朔禮部尙書桂萼上疏稱修通惠河不便請改修三里河上以其疏下大學士楊一清張璁擬票一清言通惠河因舊閘行轉搬之法可以省運軍之力宜斷行之勿爲浮言所阻璁亦言通州河道經元郭守敬修濬今閘壩俱存臣聞京城至通州五十里地形高下纔五十尺以五十里之遠近攤五十尺之高下無所不可誠濬甃山源以蓄諸山水引神山泉以合下流之歸迂回以順其地形因時以謹其濬治此一勞永逸計也成化十二年平江伯陳銳建議開修此河憲宗皇帝命大臣督理而河道已通運船已至城外適有黑眚之異惑於訛言

遂止識者恨之今欲開修此河因仍舊道誠易易耳況一舟之運約當十車每年運船已到則令剝運新糧未到則令剝運通州積糧庶京師充實永無意外之患矣至桂萼所論開修三里河則費廣而見効難非直有地理之忌而已也上深然璁言因諭一清曰覽卿疏具見忠愛朕居深宮外面事情何由得知卿輔導元臣正當直說庶不失政事萼所奏必有惑言伊輒聽信不但誤了朝廷之事亦失了大臣謀國之意彼疏朕看數遍亦知不可欲直拒之非待大臣之禮故諭卿等票來行意在其中矣我孝宗伯考時已命整理開修此河不意當時黑眚爲異夫黑眚之起非爲修河蓋灣裏住的鄉民正恐失利乘此爲言俗叫爲嘛唬卒被破事當時若有一識事剛正之臣告我伯考曰黑眚之異原非修河道所招奸詐之徒乘機營利惑及愚民不可墮其詐計伏惟剛斷而行之如此伯考豈無聰察哉前日勘官回奏停當已有旨待春暖興工朕亦恐有言者左說破事而萼卽爲首也夫萼與璁替朕有所不逮功爲等也若論識時利達事體則萼以十不及璁二三也朕欲降一密旨與萼云昨卿奏開河一疏足見謀國至意但前已有旨了況先朝亦有成算不必改議恐起營利者擾事卿疏朕留覽未知可否復與卿計一清言聖裁允當遂命如前旨傳行濬天津海口新河明世宗  
實錄

是年漕運都御史高友璣於瓜洲西江嘴置瓜口閘時監工者不慎致工人受賂築砌不如法鎮人復倡爲泄水之說閘竟不用考

濟寧河溢公總理河道欲疏支流殺悍猛築長隄防衝潰然後浚曹沛自無淤阻費十萬緡可足考據精詳與喜事臣議弗協天旱公禱泰山既降甘雨寧陽泉忽湧數尺南旺膠舟乃行工部請別遣重臣特陞公本部右侍郎兼僉都御史於是白河孫家渡工始興明年夏潦驟發公以人言乞罷廷推盛公應期代之迎合無成復代潘公希曾如公議乃底績王大用撰工部尚書朴菴章公墓志章公拯也

明世宗嘉靖七年正月乙酉河道都御史盛應期言沛縣迤北河道地形庫下泥沙易集以故累濬累塞今詢之官民盛稱昭陽河東自北進汪家口南出留城口約長一百四十餘里可改運河北引運河之水東引山下之泉內設蓄水閘旁設通水門及減水壩以時節縮較之挑濬舊河勞逸遠甚且可爲永久之利計用夫六萬五千人於山東南北直隸相近府分徵調仍量行僱募用銀二十萬兩有奇取之兩淮鹽價而以山東官帑所貯佐之期六月而畢章下廷臣雜議皆言應期議是上乃命應期及春和督官興事且誠各巡撫等官同心協力共成大功應期請乞管河郎中柯維熊員外王大化於趙皮寨孫家渡南北溜溝等處役工挑濬以殺上流之勢武城迤西至沛縣迤南修築長堤以防北潰之虞俱從之四月庚午吏部等衙門尙書桂萼等以修省會議條陳十二事一言近以運河淤塞邊報嚴急議遣大臣提督勞費特甚宜並取還邊墻諸務止令守邊官計處俟年豐舉行新河夫盡數歸農而以河南山東京操班軍暫借一季免其赴京分遣修築六月乙巳御史吳仲郎中何棟尹嗣忠都指揮陳璠奉敕開濬通惠河

成仲等因疏五事一時疏濬以通運道言大通橋起至通州石壩四十里地勢高下四丈有餘中設慶豐等五閘蓄水今已通運然地勢陡峻土皆流沙夏秋大雨河流暴漲衝決淤塞所宜預處請行管閘主事坐守閘壩往來巡視一遇衝塞隨卽挑築晝夜撥守毋致盜決仍將閘運扣省腳價銀內每歲量支千兩寄通州庫隨便興工如不足仍聽奏討一專委任以責成效言大通閘河止設主事一員又兼他務不無妨廢請令住劄通州專理河道通州添設管河同知或判官一員所管起大通橋盡鮮魚閘合行錢糧歲支扣省腳價凡應行事宜及委用官員悉聽管閘主事處分仍敕戶部歲三月初旬遣郎中或員外一員奉敕住通州會巡倉御史沿河往來催督天津以北糧運驗算輕賚銀兩待運完日造冊奏繳一改閘座以防水患言夏秋久雨西山水發皆由閘河東流閘門隘小水泄不及遂至泛漲衝決堤壩此出不測非人可爲原議障水石壩今已修成又通流閘在通州城中市井環繞積水丈餘又西水關久浸水中俱非長便舊有慶豐上閘平津中閘今已不用拆運通州西水關外創造石閘一座將前石壩南移二十餘丈改造石閘一座平時閉板水落啓洩疏入上以運河先朝屢經勘議未得成功仲等僅四閱月而就緒嘉其勤勞命科道官查驗行賞所條事宜部議亦稱便上悉從其所言壬子御史吳仲言通惠閘河成功不易持久爲難請留原差工部郎中何棟督理三歲一更聽動支餘銀扣省腳費僱倩軍民夫役挑濬上流改造閘座嚴防山水泛漲法禁盜決河防隨船帶石包岸逐年栽柳護堤墊橋道補蓋廠房修貯剝

船及兼理天津一帶河道又各河道俱設有司水利官請於近地所屬勤敏者改陞一人或同知或判官  
填註通州專管河道其督運戶部郎中尹嗣忠請如侍郎王軌疏仍留坐守催督終始其事以後不必專  
設率歲二月請差郎中或員外一人奉敕前去會同工部郎中巡倉御史督運完日回京及將來剝船編  
入漕司必須設官專管方爲久計疏下戶工二部覆如其議上曰然河工方就計非親其事者不可責成  
何棟令住劄通州往來督理及天津一帶軍衛有司官事干河道俱聽委用毋得阻撓歲滿勞著陞改職  
銜照舊行事吳仲仍提督京通等倉兼督理通惠河與何棟尹嗣忠陳瑤等協心共濟尹嗣忠督運糧回  
部歲差如議改軍自運及添設專官俟漕運會議具奏七月庚辰總理河道都御史盛應期疏濬昭陽  
湖東一帶新河工已及半會旱災修省言者多謂新河之開非計詔罷其役併罷諸治河官應期請俟秋  
深果舊河通流則已如仍有阻礙須終新河之功爲經久利戶部請從之且言河道總理官不可罷得旨  
應期回京別用另選忠誠才望大臣代之竟罷新河之役九月庚午朔罷總督河道右都御史盛應期  
管河郎中柯維熊俱冠帶閒住初應期奏開新河維熊贊之甚力朝議罷役應期請緩一月毋停工保其  
終事維熊復甚言其不便應期亦上疏自理部議兩罷之應期果毅任事旣奏開新河因謬議紛起欲急  
於成功以杜衆口遂以嚴急興怨功未成而罷然其所開新河後三十餘年卒循其遺跡疏之運道至今  
蒙利不淺也己卯刑部尙書胡世寧疏言新河之議首倡自臣旣而盛應期先因僉事江良材具疏偶

與臣合。遂爾奏報爲國家興莫大之利。第初議限以六月而應期勇於集事。功僅四月已十成八九。遂致官吏嚴急。怨讐煩興。朝議以安人心爲重。亟止其事。尋命應期與維熊同罷。彼維熊之反覆變詐。陰陷大臣。私誤國事。其罪當不止此。至於應期平日執性過嚴。所至物情不協。非遇寬大之朝。不止罷黜之罪。今得此非不幸也。但自古國家每儕大事。必追責首議之人。應期祇因臣妄言新河之謬。得罪以去。則是不惟誤彼徒費工力。而使後任事之臣。盡以應期爲戒。皆臣一言之所致也。請與應期同罷。或更加重擬。或薄示降調。使天下後世皆知我皇上馭臣賞罰之公。愚臣死不敢欺之義。上報曰。覽卿所奏已悉至情。但應期受命治河委任非人。督責過嚴以致怨聲載道。不能無罪。業已處分矣。卿宜安心供事不必引咎自

責。

明世宗實錄

是年春正月鑿新漕不成。先是河決曹單城武陽家口梁靖口吳士舉庄衝雞鳴臺。沛北皆爲巨浸。東溢逾漕入昭陽湖。沙泥聚壅。運道大阻。刑部尙書胡世寧上言。運道之塞。河流致之也。請先述治河之說。河自經汴以來。南分二道。其一出榮澤。經中牟、陳、潁至壽州入淮。其一出祥符。經陳留、睢、亳至懷遠入淮。其東道一道。自歸德宿虹出宿遷。其北分新舊五道。一自長垣、曹鄆、出陽穀。一自曹州雙河口出魚臺、場場。一自儀封出徐州小浮橋。一出沛縣飛雲橋。一出徐、沛之間。境山之北溜溝。此六者皆入漕渠。而南匯於淮。而今且湮塞矣。止存沛縣一河。勢合岸狹。不得不隘。所以豐沛徐州漫爲巨浸。溢入沛

北之昭陽湖以致運道壅淤然壅淤既久勢必復決決而東南有山限隔其禍小決而東北前宋澶州之決郡縣數十皆灌禍不可言矣故今治河當因故道而分其勢也其陽穀魚臺二道勢近東北不可復開而汴西榮澤孫家渡至壽州一道決宜常濬以分上流之勢自汴東南源出懷遠宿遷小浮橋溜溝四道宜擇其便利者開濬一道以分下流之勢或恐豐沛漫流久而北徙欲修武城以南廢隄至於沛縣之北廟道口以塞新決而防其北流此亦一計也至於運道臣與李承勳同行擬議莫若於昭陽河左滕沛魚臺之中地名獨山新安社諸處別開一河南接留城北接沙口闊五六丈以通二舟之交來冬水結船止更加濬闊以爲運道此其上策也至是河道都御史盛應期上言宜於昭陽湖左別開新渠北起姜家口南至留城一百四十餘里以通漕舟其說與世寧合工部尙書章瑞覆議從之乃集民夫萬人分標開鑿已而其地居河上流土皆沙淤功弗就應期日夜止宿水次益卒數萬治之百姓滋怨言者謂糜財用勞民力功必不可成上怒奪應期官歸田里而新渠之議寢焉以侍郎潘希曾往代踰年豐沛單三縣隄成明紀事本末  
世寧請開新河疏  
具載山東全河備考者爲詳爲錄之疏曰臣聞河流遷徙不常歷周至今未有久治而不決之術國家救災恤民亦未有聽其決而不治其本法也河自經汴以來南分二道自汴城西榮澤縣經中牟陳頴等處至舞州入淮自汴城東祥符縣經陳留毫等處至懷遠入淮其東南一道自歸德宿州經虹縣睢寧至宿遷出其東分新舊五道自長垣曹鄆等縣陽穀出自曹州雙河至魚臺塌場口出由沛縣之南飛雲橋出在徐沛之中境山之北溜溝出今諸道皆塞止存沛縣一道此正所謂河流合則勢大者而河身又狹則又所謂狹則勢急者所以不得不泛濫橫溢於豐沛二縣徐之半州漫爲巨

其浸近又溢入沛縣之北。漫入昭陽湖以致運道舊河流緩沙壅漸至淤塞也。或恐沙壅積久其地漸高水高趨下禍不可言故言治河當因故道而分疏之。故道雖六其前出陽穀魚臺二道恐其決而東北斷不可開其在汴西榮澤近開孫家渡至壽州一道決宜常濬以分疏上流之勢勿使壅也。其自汴東南原出懷遠宿遷三道及正東如徐州小浮橋溜溝二道各宜擇便開濬一道以分疏其下流或恐曹沛漫流久而北徙宜修城武以南發堤一帶至於曹單等縣黃德賈固楊明等集地方至沛縣之北廟道口築堤一道以寒新決河口并防其北徙此治河急務也若開運道尤在所急然今止宗沛縣以北三十里而不能遂開者以方秋水溢塞處半爲流沙所壅撥沙水中沙隨水勢隨擁隨壅甚難成功或謂乘今冬初水退昭陽湖暫可通船之時預備工力截其上流乾其下土并土排築旬月可開或謂此暫挑沙開築終不可永杜來歲之再淹則宜趁冬水涸水凍船阻照南旺開湖式於昭陽湖中間開河一帶兩岸築堤以通運道比之今塞舊道不增十里之遠而來歲通漕可與舊道二處隨便行舟或又庶河水入湖亦能衝沙壩塞即今昭陽南口金溝舊關處所漸淤可駛臣奉再三計議莫若於湖東岸膝沛魚鄧之中地名獨山新安社等處擇其土堅無石處另開新河一道南接留城北接沙河口二處舊河其間應開不過百十餘里更或隨勢利便各尋近道工力猶省其河新開深則各適地勢論明先止五六丈以通二舟之交行就以其土厚築四岸爲河東堤且防河之漫山水之洩而隔出昭陽湖在外以爲河流漫散之區是則所謂不與水爭地者來冬水結船停更加濬闊仍于彼立一夫廠量撥山東人夫接遞暫寬豐沛之民以稍息咽喉之氣此上策也

應期吳江人以薦起爲都御史總理河道工部郎中柯維熊與之偕時趙皮寨爲上流其地視河高數尺而其土又皆沙也隨疏隨淤久之功弗成坐論免歸河南通志

盛都御史新河之役不可全謂其無功也顧其喜功無漸程役太嚴又忤安仁故爾中止今猶可復也或於汴西濬孫家渡一道汴東南原出懷遠宿遷二道正東出徐州小浮橋溜溝二道擇濬一道以少殺其勢少分其流可也或修武城以南廢堤以防豐沛漫流或修築沛北廟道口堤以防新決河口可也鄭曉音學編餘

應期役丁夫九萬八千開渠。自南陽經三河口過夏村抵留城百四十里。已閱四月怨讐上聞。褫職停工。自是四十年無敢言改河者。乃終嘉靖之世。河之入漕爲梗者六。其決口歷歷在穀亭、孟陽、湖陵、廟道口間。而其害惟庚寅北徙爲大。漕之寄於河而受梗者屢見莫大於辛亥房村之決。大決亦大費。小決亦小費。爲漕故無所惜。特患工之不能久耳。中丞劉天和濬漕河上流使漫流就下以濟二洪爲利。垂十年辛亥壬子間復專治徐淮下流爲漕利亦垂十餘年。而上流積漸受淤。迫而縱橫衝射如乙丑之全河逆行。爲從來河患所未有。事窮則變。於是又有思成公新河之績者矣。全河備考

何棟字伯直。巢縣人。正德辛巳進士。嘉靖七年上命修通惠河。棟升工部郎中。疏鑿故道蓄澑。上流建閘築堤。務圖久遠。甫五月告成。自是糧運直抵大通橋。歲省輸費十二萬緡。上心嘉悅。升俸一級。賜白金綵幣。升右通政。仍督河務。

王用賓撰都察院右都御史何公墓志

嘉靖七年漕運都御史唐龍奏乞於三汊河口儀真上游之地置閘。以盡漕利。

全河全考

明世宗嘉靖九年正月甲辰敕通政司右通政何棟專理通惠河道。棟先任都水司郎中。修濬通惠河閘。工成陞通政。工部言棟治河有成績。宜專任之。以究其用。故有是命。

明世宗實錄

是年秋境山河忽西徙三百步。亂石絕河湍。射下數仞。雖虛舟不得上。有冒險而下者。十覆三四。遠近駭懼。舟戒弗行。公命穿故河廣十步以通水。稍截徙河逼之東。兩涯下埽以漸相屬。及兩埽逼河流激

盪乃決入故河奔放衝滌一夕河廣一倍二三日盡復其舊是役也有風公終新河之緒者有謂當條  
新河之害以聞者公一弗從蓋公之功成上乃詔加公尙書俸級仍總理之十年改兵部右侍郎

潘公希曾

傳



# 行水金鑑卷第一百十四

## 運河水

明世宗嘉靖十年八月壬辰滄州南花園漕河淤阻戶科都給事中蔡經等劾奏都御史李紝身任治河之責既不知先事預防及當此潰決之時復不卽躬臨督理以致事功難成阻滯糧運乞敕諭切責令其速詣決所督率有司與各總運官軍修治事竣仍令據實回奏并查參各管河官員以聞第今阻淺糧船甚多若至灣之日猶拘泥故事京通四六撥派則恐空船回遲來歲漕運復誤矣更乞下戶部酌議暫於今次多派通倉就近便輸其空船令速駕回輕齋銀扣貯太倉或因剝淺費多者聽巡倉御史勘覈補給後不爲例事下戶部覆如經言上從之命奪紝并管河郎中等官俸有差九月己未滄州築月河工成辛未巡按直隸御史詹寬言河堤率以草束土累築而成故堤善崩宜及時加土以障其河洪仍興復絕堤興濟二閘以石甃之時其蓄洩以殺水勢又德州當衛漳滹沱下流稍近鬲津宜便置閘以爲減水之區東兗諸郡所積河道銀足以當石閘之費事下工部請令總理河道等官計處從之壬申工科都給事中趙漢條陳河道便宜六事一濟寧上下河道皆仰徂徠山等處諸泉及諸溝澗皆漕河之委宜以時巡視疏築至汶泗諸河尤當經理一淮揚之間故堰高郵諸湖爲堤以便舟楫頃漸多頽壞而清江浦

爲入淮要路數有淤遏之虞宜便議經久之策工部覆議從之十二月辛卯戶部員外郎范韶御史聞人銓各言寶應縣范光湖爲歲漕必由之道而湖闊水洶患常不測請開築越河一道使舟行河中以免傾覆之患若河堤不堅決之甚易宜建減水閘五座濬赴海渠五條築堤節流以防衝決之虞工部言韶生長湖濱銓昔宰茲縣見聞必審其說當從上是之令總督漕運都御史等官會同勘視計處至當以聞

明世宗實錄 范光湖一名汎光湖在寶應縣西南十五里東西長三十里南北闊十里東北連清水湖南會津湖西通灤火湖灤火湖在縣西南四十里西通衡陽湖南接安宣溪東北入汎光湖津湖在縣南六十里東通運河西北會汎光湖南接高郵界清水平在縣南西

南連汎光湖東會運河西通閩丘溪

明世宗嘉靖十一年二月丙申刑科給事中徐俊民疏言南北咽喉莫急運道茲惟鉅任貴在得人竊見河道都御史李紝漕政不修一籌莫展乞更置得旨紝曠職令閒住紝字廷章固始人宏治乙丑進士二月庚子詔以通惠河脚價銀五千兩修築天津迤北一帶要兒渡黑龍口桃花口等處決口五月辛亥工部覆中軍都督府經歷司經歷趙善鳴奏請濬大通橋至通州運河增添閘座多修漕艎運通州糧入京城以實根本修自都城至儀真運河淺澀自良鄉及涿州達保定河間真定迤南一帶陸路低窪以保轉輸報可庚午太僕寺卿何棟言奉旨相勘河患大端有二一曰滹沱河發源山西渾源州會諸山之水東趨真定由晉州紫城口南入寧晉泊會衛河入海此故道也但晉地形西高南下因衝決紫城口東溢而東鹿深州諸處奔爲巨浸茲欲築此決口須起藁城縣張村至晉州固堤築堤一十八里高三丈閘三十丈多用椿

木密栽榆樹務求堅厚足禦奔湍然後挑濬河身三十餘里障水南行使歸故道一曰鴨河沙河磁河俱發源山西五臺山會諸支河之水至唐河蘭家圈合流入河間府東南任丘霸州天津入海此故道也但河間府地形東南高東北下因衝決蘭家口東北溢而肅寧新安諸邑罹其墊溺茲欲築此決口計六十丈浚河故道自劉家口至陵城淀計三百餘里通計二役工力浩大遺民方救死不給官帑又散賑已竭且大水將至興役爲難二麥被野蹂躪可惜大工未可遽議宜先令府州縣官隨地修浚以免暫時水患俟酌處財力有餘然後舉前二役又看得涿州有胡良河自拒馬河分流至涿州東入渾河良鄉有琉璃河發源磁家務潛入地中至良鄉東入渾河皆其故道近以渾河沙壅阻塞二河下流遂致平地湮沒瀰漫至數千餘頃勘得下流壅塞之沙僅四五里用力頗易計費不多所當亟爲疏浚臣請以胡良河委涿州知州張經綸琉璃河委興州中屯衛指揮李思恭各給夫一千名責之月終報竣以二臣才力必能集事工部覆奏得旨允行七月己巳戶部郎中徐元祉疏言元祉受命賑濟保河二府以地方災害由水患未消遂言順天真定保定河間四府河患謂以大分言順天利害相半真定利多害少保定利少害多河間卽全受其害蓋水之害有二一曰河二曰淀河本以洩水今下壅而不宣淀本以滌水今上溢而不受洚洞無涯民瘼特甚宏治正德間蓋嘗築建長堤排塞決口水悍土鹵隨卽潰敗爲今之計惟有疏濬而已臣周相原隰備訪僉議敷陳疏浚六事一濬本河以開其源蓋今所稱九河悉自西山而來南與

滹沱合則侵真定諸郡。北與白溝合則侵保定諸郡。所謂本河也。濬之使河身寬遠足納衆流。乃今日治水之第一義也。一濬支河以分其勢。蓋九河由紫城口入大清河。涅槃口入文都村。蘭家口入白洋淀。楊村河入章哥窪。所謂支河也。濬之使河身直遂以納細流。則水勢分矣。一濬決河以防其漸。蓋九河當其安流。自成一道。本支二河受之有餘。陡遇急雨連澍。岸口四衝。所謂決河也。宜視水勢所便。每衡量留一口。深濬順導數處。共成一渠。以殺湍急。且杜淫溢之漸。一濬淀河以統其宗。蓋九河溢於既滿。停於不洩。壞田疇爲淵藪。所謂淀河也。濬之使淀淀相通。達於本支等河。庶下有所洩。不至氾濫。一濬淤河以順其性。蓋九河東逝原有故道。或爲泥潭之凝結。或爲豪強之曲防。所謂淤河也。宜依故道疏之。使高者下。下者通。占阻作梗者抵罪勿貸。一濬下河以接其流。蓋九河一自青縣出。一自丁字沽出。其於二流相匯者。如苑家口尤甚。皆所謂下河也。濬之使本支等河兩涯不滯。直達於海。則治水之功成矣。以上數事。不過事必專其責任。然後一行真定府。先濬滹沱河。以保障城池。培植要路。次晉州、束鹿、武強等縣。於紫城、涅槃等口。聯絡河間府獻河等縣。於竇村單橋淮鎮。遡流窮源。俾水循滹沱一派。以出青縣。一行保定府。先濬楊村河。蘭家口白洋淀。次安州、新雄、任丘等縣。於呂公、月樣等橋。聯絡順天府文、大等縣。於龍灣、張青、苑家口。俾水引沙窪一派出丁字沽。斯可以抑九河之患。而民害可息矣。下二部議覆。四府河患先該太

僕寺卿何棟勘奏障濬工程浩大民困未紓須料才力有餘乃可興工已奉俞旨今元祉所奏又極詳明夫水害不除則民災終不可免恐不可以財力之謹坐視斯民之溺乞降專敕二道令順天巡撫王大用保定巡撫許宗魯督同各該兵備有司官照依所奏事理履行勘視凡故河淤塞所在遡流窮源通加開濬其一切橫流散漫之水亦須究其弊原順流下導務使趨河就海不可顧此棄彼以鄰境爲壑其諸官豪阻截水利者卽行改正若更抗拒從重參治體勘明白卽畫域鳩夫及時戒事一面具實奏聞詔悉從之癸酉陝西巡撫都御史王堯封奏陝西各邊歲仰食縣官者不可勝數考之黃河運道自汴城入洛河至孫家灣下載陸轉可數百里而達陝州復由黃河經潼關通渭南不四十里抵陝城而陝之金州等處徑湖廣襄陽漢江皆有水可漕誠循此道改立漕卒增置牛車先轉河南湖廣原派臨德二倉米十萬石於金州續改附近陝州等處折糧二十萬石各舟浮車轉而達於陝則可以不煩內帑而用饒足矣戶部覆言漢唐盛時歲漕關中粟數十萬石耳然漢番係議作渠田不欲漕張湯議通褒斜不能漕唐褚朗鑿三門山爲梁而功不成楊務廉又鑿爲棧以輶舟而輶卒多墜死李齊物鑿砥柱以通舟而不能入至候水漲乃上蓋皆更砥柱之險敗亡過半故至呼河中山爲米山謂偃門匠爲無莫而我朝成化間亦曾轉漕二十萬石至陝有斗錢易斗米之費竟不能達今徒愛獲穀之利而不知利之不償其害是揚雄所謂耗十而愛一之說也宜下廷臣會議可否以聞旣而廷臣皆以爲不便罷不行明世宗實錄

明世宗嘉靖十二年八月壬申順天府香河縣郭家莊自開新河一道長一百七十丈闊五十一丈有奇路較舊河近十餘里有司以聞詔管河諸臣亟爲善治并祭告河神明世宗實錄

總河朱裳保運道疏略云宏治以前河分四支若孫家渡、渦河口、趙皮寨、梁靖口近年俱以堙塞而以全河東奔自曹單城武等處徑趨沛縣又自沛北徙橫流金鄉魚臺穀亭口事誠可虞况今漕渠窄隘洪閘束捍以全河入之自不能容惟當分濬以殺其勢今梁靖趙皮幸已疏通孫家渡亦行挑濬惟渦河一支因趙皮寨下流睢州野雞岡正河五十餘里漫於平地注入渦河宜挑濬深廣導引漫水使歸入正河而入睢州張建口起築長隄至歸德州郭村計凡一百餘里以防泛溢仍特疏梁靖口下流且挑儀封於莊村月河入之遠於小浮橋則北崖水勢殺矣其北崖自河南原武縣至山東曹州原有長堤以防東北入海但日久坍塌者多不任衝擊所宜急爲修築兼添築月河以禦奔衝及查河道魚臺其流益北將有越濟寧趨安平東入海之漸議者欲塞岱河口以安運道然以臣計之其可虞者有三水勢洶湧遽難堵塞一也縱令塞之勢益流激夏秋水漲兼恐橫崖決北二也決口既塞徐州上至魯橋沉沙滯積山東諸泉水微運道必淤三也今宜將魯橋至沛縣東堤一百五十餘里相其要害固之以石泄之以壩自城武至濟寧州創築縷水大堤百五十餘里以防北溢魚臺縣至穀亭鎮開通淤河引水入漕以紓其患卽所謂順水之性不與水爭道者也

明世宗嘉靖十三年十一月庚寅總督河道都御史劉天和言黃河自魚沛入漕河運舟通利者數十年而淤塞河道廢壞閘座阻隔泉流衝廣河身爲害亦大邇來黃河改衝一支從虞城蕭陽等縣下出小浮橋口而於榆林集侯家林二河分流入運者俱淤塞斷流不入利去而害獨存明春糧運已迫今宜浚自魯橋至徐州二百二十里之淤塞修師家莊至黃家閘之閘座及行管河郎中主事疏浚諸泉源與運河接濟又請徵調山東河南兩直隸四省夫役及議處工價糧食限各郡縣朝覲官速回任以充委用申明運軍不許多帶貨物以致淺阻復疏請設沽頭閘主事并各閘官吏夫役工部議覆上從之詔以疏通運河係國家急務天和前後兩疏具見盡忠仍賜敕命作急督理一應司府軍衛俱聽節制務刻期完工以

圖永久。明世宗實錄。

公總督漕運至淮會漕塞議者紛紛謂復海運開濟、汝卿謂六月無漕京師困矣姑紓目前之急乃疏

黃河故道固堤岸毋令走洩未幾漕利

朱曉樞撰右副都御史馬公傳。公名卿，字敬臣，林慮人。宏治乙丑進士。嘉靖十一年任總漕。

明世宗嘉靖十四年七月癸未御史曾翀奏漕河自臨清而下汝水與衛水漳水淇水合流北至青縣復合磁、滹諸水經流千里始達直沽每遇大雨時行百川灌河其勢衝決散漫蕩析田廬漂沒糧運請於瀛渤之上流如滄州之絕堤興濟之小埽灣德州之四女樹景州之泊頭鎮各修復減水廢閘股引諸水以入於海則大勢分而不爲害乞敕河臣程督之報可。九月庚申初建西海神祠先是上召禮部尙書夏

言於無逸殿諭之曰西海子歲以午日奉兩宮游宴止行望祀宜特建祠宇言退乃上疏曰禁內西海子者卽古燕京積水潭也源出西山神山一畝馬眼諸泉繞出瓮山後匯爲七里灘東入都城瀦爲積水潭南出玉河入於大通河轉漕亦賴其利比之五祀其功較大宜特祀請於北閘口湧玉亭後隙地建祠以答神貺詔可十二月辛亥總理河道都御史劉天和條議治河事宜其一泗州祖陵其一壽春王墳錄其一近年黃河入運僅利濟魚臺南至徐沛二百里爾自魚臺北至濟寧及臨清五百里間俱賴汶水諸泉之利宜大加疏濬務俾勺水悉入漕河其一南旺周漕湖堤已築成一百餘里堪以積水其舊設減水閘壩俱宜查復其一魯橋至沛縣東堤一百五十餘里舊議砌石以禦橫流今黃河旣已南徙閘河汶泉水微培堤亦已高厚毋容更議其一淮安清河口板閘迤南淤淺河道併工疏浚築爲堤岸其一新莊清江等閘如濟寧閘例以時啓閉工部以其議爲當上從之明世宗實錄

古者河北流伊洛汴汜不入河雖沁衛淇漳之水過大伾而北始入焉故河之勢猶減今則伊洛沁汴汜諸水舉入之矣中州安得無河患邪將導沁入衛歟衛輝宗藩已因水患奏塞上流矣且臨清下至天津河道甚狹頻年已苦衝決不可復益以水惟汝泉之水遇旱則微匯水諸湖以淤而狹安山南旺瀉澗泊昭陽諸湖大半淤填平滿積水甚少運舟恆苦淺澀若於武陟境內沁河橫建滾水石壩於東岸開三斗門引沁自原武陽武北界大堤之外大堤及諸堤爲隔限以經延津縣南循大堤而東至長垣界入黃河舊衝張秋故道自武陟至勿俾與黃河相近

此三百餘里・須創

又東至曹州境舊分水處。

黃河舊於此分流・一大支・徑衝張

秋・一小支・下濟寧永通閘月河・北向張秋之道・則設一閘

開・皆大堤之北・

水潤方開・南向濟寧之道・則大加疏濬

俾出永通閘入連河・

自長垣境故道

至旱則沁水盡東全濟運

河澇則半由滾水壩仍歸黃河

是運河復增一汶爲永遠無窮之利黃河亦可少殺矣而況沁則易於

節制不亦大愈於引黃河邪但大勞未艾民力方屈運道方幸通曷敢以輕議也

國朝治河司運惟

宋司空禮陳平江瑄經理之功爲大然惟導汶濬淤建閘通運不復引河雖景泰宏治間黃河自至徐

武功有貞白康敏昂劉忠宣大夏亦皆強排力塞之而後已不復資以濟運蓋其至則衝決去則淤填

修治之工無時可已而運舟運卒之衝溺爲害尤大且遷徙不常害多利少羣公誠有見於此矣嘉靖

甲午冬十月黃河從趙皮寨南徙運道淤阻時議者有引黃河

謂黃河水溢舟

行閘而之利

濬閘河二說莫能決余甚憂之迺相度二河道里遠近工役巨細權利害輕重而折衷之引黃河濬淤幾四百里旣深且廣其

遠其費倍於浚閘河計非數月可完誤營運諸料物誤糧運京師公私仰給乏絕兼之故道難復縱復

將卽淤濬河修閘之費卒不可免是以其勞貽後人也況所濟魯橋下至黃家閘百七十里爾自魯橋

北至臨清五百里間則猶資汶水諸泉初無預於黃河也迺始決策濬河修閘惟將來天旱泉微

余甲

承乏治水魯橋以下黃河盛流閘面行舟濟寧一帶巍

至絕流隨護於南旺諸祠及泰山

幸應禱而大雨河始通

運舟不免淺閣歐陽修有言智者之於事有所不能必則較其利害之輕重擇其害少而利多者爲之猶愈於害多而利少余取法焉然則欲爲運道建

萬世之利者亦惟引沁爲愈爾。以上古今治河同異・摘錄二條・通州上達都城近已修閘轉般漕運脚費大省蓋元郭守敬雖嘗行之卒於中止惟我聖明決策修復爲萬世利無容議矣若白河經密雲諸山且全受渾榆諸河之水夏秋暴漲堤防不能禦源遠流迅水勢漫散河皆溜沙深淺通塞不常運行甚艱殊無策以治之惟用兜杓數千具治河官夫遇淺卽濬此外運舟各攜四五具二三百舟即可得千餘具合力以濬頃刻而通盤剝大省矣惟運卒利於盤剝方可開支腳價少資用焉而終歲勞苦固可憫也如卽以盤剝之費償運卒濬淺之勞則運卒受實惠不愈利歸剝船邪兼官置剝船千艘糧運不滯矣近有議於白河建閘者河廣水盛漲必他決底皆淤沙閘必易損且河徙無定乙未王家渡河一歲徙十五里閘難改移蓋未達水土之宜也運河數千里惟白河堤防大壞歷觀河底兩岸率皆淤沙以故易於衝決遷改與中州黃河略同治堤宜遠宜堅宜植六柳諸法亦略同更有異焉每見村莊週遭積沙成巨堤上復多柳云以禦水詢之乃先於平地植低柳成行以俟風沙搏聚旋自成堤柳愈繁則沙愈聚根株盤結水至無害也治河者如之不亦大省民力邪然惟瀕望平沙無可取土者方用此法若堅實河岸仍須土堤低下衝決之口仍須堅土倍築高厚更植深柳爲完美爾凡二條・衛合淇漳之水故其流盛臨清而下

去海猶遠而岸亦高衝決猶少德州而下河身旣狹去海漸近兩岸復卑滄州以下尤卑易盈易決矣近恩縣東光滄州興濟連建四閘誠足以洩漲溢之水但入海之道須修濬深廣無隳成功也滄德

天津之間。河決無歲無之。亦有水不甚盛。河不甚盈而決者。非盡由隄岸卑薄也。一則鹽徒盜決。以圖行舟私販。一則鹹薄地土。盜決以圖淤肥。一則對河軍民盜決。以免衝決彼岸。斯二者。河同之。巡守當嚴而防察當預也。臨清板閘。運河入衛處也。衛河水漲。卽壅入閘。或漫閘而以入。故閘上下常淤。運舟每爲停阻。宜增培閘面。旱澇舉須下板啓閉。舊以衛河水盛。多不用板。蓋啓則閘下之淤。每日衝洗可盡。閉則衛水不入。閘河之水積盈。及啓則二河水勢相當。淤亦不入矣。司閘者所宜審也。以上衛河。凡三條。元人遏汶分流。北出陽穀以通衛。南出濟寧以通泗。名會通河。然分水之處。地勢猶高。僅勝小舟。永樂九年。宋司空禮。築戴村壩以遏汶。導之西南流。四十里出鴛河口。南旺湖中。地勢下矣。然後分流南北。方可勝巨載。漕運永利焉。夫人知宋導汶濬河之功。而不考其故。爲著於此。汶水出泰萊諸山。伏秋流亦混濁。率皆虛浮淤沙。故老相傳。成化間戴村壩以下河道。猶未淤滿。意者開導未久耳。近則沙淤直至南旺河。皆平滿矣。故水易漲溢。卽北下東平故道鹽河入運河。不得其用矣。頻年挑濬。沙積兩岸。或平鋪地上。風起飛揚。仍歸河內。運河命脈全賴茲流。雖勺水當惜。衆議兩岸築堤。以約攔之。猶慮水漲堤壞。迺議開減水閘。滾水壩各四。東西兩岸各二。以洩暴水。嘉靖十三年秋築東堤。主事段承恩所築。尙須培補高厚。十四年秋築西堤。主事顧翀所築。去河遠。遠則足以容水。而高厚閘壩。亦計料修建。嗣而治之。運道其永賴矣。汶水自泰萊至南旺。幾三百里。遠近咸謂汶泉水微而不考其故。蓋盈河淤沙深廣。春夏久旱亢陽。沙極乾燥。汶泉經之。多滲入河底。所經既遠。

安得不微邪。嘗測其上源下流各深廣尺寸。蓋所耗十之三四。然數百里之淤沙不可盡濬。且將復淤。所濬兩岸之沙終歸河內。勞費無已。而卒莫能效。真無以爲處。有獻議者云。汝水自春城口以下。河流迂遠。宜於春城口置石壩一道。中爲數硈洞。創開小河八里餘。取徑入魯姑、龍鬪二泉。渠量加濬廣。凡六十三里餘而至黑馬溝。伏秋水盛流濁。則開硈洞。俾由故道。春夏之間及天旱。水微流清。則遏水由硈洞下出黑馬溝口。即可避汝河百數十里之沙滲。余大奇之。隨因中道有五泉隔絕不能入。遂止。如將五泉者橫汶開溝以入焉。亦無不可。治水者尙其審諸。汝河淤田盜決。對岸盜決之弊。與衛河同。言汝諸閘不與焉。自徐州北至臨清七百里間。爲閘四十有三。自元建者二十餘。聖朝永樂至今。先後增建者二十有餘。減水月河通湖。故閘面閘底高下不一。如下閘過低。積水盈板。卽須啓。則上閘之水必迅急。而舟難入。必易洞而舟難行矣。余問水歷觀而竊疑之。然未敢以爲必然。至冬。黃河南徙。諸閘有僅露閘面者。有沒入泥底者。而閘口之泥深淺不一。乃一一以閘面平石至泥水平而測之。時惟棗林閘露閘面三尺。餘各有差。師家莊晉橋二閘面各露一尺五寸。穀亭湖陵城二閘面各露一寸。孟陽泊閘面露一尺八寸餘。至底悉泥淤深至一丈八九尺者。惟棗林閘下之南陽閘已沒入泥底。閘面泥淤仍四尺六寸八里灣閘面泥淤仍五尺。始知舊傳棗林閘之過高。而不知其下南陽閘之過低也。迺一以棗林閘爲準。餘悉培而平之。由是啓閉水不復洩。仍各測其深淺。其閘底過深者。則量留底板。均止以十二板啓閉。師家莊閘深一丈三尺二寸。留底板二。晉橋閘深一丈六尺五寸。留底板六。棗林閘深一丈六尺二寸。留底板三。南陽閘深一丈八尺三寸。留底板四。穀亭閘深一丈八尺二寸。留底板三。

丈五尺七寸·留底板二·八里灣闢深一丈六尺三寸·留底板三·孟陽泊闢深一丈五尺一寸·留底板一·則闢上之水益

一·胡陵城闢深一丈七尺四寸·留底板二·沾頭以下六闢闢淺·惟上沾頭闢留板一·餘無留·則闢上之水益

深·苟非久旱水微·固可直達上闢·舊運舟過闢即淺闢·直待舟行其永利矣·南旺迤北諸闢亦可行之·而

大勞甫息未遑也·闢河自魯橋以下·爲黃河衝洗·以漸而廣·乙未濬河止·以底廣五丈爲準·蓋南旺上

源也·分水處河底僅四丈·下流愈廣·則愈淺矣·闢河僅取通舟·非務爲觀美·元人有因水散·至以板爲

岸·逼水行舟·可驗矣·治水者慎無病其狹而圖爲廣大也·惟河廣淤深·間復下墮河底不及五丈者·方

以時濬之而已·余濬河至三柳樹灣·迺八里灣·孟陽泊二闢之間·役夫云下皆生土·河底舊止此矣·余

猶病其淺·一老叟進云·聞之先輩·兩闢之間·須留稍淺一處·余恍然而悟·蓋中道皆深·下闢一開·上闢

之水盡洩·闢近者積水猶易盈·闢遠者倍費時日矣·故中道留淺·亦不過十餘丈或數丈·船行至此·雖少待·然積水

不必盈闢·即可越之而直達·上闢舟行顧速矣·益知前人用心之勤·爲慮之遠·若此·爲之歎慕·自愧不

能已·後之人慎毋忽也·凡闢鴻翅石及砌岸用石者·須內外兩面·各用完整石塊砌高·而中填以碎石·

灌以泥灰·卽永遠無坍損矣·以上言闢河·問水集



# 行水金鑑卷第一百十五

## 運河水

二洪古稱懸水三十仞流沫四十里舊各有閘湯節因洪水淺急數壞舟建議於洪上流築堰逼水盡歸月河徐州洪則於南口呂梁洪則於上下二口各建閘積水以行舟蓋正統戊辰黃河從河南滎澤孫家渡南徙二洪僅受閘河之水迺從河南懷慶之武陟導沁水下入梁靖口出徐州小浮橋以濟二洪水猶淺澀故節議建閘爾徐洪一·呂梁洪二·近方革其一·志不悉言其故·迄今天旱水澀卽築攔河壩逼水入內洪猶建閘遺法也今梁靖之流已甚微冬則斷流·遇數尺·河底高於南河丈有五尺·然深不夏口近衝之溜水勢甚盛而蕭縣城南之口亦阻山甚狹通塞靡常甲午春·二洪幾不通舟·然則建閘之法不可不預講也如月河各以石砌堅而修閘以俟冬春水澀卽築壩從閘永久之利也但二洪役夫藉險以爲利非果斷以必行之不可得也有云二洪之後皆可開月河以建閘者蓋上下口及中連建三四閘·節水啓閉·水盛則由洪·水澀則由閘二洪之險失矣但山脈皆堅石所費良不貲爾然二洪之役夫歲餘二萬緡如出數歲之費以鑿之萬世之利也以上言徐·呂二洪淮自荆山而下卽受黃河從渦河一支之水至清河則全受河水矣議者云黃河泛濫中土蓋海口近年漲沙下壅上溢致然已議濬海口矣初亦甚奇之及觀於淮海而始知其妄蓋

淮陰之地甚卑。而徐呂之洪甚高。信然。則淮陰當陸沉。而徐呂爲安流矣。審察之。乃河淮入海之處。北口實有漲沙。而南口更衝廣爾。言淮海。淮清江浦。頻年外河黃水漫入。輒淤。濬治無已。運舟每爲阻滯。詢之父老。有云自板閘而下。相度地形。中道別開一支河。河口亦建閘。各高其隄。防淤則濬其一。而開其一以行舟。可免停泊矣。淮揚諸湖。每遇暴漲。風浪觸隄。則隄壞。舟行遇之。則損溺。近范光湖議於隄外。開支河行舟。以避前患。用心仁矣。議者謂不獨范光。凡諸湖之廣而水勢盛者。皆可爲支河。蓋堤外之地本下。取土爲堤。不數尺即可通舟。費亦無多。治水者歲歲圖之。久則效矣。余深有望焉。但支河至湖塘岸。須多留隙地。密栽深柳。每濬河淤泥。即以培之。塘岸永固矣。諸湖更多開滾水石壩。壩底平鋪巨石。而酌其淺深。俾湖水淺不致阻漲。不致衝岸。壩下則開深渠。以通瀕海魚鹽之利。民田亦免漫沒之害矣。儀真河口舊無閘。近方建閘。謂俟潮入。則閉閘以積水。俾舟可達壩下似矣。然五壩之舟。舉由一閘以入。已多擠塞。每江上風起。運舟一時不能猝入閘內。衝撞飄損。其害甚大。權其輕重。閘固可廢也。言淮揚諸湖。南旺湖志稱。縈迴百五十里。漕渠貫其中。則東西兩岸之湖。皆爲南旺。甚明。蓋宋司空導汶水自東北流至湖中。而後分流南北。則湖析而爲三矣。近年惟以西岸爲南旺湖。而東岸界分之二湖。悉泯其名迹。居民指其北爲馬踏坡。湖南爲蜀山坡。湖率皆侵占耕稼其上。余疑而歷詢之。久乃得弘治中韓通政鼎所鐫南旺圖說碑。在今安平鎮顯惠廟中。明甚。蓋西岸爲南旺西湖。東岸二湖爲南旺東湖。二湖之下。

方爲馬踏蜀山坡湖而馬踏之下爲伍莊坡湖蜀山之下爲馬場坡湖也但諸湖通連中無限隔爾審其形勢凡與西湖盡處相對者卽爲東湖其下方爲別湖也韓碑宜移置南旺分司以免殘燬南旺西湖減水閘十有八舊稱汶水伏秋盛漲則開閘引水以入湖冬春則閉閘蓄水以防旱謂之水櫃余甲午夏承乏治水時久旱河皆淺涸及詢南旺則西岸環湖三面之堤盡圮矣水不能灌迺委屬役夫修治之週凡五十一里餘復諸減水閘之淤廢者及秋雖旱水亦頗積但湖中地形窪下止可從舊忙生閘下出廣運閘口濟魚臺以下運河爾無仍濟南旺運河之理蓋水旣從此以入湖又安能從此以出邪議者不察謂運河淤高故湖水不能出殆未審地形高下之宜也今南旺二閘如故濬河與閘底平止矣安有淤高邪惟南旺分水湖口地勢猶高如仍倣宋司空引河就下之遺意導汶直至今南旺西湖中之最窪下處南則從忙生閘舊河出廣運閘口或出永通閘口北則從舊河直出安山閘口以避此南旺二百餘里之淺澗固運道無彊之利也且皆舊河先年凡水漲卽從此行舟故道近雖淤廢不過修治及移南旺數閘而已如以改創爲難姑修復以爲南旺一月河未爲不可也西河堤修復外仍有見存堤一十餘里臨若連二東湖則百五十里矣汶水大發閘河不能容北則注於南旺東湖及馬踏坡伍莊坡三湖南亦注於南旺東湖及蜀山坡馬場坡三湖而伍莊坡馬場坡二湖爲尤深廣水勢就下故爾今若以南旺東湖蜀山坡之下各地形稍高水勢稍淺之處橫築高厚土堤中留滾水石壩俾各蓄水各開減水

小閘以通運河旱則出之以濟力省而利大矣蓋東岸諸湖地形本高水可以出非若南旺西湖也。苦馬踏坡上下水勢通連未可概議耳安山湖昔稱繁迴百餘里而不詳其界至弘治十三年韓通政鼎始踏四界東至馬家湖西至舊東湖南至安山北至運河其十里鋪在湖中界自鋪至安山湖廣十五里四圍東自馬家口西至戴家廟長二十二里六分自戴家廟北至壽張集長二十四里三分自壽張集東至趙家莊長二十四里七分自趙家莊南至馬家口長八里八分週圍共八十里四分置立界牌栽植柳株用心勤矣但積水通湖二閘底高河水非甚漲不能入四圍多侵占而湖之下口無閘水不能出嘉靖六年間治水者不考其故止於湖中新築堤週迴僅十餘里號爲水櫃湖之廣益狹矣以漸復之可也馬場坡湖與運河相通舊有堤湖水舊有堤風浪衝壞運河水稍盈卽洩入湖而湖廣幾二十里運河安得免淺涸邪十四年冬委屬役夫爲築堤六十里內外各植柳以護之湖甚廣風浪甚巨近堤則多植蒲葦堤根堤頂內外各遍植柳可也楊水部且御水部元吉更置減水五閘運河之水易盈湖之水蓄洩有備矣昭陽湖舊甚廣南口建二閘啓閉出金溝口以濟沽頭諸閘嘉靖七年黃河衝決東堤入昭陽湖淤漫漸高二閘已沒入泥底不復見湖亦狹而金溝口之流亦微濬河則淤深費廣惟湖上流北口通雞鳴臺小河如下口因黃河已淤高仰之地更築橫堤以益之遏湖水由雞鳴臺入運則自此以至沽頭七十里皆可濟矣蓋因其勢而利導之爾十四年夏秋已濬雞鳴臺口出水入運但下口堤猶未修築高厚當培益之更將湖東新河隔絕之

以上言開  
河諸湖

運道以徐堦闢河爲喉襟。闢河以諸泉爲本。

大率冬春微盛。夏秋

泉口築壩悉引以入湖則水積而利益大矣。源泉修廢運道之通塞繫焉可不重邪。泉志紀載詳矣惜未能紀泉所出及測其穴數大小形狀以故官夫疏濬率多虛文未可考矣至有堙沒莫知所在者且泉源四時微盛各殊。干步所出地或山谷或平。穴數若干穴。大小形狀如盤、如盡、如酒鍾、如雞子、如棗栗、如錢之類。備測泉口成渠之深廣尺寸。自泉流若干步。成渠深廣若干。入汶運之里至遠近。流幾里合某泉或入汶或入運沿途之渠道堤防罔不詳備。

有無衝決坍塌淤塞盜引。司

在州縣東南西北或四隅

遠近若干里

保社

某里莊

莊東

西南北若所出或山谷或平。穴數若干穴。大小形狀如盤、如盡、如酒鍾、如雞子、如棗栗、如錢之類。備測泉口成渠之深廣尺寸。自泉流若干步。成渠深廣若干。入汶運之里至遠近。流幾里合某泉或入汶或入運沿途之渠道堤防罔不詳備。有無衝決坍塌淤塞盜引。司泉者若有所稽有未盡復者嗣而求之備載於志可免堙沒矣近傳黃河入運山東諸泉悉皆堙廢蓋遠地未始經歷之訛傳也。閘河自徐達衛七百里黃河正德己巳方決沛縣飛雲橋所濟自沛至徐百餘里爾嘉靖九年十年間漸北出孟陽泊泥河口出穀亭口所濟自魚臺至徐二百餘里爾餘猶全資汶泉也如盡堙漕運不遂廢邪泥於近小而忘其遠且大者可乎惟魚臺滕縣而下泉源渠道爲黃水淤漫近雖疏治而或猶未盡其利爾嗣而濬之復其舊矣齊魯之地多泉近於東平州詢訪卽得新泉五第民間病於開渠占地之勞費匿不肯言爾凡久旱地潤之處其下必泉司泉者能懸以厚賞而遍求之雖尺寸之水有益運道矣漢李尋解光言陰氣盛則水爲之長故一日之間晝減夜增歷試之信然。以上言諸泉

明世宗嘉靖十五年五月己未總理河道副都御史李如圭條治河五事。一、任才能以舉泉政。漕河全賴泉水。頃年泉源淤塞。以致泉流微細。宜專設兗州府同知一員管理。一置閘座以均水利。漕河一帶閘座隨時增改者多。此盈彼涸。往往稱淺。宜仍舊便。此後必相度得宜。乃聽改作。一砌閘壩以垂永久。漕河閘壩類皆土築。善崩。宜採石修砌。一治湖陂以裨運道。山東漕河固資泉流。而昭陽、南旺、蜀山、馬場、五丈、安山等湖陂俱受水所。可爲運河之濟。但年久不治。委之無用。甚至湮沒爲害。或被人侵占。宜責令退出。官爲修治。一嚴稽考以革奸弊。河道銀兩。先年散貯各衙門。遂致那借侵欺。無從查考。宜令所司專聽河道支用。從之。六月丙午。致仕右都御史盛應期卒。應期吳江縣人。宏治癸丑進士。授主事。歷今官。致仕卒。應期有膽智。遇事敢爲。所至有績效。而殊不理於口。留城新河之濬。實漕道永利。應期創議而撓於浮言。功無成而敗。蓋首事之難如此。九月壬午。戶部等衙門會議漕運事宜。一議將管理通州郎中移劄楊村等處地方。每年當仲春秋杪之際。嚴督各該夫老人等。遇有淤淺。卽酌量工力疏濬。候運船到灣。仍詣通惠河提調。其臨清迤南。自東昌以至南旺等閘。應添設主事專管開河等閘。督令各該官夫。如法啓閉。詔如議行。閏十二月壬子朔。總督漕運周金言。淮安清河口抵瓜儀四百餘里。乃運道咽喉。其閘座止藉白馬、范光、高郵、邵伯諸湖津派。皆無源之水。往黃河北徙。或由沛縣飛雲橋。或由穀亭鎮流入漕渠。是以沾頭諸閘。頗得其濟。自嘉靖六年後。河流益南。一支入渦河直下長淮。一支仍由梁靖口出徐州小浮。

橋一支由趙皮寨出宿遷小河口各入清河口匯由新莊閘入裏河水退沙存日就淤塞訪諸故老嘗言河自汴來本渾而渦淮泗清新莊閘正當二水之口河淮既合昔之爲沛縣害者今移淮安矣興工挑濬公私勞費動以萬計臣甚慮之竊計新莊口南諸閘一遇水發必須築壩及貢使與勢官經過旋復掘放恐非長計請於新莊閘更置一渠約長五丈立閘三層重加防護水發卽三板齊下貼席封固雖有滲漏勢亦微細而挑浚不難仍戒管河屬官毋得營求別差擅離職業下工部議可從之

明世宗實錄

**戴鑑**字時化鄞縣人嘉靖乙未進士丁酉授工部主事治徐州洪洪故有二道外洪大石獸踞小者載列時時破舟殺人而內洪則紓迴滯澀沙石壅閼不可以舟又堤岸善崩齧而窪者大半公至則殫力經畫琢其巉巖碎其碧磧直其掩曲抉其壅塞以堤以路延袤二里許舳艤上下如履平地而數十年之害一旦夷之督漕大司農約菴周公稱之

張時徹撰戴公墓志

明世宗嘉靖十七年二月乙卯山東巡撫胡瓊宗奏青登萊三府舊有元時新河一道南北距海三百餘里原設閘座故跡猶存惟馬家橋中多頑石乃元人疏鑿未竟者今已募夫鑿通尙有停口窩淺隘淤塞乞動支官帑開浚永爲民利從之丁卯覆巡撫順天都御史黨以平奏薊州運河自殷留莊大口至舊倉店淤淺一百十六里請發椿草銀六百四十兩糧米五萬石及時疏濬詔可七月丙子修濬地丘店丁家道口河工完賞總理河道都御史于湛巡撫河南都御史易瓊巡按御史王鎬各銀幣有差按察司

副使張綸等各陞俸一級。明世宗實錄。

嘉靖十七年漕運都御史周金奏修寶應一帶堤岸時工部郎中涂棟畢鸞揚州知府朱懷幹通判涂相淮安府同知陳昉協贊成工人南河全考 櫄幹字守正 號晉峯歸安嘉靖壬辰進士歷知恩南府有能聲

明世宗嘉靖十九年九月壬寅運糧千戶李顯疏築運河三事其一謂揚州南自儀真北抵淮安俱藉寶應范光湖諸水接濟乃湖南北相去三百里廣百二十餘里卒有暴風漂蕩不測議於范光湖堤迤東開築月河以免水患其一謂北自淮安南至瓜儀水勢上下相去丈許惟賴瓜儀二壩關防先年壩決水衝河道淤淺宜令瓜洲陳家灣儀真新城地方并揚子橋及揚州東關各增一閘若瓜洲壩衝決則下陳家灣閘儀真壩衝決則下新城閘如二閘閉水不及則下揚子橋閘再不及則下東水關閘以留水利其一謂儀真下接揚子橋大江商舶輻輳河道壅塞糧運阻悞成化年間嘗令將新城通江舊河疏浚寬廣亦置一壩河道疏通官民稱便後廢不修今宜仍前修浚以裨漕政上命工部議行明世宗實錄。

萬表字民望定遠人襲世職歷漕運參將至南京中軍都督僉書嘉靖庚子二洪水涸漕舟並阻議者謂黃河改流公著論折之力言漕河惟用汎汶沂泗諸泉足以濟正統十二年黃河決滎陽入漕河潰沙澗入海景泰四年都御史徐有貞塞之乃分流自蘭陽東至徐入漕必疏濬而黃水始來稍稍興清合至正德六年黃始盛來漫漫衝決方黃河來衝時清河狹淺水涸易盈沿河設淺舖每年轉運無滯

也今二洪舊堤宛然可見但向者黃河漫漫一旦水落石出清河淺涸人心乍見不能無異其實則故河也蓋自洪達濟自會通至衛河一路堤防原備河衝入爲漕害今二洪以下反用黃河之水而忘其故及水不來至疏濬以引之此所謂以病爲藥也渦河在淮之南商船皆自淮入渦至祥符銅瓦箱以達陽武去衛河六七十里議者欲鑿而通之直至白河則會通河可罷公議會通河之塞自濟寧至臨清計三百八十里尙書宋禮發山東丁夫十五萬鑿河建閘爲費不貲以彼棄七十里之易而事三百八十里之難此無異故蓋鑿而通之則黃衛二水合二水合則衝決非常誰能障之此會通之運誠永利不可易也若以衛輝置倉歲以鳳陽諸衛之卒部鳳陽諸郡之糧令由渦河達陽武歷七十里輸於衛輝其勢甚易如昔山東流賊之變運道中梗又可爲備變一策海運雖極險遠第浙中海船於遠番皆能通之松江與太倉通泰州有沙船淮安有海雕船嘗由海至山東蓬萊貿易云離天津不遠若以松江太倉近海歲糧厚與僱直量運三四萬石使海道漸諳爲事變之備又一策也太倉則例每糧一石耗七升至槩斛若輕齋之羨以還運卒故卒有餘力運無愆期後官悉收之脰削四出人不聊生公憤曰此其患不獨在貧軍而且移之國計矣大者疏小者議累累百千萬言詳具國史漕運志中且極陳本末通融爲國長利而又欲開河北山東圻內一帶荒田重農薄賦爲漸減歲漕之地尤根本至論識者隣之焦太史澹園集

明世宗嘉靖二十年四月甲戌總督漕運左都御史周金奏黃河支流淤塞徐呂二洪水淺并鎮江等處河道阻滯請及時挑浚以濟糧運總理河道右副都御史郭持平巡撫河南右僉都御史魏有本各奏黃河遷徙大勢自睢州野雞岡至亳州入淮其由孫繼口并考城縣至丁家道口虞城入徐呂二洪者十分之二此運道所關非特河南一省之責卽今沙淤四十餘里疏濬之費動計鉅萬乞發山東南北直隸椿草夫役銀兩數萬於睢州貯庫協濟工部議覆從之已而戶科給事中劉繪奏黃河大勢南徙其支派細微以致徐呂二洪涸淺有妨運道乞嚴責河道官疏浚丁家道口等處及汝濟諸泉工科左給事中沈良才奏山東泰安州等處計一百七十六泉舊設管泉主事并同知等官邇者視爲泛常以致泉源微細乞行撫按及管泉主事督率人役極力浚導兵科給事中張翼翔奏黃河南入渦河經亳州逼近陵寢乞浚孫繼口等處以濟漕河並築隄防以止黃河南下工部覆議上曰徐呂二洪阻淺非尋常挑浚所能通濟卽行漕運河道都御史及撫按督率各官盡心議處以聞五月丁亥工科都給事中韓威等劾奏總理河道都御史郭持平等修河半載尙未成功給事中林庭學復奏持平已報睢州野雞岡孫繼口挑濬新河工完徐呂二洪糧運無阻而漕運都御史周金等又稱桃源宿遷等處淺澀徐呂水不盈尺歲運艱難各相背戾上乃降持平等俸因命兵部右侍郎王以旂往督理以旂遂條陳河道事宜疏下工部覆議一管河官止令專理河道不得別遣効勞著績者不問崇卑一體旌擢一河道貯庫及椿草銀兩并本部事

例戶部無礙官銀俱聽隨宜支用。一、各項船隻停泊已久，一遇河通，勢必競先，宜申明條約，先儘運船及進鮮黃船發行，餘皆不許攬越。把總等官無得遲延帶貨。一、國初漕河惟導徂徠諸泉及汶泗諸水，至景泰弘治年間，黃河始自至于時督理大臣如徐有貞白昂、劉大夏猶極力排塞，不資以濟運也。以其勢猛水濁，來則衝決，去則淤塞，且遷徙不常，害多利少耳。今幸黃河南徙，諸閘復舊，其野雞岡新開河道，宜浚山東諸泉入之。以濟徐呂二洪沛縣南仍築長堤，聚水如閘河制，務在有司利漕運而已。又今之議者，有謂引沁水自武陟而東，至曹州向濟寧出永通閘入運河者，有謂引漕舟由江淮入黃河，達於陽武、陸運百里，入衛河直達天津通州者，又謂海運固難，中間平度州東南有南北新河一道，元時嘗有治閘，直達安東北，悉由內洋而行，路捷且無險者，此皆今日所當多方講求，擇便而從事者也。上曰：海運迂遠難行，不必妄議生擾。決浚山東諸泉乃今日要務，其如議行。湖廣布政司右參議方遠宜請開海運，上曰：運河一時淺阻，已命官往治，海運有旨勿得妄議，方遠宜多言亂謀，姑勿究。明世宗實錄。

明世宗嘉靖二十一年二月辛酉，總督漕運都御史王杲、總理河道都御史郭持平奏：睢州野雞岡原有支河通徐呂二洪，以資運道，近因黃河衝野雞岡，流渦河經毫泗，大勢南徙，於是孫繼口遂淤，徐呂二洪水微，而泗州祖陵、鳳陽、白塔、壽春等王墳水遂歸焉。乞築野雞岡口、挑濬孫繼口、扈運口、李景高口三河，使水勢東行，由蕭、碭自徐州入運河，以濟二洪，庶運道有利，陵寢無虞。又邳州桃源河廣流遠，多淺塞處，

乞循依古法築壩擗沙水流中漕可無壅滯疏下工部覆如其言詔差工部郎中郭應奎及欽天監官會同撫按官查議勘報。九月庚午督理河道都御史王以旂疏陳四事一漕河仰給山東諸泉貴以時疏浚近已會同各官清查舊泉一百七十八處復開新泉三十一處俱入河濟運但恐一失疏濬尋卽湮塞主事一員勢難遍歷乞分隸各地方守巡兵備等官兼理其事一徐呂二洪爲運道咽喉山石險峻非水深數尺莫能行舟聞舊曾置閘束水乞於境山鎮二洪下各建石閘旁留月河以洩暴水沙坊等淺由河廣漫流更宜築四木壩武家溝小河口石城匙頭灣諸淺預置方船以備擗浚一漕河兩岸原有南旺安山馬場昭陽四湖名爲水櫃所以匯諸泉濟漕河也被豪強占種蓄水不多而昭陽一湖淤成高地大非國初設湖初意乞委官清查添置閘壩斗門培築堤岸多開溝渠浚深河底以復四櫃一黃河南徙舊口俱塞惟孫繼口獨存導河出徐州小浮橋下徐呂二洪此濟運道之大者近已俱工挑浚但黃河變遷無常難保不復淤塞乞於本口多開一溝及時疏濬庶上流有所受下流有所洩而二洪常得接濟矣疏入工部覆議當從但以管泉責之有司事體不一仍令各部官司之惟於總督河道官加工部侍郎銜以便督責上倅擬仍詔管河官委任嚴切遵行永久不許始勤終怠以墮前功癸酉督理河道兵部右侍郎兼都察院右僉都御史王以旂奉命回京辭免兼官許之實錄明世宗

王以旂以左副都御史佐院事辛丑陞兵部右侍郎是歲徐呂洪竭漕舟滯不行淮安濟寧兩院以聞。

臺諫諸臣合詞言宜如先朝故事簡大臣一員督治於是公受命兼右僉都御史以行至則先求故道視泉脈循經流塞分殺自徐洪南抵沽頭增置閘若干座又相地形引水暫築土壩若干座河流時匯漕舸皆如期達京師汶上寧陽間故有四水櫃置湖中勢豪侵沒多獻德邸藉其牽制放水灌田成沃壤官因循而不問民隱忍而諱言爲弊頗久乃公廉實謂四水櫃復庶蓄洩有地河溢則懸河以入湖河澀則懸湖以入河足備緩急遂任怨力復之至今賴焉事竣上嘉悅之加俸一級癸卯陞右都御史

掌南院謝少南擢宮保兵部尚書襄敏王公行狀

以

族字士招江寧人正德辛未進士



# 行水金鑑卷第一百十六

## 運河水

明世宗嘉靖二十三年十月辛卯工部管河郎中歐陽烈奏本欒店河口及各堤岸衝決乞加補塞衛河自臨清抵直沽止有三減水閘乞於德州以北增修減水石壩一座仍於沿河築擋水月堤以護河岸并將天津等衛軍補淺夫審編正副逐堤編巡修補工部議覆從之

明世宗實錄

都御史丁湛題名記略云或謂海運由浙西不旬日可達都下較之河運費省而功倍邱文莊衍義補言之詳矣近年言者亦多厭河運之勞而欲舉文莊之策子顧極言河運之利而欲侈諸臣之功示諸久遠何也曰海運之法作俑於秦效尤於元祖宗已棄之策三代以前未聞也文莊計漂溺之米而不計漂溺之人故以海運爲便不知米漂而載米之舟駕舟之卒管卒之官能獨免乎考之元史至元二十八年海運漂米二十四萬五千六百有奇至大二年漂米二十萬九千六百有奇卽如文莊言每舟載米千石用卒二十人則歲溺而死者殆五六千人此勝國之所忍於民人也奈何今日亦忍於民人哉河運之費費於人所謂人亡人得損上益下者王者以天下爲家又奚惜哉

河防榷黃羲云公治河山東全河備考云嘉靖十六年任二十四年復任則是兩任總河矣題名記不知作於何年其意急仁矣潘公摘其語以示後人見海運之害若必思有以佐河運之窮莫若萬表言自淮入渦河至祥符銅瓦廠以達陽武去衛河六七十里鑿而通之直至白河

則會通河可罷。此策勝於海  
運多矣。萬表說在前卷。

于湛字瑩中。金壇人。正德辛未進士。歷右都御史巡撫陝西。會黃河徙道艱阻遷總督河道。整野雞  
河九十餘里。以達運河。乞終養服除。起戶部右侍郎。撫治鄖陽。卒。賜祭葬祀鄉賢。江南通志

明世宗嘉靖二十八年七月辛未。戶兵二部議覆巡倉御史阮鶚疏。陳漕運事宜。一天津以北河道。宜令  
管河郎中。每年三月親詣淺所疏濬。一天津一帶河道。宜分屬巡倉御史管理。一河西務起至石土二壩。  
宜刻立水則淺深。其起剝多寡。可坐而定。議入從之。明世宗實錄

明世宗嘉靖三十一年十二月己未。工科右給事中李用敬奏。開膠萊新河。其略謂邇者河道湮塞。深妨  
國計。聞之膠萊之間。有新河一道。在海運舊道之西。乃元人欲開通以避海濤島嶼之險而未成者。先是  
山東巡海副使王獻憫。登萊之民。土瘠人稀。生理不足。皆由舟楫不通。嘗按元遺跡。鑿馬壕石底。以通淮  
安商賈。建新河等閘八座。以蓄洩水患。導張魯白現諸湖。以濟水道。見今淮安之船。由淮河直底麻灣。即  
新河之南口也。由海倉直底天津。即新河之北口也。自南口以至北口。僅三百三十餘里。各有潮水深入。  
中有九穴湖。大沽河諸流可引。其淤塞未通。宜量加浚者一百五里。宜深加浚者三十餘里。元人用工以  
開其二。今之用工當任其一。此皆彰明可見者。乞選才望官一二員。會同撫按官亟爲修舉疏入工部覆  
行所在。撫按詳議。具奏報可。明世宗實錄

是年大水衛河決工部員外郎周思兼督衆築塞之。

北河續記

連鑛字伯金永年人嘉靖丙戌進士辛亥歷都察院右副都御史奉敕總理河道是歲澍雨運堤衝潰阻後幫四千七百餘艘公自濟趨邳極力疏通至十一月而悉就下流矣上疏曰北河張秋濟寧地高而水易涸患在春月故啓泉門以濟之南河自徐州小浮橋引蒲河以濟運而清淮一帶橫流浩蕩犯之尤難必春夏未盛之前可循也運早過淮則南河免泛濫之憂北河當順利之勢識者皆以爲確論因請造運船補軍夫先時徵兌早督過淮挑浚新莊等閘以爲來春運地壬子上命以原職總督漕運兼撫治鳳陽等處是歲五月運卽過淮矣六月雨決新安房村復阻後幫二千餘艘公往來二地之間至十月而運事亦竣因請疏治房村淤塞及浚黃河下流使循故道公始至淮實漲水殘傷之後蕭徐邳宿匯爲巨川百姓轉死劫掠者不可勝數公奏蠲夏稅秋糧發粟振饑使民應募河工水落田出則示有司給牛種勸樹畜而淮徐之間稍休息矣去之日疾作於途卒於家

郭鑛作連公  
神道碑

陳茂禮字履卿慈谿人嘉靖庚戌進士授工部主事壬子河決徐邳漕運阻塞言官議開膠萊新河通南北海道天子下其議時當道方憂徐邳幸海運或可必行大司空請以茂禮往視可否茂禮歷膠萊觀南北所謂海道者上議曰石礦既難開鑿而絕無他泉可引通舟必須穿引海水非掘地十餘丈不可且航海必須更造海船而海寇方出沒諸利害有難逆覩至於工鉅之難成又其小者於是議寢省

大司農金錢以億萬計。

兩浙名賈錄。

明世宗嘉靖三十二年二月甲戌南京兵科給事中賀涇條陳治河事宜酌挑濬之法以濟新運謂徐州以上河道淤塞宜借撥驛遞夫役及山東河南淮揚羨餘銀兩以助河工一開新河之利以備非常謂自膠州由新河以達滄州僅百七十里中間不通者惟分水嶺十五里宜疏鑿新河以省漕運之費工部請下所司勘處報可十二月辛丑漕河工完詔陞總理河道右副都御史曾鈞爲工部右侍郎兼右僉都御史視職如故仍令禮部祭告河神

明世宗實錄。

是年七月河趨東北段家口則分六股爲大溜溝小溜溝秦溝濁河胭脂溝飛雲橋皆由運河至徐入洪又分一股由碭山堅城集下郭貫樓散五小股爲龍溝毋河梁樓溝胡店溝亦從小浮橋入洪

續文獻通鑑

考

明世宗嘉靖三十三年三月丁巳議開膠萊新河遣雲南道監察御史何廷鈺費敕視之五月戊午巡按山西御史宋儀望請疏桑乾河通宣大糧餉言桑乾河發源於金龍池下壅城驛古定橋會衆水東入盧溝橋一千餘里在大同則卜村稍有亂石在宣府則黑龍灣有石崖頗險其險與亂石不越四五十里水淺處亦深二三尺誠疏鑿之爲力甚易當時撫臣侯鉞嘗駕小舟至懷來過卜村踰黑龍灣坦行無虞又自懷來載米三十石逆水而上竟達古定橋則河足便漕有明徵矣時朝廷新行空運之法山谷崎嶇

率三十石而致一石。部臣謀所以易之，未得其便。及儀望疏下兵部，任其可行，且稱都御史趙錦嘗使人從桑乾河水行千里，直抵大同城下，若稍加疏鑿，不惟通漕，且因可以捍虜。詔會工部計之，工部謂遠河糧船過淮愆期，皆坐鎮江以南內河淤阻之故。乞特遣一部臣督帥有司疏通河道。章下工部，議以爲便。從之。吏部因言江南舊有水利郎中一員，兼管鎮江運道，後因權輕不便鈐轄，乃以其事專責之巡撫。今復設部官，他日又將以爲不便矣。上曰：管河郎中旣有前旨裁革罷勿遣。其經理河道事宜，仍責成巡撫如故。七月丙午，以久雨通惠河水溢，命有司修築閘壩堤岸。明世宗實錄。宋儀望請開桑乾。時司馬叢約言河成便漕。兼制敵騎。司空歐陽必進言道

明世宗實錄

宋儀望請開桑乾。時司馬嚴防兼制敵騎。司空歐陽必進言。道

明世宗嘉靖三十四年二月癸酉朔罷開膠萊河議先是御史何廷鉉請疏濬新河詔遣廷鉉往會山東撫按官勘報至是言膠萊新河一帶係元人已開故道特因馬家壕南北長四里內有石岡難鑿而止前海道副使王獻曾鳩工聚財焚以烈火鑿通此濠隨於分水嶺南北河道併力挑濬設立閘座八處工已十之三四尋以本官遷去工竟未就卽今此濠舊迹猶存特兩岸沙土日久頽下遂致淤塞挑濬亦不甚難至於分水嶺地本高阜故白河之水至此分流然度其地勢終不甚峻今在南者爲積沙所淤惟北流若加開濬深廣中間雖有磽砌灘諸石亦是人力可施司道諸臣稱舊估二百七十餘萬恐必有增減

其委官通判羅士賢等所估亦稱一百六十萬兩臣雖心計不足竊欲估如士賢所擬數三分之歲給一分年終總掣工費幾何而次歲固可定矣其通海一節則中間地勢既高若必使兩潮兩接須濬深及八九丈恐海濱之地鑿下數尺水泉溢出人無所置足勢必難成而所費真不下數百萬矣計惟一意引河添設上下閘座疏理各處泉源隨宜因勢而爲之雖未免重費而視鑿通兩河猶爲稍省第現河之流不雨卽涸而白河其流亦微遇夏秋水泛則二河自合而沙恆多其膠河無沙視現白河源亦稍盛顧又在分嶺以北不達於南張魯河雖無源而中有泉亦必從東都泊之地引之計二十餘里然後可通沽河水勢大而沙尤多若於吳家口閘之下因小派而引之可以濟南行之水但恐沙隨水走河益深淤蓋新河原係人力所開南北俱潮水所入之地惟其勢不甚峻故水泛不甚衝決而水因潮逆則沙雖隨水泛而流亦因水緩而停必須歲歲挑浚而後可此司道諸臣所慮泉源不足者臣意於疏理之時廣加尋引而於王副使所設八閘如陳村楊圈已損壞者興而葺之其餘完存者添而修之及膠河等處之口亦添設小閘大約共計大小十三四座所增既密啓閉以時自足濟用若猶慮水微閘小不足恃則如委官築壩之說亦可瀦蓄不洩諸臣乃復慮山水驟發衝激之虞及出入河海船隻搬剝慮患計費至此可謂纖悉無遺矣至於南北兩海臣備查博訪知之頗悉在北者無風可以篠行南自淮安海口由雲梯關至馬家濠風便不過三四日之程中有鷺遊山可以灣避又沿海崖一路係行鹽地方少加疏達而行尤爲穩便

且新河南北迂迴計二百四十餘里俱挑深廣爲力固難然不計工費而爲之則亦無不可成者其所難者如諸臣之慮所引泉源恐或未足歲加挑濬其費不窮兼之此時南北兵革未寧而近日災傷尤異常時工役今且暫停此役一興雖假以三年之從容亦須每歲給以銀兩五十餘萬當此財力絀乏之時何從出辦又況開河建閘所費已百萬以上之財而三四次轉剝必須多造船隻費益無所出東土窮荒公私俱竭此河若開又必循會通河設官編夫體例方可永久通行不無愈增虧損此則又當相時審力而處之者也乞下工部酌其行止焉得旨報罷丙子總督薦遼保定軍務都御史楊博疏請開密雲白河以濟糧運於楊莊地方築塞新口使白河之故道疏通與海潮之水合而爲一仍於密雲城西修築泊岸以防城墉崩塌之患從之

實錄·明世宗

明世宗嘉靖三十七年淤新集趨段家口析爲六支入運河又由礪山趨郭貫樓析爲五支出小浮橋會徐州洪

明會典

明世宗嘉靖三十八年十二月乙丑先是巡撫遼東都御史侯汝諒以遼東大饑議開山東之登萊北直隸之天津二海道轉粟入遼陽部臣以海道迂險行令覆勘旣而汝諒勘上天津入遼之路自海口發舟至右屯河通堡不及二百里可達遼陽中間若曹泊店月沱桑陀美女墳桃花島咸可灣泊各相去不過四五十里可免風波盜賊之虞請動支該鎮賑濟銀五千兩造船二百艘約每舟可容粟一百五十石委

官督發至天津通河等處，招商販運，仍令彼此覺察，不許夾帶私貨。下戶部議覆，據勘天津海道路近而事便，當如議行。第造船止須一百艘，令與彼中島船相兼載運，其登萊海道姑勿輕議，以啓後患。從之。世宗實錄

嘉靖中，河道都御史王廷奏略曰：宋禮陳瑄經營漕河，既已成績，乃建議請設水櫃，以濟漕渠。在汶上曰南旺河，在東平曰安山湖，在濟寧曰馬場湖，在沛縣曰昭陽湖，名爲四水櫃。水櫃卽湖也，非湖之外別有水櫃也。漕河水漲，則減水入湖；水涸，則放水入河。各建閘壩，以時啓閉，故問刑條例一款，凡故決盜決山東南旺湖、沛縣昭陽湖、蜀山湖、安山積水湖各隄岸爲首之人，發附近衛所係軍調發邊衛各充軍。此見在條例可考，仰測累朝嚴禁之意，豈不知各湖可蠲以興民，以取征賦之入哉？蓋以利有大於此，慮有遠於此者，不可以小害大，以近妨遠也。昔人云：事有煩而不可省費，不得已者，正今日湖地之謂耳。臣近巡歷泰安、寧陽等處，竊見漕河所資，止泰山諸泉。自新泰、萊蕪等縣經流汶上，故曰汶河。雖以河名，而實諸泉之委匯也。然諸泉之水，濬則流，不濬則伏；雨則盛，不雨則微。故汶河至南旺分流南北，則水勢益小。非有閘座，以時蓄洩，則其涸可立而待也。每年春夏之交，天旱水涸，而阿城七級之間，如置水堂坳之上，舟膠而不可行。非借安山等湖之水，以濟繹挽，卽進鮮船隻，亦不能依限入京矣。故宋禮諸臣議設水櫃者，誠有見於此耳。計今一百六七十年，爲國家久長之利，豈其微哉？今四湖

俱在而昭陽湖因先年黃河水淤平漫如掌已議召佃而安山南旺二湖不知何時被人盜決盜種認納籽粒以致河乾水少民又於安山湖內復置小水櫃以免淹漫遂致運道枯澀漕輶不通嘉靖十二三等年加以黃河南徙兩洪水澀其時在朝諸臣講海運則迷失其故道修膠萊河又徒費而不成上屢皇上宵旰之憂敕遣兵部侍郎王以旂往視漕河并爲經理以旂至此訪究弊源建議修復官河築堤岸建水門閘座以圖永久素嘗盜種盜決之民盡行問遣驅逐不許佃種以啓弊端題奏欽依施行迄今漕河無阻然自官湖議復後而東平汶上之民垂涎湖地何嘗一日忘情哉今據各官開報之數湖中水落露出高阜地土止四百四十三頃非不可以召人佃種但成事不可破巨方不可開且小民奸頑日甚惟欲利己罔知國法頃者議復官湖已嘗懲創恬不知畏若再奉例召令佃種辦籽粒則將一家開報數名占種不計頃畝遇水發入湖恐傷禾稼必盡決堤防以滿其望是所名水櫃者將來爲一望禾黍之場耳而漕河何所賴哉今山東地方鄒滕沂費泰安等州縣卽東平汶上之間拋荒地土不知幾千百萬頃卽安山湖外荒地亦不知幾千百頃而東平汶上之民必欲舍彼而就此者以民田納糧養馬當差寧拋荒而不顧湖地止認納籽粒更無別差期必種而後已況未必皆貧困之民也昔東平民曾以安山湖地投獻德府隱占地畝莫能誰何後被查出方歸於湖且安山湖舊稱延袤百里今止量七十三里以此推之寧望其辦納籽粒保全河堤耶今據郎中汪泓主事陳南金嘉靖三十六年任並見山東

全河備 召納過人數計算每畝照今例五分止得銀六百兩有奇若盡湖中高阜地止得二千二百兩有奇亦非有大利也今每年河漕轉輸四百萬石之外輸將於京師者又不知幾千百萬焉則其利孰多孰寡而京儲與邊餉孰重孰輕此不較而知也萬一河水告竭漕河失利臣恐所得不償所失而其爲費又不知其幾往年山東議開膠州河布政司卽議費銀六十萬兩又未必其能成也今之欲種河地者乃倡爲水入而不能出之說臣近親歷各湖湖高於河殆六七尺春夏水涸每借各河之水以濟河漕况各湖原設水車各三百五十輛若遇盛旱亦令車水以濟奚謂入而不出乎臣又覽觀地勢詢訪民謠湖櫃之設不但漕河有利而庶民亦有賴焉蓋泰山以西地漸窪下夏秋水發俱奔注此中宋末嘉祥鉅野曹濮壽張之間遂成巨浸是以有梁山水泊之亂今東平去梁山不遠而水旣入湖湖外皆納糧民田也若堤防稍廢則水將漫衍淹沒而嘉祥鉅野曹濮壽張之間又成巨浸矣是所利者止數百家而所害者將幾千百家及數州縣也事有召釁法有啓奸不尤可慮乎此就其害於下者言之耳若湖廢河乾漕運不通其所關係尤重且大又不可不深慮也

北河續記

山東水櫃原以蓄洩濟運遇有淤淺卽當開浚深通復其舊界無如濱水之民貪利占佃庸吏概令陞科水櫃盡變民田以致潦則水無所歸汎濫爲災旱則水無所積運河龜拆大爲公私之害不獨山東爲然如淮北之射陽湖江南之開家湖皆水櫃也今盡行陞科蓄洩無繇官民交困爲水官者有能知

其所以然之故乎。或曰。然則陞科不可行歟。曰。陞科原爲朝廷增賦才吏之所爲也。而於濟運之處。獨不可明成化中杜謙以工部侍郎行河。自通州抵淮揚。相地勢去淤塞復水櫃導泉源修閘壩河乃復舊此十五字。誠爲治河司運者之要訣矣。匪但水櫃卽黃河淤灘亦不可陞科。昔高御史明白河徙無常稅糧不改。平陸忽復巨浸。常稅猶按舊額。民何以堪。旨哉言乎。或曰。然則將聽其棄爲汙萊歟。曰此又不可。不若仍爲官地。責令汛官廣植榆柳蘆葦之類。歲收其材。以爲河工之料。不亦利乎。夫陞科之法。斷不可行於兩河之間。其爲利甚小。而其爲害甚大也。鄭元慶今水學

明世宗嘉靖三十九年九月壬辰。大同巡撫李文進奏。大同邊儲缺乏。米價翔貴。乞開桑乾河以通運道。自大同縣古定橋至盧溝橋務里村。水運五節。計程七百二十七里。陸運二節。計程八十八里。總該造船二百六十隻。置贏三百五十頭。夫役一千三百四十餘人。官十九員。春秋二運。可得米二萬五千餘石。日久大通貿易。寢廣公私俱利。又盧溝迤南達天津。另造淺船。運米百石者。改小灘兌運。由天津逕達蘆溝橋務里村交兌。尤爲省便。仍乞倣通惠事例。於務里村、青白口等八處建公廨倉廩。以備撥運堆積。工部議覆。本河不係長河。泛濫則迅激難制。乾涸則一葦不通。又多山石阻礙。每議輒止。今撫臣既有成畫。當令如議舉行。如有窒礙。亦當從實奏罷。上從部議。明世宗實錄

徐九思。貴溪人。歷工部郎中。治張秋河道。漕河與鹽河近而不相接。漕水溢。則泛濫爲田患。九思議築

減水橋於沙灣俾二水相通漕河溢則有所洩以入海而不侵田少則有所限而不至於涸工成遂爲  
水利遷高州知府明史稿

嘉靖四十三年高郵河堤議用石河道都御史陳堯謂石取道遠而河勢薄不至噉多樹木隔以板菱土實之費率省半及萬曆中卒易以石費不貲於隄不足有無大半實用事者橐余親見之如椿木估用杉則以堤楊代之採石不及十一而賦民輸辦凡中戶以下階砌及市塵石塊無得免者零星湊成不久即潰湊小品

# 行水金鑑卷第一百十七

## 運河水

明世宗嘉靖四十四年郭貫樓淤遂決華山出飛雲橋截沛以入昭陽湖北泛湖陵城孟陽泊至穀亭南溢於徐命官往治乃接六年所鑿故跡役夫浚之爲南陽新河又疏舊河自留城至境山又堤馬家橋遏河流之出飛雲橋者使盡歸秦溝魚沛橫流始絕唯茶城時有淺阻明會典

是年秋七月河盡北徙決沛之飛雲橋橫截逆流東行踰漕入昭陽湖泛濫而東平地水丈餘散漫徐邳沙河至二洪浩渺無際而河變極矣初漕渠左視昭陽湖其地沮洳去河不數十里識者危之嘉靖初盛應期督漕議鑿渠湖左以避河患朝廷從之鳩工未半爲異議所阻至是漕湮以吏部侍郎朱衡出督濬鑿衡與僉都御史潘季馴尋應期所開故道以爲運道之利無逾於此疏請鑿之開新河自南陽達留城百四十一里濬舊河自留城達境山五十三里役丁夫九萬餘八月而成而水始南趨秦溝

明紀事本末

是年總河朱衡奏略臣初至沛縣乘舟徧歷黃水無處不漫獨南陽河口直抵留城一帶黃水少浸先年曾挑間類河形臣於彼時竊已在念猶冀水消工畢再行詳勘處理詎意運河漫水未消黃河又難

分導則於此地應亟勘理。臣卽與河道都御史孫慎、漕運都御史馬森、山東巡撫戶部左侍郎霍冀、河南巡撫戶部右侍郎遲鳳翔、又委郎中程道東、主事李汶、吳善言、王纘宗、副使梁夢龍、徐節、張任、胡湧、參政熊桴、僉事劉贊等前往南陽留城一帶相勘。隨據道東等呈稱：遵依踏勘南陽閘起至留城一帶新河計一百四十一里八十八步。先年曾挑間類河形，須加創挑方可成河。隨委鄒縣知縣章時鸞、濟寧衛指揮李肇芳等卽日帶領吏書及慣熟知地人等勘得：上自南陽閘起至新莊橋六十里下自滿家橋起至留城四十里中段新莊橋至滿家橋四十里尙未成河，合用人工挑挖方可通水。又勘得三河口沙河一道，每年山水大發，應築壩堵塞爲防水患。東有薛河，中有趕牛溝，上自山東滕縣關橋諸泉發源水向西行出金溝，今議於兩岸築壩二道，引水入河接濟。共算挑土三十四萬九百一十方。該用夫六十八萬一千八百二十工。又勘得地形北高南下，水易傾洩，合於沙河兩崖等處建閘六座。修築兩崖堤岸及打壩補塞缺口，爲照國家重務，莫切於漕運。妨運莫重於黃水。黃水之性湍激浩蕩，難以禦治。卽或治之而工費不貲，況其變遷無常，屢爲運害。如嘉靖六年決於沛縣十三年決於魚臺縣，皆旋挑旋淤，迄無成績。今歲黃水復決徐沛汎溢運河，淤連百里。至今水尙未消，工難措手，驚惕於中，莫知爲計。蒙委徧歷踏勘，看得此地兩岸形高土俱堅實，三十餘年黃水不侵，雖今歲水勢瀾漫，亦未侵及。況河路徑直，挽輸更便。成功以後可保無虞。實天留此以貽國家億萬年通漕之利者也。臣看得

黃河上源既難分導水勢散漫不能施工雖河坡之水暫藉行舟然乾涸無常終不可恃來歲糧運實切隱憂反覆思維計無所出所據勘議開通新河以便轉漕委宜亟處臣卽與河道都御史等前往南陽留城一帶看得此處地遠黃水可免侵淤人力堪施開挑成河不惟近可以濟來歲之運而又遠可以垂無疆之休此實我皇上至德潛孚精誠昭格天啓其機地顯其靈載觀人情僉謀允協臣願督率羣工於此効力務期一勞永逸少申微臣體國之念以仰答皇上知遇之恩

北河續記

南河全考  
舊河自南越沛縣上中下沽頭等閘處今淤平是年黃河水異常郭貫樓淤平全河逆行汎濫白沙河至徐州全河俱入北股至曹縣棠林集以下向北分二股南一股遶沛縣戚山楊家集入秦溝至徐北一股遶豐縣華山向東北由三教堂出飛雲橋分十三股或橫截或逆流汪洋入運河至湖陵城口散漫湖坡達徐

黃河泛徐州將溜溝以上運河淤凡一百六十餘丈以下淤七十餘丈又自境山至茶城五里許小閘至沛金溝口一十三里許俱淤其沛縣黃河赤徑衝魯村淺西岸循謝家莊至上閘上淺仍東北衝由三教灣一帶一十五里盡淤乃以朱衡爲工部尙書往治河衡議開南陽口至留城一帶新河以備運道又開留城口至白洋淺一帶舊河以接新河費銀四萬有奇粟三萬有奇功猶未就言官劾奏衡等乃濬自南陽口至仲家口俱底續可行舟但三河口至夏村口二十餘里微淺澀是年六月黃河水發

遂決長堤二百餘丈。其所挑舊河與沽頭閘數里復淤。百中橋至留城一帶新河堤。又決百十餘丈。及留城至白洋淺運河仍淤。言官復劾奏。

通漕類  
編•正撰章

章時鸞號孟泉青陽人嘉靖甲午舉於鄉知鄒縣時河淤漕阻天子遣尙書朱公衡經理其事令沿河官集議公首創開南陽新河用其策底績論功升兗州同知仍管河務隆慶六年九月用給事中雒遵薦陞河南按察司副使督築黃河南堤往來相視不避風雨舟居經年途中濕以病乞歸

陳願正撰章  
公墓志

明世宗嘉靖四十五年二月辛巳遣工科右給事中何起鳴往勘河工時尙書朱衡定計開沂山一帶新河築堤於呂孟等湖以防墳決河道都御史潘季馴獨以爲新河土淺泉湧勞費不貲不如濬留城故道由是興衡有隙衡持前疏益堅身自督工吏卒不用命者用重法繩之時浮議籍籍有謂衡違衆自用故興難成之役以要功者有謂衡擅用腰斬截髮之刑致死萬餘人者給事中鄭欽信之上疏言狀工部覆非常之功怨謗易起請遣官勘視問新河與舊河孰便然後議衡功罪報可三月己未詔開新河工科右給事中何起鳴奉詔至沛縣勘河工還上言舊河之難復有五黃河全徙必殺上流如新集龐家屯趙家圈等處然以不貲之財而投之於河流已棄之故道勢必不能一也自留城至沛莽爲巨浸無所施工二也橫亘數十餘里襄裳無路十萬之衆何所棲身三也挑濬則淖陷築岸則無土且南塞則北濟四也夏秋潰潦大降濬後難保不淤五也新河內多舊堤高埠黃水難侵開鑿之費視舊河爲省且可遠將來

潰決之患故尙書朱衡任其必可開開成運道必利而議者見謂難成亦有三焉一以夏村迤北十六七  
里地高恐難接水然地勢北高南低大約止深二丈一照水平加深夫何患水淺一以三河口積沙深厚  
水勢湍急不無滯阻然旣建壩攔截或用石包砌每歲挑淺如例夫何患沙壅一以馬家橋兩岸築堤五  
里微山取土不便又水口投埽勢必不堅恐難經久然此亦在委任得人培築高厚無必不可措力之理  
臣又觀居民之情在新河者則稱新河可開在舊河者則執舊河可復皆爲市塵之私非爲國家運道計  
也夫天下之事勢窮則變變則通沛縣河患至此極矣往時舊河淤塞未深都御史盛應期開新河垂成  
而廢至今惜之今黃水異常伏漕無日尙可溺於人情安土而不爲通變之謀哉故臣斷以爲開新河便  
宜如衡言開新河而不全棄舊河宜如季馴言疏入下工部會廷臣議俱合上意乃決詔勒限開新河仍  
不得藉口速成苟且完事七月戊午始通天津海運轉漕永平諸軍永平自庚戌邊患後燕河石門二  
路所增主客兵餉歲計三十萬石有餘而該郡土燒歲收不給稍稍水旱水陸絕無商販全恃空運前巡  
撫都御史溫景葵遂倡通漕之議會以疾去詔繼任都御史耿隨朝勘奏及是勘上該郡有青灤二河青  
河爲工鉅不可開灤河自永平西門外經流一百五十四里至紀各莊入海自紀各莊至天津衛四百二  
十六里悉並岸行舟中間開洋僅一百二十里沿途有建河糧河小沽大沽河流遇風可以引避宜於紀  
各莊修建倉廩自天津漕粟於此卸囤轉載小舟由灤河達之永平永豐倉力半功倍可爲左輔永利部

覆報可。自是每歲通漕省國帑十二灤東諸邑漸稱饒阜云。九月庚戌新河工成。工科都給事中王元春以新河未通。劾奏總理河道工部尙書朱衡倖功欲速無爲國計長久意宜罷黜。因請訪求元人海運故道。初衡議開新河。自南陽至留城。凡一百九十四里。有奇八月間工垂成矣。祇餘十餘里未通。值黃河暴漲。堤岸有潰決者。於是朝議紛紛。謂新河必不可成。元春及給事中何起鳴。御史黃襄等咸請亟罷黜衡。起鳴初主新河之議者。至是亦自變其說。疏俱下部覆。而衡與河道都御史潘季馴以新河工告成。言大幫運由境山進河過薛河至南陽出口。隨處河水通滿。堤岸坦平。並無閡阻。於是羣驩寂然。吏工二部乃覆諸臣疏。謂河工既有成績。衡宜留用。令會同季馴悉心料理。以圖永久。從之。十月己未詔濬豐潤縣環香河轉運太平等寨軍餉。從順天巡按御史鮑承蔭奏也。河濬自成化間設豐盈倉於該縣。舟運粟十萬餘石貯之以便。東路官軍支給。倉廩及所設官攢具存。乃河道堙廢。舟楫不通久矣。近歲薊鎮警報日棘。其太平寨一路。主客兵餉俱赴薊州關領。如喜峯三屯等處。遠者至四五百里。公私俱稱不便。承蔭乃查復舊河運道。仍於北徐莊、張官屯、鴉鴻橋設三閘以瀦水云。  
明世宗實錄

公念新渠在昭陽湖之東。河即橫決得湖而止。勢必不來。規以爲渠。宜無河患。乃決策奏請。有詔從尙書畫公。廬於河旁。晝夜調度。目不交睫。手不停書。六月正午去蓋立堤上。汙流被面。或深夜風雨。單車小舸出入波濤。衣帷濕裂。又其時役夫多疾。公親行其中。問疾施藥。與同甘苦。吏人戴其恩義。有流涕

者聚衆十餘萬竟無他虞。其明年丙寅功且就緒。諸故河堤市人以渠他徙賈販不通流言新渠不便上命都諫何公起鳴往視還奏故渠難復者五詔如初議。明年渠成萬艘流通頌聲大著上嘉其功賦詩四章志喜以示在直諸臣方議爵公而龍馭上升矣。穆廟登極晉太子少保加一品秩留經理漕河事宜又閱歲河渠大備屬大司空缺召還掌部事于慎行撰鎮山朱公行狀平萬安人嘉靖壬辰進士衡字士

明穆宗隆慶元年正月辛未吏科給事中何起鳴言按會典沿河開壩每三處設御史一員主儕運今宜復國初之舊於南直隸浙江杭嘉湖添差御史一員給之敕書令其專理漕運其濟寧以南河道舊屬兩淮巡鹽御史帶管者并以委之鹽兌時則巡歷淮安以南水盛時則巡歷徐州以北此河道漕運可兼攝而並舉者也戶部覆奏從之四月丁未工部覆御史李惟觀奏言城河開壩工程宜定爲規制三歲一舉用省積久浩大之費廣源青龍二閘相去密邇宜令閘官兼攝并太原派閘夫之一從之五月己未河工成先是黃河決新集龐家屯等處汎濫徐沛間故道沮洳不可復浚尙書朱衡議從南陽以南東至夏村及東南至留城凡一百四十一里故都御史盛應期所鑿河形在焉又其地高阜黃河卽至昭陽湖不能復東乃鑿舊渠因深廣之引鮀魚諸泉薛沙諸河注其中壩三河口疏舊河築馬家橋堤遏河之出飛雲橋者使盡入秦溝自留城至赤龍潭又五十三里凡爲閘八減水閘二十爲壩十有二爲堤三萬五千二百八十丈有奇石堤三十里已而鑿黃家口導薛河入赤山湖鑿黃甫導沙河入獨山湖凡爲支河

八旱則資以濟漕潦則洩之昭陽湖由是運道遂通。癸亥總河尙書朱衡言河工告成宜分官督理黃河上自曹縣直抵豐縣堤界新河自南陽起至宋家口可屬之山東驛傳道自宋家口而南及黃河自豐縣堤界而南可屬之徐州兵備道其預防黃河繕理新河事宜皆聽計畫合用夫力黃河得調閘溜淺夫新河得調曹單等縣堤夫互相協助其扣貯山東漕河徭夫工食及河道銀兩有事許呈請支費諸管河官員悉聽二道委用又請於曹縣上下築縷水壩修埽臺以防秋水衝決之患其工費於兩淮工本銀及山東河南料價支給上皆從之。詔運船過臨清免其帶磚以漕軍重困也。甲子總理河道尙書朱衡條議新河應舉事宜一改移官夫議以舊河謝溝等八閘官夫改撥新河留城馬家橋滿家橋夏村宋家口楊莊西柳莊西馬家口八閘應役其沛縣宋家口北入山東界中宜割屬濟寧主事滕縣西柳莊南入直隸界中宜割屬沾頭主事各提調兌管以便約束一建設堤夫議以新河南自留城至佃戶屯北自南陽至新莊橋新築堤岸及三河口壩堰俱建鋪設夫防護修理卽以舊河堤夫充役一查復淺夫議以三河口及留城以南至梁山皆有沙淺其淺夫除防守堤壩外俱應留用仍如南旺事例三年兩挑與南河徭夫并力開濬一改移驛遞議移沛縣泗亭驛遞運所於三河口山東河橋驛谷亭遞運所於南陽沛縣夫廠於河口令豐蕭等縣協濟如故一分定職掌議自宋家口以南至白洋淺屬南河郎中督理自宋家口以北屬北河郎中督理各州縣掌印管河等官悉聽察舉其沾頭分司移建夏村徐州沛縣魚臺管河

官移駐瀕河以便巡視一申明漕規議令徐淮臨德管倉主事嚴限催督運船查革私載遷延希圖寄圃等弊一蠲免稅糧議新河獨山等處水占地土免其租稅及南陽一帶積水之地立法濬水以濟運道上皆從之癸未修理普濟閘以河水衝溢也六月乙酉新河鮎魚口等處山水暴決漂沒運船數百隻人民溺死無算乙未修理河西務馬營道口等處堤岸以水災衝決也丙申敍治河功加工部尙書朱衡太子少保仍陞俸一級陞都察院右僉都御史潘季馴爲右副都御史禮科都給事中何起鳴候四品京堂缺推用先後經理河道漕運都御史馬森霍冀遲鳳翔張瀚孫慎冀練洪朝選孟養性先後巡按御史尙德恆蘇朝宗韓君恩孫丕揚孫以仁李文續管河郎中程道東員外郎游季勳主事陳楠李承緒吳善言副使徐節原任參政熊桴副使梁夢龍胡湧郎中李汝等主事唐練等各賚銀幣有差丙午御史劉翹奏北直隸武清縣等處山東汶上縣等處水災異常壞漕河堤岸橋閘及民間廬舍田禾甚衆請下撫按官查勘蠲賑章下所司八月癸未朔工科左給事中吳時來言臣屬者從漕河來睹記治河之事弊在議論繁而要實未審也其甚者惟新河三難之說臣請得而解之夫黃河運河故道難復無論已乃今新河以三難稱者豈不以馬家橋易淺沙河易淤薛河易衝爲患哉臣以爲此患在委耳源之不通委將安屬故治源者急也夫新河與青原山至近也而東堦以南費嶧鄒勝之水注焉以一堤而捍羣流又當大山瀉下之勢興素號滻水之區能保其不潰乎故疏濬分殺之謀宜豫也夏村迤邐數十里地勢

居高必導水於薛河。非開支河引薛河上流以分其派。及三河口鮎魚泉諸地鑿口築堤。益以啓閉之閘。能免衝決淤塞之虞乎。故蓄洩之計宜慎也。願自今以河渠事命憲臣一人與藩臬之佐一人專之罷濟。沽南旺部臣之分理者。上然其言。命尙書朱衡計處以聞。甲申南京工科給事中張應治等言。近日三河口之決。以新渠地高不能受汶泗滕薛諸水。故一遇霖雨。至於潰溢。而工部尙書朱衡。故多大言。功不補患。昔旣棄彼三河。而爲大河波及之區。今又穴此一溝。而萃全兗合流之水。咎有所歸。宜加罰治。得旨降衡俸一級。仍令悉心經理。以圖後效。十月。總河尙書朱衡請於東邵開支河三道。以洩河流。又於東邵之上。別開支河。歷東倉橋以達百中橋。鑿牙裏浦諸處爲渠。使水入赤山湖。繇之以歸呂孟湖下景山而去。至沙河水築壩於支河之下。令水繇此以出鮎魚泉。而於泉之對河開塘築堤。以納其流。而殺其勢。因言楊莊、南陽、佃戶屯、留城諸閘。或宜改建。或宜修理。俱必不可已之工。而有司多不得人。如徐州守鄒臣督建爲馬家橋閘。旋就傾圮。宜重懲之上。從其言。下撫臣巡按御史按問。且誠治河官以實心幹理。毋蹈前轍。己丑工科都給事中馬成能言。臣從新河所來。相度南北地勢可慮者有三。一新河自南陽而下。至鮎魚口。與三河口地形俱高。水以平流積滯之故。漫溢四野。致奪樹藝之地。又諸閘半就淹沒。而長堤崩潰未已。此上流之患可慮者也。一三河匯萬流以西注。旣湍悍難制。而其下達新河。猶高屋建瓴。衝擊彌甚。故泥沙填壅之區。澇則懼衝。旱則懼淺。此中流之患可慮者也。一夏村以南諸閘水勢高下相懸。

幾及一丈。啓閉之節，蓄洩爲難。此下流之患可慮者也。以上三患，皆繇三河上下地既居高，水復平行，雖目前告成，宜逆爲未然之備。上以其疏示尙書朱衡，令熟計以聞。明穆宗實錄

按三河口在滕縣西南五十里。以上源薛河、沙河、趕牛溝三處之水俱由此會，故謂之三河口。本年三河口復淤，乃於薛河則築王家口壩，又裏溝等壩，開支河引水由呂孟湖出地浜溝於沙河，則築皇輔等壩，開支河引水會趙溝等泉出滿家湖坡入南陽湖，建閘九座，一名利建，屬北河。其珠梅以南八閘屬夏鎮壩十三處，又薛河口石壩一座，南陽湖石堤三十餘里，減水閘一十四座。南河全考

明穆宗隆慶二年十月庚辰，總河尙書朱衡奏言：黃甫東邵宋家口、王家口至豸裏溝續挑支河四處，皆係納糧民地，乞行履畝除豁，或將昭陽湖官地及淤平舊渠償之人夫，量免雜差一年。又近河州縣勞役三載，如山東之濟寧、滕嶧、魚臺、滋陽、鄒平陰、鉅野，宜分派靜德等州闢布，東平等州存留米一二年，而南京隸之徐邳沛三州縣亦宜寬恤，部覆從之。癸巳，巡按浙江監察御史蒙詔條議四事：一、河工旣成，請悉按民田受患者獨山以南，自湖陵城至回回墓，薛河新改支河，自王家口至呂孟湖，宜設法開導，使水有所歸，不重爲民害。其三河壩堰功緒初成，當倍加葺濬，預爲久遠之謀。一寶應湖風濤叵測，往往有沉覆之虞，宜如高郵康濟河故事，別鑿一河，以近隄民田爲之，使之計畝受值，免其征稅。一高郵康濟河故有木匣涵洞，相旱澇爲啓閉之節，今歲久浸廢，加之節年大水，衝齧內外堤，僅如一線，宜及其未敗，以次

經理。一徐呂二洪相距二舍。事務可以兼攝。宜罷徐州部使。令呂梁分司總之。且汰各閘官夫之虛設者。工部覆奏。詔如議行。已而工科都給事中孫枝言。比來江淮諸郡蕭然。煩費不任興作。卽欲如詔議開寶應越河。以避險阻。亦當俟國用少裕。徐爲之圖。上是之。明穆宗實錄。

# 行水金鑑卷第一百十八

## 運河水

明穆宗隆慶三年三月戊辰裁革山東利建魯橋棗林新閘師家莊各閘官一員及各處閘夫溜夫泉壩夫淺鋪夫停役夫共六千餘名時新渠既成都御史翁大立乃建議請裁冗費以便民而尙書朱衡上其奏曰今運河自魚沛一帶乃元人故道而我成祖命先臣宋禮濬治之於時測量水平計濟寧平地視徐州境山山頂相準北高南下懸至三十丈故魯橋閘以南稍啓立涸自徐州至濟寧往往待水須半月始達雖屢議增閘添夫猶不免膠淺之患蓋東兗之民苦於力作者百六十年於茲矣屬者改鑿新渠舍卑就高因之遠避黃流而地形平行泉源密邇異時舊河之陡駛今皆無之是以自楊莊閘迄新店閘俱不事啓閉舟楫日行可百餘里卽徐州至濟寧度不過三四日止耳而濟寧以北舊渠之水亦遂停蓄不竭故閘官與各夫徒株守河濱漫無事事請如大立言罷各官之虛設者以所汰夫役餓直悉改編銀差徵解東省用儲河渠之費報可四月丁丑總河翁大立言新河之成勝於舊河者其利有五地形稍仰黃水南衝一也津泉安流無事隄防二也舊河陡峻今皆無之三也泉地旣虛黍稷可藝四也舟楫利涉不煩牽挽五也顧道路之言或稱未便者以魚臺滕沛沮洳成湖谷亭沽頭市廛失利乃倡浮言以搖國是

耳臣請以一得之慮熟陳於前夫漕河故資泉水而地形東高西下非有湖爲之積瀦則涸故漕以東皆有水櫃非有湖爲之宣洩則潰故漕以西皆有水壑此先臣宋禮之紓畫蓋殫悉獨到者今新河塞師其意遇黃流逆奔則以昭陽湖爲散衍之區遇山水東突則以南陽湖爲蓄瀦之地慮不可謂不周矣然水有歸壑堤始無虞宜大興人卒繇回回墓一帶開通以達於鴻溝令谷亭湖陵之水皆入昭陽湖又引昭陽湖水沿鴻溝以出留城其湖地退灘者盡上腴之田按之可得千頃令民得種藝其中計畝出賦以供河渠之費計無便於此者上從之閏六月丁卯總河翁大立言薛河之水夙稱湍悍今盡注於鄱山湖入微山湖以達於呂孟湖此尙書朱衡經理之績也惟呂孟湖之南爲邵家嶺黃流填閼地形高仰以故秋水時至翕納者小而反浸淫平野奪民田之利又微山之西爲馬家橋屬者草創一堤以開運道土未及堅而時爲積水所撼以尋丈之址二流夾攻慮有傾圮宜鑿邵家嶺令水由地浜溝出境山以入漕河則湖地可耕河堤不墮而更於馬家橋建減水閘相旱澇以爲啓閉之節斯通漕之長策也上採納之九月癸酉總河翁大立言臣按行徐州循子房山過梁山至於境山入地浜溝直趨馬家橋上下八十里間可別開一河以漕其利有十自秦溝濁河至徐州洪諸狂瀾激湍遠不相涉一也依山爲堤雖有洪濤必不泛濫二也漕舟循堤而上牽挽不難三也無茶城淤淺之患省盤剝之費四也由馬家橋至境山四十里由境山至徐州洪四十五里視舊河爲近驛遞夫價並可減省五也驛路改從新堤往來徑捷六也

徐州募夫可併。呂梁二洪徭夫可遂裁革七也。計沛縣六鋪至境山築堤百里。當用銀十三萬有奇。今開新河。則長堤可緩。費益大省八也。糴穀貯食。假工役以濟饑民。兼節財賑荒弭盜之術九也。棄舊河以爲水壑。卽河決谷亭沛縣。從鴻溝以泄。徑從小浮橋下徐洪。運道無梗十也。顧其難亦有三。地浜溝當築大壩接黑龍潭堤。至楊山壩西當別開一道。至舊河繞出茶城。及開渠建閘。費皆不貲。此其難在工費。歲屬大饑。而徭夫工食往往不繼。待哺之民怨讟易生。此其難在工食役夫二萬。仍聽番休。而錢糧不益淹。以歲月必招謗議。此其難在工程犯此三難。以興十利。臣固未易辦也。惟上速集廷臣議之。章下工部。以大立議爲便。請行撫按及巡鹽官相度地形。并議錢糧夫役。以請從之。丙子。山東莒州沂州郯城等處水溢。從直河出邳州。人民溺死無算。河道都御史翁大立。以聞都給事中嚴用和言。淮安徐邳皆輸糧咽喉。壅淤潰決。運道爲梗。關國計不細。疏濬修築之務。不可不亟。宜令趙孔昭及翁大立。協心共濟。不得廢事失時。工部覆如用和議。且言淮安湖陂故有大堤。往時商人決以逃稅。故多水患。宜及今修築。今河決草灣。北合鹽河。至海州入海。亦可疏濬以殺水勢。并行二臣會勘與工。從之。十二月丙辰。時淮河自板閘至西湖嘴。開濬垂成。而裏口等處復塞。總督漕運侍郎趙孔昭。以工費不給。請議處錢糧。因言清江一帶黃河五十里。宜築堰以防河溢。淮河高家澗一帶七十餘里。宜築堰以防淮漲。工部覆請。以錢糧事下孔昭。及河道都御史翁大立。通融借助。其裏口等處亟行開濬。以築堰事宜。及海口築塞寶應越河二事。均

酌議舉行從之。乙丑總理河道都御史翁大立言治河之役宜以調撥夫役收發椿草屬部臣計處糧追徵工食屬兵備令畫地責成則河工可計日而就於是工部覆議以儀真至揚州淤淺高郵一帶湖堤剝蝕屬淮揚兵備會同南河郎中儀真主事經理以通濟閘內外清江浦上下淤淺屬淮揚徐州二兵備會同南河郎中清江廠主事經理以廬鳳二府協濟椿草錢糧役夫工食及寶應湖堤泗洲等處堤岸屬潁州兵備會同南河郎中經理以大淮兩岸沙嘴清河縣東西河堤魚溝河以下屬徐州兵備會同南河郎中經理以邳州沂武二河與乾河口淤塞房村及境山黑龍潭堤屬徐州兵備會同南河郎中管洪主事經理以沛縣三鋪四鋪大堤豐縣樓水堤接華山塞飛雲橋故道及薛河下流屬徐州兵備會同夏鎮主事經理以臨清萊市口尖塚集白廟兒等處堤岸屬臨清兵備會同北河郎中輒廠員外郎經理以內黃南樂二縣正河淤塞及小灘上下膠淺黃廬河乙家河屬大名兵備會同北河郎中經理以吳橋縣衝決朱官屯交河縣衝決徐家馬頭等處青縣衝決盤古口等處與滄景二州南皮靜海二縣及天津衛堤屬天津兵備會同北河郎中經理以蒙村蔡村要兒渡等處堤岸河西務上下淤淺屬霸州兵備會同通州郎中經理上皆從之。明穆宗實錄

劉應節字子和濰人嘉靖二十六年進士隆慶初歷右僉都御史巡撫順天建議永平西門抵海口距天津止五百里可通漕請募民習海道者赴天津領運同運官出海達永平部議以漕卒冒險不便發

山東河南粟十萬石儲天津永平官民自運焉四年秋進右副都御史巡撫如故旋進兵部右侍郎總督薊遼保定軍務又建議通漕密雲上疏曰密雲環控潮白二水天設之以便漕者也向二水分流至牛欄山始令通州運艘至牛欄山以上陸運至龍慶倉輸輓甚苦今白水徒流域西去潮水不二百武近且疏渠植壩合爲一流水深漕便報可明史稿

明穆宗隆慶四年二月癸亥總理河道都御史翁大立言挑濬運河請發運司餘鹽銀二萬兩濟工部覆餘鹽銀係供邊之需宜量發五千兩不足於淮安揚州二府商稅及河夫椿草存留贓罰內動支詔可

三月壬申工部覆御史楊家相所陳一開河道以利漕輓謂朝陽門外故有河渠雖歲久漸湮尙可復之以便東倉之運與夫寶應湖之議開康濟河鎮江一帶之議濬淺阻填卑窪者皆通漕孔道所宜亟舉一建閘座以省耗費謂瓜州土壩剝運甚艱莫如建閘之便又境山諸閘日就頽毀宜及時修理上命如議行四月甲子總理河道都御史翁大立奏高郵等處湖堤剝蝕請將徐州倉現貯截留漕糧二萬六千餘石移置淮南召集饑民修築從之五月乙酉工部覆總河翁大立條陳議處河工錢糧三事一寶應河濱碧霞元君祠香錢宜擇府佐之治河者綜其出入一開新莊閘以通商船量船廣狹徵稅徑一丈六尺以上者銀五兩一丈四尺以上者三兩一丈以上者銀一兩由儀真閘者以遞減之一濟汝以北各湖地皆膏沃之土壤宜募民田作每畝徵銀四分輸之工所從之八月庚戌詔建河神祠於夏鎮梁山各

一賜名曰洪濟昭靈。命夏鎮廟。徐州洪主事以春秋致祭。先是河道都御史翁大立欲濬治梁山河。禱於神。忽水落成渠。可以通舟。大立以爲此神助。非人力也。請建立祠宇。領於有司。以答靈貺。故有是命。十月己酉。以運河淤阻。漕舟不至。詔奪提督漕運總兵官鎖遠侯顧寰。總督漕運侍郎趙孔昭。總理河道侍郎翁大立。各祿俸半年。降管河郎中張純。徐州兵備副使劉經緯。參將顧承勳。各一級。俱戴罪管事。尋以工部言。純初自北河徙官而南。尙未視事。復宥之。明穆宗實錄。

是年七月。河決睢寧縣曲頭等集數口。兩分閃運道百里。淤重儲船九百餘。潘季馴築塞決河水歸正道。儲船盡出。南河全考。

是年九月。河決小河口。自宿遷至徐州三百里。皆淤。而坡反爲河。時河水橫流。漕舟飄損八百餘艘。溺死漕卒千餘人。失米二十餘萬石。御史萬恭疏言。河自西而東。淮自南而北。會於清河口。東南入海。夏秋海潮既盛。河水復湧。河不得入海。乃流入淮。淮不能容。則必衝決。今惟疏其下流。捍其決口。水將自順。毋煩多謀。以滋勞費。科臣李貴和言。河決不能轉餉。請開膠萊新河。以濟運其策。又在萬恭下矣。按萬恭之策。深得河性。古有分上流之說。萬恭專主浚下流之議。簡便可行。然未有幾於海運之議。蓋萬恭與貴和論。皆未行也。河志

馮敏功字元卿。平湖人。嘉靖乙卯舉於鄉。隆慶四年陞山東按察司副使。飭徐州兵備兼治漕河。甫至。

而河決睢寧縣白浪淺而入青陽決者六皆巨新安左右決者七差小其水不制睢寧之陸匯爲湖曹口而上故河百餘里以南盡爲陸淤泥半之漕艘之阻者數千計漂廬舍人畜無算公甫至受計大吏調士民晝夜併作與其下分功任難無何決塞水就緒漕舟漸通而大風雨彌旬水暴漲諸塞盡潰湖與河一來攻邳公時按部邳下令土其門水勢重不能禦公卽解衣裙囊沙而塞之諸從官吏卒市人爭效公闢沙皆滿水遂巡解公乃行視諸決口皆就塞僅月餘而水復漲敗閭家口以西半戈山左右堤百餘丈公又築之自是堤土漸堅實不受侵矣會徐州靈璧諸邑舊堤潰公又受計大吏所獨治者南自曲頭抵青田八十里北自陸灣至呂梁四十里所與監司曹郎合治者直河以下南岸幾千丈又自茶城踰華戚山曹築單堤一百六十里以遙衛漕河之閘者諸經畫版築楗木薪土之費與護視斥堠約束唯公行之最精監司曹郎咸取則焉見三見於萬曆二年十年王世貞馮公傳敏功事再

明穆宗隆慶五年二月癸卯戶科給事中宋良佐等劾奏總理河道侍郎翁大立總督漕運侍郎趙孔昭前以治河無策遲誤漕糧方議薄罰不宜遽使離任俾脫後責宜罷斥以儆任事諸臣又請飭都御史潘季馴陳炌協心共濟如運到而河尙未通則罪河道河通而運不過淮則罪漕運戶工二部覆請上是其言令大立孔昭戴罪回籍俟河通運完之日奏處三月丁卯初嘉靖間山東按察司副使王獻建議請循元人海運遺蹟於膠萊間開河渠一道舟繇淮安清江浦歷新壩口馬家塚麻灣口海倉口以達天津

道里甚徑度不過千六百里又可避海洋之險業已從其議開鑿將畢會獻去官遂罷役至是戶科給事中李貴和言比歲河決轉餉艱難請修獻遺策開膠萊新河復海運以濟餉道上以事體重大遣工科給事中胡檳往視之五月壬申工科給事中張博請改瓜洲土壩爲閘以便漕舟工部覆言茲議行勘已久而所司莫爲奏報此必徇私牟利之徒倡言阻撓而當事者憚於改作故議久不決宜督河道漕運諸臣刻期會勘以聞有旨從之庚辰戶科都給事中宋良佐以漕舟尙未抵洪入閘請嚴敕河道漕運二臣悉心經畫得旨潘季馴陳炌各務盡心幹理俾河道疏通糧運早至不得推諉誤事辛丑巡倉御史唐鍊條奏漕運事一白河沙谷等淺僅五里淺而以轉般厚費運軍不勝其苦宜令所司及時疏濬戶工二部覆議詔允行六月庚申工科左給事中胡檳勘視膠萊諸河及山東撫按議皆以爲不便疏治乃奏言今爲新河之議者徒指元人故渠及副使王獻臆說非能涉歷三百餘里間親覩其利害也臣嘗濬分水嶺驗問獻所鑿渠皆流沙善崩雖有白河一道徒涓涓細流不足灌注至如現河小膠河張魯河九穴都泊稍有潢汙亦不深廣膠河雖有微源然地勢東下不能北引且陳村閘以下夏秋雨集衝流積沙爲河大害縱謂諸水可引亦安能以數寸之流濟全河之用則諸水之不足恃明矣或謂新河頗多積水可引用爲渠不知潢潦所聚皆以下流壅滯之故設皆濶深水必盡洩則蓄水之不足恃明矣或欲引濰河之水不知濰河在高密西去新河百二十餘里中間高嶺甚多雖竭財力終不可濟則濰河之不可引

明矣分水嶺以南至陳家閘以北至周家莊雖云邊海通潮又皆岡石糜沙終難鑿治則海水之不可達明矣大抵上源則水泉涸枯無可仰給下流則浮沙易潰不能持久二者皆治河之大患也故元史食貨志以爲勞費而無成國初徧訪運道舍此而不顧自獻以後屢勘而不行良由於此苟率意輕動捐內帑百萬之費以起三百里無用之渠如誤國病民何臣請亟罷其事并令所司明示新河必不可成之端勿使今人既誤而復誤後人也上乃罷之令自今不必更議以滋紛擾八月丙午總督漕運都御史陳炌上疏報邳州河決漕船淹阻狀戶部覆今歲漕船過淮獨早而入閘者十不及二三雖河流爲梗然諸臣怠誤之罪亦不容辭乞遣風力憲臣督視以重國計會給事中宋良佐御史唐鍊亦以爲言得旨炌與總兵陳王謨參將顧承勳俱停俸戴罪管事命雲南道御史張憲翔沿河督趣之九月辛酉總督倉場侍郎陳紹儒條上漕政五事一時疏濬言京口小灘等處原設淺溜人夫宜令有司從宜督治丙寅戶科都給事中宋良佐等奏國初糧運率因元故道自會通河成而海運始罷然而遮洋一總猶寓存羊之意至嘉靖末年科臣胡應嘉欲市恩淮大諸衛桑梓之軍建議罷廢而海運遺意無復有存者矣今河變頻仍運道屢梗宜乘此遺跡未泯之時將遮洋一總盡行議復務足原額以存海運遺意仍稍稍推拓如該總隸北諸衛兌北糧者令由天津入洋抵薊州頴南諸衛兌南糧者今由淮入洋抵京通仍博訪國初並海諸衛所舊制使列障聯屯彼此相望卽河渠少梗而此塞彼通亦思患預防之術也戶部覆言遮洋一

總先時徑渡天津海口。不過八九十里。今欲涉海運餉。事難造次。請先復遮洋一總。而以良佐所上事宜。下漕司詳議以聞。報可。戊寅戶部覆漕運都御史陳炌等會議漕政事宜一疏。濬常鎮寧國及浙江海寧崇德等處河道。仍開復練湖。以濟運河之用。報可。乙酉山東巡撫都御史梁夢龍等上海運議曰。今漕河多故。言者爭獻開膠河之說。此非臣等所敢任也。第嘗考海道。南自淮安至膠州。北自天津至海倉。各有商販往來。舟楫屢通。中間自膠州至海倉一帶。亦有島人商賈出入其間。臣等因遣指揮王惟精等。自淮安運米二千石。自膠州運麥一千五百石。各令入海出天津。以試海道。無不利者。其淮安天津一道。計三千三百里。風便兩旬可達。況舟皆由近洋。洋中島嶼聯絡。遇風可依。非如橫海而渡。風波難測。比之元人殷明略故道。實爲安便。大略每歲自五月以前。風順而柔。過此稍勁。誠以風柔之時。出並海之道。汛期不爽。占候不失。卽千艘萬櫓。保無他患。可以接濟京儲。羽翼漕河。省牽挽之力。免守幫之苦。而防海衛所。犬牙錯落。又可以嚴海禁。壯神都甚便。事下戶部。覆云。海運法廢已久。非常之事。難以盡復。乞敕漕司量撥近地漕糧十二萬石。自淮入海。工部卽發興節省銀五千兩。爲僱募海舟之資。淮揚商稅亦許暫支萬五千兩。充傭召水手之費。從之。

明穆宗  
實錄

翁大立。字孺參。餘姚人。嘉靖十七年進士。隆慶二年命督河道。朱衡旣開新河。漕渠便利。大立因頌新河之利。有五。而請濬回回墓。以達鴻溝。引昭陽之水。沿鴻溝出留城。以灌湖下腴田千頃。未幾。又請鑿

邵家嶺令水由地浜溝出境山入漕河帝皆從之三年七月河大決沛縣漕艘阻不進帝從大立請大行賑貸大立又請漕艘後至者貯粟徐州倉平價出糶詔許以三萬石賚民大立以下民昏墊閭閻愁困狀帝莫能周知乃繪圖十二以獻且言時事可憂更不止此東南財賦區而江海泛溢粒米不登京儲可慮一也邊關千里悉遭洪水墩堡傾頽何恃以守城騎可慮二也畿輔山東河南霪雨既久城郭不完猝有寇盜何以備之內地可慮三也江海之間颶風鼓浪舟艦戰卒悉入波流海防可慮四也淮浙鹽場鹹泥盡沒竈戶流移商賈不至國課可慮五也望陛下以五患十二圖付公卿博議速求拯濟之策帝留圖備覽下其奏於所司當是時黃河既決淮水復漲自清河縣至通濟閘抵淮安城西淤三十餘里決方信二壩出海平地水深丈餘寶應湖堤往往崩壞山東沂莒郯城水溢從沂河出邳州人民多溺死大立奔走經營至四年六月鴻溝境山諸工及淮流疏濬次第告成帝嘉錫賚有差時大立已陞工部右侍郎旋改兵部爲左會代者陳大賓未至而山東沙薛汶泗諸水驟漲決仲家淺諸處黃河又暴至茶城復淤已而淮自泰山廟至七里溝亦淤十餘里其明年遂爲給事中宋良佐劾罷明史稿明穆宗隆慶六年正月丁卯禮科左給事中雒遵條治運河五事一自茶城至清河五百五十里爲運道咽喉宜修築長堤增卑倍薄三里置鋪鋪置十夫十五鋪設一官畫地而守以防潰決一自淮抵揚州一路堤岸衝決閘座廢壞者宜令補築自大江以南抵浙江水有淺澗者宜令疏濬一濟寧南旺閘河全藉

汎汶二水宜疏通泉源而臨清河西務等處修濬之工亦不可緩工部覆奏上皆允行。二月丁酉山東撫按等官梁夢龍等言邇因河患異常廟堂畫策傍海通運誠千萬年經久之圖顧今經理之急其要有四沿海城池廢墜不修不可言備如大嵩靈山等數衛宜及時修葺以壯門戶杜窺伺一也海運既開奸人或乘便通番宜嚴諭商民不得輒私下海卽下海者第行島嶼間不得遠泛大洋違者許官兵擒住二也自海禁久弛私販極多欲驟革之則海道藉其指引卽縱緩之則接引之奸不可勝詰今宜明諭商民入海者責令往回給引查銷則巡察者旣有所驗而私販者難容其奸三也海運旣行如利津等縣三巡檢司各有沿海信地運船往來有護送警備之嚴宜復巡檢司及弓兵原額四也戶工二部覆議如夢龍等言從之閏二月戊辰巡按山東御史吳從憲言淮安而上清河而下正淮泗河海衝流之會河潦內出海潮逆流停蓄移時沙泥旋聚以故日就壅塞宜以春夏時濬治則下流疏暢泛濫自平工部議行尙書朱衡河道漕運各都御史及時勘議從之壬申禮科左給事中雒遵會勘泇口河議以爲不便乃言泇口河從馬家橋東過微山赤山呂孟等湖踰葛墟嶺而南經侯家灣良城至泇口鎮又涉蛤鰻周柳諸湖乃達邳州直河口以入黃河凡二百六十里取道雖捷施工實難葛墟嶺高出河底六丈餘開鑿僅至二丈硼石水泉湧出侯家灣良城雖有河形水中多伏石不可施鑿縱鑿之湍石不可以通漕且蛤鰻周柳諸湖築堤水中功費無算微山赤山呂孟等湖雖可築堤然可鑿葛墟嶺以洩正派開地浜溝以散餘

波要其施工又自有序夫與其煩勞厚費以開泇口之河孰若時加修防如期儕運保百數十餘年之故道疏上詔尙書朱衡會同總理河道都御史萬恭覆勘以聞三月辛卯工部尙書朱衡條陳經理北河八事一復舊革山東徭夫七十餘名接興河工一復夏津魚臺二縣管河主簿隨時看守修葺一清查馬場湖南旺湖南陽湖蓄水以濟運河之涸南旺西湖安山湖洩水以宣運河之溢毋使居民侵占一呂孟微山張莊諸湖爲山東滕嶧山水之會宣洩無路衝溢稅地損傷堤岸乞建二閘以洩積水一築馬家橋東岸石堤一河南船子船納稅於呂梁洪殊爲不便乞改納於徐州洪一管河官不許差委以妨河務一修河築隄椿草錢糧積年逋負乞嚴有司之罰每於年終聽河道官開數具奏詔如所擬丙午總督漕運都御史正宗沐言國計之有漕猶人身之血脉血脈通則人身康漕運通則國計足我朝運河幾百六十年法度修明疏通無滯邇來事多滋弊兼以黃河泛溢數患漂流故科臣復議海運而紳士之慮猥云風波夫風波在海三天童子知之然其利害有辨古語云地不滿東南東南之海衆水所委渺茫無山則趨避靡及近南水緩則蛟龍窟居故元人海運多驚以起自太倉嘉定而北也若自淮安而東引登萊以泊天津茲謂北海中多島嶼可以避風蛟龍有往來而無窟宅又其地高而多石行舟至登萊因其曠遠以取其速而標記島嶼以避其患則名雖同於元人而利實專其便易佐河運之缺計無便於此者然此猶舉時宜而言耳若語全勢則其說有三一曰天下大勢二曰都燕專勢三曰目前急勢唐人都秦右據

岷涼而左通陝渭。是有險可依而無水通利也。宋人都梁背負大河而面接淮汴。是有水通利而無險可依也。若國家都燕北。有居庸巫閻以爲城。而南通大海以爲池。金湯之固。天造地設。聖子神孫萬年之全利也。而乃使塞不通焉。豈非太平之遺慮乎。此所謂天下大勢也。夫三門之險。天下之所謂峻絕也。然唐人裴耀卿、劉晏輩。百計爲之經營者。以彼都在關中。輸輓所必由故也。若夫都燕。則面受河與海矣。然終元之世。未嘗事河而專於海者。彼終歲用兵。無暇於事河也。彼又以爲河運入閘。則兩舟難並不可速也。魚貫逆遡。一舟壞。則連捎數十舟。同時俱靡。不可避也。一夫大呼。則萬橈皆停。此腰脊咽喉之譬。先臣邱濬所憂。不可散也。若我朝太平熙洽。主於河而協以海。自可萬萬無慮。故都燕之受海。猶憑左臂從脇下取物也。元人用之百餘年矣。梁秦之所不得望也。此所謂都燕專勢也。黃河西來禹之故道。雖不可考。然不過自三門而東出天津入海。是腹雖稍南而首尾則東西衡也。我朝宏治二年。決張秋。奪汶入海。其首猶北向。乃今則直南入淮而去。歲之決閭家口。支出小河。近符離靈璧。則又幾正南矣。自西北而直東南。途益遠。而合諸水益多。則其勢大。而決未可量也。故以漢武之雄才。尙自臨決塞。王安石之精博。且開局講求。河之爲患。詎直今日然哉。且去年之漂流諸臣聞之。有不變色者乎。夫旣失利於河。又不能通變於海。則計將安出。故富人造室。必啓傍門。防中堂閉。則可自防入也。此所謂目前急勢也。風波係天數。臣豈能逆覩其必無然。趨避占候。使其不爽。當不足以妨大計。惟聖明采擇。因條上海運七事。一定運米。言海。

運旣行。宜定撥額糧。以便徵兌。除隆慶六年已有缺船糧米足備支用以後。請將淮安揚州二府兌改正糧二十萬一千一百五十石。盡派海運行令各州縣於附近水次取便交兌。遇有災傷改折。則更撥鳳陽糧米足之。一議船料。言漕運二十餘萬通計用船四百三十六艘。淮上木貴不能猝辦。宜酌派湖廣儀真各廠置造。其合用料價一十一萬八千四百兩有奇。卽將清江浙江下江三廠河船料價并浙江湖廣本年折糧減存及湖南班匠等銀解用不足以撫按及巡鹽衙門罰贖銀兩抵補。一議官軍言起運糧船宜分派淮大台溫等一十四衛責令撥軍領駕每艘照遮洋舊例用軍十二人以九人赴運其三人扣解糧銀添僱水手設海運把總一員統之。其領幫官員於沿海衛所選補所須什物。卽將河船免運軍丁糧銀扣解置辦。一議防範。言糧船出入海口宜責令巡海司道等官定派土島小船置備兵仗以防盜賊。一議起剝。言糧船至天津海口水淺舟膠須用剝船轉運至壩每百石給水腳銀二兩九錢。其輕齋銀兩先期委官由陸路起解聽各督糧官收候應用。一議回貨。言海運冒險比之河運不同。旗軍完糧回南每船許私貨八十擔給票免稅以示優恤。一崇祀典。言山川河瀆祀典具載今海運所畏者蛟與風耳宜舉廟祀。以妥神明疏下部覆如宗沐言詔允行之。四月戊辰巡按直隸御史張憲翔疏劾管理河道主事詹世用失時不修閘壩及招集客舟壅塞河口以致漕艘漂損諸罪狀得旨世用降三級調外任己卯吏科都給事中雒遵言南陽魚沛之間開濬閘河淹沒民田者數千畝往者雖有蠲賦之令而有司旋復徵稅。

又督責徐邳諸郡逋負甚亟民何以堪請賜民數年租稅及緩征逋賦以廣軫恤之惠戶部覆用其言。

五月丙戌工部尙書朱衡及河道漕運諸臣會議瓜州建閘事宜有五便詔從之。戊申工部尙書朱衡等奏言防河如防虜守堤如守邊河南累被水患大爲堤防今幸有數十年之安者以防守嚴而備禦素也徐邳爲糧運正道既多方以築之則宜多方以守之因上議夫役議舖舍議定期三事自徐州至小河口新築堤三百七十里設防守夫三千七百名三里建一舖計屋三楹四舖設一老人統率晝夜巡視其期以伏秋水發時五月十五上堤九月十五日下堤願攜妻子居住者聽疏上得旨允行

明穆宗實錄

# 行水金鑑卷第一百十九

## 運河水

朱衡字士平萬安人嘉靖十一年進士四十四年進南京刑部尙書其秋河決沛縣飛雲橋東注昭陽湖運道淤塞百餘里改衡工部尙書兼右都御史總理河漕衡馳至決口舊渠已成陸而故都御史盛應期所開新河故址尚在乃定議開之築堤呂孟湖以防潰決河道都御史潘季馴以爲濬舊渠便議與衡不合衡持益堅引鮎魚薛沙諸水入新渠馬家橋堤以遏飛雲橋決口身自督工劾罷漕樞副使柴淶重繩吏卒不用命者浮議遂起明年給事中鄭欽劾衡虐民倖功詔遣給事中何起鳴往勘工垂竣矣及秋河決馬家橋議者紛然謂功不可成起鳴初主衡議亦變其說與給事中王元春御史黃襄交章請罷衡會新河已成乃止河長一百九十四里漕艘由境山入通行至南陽未幾季馴以憂去詔衡兼理其事隆慶元年加太子少保山水驟溢決河壞漕艘數百給事中吳時來言新河受東兗以南費嶧鄒滕之水以一堤捍羣流豈能不潰宜分之以殺其勢衡乃開支河四洩其水入赤山湖明年秋召還部又明年衡上疏曰先臣宋禮濬治舊渠測量水平計濟寧平地與徐州境山巔相準北高南下懸流三十丈故魯橋閘以南稍啓立涸舟行半月始達東兗之民增閘挑淺若力役者百六十年屬者

改鑿新渠遠避黃流舍卑就高地形平行諸閘不煩啓閉舟行日可百餘里夫役漫無事事近河道都御史翁大立奏請裁革宜可聽於是汰閘官五夫役六千餘以其儻直爲修渠費四年秋河決睢寧起季馴總理明年冬閱視河道給事中雒遵劾罷季馴言廷臣可使無出衡右者六年正月詔兼左副都御史經理河道穆宗崩大學士高拱以山陵工請召衡會邳州工亦竣衡遂還朝明史稿

六年侍郎萬恭更請建瓜洲閘自時家洲以達於花園港開渠長六里有奇其年冬閘成一名廣惠一

名通惠於是五總船始下壩

南河全考

隆慶六年六月己巳神宗已登極矣督理河道工部都水司使署郎中事主事陳應薦奏挑挖海口新河工竣河長十里有奇闊五丈五尺深一丈七尺凡用夫六千四百八十九名支米九百六十七石八升己卯工部尚書朱衡疏報徐邳等處河堤工完并請寢泇河之議言泇口河開鑿之難有三一則葛墟嶺開深之難一則良城侯家村鑿石之難一則呂孟等湖築堤之難先是漕河淤塞損船傷米臣思前河臣翁大立請開泇河以救燃眉之患今漕河通利徐邳之間堤高水深使歲加修葺之工自可無患固不煩別爲建置況公帑空虛支費不給瀕河生靈從事徐邳之役勞者未息呻吟猶聞揆之時勢誠所弗宜庚辰定漕運程限每歲十月開倉十一月兌完十二月開幫二月過淮三月過洪入閘四月到灣永爲定例從尚書朱衡議也壬午派魚沛南陽留城等處堤木河木於各州縣仍給前築堤沿關河所占民田價值

又以獨山、微山、呂孟等水櫃有傷民地。蠲其湖米。七月丁亥初通漕運於密雲。尋復密雲漕糧五萬石。先是總督侍郎劉應節等言塞備以儲餉爲急。軍需以漕輓爲便。密雲一城環控白潮二水。若天開以便漕者。向二水分流至牛欄山始合。故剝船自通州而上者亦至牛欄山止。若至龍慶倉從陸輸輓。軍民艱苦之狀水次露積之虞。難以悉狀。今白水徒流西城下去。潮水不二百武。前於城東北業築三合土堤障水防城。近有疏渠於上。填壩於下。邀潮入白。合爲一派。水漕深便。剝船可達密雲無礙。漕渠既通。漕額宜復。八月戊寅。工部言南旺三河等處三年兩挑。正月興工。二月告完。旣據河臣萬恭等議糧運旣早。則明春大挑之日正來年運行之時。擬改九月中興工。十月依限告完。挑浚之時惟進水鮮船隻。設法前進。其餘俱暫停止。且言大挑莫便於秋冬。莫不便於春間。新運踵至。停積河流旣盧風濤。又稽程限。不便一均役。更換夫役未集。追呼號召。每至愆期。不便二春事方殷。民無暇力。迫之工作。田野不安。不便三青黃未接。室如懸磬。頭會箕歛。工食艱窘。不便四堅冰初解。時尚嚴寒。驅之泥淖之中。責以疏鑿之力。不便五籍。正役者不勞再籍。僱役者無事更張。則徵夫便。秋事完成。農多暇日。旣無私慮。自急公家。則民力便。如今改擬。則回空已盡。築壩流絕。疏浚一完。藉水封閉。春融凍解。潮流無礙。則新運便。舊夫未更。按冊可秋豐稔。民多蓋藏。閭閻利以供輸。夫役易於徵斂。則工食便。天霽秋清。氣候涼爽。河鮮沮洳。鍬鋤易施。則用工便。上是之。十月己未。先是南京戶科給事中張煥疏論總督漕運王宗沐六月內飛報海運米十。

二萬石於某日由淮安次天津抵灣粒米無失比聞人言噴噴咸謂海運八舟米三千二百石忽遭風漂沒渺無影響宗沐蓋預計有此令人齎銀三萬兩糴補臣思宗沐受國家財賦之託銳意此事意非不良糧船有失據實陳乞未爲不可何至粉飾觀聽大臣實心任事之體當不若是米可補人命亦可補耶當今之行海運譬北方之種稻始必樹藝少許以試地利何如而漸次爲之可也若不論南北之高下寒燠菽粟與稻並樹則雖三尺之童亦知稻之所獲不如菽粟之嘗多矣河運之興海運其經取久暫之宜殆亦類此來年倍加米數一節乞敕該部從長計畫疏下戶部覆言先該科道請敍海運之功臣等謂萬世之利在河一時之急用海繼因漕臣議增海運二十四萬臣等謂海道風波難定但當習熟此路以供緩急不必加增今煥意略與臣等議同至言漂沒糧石發銀買補臣等不意宗沐之明達弄巧成拙至此但事出風聞難以深求而首事勇敢之臣可以情恕以觀後效萬曆元年爲始海運止以十二萬爲則候數年之外另行裁酌宗沐亦疏辨臣固知駁見之難諧俗成事非易可居然不意乃懸空妄傳若此使臣有一毫不誠但爲身計則按守舊規可以畢事何必更端革故力舉海運自添一事以致彈射也況海運人船募數省之人發行經數月之久按歷涉三省之途其同事而不可欺者各省撫按十數人沿海守令及護行守備等官百餘人官軍水手三千餘人使有沉溺豈待言官今日始言三萬出之淮庫自有卷籍人船出於僱募各有貫趾乞敕戶部會同法司行巡按御史查核疏亦下部十一月丙申河道侍郎薦恭

奏議河夫工食言二洪閘溜淺夫山東東兗二府額一萬二千七百餘名每名工食一十二兩歲該銀一十五萬三千餘兩江北淮揚徐三府州額五千三百餘名工食八兩二錢歲該銀六萬四千餘兩各椿草銀不與焉在銀兩視舊額俱已增加在戶夫視今編悉已安便然漕糧朝廷之命脈漕河朝廷之咽喉當以朝廷之力治漕不當以瀕河之民力治漕今運道工役十倍於前民力凋敝十倍于舊竭疲民以事弊河亟宜改轍查舊議單有兌運所折耗銀有剝運所省腳價近新建瓜閘又有所省過壩米三項歲不下十餘萬兩若悉給發以治河道可減派各疲弊府州之半工部言耗米銀後改徵本色給軍腳價除扣修通惠河餘解太倉濟邊惟有過壩餘米可歲給河道少助夫役工食報可甲辰漕運總督王宗沐奏辨海運漂沒事乞回籍聽勘戶部以漕運在邇請敕宗沐矢心任事仍照原議習熟海道備一時權宜之計從之庚戌河道侍郎萬恭條奏河漕事宜四款一嚴遲速之令黃河伏秋水高運船所避宜令江南糧儲道各督尾幫遼限過徐州洪勿至與怒河鬪三月過洪者以上勞敍薦四月過者次之延至五月後者議罰因而遇水漂沒者從重擬議一別遠近之宜南北河道迥殊到灣之期非可概定宜令各省運船不過閘者限二月到灣過閘限三月過閘又過黃者限四月過閘過黃又過江者限五月巡漕御史按限期行殿最焉一專兌運之權今議早運徵發期會急如星火監兌部臣無殿最之權有司慢而軍衛易又轉求督糧煩難兌運必致愆期宜照浙江例各省俱以御史帶理兌運則官與軍民俱便一順官民之情江

南山谷州縣仲冬水涸不可以舟迨水發時兌運已緩宜從其便齎銀至會城市米候兌但責早兌不必問所從來農末相資官民相利兌運自早過江過淮入閘抵灣自然如期疏下戶部議覆惟監兌部臣照舊恭又言春間大挑待本年之運者累朝之舊法秋中大挑待來年之運者皇上之新規今南旺一帶及三河口諸處河道九月興工十月竣事但臣所治者河耳使運船不速至將焉用河明歲全運四百萬石計船一萬艘須以正二三四月盡數過洪遠避黃水計每月當過洪入閘者二千五百艘每日當八十餘艘乞敕各糧儲道如期督至庶河有實用疏下工部明神宗實錄

明神宗萬曆元年正月乙巳河道侍郎萬恭奏創建瓜洲二閘工完免挑盤僱剝之苦因敍郎中吳自新及道府諸臣勞績恭先又檄浚蘇松常鎮一帶河道建三汊河東水吊橋自是吳浙之運可與江西湖廣徵發相同因言瓜閘既成商舶由壩者可去險就安應比照儀真事例一體抽分疏下工部俱覆行之

三月壬寅河道侍郎萬恭奏江南糧運開幫期於歲十二月在江楚長江大河則可至若湖浙之舟阻於京口閘必待季春開閘方可開幫今年早運者實由臣挑浚京口所致顧事必專官而後善計必遠慮而後成江南河道水利原設有都水司郎中一員後革郎中令兵備道帶管權阻於遙制力分於他務三江運道遂至湮滯今宜比照惠通北河南河事例復設郎中駐劄鎮江以其餘力兼治三吳水利工部言三吳水利積弊已極非工部郎中所能任已責成應天巡按督理其京口閘挑浚事務仍舊分責各道而亦

統領於督臣便上從部議行之。戊申令昌平兵備僉事張廷弼疏濬鞏華城外舊河。廷弼原勘河通可省陸運費歲八千金及運船至而淤塞不前空運司官楊可大以爲言戶部奏行廷弼速濬之。四月辛未河道侍郎萬恭奏事莫善於法祖法莫病於因循今年之運既得以善其終明年之運不可不慮其始。祖宗以四百萬之糧兌近萬之淺船豈不知滿載省舟之爲便而爲是經年造船紛紛者以閘河故蓋南旺運河之脊又得全汶之利故每船可運四百石然夏旱則汶流微又不敢過四百石特爲淺船之制底平倉淺底平則入水不深倉淺則負載不滿又爲限淺船用水不得過六挈今各省不務遵原運而務搭原僱船有三害搭運有五害皆足以病河道今年賴皇上主持諸臣竭力上水諸淺深皆四尺至七尺旱枯之時幸不敗事然終非全算乞敕該部勿以目前幸濟而忽遠圖勿循今日弊端而廢祖制務足近萬之額船載四百萬之額糧盡復入水不過六挈之舊制令船力勝米力水力勝船力其僱船搭運坐困之弊一切痛革部覆從之。乙亥工部請建復淮南平水閘與淺船淺夫及建天妃廟口石閘修復境山閘從之儀真建平水閘二座江都一座高郵十座寶應八座山陽二座凡二十三座座三百金自儀真至山陽有五十一淺淺設撈淺二小船船七金淺夫十名天妃口大閘一門除堪改廢閘石料仍用二千五百金境山舊閘五百二十金凡費工料一萬餘金悉聽河道便宜酌處不煩請發閘多則水易落而堤堅浚勤則河愈深而堤厚建天妃閘則時閉時啓而省挑浚修墻山閘則有留有接而省盤剝旣裨運道且資

民生議發於恭而衡覆行之誠萬世之利云。五月乙未開通廣西府江水陸諸路。己亥漕運都御史王宗沐奏請申飭連務二事。一濬河渠以利邊運。言王家淺銀魚廠一帶河道淺澀難前。宜令挑濬深廣。堤岸卑薄者修築高厚。一造官船以便民運。言白糧民船大小參差。橫塞河道。宜依漕船式樣。打造官船。下戶部。六月辛酉戶科都給事中賈三近奏往因運渠梗咽。當事者議復海運。悉心講畫。法非不周。然風濤險阻。終屬可虞。所以歲運祇限十二萬石。意正爲此。今聞海運至山東卽墨縣福島等處。忽遭異常風雨。衝壞糧船七隻。哨船三隻。漂消正耗糧米幾五千石。淹死隨軍水手十五名。臣因此反覆其事。海道之勢與河道異。河道之可恃者常。海道之可恃者暫。特數百艘行數千里。巨浸僥倖於暫可恃。未有無虞者也。海運畏途。當時建議者計出於不得已。始旣以不得已議行。則今當因可已以議罷。近漕渠一帶諸臣綜理振飭。大異昔時。據今年江南諸艘入閘最早。卽更加十餘萬。何有焉。世有夷途。安取九折坂。人有參苓薑桂。可以攝生。何試命烏附以苟萬。一乞敕詳勘。將海運姑暫停止。仍以額糧十二萬盡入河運。時巡倉御史鮑希顏。山東撫按傅希摯。俞一貫疏俱如三近指疏下戶部議停之。甲戌兵科給事中趙思誠奏請撫馭山東島人教習海運船卒以避風險。旨下該部。七月丁酉山東按察使兼右參政潘允端條陳軍民二運事宜。一議建轄以速糧運。凡沿河管河官員。乞聽臣兼攝庶便督責修濬及時。運船不至淺閣。部覆如議行。戊戌工部覆御史田樂疏言四府所屬州縣頻年水災昏墾已極。蓋滹沱黑洋白溝。

諸水會合經行之地。下流壅塞。輸洩無路。一遇暴漲。則卑窪漫渚。方數千里。田產被其覆沒。臣等請勅責成二處。按臣蓋水之瀦處。多在順河二府。水之出口。多在真定所屬。利不必出其土害。不可委於隣。令踏勘被災地方。下流阻滯。作何疏通。上源泛濫。作何約束。應挑浚者浚之。應堤壩者築之。故道可復。則復橋梁可建。則建。苟有利於生靈。宜無分於彼此。合用夫役錢糧。及淤出地土錢糧。應否加派。渰占田產賦稅。應否蠲豁。嚴限具奏。請自上裁報可。八月丁未。工部奏。今歲河道通利。糧餉早達。乃聞茶城於八月內淤淺。致回空糧船。阻滯不得南還者數千隻。回空之船既遲。則新運之期必愆。今須晝夜疏利。方保不誤。兌事。且茶城之淤。歲甚一歲。宜照舊說於境山上下高建一閘。沙灌則閉而避水。積則放而衝。至於徐邳一帶堤岸。逼近河身。土疎浪高。今秋房村之役。方合迅決。可爲明鑑。宜照原議。再築遙堤。凡一應河防事宜。務兼聽集思。紓謀遠慮。求建長治之策。勿苟目前之安。報曰。運船淤淺。至數千隻。明年糧運。必致有誤。便行與萬恭上緊設法。提浚毋慕虛聲。務收實效。工科署都給事中朱南雍。參河道侍郎萬恭言。防河甚於防邊。爲河臣者。事必預報。廟堂方可據以處分。功必實圖。國計方可藉以利濟。臣備詢河務。咸謂茶城淤塞二十餘里。萬恭起夫數萬。挑浚罔效。回空糧船數千。阻泊於上河者。不下五十餘里。幸黃水旁衝小溝。恭督軍民拖拽空船。從小溝出。日不能七八隻。正河仍未開通。今據恭奏。河通於九月十二日。距恭具疏纔五日耳。縱神運鬼輸。安能於五日間盡回數十里糧船。始之失事。旣屬隱蔽。今之奏詞。又屬謬驪。

彌縫一時之失職。僥倖後日之成功。且不圖目前之難。而談古法之沿革。不虞上流之塞。而計下流之淺深。恭蓋曰。河道通塞。自古已然。下流俱深。一淺何害。又何莫非掩過倖功之心。夫今歲南回之空船。卽明年北上之重船。使茶城一日不開。則空船卽一日不下。明年之運。將有欲早而不可得者。乞敕令萬恭戴罪管事。悉心河務。以贖前愆。工部覆亦罪恭。下嚴旨切責之。  
甲寅江西道御史盧明章奏開濬河道事宜。一曰詳踏勘。一曰專修理。言順保河真。巡按岐而爲二。兵備分而爲四。勢旣不相統屬。議自不能通融。其兵備及州縣正官方在開濬。忽令遷轉。不惟本處工程不完。卽上承下接。均有不便。功何由成。宜差司官一員。駐劄通中地方。同各州縣正官細加踏看。預定河身。凡干係開河兵備州縣正官及承委官員。俟工有次第。方得循資遷轉。工部以司官權輕。仍守前議。而請停遷各官。以便責成。上是之。  
辛酉工部奏。明年春照例挑浚天津衛海口新河。恐礙運艘也。九月庚寅戶部覆漕運都御史王宗沐議。覆遮洋總言。國初海運歲運七十萬石。以給遼海。後會通河成海。運遂廢。然尙留遮洋一總。原有深意。至嘉靖末。給事中胡應嘉建議。裁革并入山東江北諸總。前制盡罷。應嘉以鄉土之故。忍變成法。有識者未嘗不扼腕而歎。近因河道淤阻。當事諸臣復起新議。勞費更多。海運二年。道路稍諳。今雖議罷。宜查復遮洋一總。卽改海運把總爲遮洋把總。領兌河運北糧。仍知會兵部。海汛有警。暫調海口爲狼山聲援。從之。  
壬午河道侍郎萬恭奏。江南運道延袤八百餘里。每歲夏初開運。河水充溢。運道無虞。今改於年前十二

月開幫正屬各河淺滯諸壩斷流京口封閉之候挑浚工費動以數萬計仰給於導河銀是以杯水救車火且病農派夫於丁田則病民借辦於鋪行則病商取給於協濟則病隣俱屬偏枯非久計也查江南漕運幾二百萬石每石舊帶徵僱船腳米七升近瓜洲建閘運船徑抵水次交兌此米遂蠲宜仍每石徵一升歲折銀一萬兩查各府河務輕重分發收貯名曰運河銀凡運漕渠挑淺築堤建閘修壩僱募夫役買辦什物一應工費悉於此項動支應用分毫再不干擾農商貽累隣境以瓜洲所省江南之費爲江南運道通融之用似爲長便下工部覆行之

明神宗實錄

王宗沐字新甫臨海人嘉靖二十三年進士歷山東左布政使隆慶五年給事中李貴和請開膠萊河宗沐以其功難成不足濟運遺書中朝止之拜右副都御史總督漕運兼巡撫鳳陽極陳運軍之苦請旨優恤又以河決無常運道終梗欲復海運上疏曰自會通河開濬以來海運不講已久臣近官山東嘗條斯議巡撫都御史梁夢龍毅然試之底績無壅而慮者輒苦風波夫東南之海天下衆水之委也茫渺無山趨避靡所近南水暖蛟龍窟宅故元人海運多驚以其起自太倉嘉定而北也若自淮安而東引登萊以泊天津是謂北海中多島嶼可以避風又其地高而多石蛟龍有往來而無窟宅故登州有海市以石氣與水氣相搏映石而成石氣能達於水面以石去水之故也北海之淺是其明驗可以阻運河之窮計無善於此者因條上便宜七事明年三月遂運米十二萬石自淮入海五月抵天津

功與夢龍俱進秩賜金幣而南京給事中張煥言比聞人舟漂沒失米三千二百石宗沐預計有此私  
令人糴補夫米可補人命可補乎宗沐掩飾視聽非大臣誼宗沐疏辯求勘詔行前議習海道以備緩  
急未幾海運至卽墨颶風大起覆七舟都給事中賈三近御史鮑希顏及山東巡撫傅希摯俱言不便  
遂寢時萬曆元年也明史稿

運河一帶平江伯陳瑄用力於南工部尙書宋禮宣勞於北禮用臨清知州潘叔正之言其言本之老  
人白英言築壩戴村亘五里遏汶水至南旺分析兩河以其七北注臨清度地降九十尺閘十七三南  
注曹沛度地降百十六尺閘二十一禮沒後至萬曆元年總河萬恭追頌其功立祠贈禮太子太保一  
孫入監曰英先以平頂巾執工簿立於傍亦賜冠帶坐世令一人充冠帶老人管河夫坎河之灘湧幢小品

# 行水金鑑卷第一百一十

## 運河水

明神宗萬曆二年六月丁未調河南左參政馮敏功於山東。七月癸巳吏部候選歲貢生員許汝愚上言東南運道水勢之澀莫甚於丹陽地勢之高莫甚於夾港國初於此置爲閘者四曰京口曰丹徒二閘居上以防三江之易涸曰呂城曰奔牛二閘居下以防五湖之易洩自丹陽起至鎮江蓄爲湖者三曰練湖曰焦干曰杜墅以濟漕河之用遂免海運之艱以故四月交兌五月過淮維時雨澤大降江湖盛行不假湖水亦足以濟歲久延襲居民侵爲田畝焦杜二湖俱爲平陸僅存練湖猶有侵者而四閘俱空設矣今改爲十月臨倉雨澤既少江水枯落不免剝淺纔數十里之區有閑三四月而不得盡達於江者雖添設儻運枉費推挽而開河之議起矣夫夾港兩岸高者數十丈而河僅闊數丈許下之開鑿愈深則上之坍塌愈速頻冬役民以浚之春來淤塞如故年年興此大役民何以堪爲今之計莫若修三湖之故址就四閘之完基蓄洩以時下修呂城奔牛一閘以時糧運之入上修京口丹徒以時糧運之出況乎上流既溢則奔牛而下又何不通之患哉破此說者必以淹沒民田爲辭不知前此占湖爲田今仍舊修葺非廢田以爲湖也卽欲補此數頃之田則沿江一帶新漲常稔洲田無慮千頃民方爭佃構訟不息其皆隸於

丹徒以此相易不亦可乎。年官司欲興水利，輒爲豪富破壞，遂以湖淺河長爲解。試併修三湖，而於丹陽水關下板，則河如此其長，湖亦如此其闊，寧有不足之理？此皆上下習見，而緘口不言，則利害之心惕之也。工部覆行彼處撫按踏勘具奏從之。九月丙子，工部覆工科給事中吳文佳言：茶城、黃淮交會，數千糧艘皆由此一線之路。如數十里之茶城一淤，即有計疏通無救旦夕。查得先年總理河道都御史翁大立建議，欲從子詹山、梁山至馬家橋上下，約八十餘里，另開新河，置舊河於堤外。凡黃河出口之地，並不相及，而波濤可避，良爲得策。但稱由梁山之下張孤山之東南花山之西，新衝河形南出戚家港，會於黃河，亦可通舟。因勢利導，就下爲川，頗與原議稍異。宜令總理河道等官親詣茶城踏勘，從之。閏十二月乙未，議查濟寧汶上二湖舊界，總理河道傅希摯勘請，湖地高者准令佃種，分等徵租，低者照舊蓄水濟漕，嚴禁佃戶不許曲爲堤防。侵那疆界，工部覆言委於國計，民生有裨。但照先原任尙書朱衡稱：支河新河之身，堤基皆係民間田地，合將昭陽湖官地及淤平舊河准令對畝給業，免其納稅，以河之棄土補河之占地，亦可舒濱河失業之困。應行併議，從之。明神宗實錄

漢唐以前至春秋戰國，大江由六合遡邗溝，取道於高郵寶應諸湖之西北，達長淮。江南之漕俱由邗溝，而苦淺阻。陳平江乃堤揚州以及於淮西，遏諸湖之水，遂匯爲一湖港，相通三百七十里，達於黃河。餉道大通，邗溝遂絕。今不必泥古，妄圖恢復，惟濬之洩淮則可。高郵諸湖西受七十二河之水，歲苦

溢乃於東堤建減水閘數十洩水東注閘下爲支河總會於射陽湖鹽城入海歲久悉湮宏治中乃開儀真閘苦不得洩治水者歲高長堤而湖水歲溢隆慶初水高於高寶城中者數尺每決堤節高寶興化悉成廣淵隆慶六年萬曆元年建平水閘二十一於長堤又加建瓜洲閘併儀真閘爲二十三湖水太平淮漲不能過寶應又復淺船淺夫但許深湖不許高堤舊制初建瓜洲花園港通惠閘得故金焚韓世忠船板改廣惠閘又得故閘基椿石椿大四圍基因之則花園港故閘道也而或恐二十三閘洩高寶八百里七十二河之水欲閉瓜儀蓄諸湖利餉道誤哉各湖水南注者儀河窄而淺瓜湖廣而深余懼瓜之奪儀也乃於三汊河建揚子橋橋口如閘制以節束之儀湖不病淺矣而瓜閘江潮近六十里則早至而遲落更便於儀閘鎮江截流官舫徑趨江都真州省續食征夫之役又利儀閘云高郵湖宏治三年白公以七十餘萬金成康濟河商誠便也第不當東繞閘民田一萬八千畝康濟與湖通水如城田若孟不得已於月河之底沉三涵洞穿月河而東洩船行洞之上方未七十年松板洞竈不復能穿月河水匯田中是老堤之東又益一萬八千畝之田湖也左哉左哉老隄如線浸萬頃中八面受敵而大堤壞中堤故卑薄大湖擁田湖濤擊之而中堤壞二堤俱壞則康濟東堤直弱繪當萬石之弩耳豈不危哉今議固老堤塞金門決康濟涸湖田乃循老堤之東去十丈爲之東堤一護老堤一成月河歲加修築則運與民與商舶萬世之利也寶應湖堤袤三十里軍民舶由湖中西風大作歲

濁湖中以數千人運之險道也。今爲東護堤，如議高郵新月河之制，東堤成，則月河成，一舉兩得之計。了此不過十萬金耳。省中堤故也。視白公縮費六十萬金，歲加修築，可保數百年無事。謀國者各有見乎。天妃口自陳平江開清江浦六十里，由此入黃河，官民便之。嘉靖中，黃水泛入清江，淤河臣費十萬，開新河以北接於淮。其說以爲接清流勿接濁流，可不淤。不知黃河非安流之水也。伏秋水盛，則西擁淮流，併灌新開河。夫天妃口一黃水之淤耳。若淮黃會於新開口，是一淤也。乃歲役千夫濬淮，甚交會之淺，而患愈博矣。余於天妃口建石閘，直出黃河，黃水盛，則閉閘謝絕黃水，以杜淤。黃水落，又啓閘以利官民。新開口勿濬可也。新河焉用哉。夏秋高寶諸湖水溢，瓜儀二閘宣洞開之。高寶諸湖今建平水閘，俱引支流入射陽湖，注於海，正道也。而鹽城范公堤有入海五道，今湮其四，下流不疏，此高寶興鹽之多水患乎。夏鎮新河馬家橋之左，呂孟微山諸湖，夏水泛漲，外傷漕堤，內淹民田者，徐州七分，滕縣二分，驛縣一分，公私未便也。余自北堤漸家壩至鐵河止，開水口，建石閘，宣洩湖水，以左出民田，右濟漕河，而夫役以履畝出之，二年乃成。泇口河從馬家橋入微山諸湖，穿梁城侯家灣，取道於利國監，經幔蛤柳諸湖，出邳州直河，入黃河，有六難焉。微山諸湖水中不可堤一也。梁城侯家灣葛墟嶺皆數十里，頑石不可鑿。二也。砌石水中，隨撤隨合，金火不可施。三也。嶺南去徐呂二洪一舍耳。二洪高下相等，避徐呂二洪，險葛墟洪，險復生。四也。假令治泇河，卽不治徐邳河尤可。萬一泇河成，歲治

之而徐邳河非無事之水也而又治是兩役也勞不已甚乎五也計鑿梁城侯家灣非五百萬不可視今治徐邳河五百年之費也況未必成六也治泇河策宜永罷之糧運盛行運舟過盡次則貢舟官舟次之民舟又次之閘乃肅汶水微而南旺析七分北濟張秋東昌臨清三分南注濟寧南陽夏鎮是北濟者道近分數多南濟者道遠分數少則恃呂孟昭陽等湖也故運盛行則濟寧而上發蜀山湖南陽而下左發呂孟諸湖右發昭陽湖以濟黃家閘勢不得不汲汲矣夏鎮新河萬世之計也往閘由南陽穀亭沽頭沛縣出留城地勢太卑視南陽以上高下相懸各閘水峻故多淺又昭陽湖在其東黃水每踰漕趨昭陽故閘河多淤隆慶初朱少保開南陽至留城一百四十里地故聳與南陽等置新閘焉舊閘多沉水中漕水大平不患諸淺第三湖口受沙薛二河之水夏秋水發流沙入漕爲梗乃於二河上源爲皇甫東邵諸壩遏二河入微山諸湖卽沙入湖中若石投水新河無沙患矣石堤累累如墉柳陰依依若茨樓船月夜簫鼓中流百里湖光萬頃金碧蓋不讓西湖蘇堤焉南旺分水河每年汶水大發則流沙及新河三河口沙薛二河水發則流沙舊制三年二挑俱正月興工三月竣事是治本年之河爲本年之運者也倉卒周張今運期早蓋二月有過南旺者矣則挑期亦宜早故隆慶六年改期大挑是治頭年九月之河爲次年二月之運者也餉道遂大利焉故糧務舊以冬兌而夏開幫兩年事也今則冬兌而冬開幫合之而爲一河務舊以春挑而夏行舟一年事也今則秋挑而春行舟分

之而爲二或合或分百世不能易矣。兩河大挑有五不便有五便舊以正月興工二月竣事則新運踵至停積河流旣慮風濤復稽程限一不便夫役年終徭役更換舊役已滿新役未來二不便春事方興民無暇力迫之工作田野不安三不便未接青黃室如懸罄頭會箕歛工食艱窘四不便堅冰初解時尙嚴凝驅之泥淖之中責以疏鑿之力五不便若改期九月興工十月竣事則回空已盡築壩絕流疏濬甫完藉冰封閉春融凍解河卽有待是新運之便也舊夫未更按冊可籍正役者不勞於再籍僱役者無事於更張是徵夫之便也秋事告成農多暇日旣無私慮自急公家是民力之便也新秋豐稔民多蓋藏閭閻利以供輸夫役易於徵斂是工食之便也天霽秋高氣候清爽河鮮沮洳鑠鍤易施是用工之便也。略見實錄

天津逆入白河至張家灣源出密雲山後諸流五六月水漲則流沙三四月行舟輒膠非無水也蓋頭年漲漫沙平河闊則淺耳余復夫老如大挑故事歲濬之以待次年春夏之運畢水溢流沙復平九月復濬以待歲工也創瓜洲上下二閘及開花園港六里買石僱夫費河道銀萬金有奇亦萬世之利也焉論費瓜洲上曰通惠閘下曰廣惠閘青石市諸蘇州麻石市諸上元閘匠取諸夏鎮丁夫募之江北經三月而後成排萬口而始定議百年而方興難矣哉南旺大挑舊制壩南北而絕之流舟楫弗通余先爲之南壩逼汶盡北流而挑其南北舟悉艤南旺而待南挑畢余又爲之北壩偏汶盡南流而挑其北乃決南壩舟順流而趨於黃河此濬淺行舟兩利之策也植柳

固堤六柳之法盡之矣。然必立春前所植交春後則生氣動多蟲噦之患舊制不活者罰銀錢余念貧夫安所得銀錢第一株罰栽五株耳而柳益衆自張家灣以及於瓜儀循河二千餘里萬曆初植至七十餘萬株後來者踵行之則柳巷二千里捲埽者有餘材輓運者有餘蔭矣黃河堤同山東濱東海水盡東注海者勢也逆水而西以濟會通河始於元然其時主海運海運爲寇所扼則治賈魯河而元因以亡是元人不得會通河之利也宋少保禮於永樂九年因元舊始開會通河五百里然非述者蓋作者也夫元人因山東之泉悉入汶河又以汶河雜汎汎併泗不能勝東注則爲堽城壩截汶會汎泗西南流以會於濟寧州之天井閘而分水焉蓋以濟寧以南截諸淮安入海濟寧以北截諸天津入海云耳不知陽穀壽張之交地勢聳於濟寧數丈而可倒使北注如尉遲敬德武德七年之訛事乎夫敬德爲盧龍節度使一鎮之餉耳嘗試爲之也而元以全運餉上都而又可襲訛嘗試乎宋康惠弗之是也乃壩戴村遏汶西南流入於南旺據陽穀之脊而分水得之矣然併諸泉而歸諸汶是也汶水盛發勢不能攻戴村壩則從戴村之東龍山之西攻開名曰坎河口注鹽河以復歸於青州故道而山東水復東傾蓋九分東注特一分析入南之安東北之天津餉道頻年幸河不乏絕隆慶六年余以主事張克文言循南旺百里而上歷戴村壩壩故堅汶不可破也又東數里爲坎河口東北注若駛余顧張水部曰何縱汶曰歲堤坎河口歲敗亡益也余顧東龍山彼有亂石盍取石灘坎河之口里許若天成平水焉

汝溢則縱之令還東注面目汝平則留之令全汝西南注以其七北灌入天津之海又以其三南灌入淮安之海是因勢而鼎足分之者以坎河灘故也遂灘坎河口萬曆元年漕大利嗟後之人使會通河可廢則坎河口請勿灘如不可廢治水者尙慎旃哉尙慎旃哉宋少保禮河南永寧人永樂初治會通河先是國朝都金陵餉道悉仰給於南江右湖廣之粟江而至兩浙吳會之粟浙河而至鳳泗之粟淮而至河南山東之粟黃河而至而金陵據舟楫之會而灌輸焉置餉道弗講永樂中治北京上供百官六軍悉待哺於江南之稻梁永樂多治海運運艘兩浙自浙入於海吳會自三江入於海湖廣江西自揚子江入於海淮北河南自河淮入於海山東各以濱海州縣入於海皆會直沽達於天津而懷慶衛輝以其舟順衛河入天津來會俱遡白河逆於張家灣輸上都而舟溺亡算計臣曰海道險不可運乃令江南之運皆入高寶諸湖渡淮達黃河陸運百七十里入衛河指天津輸上都而車費亡算計臣曰陸道費不可運少保乃請治會通故道顧元末鼎沸不暇治餉事故道廢自汝上至臨清五百里悉爲平沙公乃究尉遲公之舊跡及元人之遺則自汝之上流唐元爲堽城壩遏汝入洸河會泗水東南注濟寧濟寧今天井閘尉遲建也以天井之南注淮安以天井之北注天津而南旺地特聳濟寧水上行終元之世第舟載上供數十石耳海運若故少保公患之適有戴村老人白英者獻策曰南旺地聳盧分水焉第勿令汝南注洸河北傾坎河導使趨南旺南九十里流於天井北百八十里流於張秋樓

船可濟也。少保乃造梁窒汶之入汎者。大壩戴村。遏汎之入坎河者。開新渠百十有餘里。抵南旺而分注之。九年道大通。淺船約萬艘。載約四百石。糧約四百萬石。浮閘從徐州至臨清。幾九百里。直涉虛然。爲龍海運河成。會北京建宮殿五。敕公採大木六十四。卒於蜀。乃以餉道統屬平江公。平江居河上三十年。功多在淮南。而會通河則仍少保之舊。平江以帝姻且久。河工昭景鑠。而少保自蜀葬於永寧。曾學士槩表墓。又不著河工。子孫皆微爲庶人。又不克揚先人之烈。弘治中。僅僅廟食公南旺足矣。白英尤泯不聞。悲夫。隆慶末。余治水歷戴村。遂灘坎河口。披楚茨。涉流沙。謁白老人之廟。則棟撓像頽冠平定巾。老人已爾。返謁宋公祠。則淒涼古舍中。工部尙書已爾。亡有贈謚蔭敍。余以聞廟堂悲之。乃贈公太子少保謚康惠。蔭一孫人監讀書。而英亦給冠服。英之後世冠帶老人。而國家所以報開河元勳者備矣。無已則必如平江例。乃同勳同賞乎。而況少保有明堂之功。亡獻舟之過也。閘之啓閉。宜以水爲則。不宜以日爲則。水盈板而不啓。則溢不及板而啓之。則洩視水而疏數焉可也。兗州府有泗水穿城而過之。西注於報功祠。自濟寧左而會汎水。由長溝東注於報功祠。自濟寧右而會。則任城固一都會也。故建國最久。泗水故道多堙。水溢則經兗府東潰金口堰。而南出魯橋。豈徒少濟六十里之運。且導洩兗城之氣。而絕任城之青龍水。又不利於商舶之泛兗府者。萬曆春。余築金口導洩流。一貫城一邊。城北濠而皆會於天井焉。閘有三叢石爲之。有龍門。有鴈翅。有龍骨。有燕尾。曰石閘漕長恐水。

之洩也。則木板爲之。視漕之廣狹而多寡焉。中留龍門。十有八尺。遇淺則施。深則否。可導而上下者也。曰活閘。閘水出口與河上下相懸。爲之壩以留水。與河接也。龍門如制。曰土閘。皆濟石閘之不及也。閘漕與河接。若河下而易傾。則萃漕船塞閘河之口。數重。閘水爲船所扼。不得急奔。則停迴。卽深留一口。牽而上遞。相爲塞障。而壅水也。命曰船堤。是以船治船者也。閘漕下流通河者。必留一淺。長數丈。戒勿濬。以蓄上流。以一淺省多淺。若棄之與啓閘等。而上流諸淺見矣。此以淺治淺也。閘漕一里。藉令舟滿漕。可容九十艘。舊制魚貫三十艘而過之。余令之九十艘。盈漕焉。漕盈則水溢。且上閘之水。不得直遂也。而善停蓄水。可逆灌上閘矣。此以漕治漕者也。白河天津至通州。凡五十九淺。有淺夫以濬淺。有堤夫以築堤。百八十年。堤夫猶故也。而以淺夫爲引舟夫者誤。余爲之復舊制云。河道夫役。以類從焉。一曰堤夫。若高寶邵徐閘崖。從事笆釤修築者是也。二曰淺夫。若高寶湖之用船籃。閘漕之拽溜。牽洪諸閘之絞關執纜者是也。五曰壩夫。若奔牛之勒舟。淮安之絞壩者是也。而今白河以淺夫改爲引夫。高寶以淺夫併爲堤夫。失制久矣。今悉改正之。淮南建閘。舊取石江南綱運。殊爲勞費。不貲。萬曆元年。高寶諸閘。余令石工鑿徐州山第給匠氏之餼耳。而令回空糧船順載之。每歲約回空八千餘艘。每艘載石者三。則每歲當得石二萬四千。可建二十閘矣。勿勞舟費。勿擾商舶。便計也。而何

苦江南之官民爲國家造黃冊之法。若奇零不可窮詰。且滋弊藪也。爲之法曰。逢三丟。逢七收。蓋如以分計者。如遇三釐。則損之爲一分。如遇七釐。則益之亦爲一分。善數也。今乃推之。以至於不可盡之數。吏緣爲奸。余令估河工堤。如百丈者止於尺。千丈者止於丈。萬丈者止於十丈。銀如百兩者止於錢。千兩者止於兩。萬兩者止於十兩。糧如百石者止於斗。千石者止於石。萬石者止於十石。糴灰如百斤者止於兩千斤者止於斤。萬斤者止於十斤。假令不盡奇零。則三丟而七收之。分數明。吏弊絕。黃運兩河估計皆同。

瓜儀天妃各閘。啓閉不定期限。以江河消長爲候。如江河消。則啓板以通舟。悉令由閘。使商者省盤剝之難。如江河長。則閉板以障流。悉令由壩。使居者得挑盤之利。若水長閘閉。願候水落。由閘者不強之使由壩。水消閘啓。自願過壩者。亦不強之使由閘。則閘壩俱安。商民兼利。閘河水櫃凡八。一曰馬場湖。隸濟寧。周四十里有奇。俱水占可櫃不可田。二曰南旺湖。隸汶上。周七十九里有奇。可田者三百七十四頃六十畝。可櫃者一千六百七頃八十畝。三曰蜀山湖。隸汶上。周長五十九里有奇。可田者一百七十二頃。可櫃者一千五百三十九頃五十畝。四曰馬踏湖。隸汶上。隆慶元年均地踏丈。陞科者爲官占。不經陞科者爲民占。可櫃者無幾。方稽核而未報也。五曰大昭陽湖。隸沛縣。原額二百一十八頃有奇。可田者一百八頃。可櫃者一百一十頃。七曰安山湖。不可櫃。八曰沙灣湖。可櫃。夫可櫃者。湖高於河。不可櫃者。河高於湖。故

也。然而昭陽可櫃不能大濟。蓋洪溝之出涓涓耳。無足恃也。若獨山、赤山、微山、呂孟原非櫃也。新河障田成湖。而馬家橋諸口決之。大濟運無櫃之名。有櫃之實。蓋捐田稅毋病民。而櫃焉以益運乎。余蓋嘗請之。不報。運河之存也。以堤。堤之固也。以民。自張家灣南迄瓜儀延袤二千四百餘里。河臣鄙懼民居之毀堤也。而逐之。余大召民之居堤者。與約法三章耳。商賈輜輶者爲上堤。歲輸地租如例。民集而商賈不停者爲中堤。三載量征之。若野曠民稀者爲下堤。直令世業也。永勿征。蓋半稔而來者三千廬焉。循是行之。則二千四百里間。童叟往來。木樹掩映。舟行兩堤之中。亦天下之至安至適也。已是全堤也。焉用逐。通州至天津爲淺鋪者。九十五鋪。設淺夫十名。小甲老人一名。每歲水溢沙平。則濬之。是歲工也。百七十年。河臣以淺夫爲引夫。有司革淺役爲民役。白河之不治也久矣。萬曆元年復之。治水  
鑑

# 行水金鑑卷第一百二十一

## 運河水

儀真至淮安河止務高堤不務深河勢擁諸湖安所紀極萬歷元年治之乃測江都縣三汊河起至楊子橋止計半里舊水深四尺測寶應縣大潭起至三官殿嘴止河心舊水深四尺五寸測白馬湖口起至錢家直止河心舊水深四尺二寸測山陽縣化骨亭起至趙家莊止一里舊水深四尺二寸是三百七十里運道中淺者止此總之不踰五里餘皆五尺至一丈極深有至一丈八尺而止淺夫淺船治之月計之工也凡四尺者可濬至七尺而止則以運舟用水三尺乘之高寶諸湖從平水二十餘閘中尙可洩去四尺夫水落四尺則河岸視舊可高四尺一以固堤一以利田此祖宗但令深河不令高堤之微意也余故痛復之百餘年來乃不爲濬淺之易而爲高堤之難未之思也夫治閘漕之淤有二法遇淤泥之淺利用爬杓不利於刮板遇沙淤之淺利用刮板不利於爬杓瓜儀濱江閘外春運江潮未盛潮至則通潮落則滯司河者爲濬渠焉愈深愈滯蓋潮帶漕水同落故也余止濬渠獨令閘外與江相接之所置壩焉以留舊潮而接新潮且令渠之不直洩也而又免濬渠之勞費漕舟乃利境山閘者閘漕之外戶也年遠變遷棄焉不治上下多淺萬曆初乃更爲之而黃家閘始有重關矣外阻黃

內束漕兩利之策也。坎河口者其運漕之橐籥乎。旱則止汝以濟漕澇則洩汝以全漕石灘天壞俱弊可也。後來者時爲橐時爲籥有權存焉酌而用之存乎人。閘河水平率數十里置一閘水峻則一里或數里一閘焉。舊制漕淺卽濬夫數十里濬深一尺勞費則何益一板焉則數十里水深尺半餉耳故救急莫如加板。理閘如理財惜水如惜金糧艘入水深不踰三尺五寸濬至四尺則水從下過廣不踰一丈五尺濬至四丈則水從旁過皆非惜水之道也。故法曰凡濬法深不得過四尺博不得過四丈務令舟底僅餘浮舟之水船旁絕無閑曠之渠所謂以少淺治多淺以下水束上水。啓閉諸閘法若潮信焉如啓上閘卽閉下閘啓下閘卽閉上閘節縮之道也不然將恐竭又啓板時上下水舟俱泊五十步之外每啓一板輒停半餉命曰晾板則水勢殺舟乃不敗若通閘若頂閘是竭河毀舟之道也。漕大忘之沂泗之水經兗府自北而南由金口壩南出魯橋其流頗順故古建金口壩以遏南奔特分一派由黑風口西流穿兗城出天井閘其流頗細余濬黑風由兗城至濟寧深廣可舟而固金口西趨者盛則南奔者微多濟運道商舶直達兗府兩崖膏腴無淹沒之患一舉三利之也。山東水惟汶最大伏秋暴漲出南旺南奔濟寧者勢盛則衝遏沂泗之水天井閘咽不得下而濟寧東偏數萬頃膏腴悉爲廣川溢南陽則斷諸堤且左偏獨山諸湖不得疏洩右奔入昭陽二湖魚沛膝成淵東南射茶城則黃河得汶十之一助爲虐也。萬歷元年謹備南旺七月淫雨連旬汶暴發丈餘余亟閉柳林寺前

二閘斷南流而令全汶上源多北歸鹽河入青州之海下悉北歸張秋入天津之海其流於濟寧南陽出茶城者特沂泗二水耳流細而力薄通天井閘咽之裕如也東全膏腴數萬頃南陽諸堤其若常山之蛇焉獨山諸湖徐徐入新河而新河特涓涓者入昭陽魚滕沛疇昔之爲湖者今皆成膏腴秋大稔矣而射茶城入黃河者一衣帶之多黃河亦少失所助乎其樞在南旺其機在柳林寺前二閘蓋南旺地聳制之固形便勢利也汶平則柳林寺前復開汶發復閉不言所利大矣哉南陽新河堤三空減水閘湖水盛則從空中衝對岸之堤堤多毀河水盛則從空中奔沿堤之湖運舟吸入空中多敗余益之小閘十數口僅僅六尺許夫閘多則水勢大殺口狹則水力大弱亡吸舟決堤之患矣閘河八百里大湖之中多產蘆葦長堤之間多長草蒿棄於地也余令九月刈之蘆葦可以代柳稍蒿草可以代谷糞掩埽之資誠取之無禁用之不竭者矣省令夫之徵本色者改折色貯庫以備不虞不亦公私兩利乎閘河無源非眞無源也蓋合徂徠諸山二百八十泉者尺疏而丈導之合則流散則否有似於無源耳故閘河之水以深三尺爲制真指直之謂之一挈一挈者五寸也六挈則三尺矣六挈者三尺也故船力勝米力水力勝船力若不務足船而徒搭運以省船河力安能運船而漕大困矣歸罪無源之河何益哉制閘三法一曰填漕凡開閘糧船預滿閘漕以免水勢從旁奔洩如甘蔗置酒杯中半杯可成滿杯下漕水可使逆流入上漕二曰乘水打閘時船皆

衝尾其間不能以尺如前船拽過上閘口七分卽付運軍爲牽之溜夫急回拽後船循前船水漕而上使後船毋與水頭關閘夫省路一半過船快利一倍三日審淺凡下活閘蓄水如係上水淺則於船頭將臨淺處安閘如係下水淺則於淺尾下流水深處安閘故活閘必從深淺相交之界則淺者自深若騎淺安之則一半淺者深一半淺者愈淺矣南旺脊水也閉諸北閘則南流閉諸南閘則北流水如人意者莫如汶故命之左則左灌濟寧命之右則右灌臨清萬歷元年臨清稍滯運余以尾幫入南旺閉之南閘令全汶趨臨清一日而出板閘者七百十日而出運艘六千有奇此所謂役水者也諸閘漕以汶爲主而以諸湖輔之若蜀山馬踏南旺安山沙灣諸湖皆輔汶北流者也獨山微山昭陽呂孟諸湖皆輔汶南流者也顧汶水微于春夏之交而灌輸方盛湖水溢于夏秋之交而運事以竣要在節宣諸湖秋終則悉閉之以待運春終則漸發之以濟運則得之矣閘河身博不踰六丈故水束而深唯自留城以下往年爲黃水所盪漕博至有數十丈者夫以半汶南流而鋪數十丈淺固宜然今立小河之法於秋盡水落之候因勢剗築縷水小堤以小漕身如平淺則兩旁夾縷之如偏淺則於一旁淺處偏縷之延袤以淺爲度大都漕博止六丈堤高止五尺根四尺頂二尺欄以小椿草夏秋水漲則任其敗水落復修每千夫日可小二三里漕立小則水立深浮舟俄頃耳此歲工也江南運道自萬歷元年始屬總理自杭州以達於鎮江凡八百餘里遡杭及常之七墅堰大勢地卑且多湖蕩卽崇德吳

江長洲之間淺不堪也。唯自常之白家橋以至鎮之京口地勢漸聳河止一經更無支流可引每旱乾秋冬水涸輒淺滯不可舟而揚子江復下丈許此京口所以冬築春開今建瓜洲二閘大挑常鎮諸湖遂使臘月初旬京口可開千艘並入誠二百年僅見江南百世之利也顧自白家橋抵京口僅三百里濬之以漸而下引七墅堰以南之水注之北流如南旺北河故事則京口永無患矣常州以北三十里爲犇牛閘又二十里爲呂城閘官夫故在唯作新而用之此事半功倍者也每歲犇牛築壩兩浙回空皆由江陰下江口歷青陽出無錫之高橋抵蘇杭此其捷徑也但青陽一帶河身狹淺阻塞商賈不通今濬之不惟江陰運舟徑可抵城而每京口大挑此其間道也經略江南三策一曰處工費以備修濬江南河道宜兩年大挑如北河故事爲費甚鉅取之屬邑是以杯水救車火也則病官取之丁田是以公家累私室也則病民取之以河銀是漕渠廢水利也則病農取之商賈是以水累陸也則病商取之協濟是欲舍己耘人田也則病鄰今查蘇松常鎮杭嘉湖漕糧二百萬石每石僱船抵瓜壩脚米七升瓜洲閘成淺船悉抵江南水次交兌而悉獨僱船米余請於七升之內免去六升以利民量徵一升以利河名曰運河銀分貯各府鎮江河工獨多貯亦以多常次之蘇次之嘉又次之杭又次之大挑僱役辦料諸費悉資於此一切亡累也夫民免六升省二百年額內之舊派修河一升亡八百里額外之偏累以瓜閘所省江南之費爲江南運道通融之用便計也二曰設江渚以避風濤七郡運五千餘艘

俱出京口渡江以入瓜洲閘河風濤不利則艤於大江之濱後舟鱗集欲進不得欲退不能至危事也則於京閘之外藏風處濬而深之可容五六百艘固椿築堤若湖蕩焉而以一口通出入南北渡江者乃卽安矣三曰改閘座以免阻塞犇牛呂城二閘底石頗高而運河深七尺以平江水則閘底限之故深河宜深閘底乃利涉爾夏春運盛之時正汶水微弱之候南北分流之則不足併流之則有餘特爲番休之法如運舸淺於濟寧之間則閉南旺北閘令汶盡南流灌茶城逆舟屯於汶之上源以待北決如運舸淺于東昌之間則閉南旺南閘令汶盡北流灌臨清此役汶全力者也萬歷元年始用此法

漕大利

治水筌

馮敏功遷河南左參政時少年喜事者欲從泇口穿葛塢諸山抵南北大湖中界兩長堤爲運道以示奇柄相以敏功熟於河徵敏功與議且將屬之敏功念諸山道約二百餘里多盤石硆砂不可鑿大湖相連十四不易堤民力之幾何而虐用之持不可乃寢而喜事者又欲別繇海通膠河其視漕稍徑而中皆高嶺巨石東土瘠人疲不勝役甫舉事而驚潰者再矣乃移敏功山東敏功議以膠工不易興且不易竟卽竟亦終塞縣官故不乏金錢奈何悉捐以墳無用而窮此數十萬人力也撫臣採敏功議上聞失柄相意遂舍敏功而他屬卒如敏功言費至十三萬金而無尺寸利柄相稍恧沮始用廷議罷之丁艱去

兩浙名賢錄  
敏功服除  
起佐漕運見十年

是年漕撫都御史王宗沐·淮安知府陳文燭加修淮安長堤·幫築西義橋椿岸·又修鹽城石磯海口·以疏下流入海之路。南河全考·宗沐·文燭俱在萬歷二年去任·全考錯入在四年·故移置於此·淮安長堤在郡西·自清江浦樂王廟起·東歷大花巷·由西橋相家灣直抵新城·過金神廟至柳浦灣·六十里而近·詳見淮河王公二堤記·石磯口在鹽城縣東門外里許·諸海口可開·而石磯口獨不可開·明胡希舜嘗有記矣·略云·萬曆丙子·鹽城令杜君善教·以興化鉅公主議浚河建閘·河通潮大·至壞閘水·澎湃震蕩·大沒民田·一時居民溺死者無算·於是鹽人鼓噪而爭言塞石磯口矣·庚辰歲·揚令瑞雲言之巡鹽御史姜公壁·是年題請塞石磯口·修宋丞相范文正捍海故堤·而命楊令董其役·自是海潮不得奪隄而上·鹽人永永無海患矣·諸海口可開·石磯口則不可開·何者·石磯口瀕城·故憂不獨在田也·

明神宗萬歷三年正月丙午·巡撫順天都御史王一鶚條上弭盜六策·一議定守備汛地·漕河一帶·南起丁字沽·北至王家擺渡·崔黃口與霸州二守備分河東西岸而守之·兩岸兩屬·彼此互諉·不若盡屬之崔黃口·而霸州則專以近京要路責之一·一議增巡河哨船·宜置八槳船六隻·每船用兵十名·分布巡哨·一遇有賊·併力齊棹·與岸上巡緝互爲聲援·一議明管河職掌·謂管河舊設一把總·一主簿·皆高坐河西膏地·職守湮廢·宜於夾河武清營州二衛選驍勇有才官一員·充爲總領·責以護糧·把總·主簿責令沿河修濬·巡緝·如有失事·通與守備及巡緝官一體查究·疏下兵部·覆核無異·詔如議行·併令撫按官申飭所屬·有隱匿盜情·規避罪責者·事發一體治罪·二月庚午·先是聽選歲貢生員許汝愚奏稱·鎮江府練湖、焦干、杜墅三湖修之·堪以濟運·京口丹徒呂城、犇牛四閘·因而可廢·事下地方踏勘·至總理河道傅希摯言·練湖先已疏築·無容別議·焦干、杜墅二湖·地窪源少·無益連道·四閘若廢·有妨蓄洩·其事遂寢·戊戌總理

河道都察院右僉都御史傅希摯上言治河當視其大勢慮患務求其永圖頃見徐邳一帶河身墊淤壅決變徙之患不在今秋則在來歲幸而決於徐呂之下猶可言也若決於蕭碭之上則閘河中斷兩洪俱涸矣幸而決於南岸猶可爲也若決於北岸則不走張秋必射豐沛矣臣日夜憂懼悉心講求禹之治水順水之性耳今以資河爲漕故強水之性以從吾雖神禹亦難底績惟開創泇河置黃河於度外庶爲永圖耳泇河之議嘗建而中止謂有三難而臣遺錐手步弓水平畫匠人等於三難去處逐一勘踏起自上泉河口開向東南則起處低窪下流趨高之難可避也南經性義村東則葛墟嶺高堅之難可避也從堤溝河經郭家西之平垣則梁城侯家灣之伏石可避也至於泇口上下則河渠深淺不一湖塘之聯絡相因間有砂礫無礙挑空大較上泉河口水所從入也下至大河口水所從出也自西北而東南計長五百餘里北之黃河近八十里河渠湖塘十居八九源頭活水脈絡貫通此天之所以資漕也昔尙書朱衡之開新河都御史潘季馴之開邳河權救一時其情事忙促工費浩大難盡名言今雖尙幸無梗然想時度勢要之不免卒有不虞而後竭天下之財力以通咽喉何啻如新河邳河之情事洶洶而已哉若拏十年治河之費以成泇河泇河既成黃河無慮壅決矣茶城無慮填淤矣二洪無慮艱險矣運艘無慮漂損矣洋山之支河可無開境山之閘座可無建徐口之洪夫可盡省馬家橋之隄工可中輟今日不貲之費他日所有省尙有餘抵也故臣以爲開泇河便因列爲議工費酌工程擬督工請監工四款上之竚下戶工

二部看議。三月丁巳，泇河之議。工科都給事中侯于趙疏言：事體重大，宜集廷臣會議，或行地方覆勘。又瀕河一帶水災頻仍，大役驟興，地方隱憂，不可不慮。戶科都給事中湯聘尹言：曩者新河之役，議用費七萬，及其成功，殆十倍焉。今日雖議百萬，而大役難料，中道難輶，恐不能無倍於初議矣。宜大集心計，博采衆思，工費約用幾何，支給出自何所，開列奏聞，必儲蓄可備六年，然後可下詔興工。二疏俱得旨下部臣覆請會議。上曰：開河事理，傅希摯所奏固已明確，但事體重大，不厭詳慎。廷臣會議亦是虛文，甲可乙否，終難成事。命俟于趙親往會，希摯及儕連按臣確議以聞。丁卯，工科給事中侯于趙舉原任都水司郎中張純久歷河防，周知地理，乞添註原銜，同往勘議泇河，許之。四月甲午，總理河道都御史傅希摯謂高寶之間桃花泛漲，陡齊堤岸，宜急捐徐邳二州河道船稅堤夫等項四萬，以備修築。於是工科右給事中蕭崇業等疏：東南咽喉重地，重罹災變，宿水未消，新澇增毒，獨恤修築，以甦瘡痍，是或一道也。若開草灣浚石磈二策，則未可輕議何也。泇河之役，國儲所關，必不容已。若兩役並興，馳驚不足，顧尾失首，非計。宜俟泇河告竣，淮揚稍稍安業，乃可徐圖耳。戶科都給事中光懋亦言之。事下戶工二部覆議，命河漕諸臣及勘泇河科臣博訪羣策，議定明白以聞。六月辛卯，工科都給事中侯于趙等題會勘泇河事宜，自泉河口至大河口五百三十餘里，內自直河至清河三百餘里，自來河道無恙，無賴於泇，斷在可已。惟是徐呂至直河上下二百餘里，宜開以避二洪邳河之害，約費可一百五十餘萬金。特良城伏石長五百

五十丈比原勘多四百七十丈開鑿之力難以逆料性義馬陵俱限隔河流之處二處既開則豐沛河決必致灌入宜先鑿良城石土預修豐沛堤防而後前功可徐議也戶部亦覆如科臣言又謂正河有目前之患而泇河非數年不成故治河爲急開泇爲緩奉旨着俟于趙等所奏與傅希摯原議大不相同傅希摯久歷河道他當初若無的見豈敢謾興此役此必該道等官畏工久羈官故難其說陰肆阻撓勘官據其所言謾爾回奏其言先開良城伏石徐議興工都是搪塞了事之語深負委託今人平日都會說利道害沽名任事及至着落他實幹便百計推諉只圖優游無事捱日待時詎肯視國如家忠謀遠慮者似這等人如何靠得他成功濟事且泇口之議止欲通漕非欲棄河而不理今他每既說治河即可以兼漕使着他一意治河別工不必再議今後漕糧開兌遲悞責在漕運舟行梗塞責在河道有曠職廢事的都掣來重處管河司道等官都着久任不許陞轉吏部該科記着七月己未國初糧運自儀真直抵淮安謂之裏河俱分入五壩轉盤黃河謂之外河原不相通後平江伯疏開清江浦河由天妃口徑通黃河仍設閘以司啓閉每歲三月以後糧運過完卽將原閘封閉隔絕黃水官民船盤剝如故其後漕規廢弛閘不能閉而黃水灌入河臣乃議塞天妃口以杜黃水創開三里新河設通濟閘以通淮水其後閘廢不修淮地勢高於通濟淮水灌溢多於黃水謂宜將通濟閘及福興新莊二閘增卑倍薄務令高厚堅固仍令清

江廠分司專司啓閉。每五月以後。九月以前。二水盛發之候。嚴加封閉。官民船聽其自行轉盤。惟回空船至。每二日啓放一次。隨放隨閉。不許官民船越規擅進。以貽水患。從之。八月甲戌。工科都給事侯于趙疏言。高寶湖堤大壞。蘇松水利久湮。宜專委任督理。以裨國計。巡鹽、巡撫俱難兼管。宜於南京巡江、巡倉、屯田三差歸併一員。專理河工。部覆如議。丁丑。先是總理河道都御史傅希摯言。茶城一帶。運道咽喉。頻年淤決。迄無成功。宜自梁山以下挑濬。與茶城交相爲用。淤舊則通新而挑舊淤新則通舊而挑新。惟築壩斷流通其一。以備不虞。部覆得旨如議。九月己亥。南京工部尙書劉應節等上疏言。海運之難。以放洋之險。覆溺之慮耳。今欲去此二患。惟自膠州以北。楊家圈以南。計地約一百六十里。其應挑濬者不過百里。非有高山長坂之隔也。宜因山東班軍一枝屯駐膠州者。合附近該營起軍數千。度地分工。量工命日。以實心任事大臣一員董之。可成百世之功。部覆原議聞見旣眞。籌畫又熟。若以他臣督之。恐議非已出別生異見。宜專敕一道付本官專詣膠州。相度經營。并未盡事宜。悉聽便宜行事。得旨。這膠萊河議。卽經行勘。俱爲浮議所阻。劉應節等旣的有所見。不必覆勘。就着徐栻改工部右侍郎兼都察院右僉都御史。會同山東撫按官。將開濬事宜。一一計處停當。具奏來行。朝廷屢議開河。止爲通漕。與治河事務不相干涉。再有造言阻撓的。掣來重處。十月壬午。總理河道傅希摯議上。江四河道及山東泉源主事。要將江南運河歸併水利御史就近統管。兗州泉務歸併該府管河同知。仍將清軍同知除去。管泉字樣。部

覆從之。明神宗實錄。

徐公栻擢南少司空時。黃河東決。漕道爲梗。上南顧太息。宰臣以下咸蒿目焦心思。所以別爲計。而南大司空濟南劉公者。熟登萊事。公亦諳習水道。心然其言。遂並疏上計。上報可俾。劉尚書往視。而公則以少司空兼僉都御史專敕理膠河。會山東當事者言。開膠河非便。所役夫且乏餉。而羣譁言不便者。交和之。遂從中報罷。張元忭撰南工部尚書徐公墓志。栻字世寅。嘉靖丁未進士。

是年五月。高郵西堤決。清水潭丁志等口。本部郎中屠元冰暨接管郎中陳詔督築塞之。南河全考。

# 行水金鑑卷第一百二十二

## 運河水

明神宗萬曆四年正月辛丑以原任登州府知府陞陝西行太僕寺少卿李承選改添註遼東行太僕寺少卿兼山東僉事駐萊州開浚新河。己酉高郵州清水潭堤口衝決時督漕侍郎張翀以修復老堤工力浩大數年始可成功恐新運已臨決口未就且令糧船暫由田圈裏行而御史陳功則稱圈田淺灘不便牽挽外湖水而闢四十餘里風有不順必至稽阻工科給事中侯于趙亦以兩臣持議未決恐致過淮後期乞敕所司速議并欲以淮南運道專責漕臣而以淮北運道命河臣傅希摯一意經理務時加挑濬以圖萬全從之。己酉督漕侍郎張翀以修築寶應堤工議於江南各府州縣并浙江江西湖廣每糧一石加派一斗折銀五分兌于餘鹽銀內借用候次年徵完補解弗許詔以漕糧腳米六升每歲計銀三萬三千三百餘兩及蠲免七升內量復一升每歲計銀一萬兩爲修築之費又命於河道衙門轉發修河銀五萬兩如不敷或留漕米或借工本鹽銀或山東河南香錢例銀及德州倉銀并准湊用。壬子開浚新河工部右侍郎兼右僉都御史徐栻等議新河二百五十八里中間鑿山引水築堤建閘工必不可議省漕河舊規每方廣一丈深一尺爲一方每方二工計工給銀四分共該銀九十萬八千七百六十一兩八

錢費必不可不儲得旨膠河在嘉靖間該道官自行開浚工已十之六七當時未聞請給錢糧多用夫役今特竟其未成之緒縱工費銀鉅何至動稱百萬據所委勘各司道官多推艱避事其中工程道里丈尺大率虛估未見詳確顯是故設難詞欲以阻壞成事且就近有司官員豈無堪用者乃委及王府長史長史以輔導爲職豈宜侵有司事徐栻始議云何今觀其所措畫殊無勤誠任事之忠戶工二部其會同原建議劉應節並二科勘議以聞栻等又言前題匡家莊地委高峻難於施工改扞黃阜嶺道里稍近而高處亦復不減泉水仍不可通惟治都泊山船路溝一帶原係便路相傳謂都泊爲水所匯船路溝爲行舟處似有待於今日者在黃阜嶺迤北旣遠其高峻在分水嶺迤南又避其淤沙地形平衍水勢漫漫且旁有可濟之河水可引之源泉其上流爲沾膠等河濬之以爲血脈其下流爲張奴等河濬之以爲經絡多建閘座以通其咽喉廣開水櫃以資其榮衛立堤塍以障其流沙開月河以洩其橫溢或遇大旱水淺仍照會通河事例預造剝船以備剝淺每年春初大挑小挑務期通利其海倉口等處俱有舊設倉廩仍查復製造以備積貯是可以備海運之長策稱轉輸之便途矣報可丁巳命漕運及河道衙門嚴督郡縣將清水潭原決堤口設法堵塞勿得恃圈田外湖致稽糧艘二月丙寅戶科都給事中光懋言國家建都極北軍國之需悉仰給東南近因漕渠多梗識者謂宜別通一路與運河並行然初議挑浚僅百里起夫約數千經費數萬即可通潮信而海水自來頃勘報又謂海潮必不可通矣三徙匡家莊而都泊是

主矣。深挑量浚計地長百有七十里矣。旁引接濟之水又遠百六十里。與正河等矣。夫役過四萬矣。時限三年矣。估計工費又幾百萬矣。前後矛盾。恐糜竭無餘。而漕事未必有裨。乞命尙書劉應節暫輟營事。赴開河地方與徐栻虛心講求實用。若出百萬之費。未足收永賴之功。不妨奏請中止下所司。己巳工部尙書郭朝賓等言。新河之議。劉應節原以通海爲主。今查姚家莊以南至集墓溝。計三十里。自孫家口以南至高崖頭玉皇廟共一百一十八里餘。又自高崖頭至旋河觜。量浚七十丈。俱係海水必由之路。宜卽興工。其開引水河一百四十六里。應命停止。惟是千聞不如一見。徐栻親見海不可通。故議引泉。乃欲使之捨泉就海。責以必通。萬一無成。則栻得自諉。而費過錢糧已不可追矣。必須公同應節商度。至當可通則通。可止則止。慎於經始。以圖萬全。上命應節暫解營務。會同栻并該省撫按官親到地方虛心計議。先將難處開浚。試驗果否可行。細估具奏。毋得拘泥原議。含糊兩可。致誤大計。戶工二部各先發銀三萬兩。付應節支用。以後工費另行議處。丙子議浚新河。工部右侍郎徐栻題。山東屢罹災傷。青、登、萊三府尤甚。今大舉河工。必賴居民安業。乞將一應拖欠錢糧。自隆慶六年以前免徵。萬曆元年二年緩徵。疏入命所司分別京邊緩急。以副恤民德意。刑科給事中王道成言。新河一事。劉應節主通海。徐栻主引泉。臣愚以爲膠州在南海口之中。土最高厚。萬一堅石隱伏。挑浚安施。至於漕運紓長河。泉脈細易盈易涸。閘徒勞。況海船河船。決難通用。而山東錢糧不滿二萬。卽南北區處百萬易備。使復有不足。其將再請乎。

疏入上曰人臣任事最難已令虛心議處不當預爲難成之說以恐之命仍前議 戊子工部右侍郎兼右僉都御史徐栻以條議新河事奉旨切責倉皇具疏陳謝而所錄旨意差訛爲工科論劾上以栻在遠傳寫致誤貸之 三月辛亥巡按山東御史商爲正言臣奉命亟趨膠州擇分水嶺難開處挑驗用夫一千一百名方廣十丈餘挑下數尺卽礪砌石又數尺卽沙此下皆黑沙土未丈餘卽有水泉湧出隨挑隨汲愈深愈難今十日餘矣而所挑深止一丈二尺所費銀已五百餘兩尙未與水面相平若欲通海及海船可行更須增深一丈雖二百餘萬金不足以了此且麻灣海倉海口兩頭淖沙數十里隨挑隨淤雖使別開一渠數月後潮至沙壅亦復如是況海運必出自淮安海口高寶其所必經高寶不治此河雖通亦不能越而飛渡觀其緩急先後之勢此河之不必通亦明矣而況有未必能通之勢若此乎乞命停止毋事虛糜下部議 丙辰河道總督漕運侍郎吳桂芳言高郵河南隄乃永樂間平江伯陳瑄所建運舸俱行湖內波濤爲患至弘治間侍郎白昂議開越河中爲土堤東爲石堤兩頭建閘名爲康濟河其中堤之西老堤之東約成民田數萬畝卽今所謂圈子田也彼時未傍西堤爲河而別作越河於數里內舳艤安流軍民稱便但河去老堤大遠瞻顧不及缺壞不修遂致水入圈田又成一湖而中土堤遂潰壞則東堤猶受數百里湖濤故有昨歲清水潭之決蓋勢所必至也今若盡復白昂舊蹟策非不善但據估銀二十三萬有奇比之白昂所費尙不及半誠恐修築不堅數年復壞反成虛費則不如照弘治年間侍郎王恕

議就老堤爲越河只修築東西二堤爲費既省而循堤牽挽亦可隨壞隨修高郵既完徐及寶應謹將切要事宜條爲四議其一曰設處錢糧二曰燒採磚石三曰分募夫役四曰委官分理下所司壬戌工科給事中戴光啓言臣觀吳桂芳所奏高郵築堤一事舊河方病太遠終不忘軍民稱便之功開河令傍老堤又自爲二面皆水之慮臣竊探桂芳意若曰三堤並修一河復舊良可垂遠但前估工費不足應用今又不便更估不若姑省中東二堤之費云爾按其疏中有據估不及白昂之半又曰必復康濟之舊非增二十萬不濟其意可見矣夫圖大事者忘小費何必過爲嫌憚求倖於目前苟安哉下部議四月戊辰先是漕運侍郎吳桂芳以議修高郵湖堤爲工科給事中戴光啓所摘下工部議言漕臣躬親相度必有所見但疏意似因工鉅財絀改疏越河故戴給事反覆辨之事應覆勘惟是合用磚石數多採燒船運非倉卒可辦所議河南庫貯河工銀五萬兩應節轉發其磚石行各府州縣如式燒採至興大役應分派各府縣撥夫一體應役計時省放得旨吳桂芳原任揚州河工事理知之必真前已有旨委任責成不必又行覆勘餘如議戶部亦以江北各府椿草香錢船稅等銀五千兩漕撫罪贖銀五千兩廬鳳淮揚徐滁和事例納板銀二萬五千兩俱免解部各總輕齋內河工銀共五萬八百六十四兩兩淮鹽運司庫貯挑河銀三萬兩俱留濟用上渝其請仍留廬鳳等府應解馬價銀二萬二千兩以濟之庚午勘議新河兵部尙書劉應節言新河地形如掌水勢成渠較之黃埠嶺誠便且兩海口水甚深闊下皆實地乘潮自可通

舟惟南海口迤北十五里積沙數段從古路口另開十三里許直接麻灣以避之可以永恃又橫建一閘於新舊河水之交則潮水流通浮沙不入矣北海口以南三十里爲龍王廟有客沙二里四十步撈沙二尺下卽實地若旁闢一渠築堤五百餘丈以約水障沙自無他患由廟前起新河閘口中間一二淺阻并令挑深亦可無虞矣分水嶺一帶地形本高泉水四溢拽泥運水工力固然起工當自卑而高洩水當自高而卑難易未可執一論也至王家邱船路溝一段地勢趨下白河適當其衝秋水暴漲最爲河患宜岸口建閘一座沂水上流建壩二座尋常水流壩下引以濟河秋漲則水經壩上內以停沙亦爲善策大都北自海口抵亭口南自麻灣朱鋪通潮最易所慮者惟朱鋪抵亭口四十餘里耳然臣意主於通漕原不泥於通海也若造船宜准漕臣王宗沐所造海船式而稍儉其制載糧不過四百石納水不過三四尺則河海可並行無患矣山東巡撫李世達言南海麻灣以北劉尚書謂沙積難除徙古路溝以避之每里約費五千八百餘兩十三里總約七萬五千餘金然南接鴨綠港達東龍家屯沙積甚高渠口一閘沙隨潮入故復有建閘障沙之議竊以謂閘閉則潮安從入閘啓則沙又安從障也北海倉口以南至新河閘大率沙淤潮淺劉尚書從東岸試挑二里僅去沙二尺給過工食已二千一百金而大潮一來沙壅如故故復有築堤約水障沙之議竊以爲障兩岸之沙則可若沙自隨潮衝激安能障也分水嶺高峻試一工長止二十丈而費近千五百金舊河身原深一丈一尺新挑止深一丈四五尺最深亦不過一丈九尺爲

下多礪石。又掣水甚艱也。故復有改挑王家丘之議。竊以吳家口至亭口共高峻者五十里。大概多礪石。以分水嶺一工計之。費當何若。試過三工俱的無可行。况全河長亘一百七十里乎。潮信有常。遇大潮始稍遠。然亦止近陳村、閩、楊家圈耳。曾未至朱鋪、亭口也。况日止二潮乎。此潮水之難恃也。自店口至新河口。紓曲餘二百里。張魯白膠三水微細。都泊行潦業已乾涸。設遇亢旱。何泉可引。引泉亦難恃也。海中小舟載三百石者必納水六七尺始可行。王侍郎船式果可行乎。元人自至正十七年開浚此河。至三十一年竟以淺澗奏廢。元史謂其勞費不貲。終無成功。足爲前鑒。今當緝高寶之堤。無徒殫財力於不可必成之膠河也。巡按御史商爲正亦以爲言。上以撫按奏報與劉應節所奏利害懸殊。恐難底績。命工部集議以聞。於是工部覆言。撫按議既明確。則應節所謂可成可恃者。詢謀原未僉同。委應停罷。上然之。召應節及栻。遂并罷諸添設員役焉。六月乙丑罷新河兵部尙書劉應節。猶以用過夫役器具等項銀共三萬二千二百二十餘兩。請下所司。丁丑總理河道右僉都御史傅希摯言。山東兗東二府連河額編有現役夫。有徵銀夫。共一萬四十一名。今查工程繁簡。酌量裁留。現役夫六千七十五名存用。革去徵銀夫三千九百六十六名。所徵工銀。按季解貯府庫備河工支用。從之。甲申總理河道右僉都御史傅希摯言。南口口口口往來要區。素稱大淺。二年議一。春秋興工。輒於糧船有礙。宜倣濟寧月河制。建通河一閘。遇大挑則船隻俱出。月河工畢。仍出大河。用夫約九千名。用銀約四千七百餘兩。下所司。明寶

是年工部覆止膠河疏曰看得尙書劉應節侍郎徐栻題稱南海口地方有積沙橫絕中流已從古路溝另開十一里許以避此沙又議於新舊河水之交橫建一閘俾浮沙不入北海口一帶築堤五百餘丈以約水障沙分水嶺一帶試開一處深至三丈以上運水甚難因而停工自王家丘至船路溝另開七里爲一便路此處白河一道適當分水嶺之衝議建閘壩以遏之仍引水爲用及造船之式欲以侍郎王宗沐海船爲準而稍儉其制載糧三四百石納水三四尺河海並行永永無患要動用原奏留銀三十萬其餘銀兩另行細估補發巡撫李世達題稱試過三工俱已的無可行潮水引泉俱不可恃乞將二臣回部管事巡按商爲正題稱淖沙爲梗海水難通及又揭稱淖沙難去丈尺難據工程難計沙石難去潮水不足特引河不足濟海運難行乞命二臣回京河工卽爲停止各一節議照尙書劉應節侍郎徐栻建議新河要捨故河而尋便道在於匡家莊一帶開濬以通海爲主蓋兩海相貫則河渠充滿海舟直達於河由河復入於海往來無滯誠爲得策隨該二臣改議黃阜嶺又改船路溝今卻於分水嶺開試勘稱河形太高而海最下勢不可通遂議及乘潮導河障沙造舟等事意在多方求濟大約以兩頭所恃者潮南自麻灣以抵朱舖凡五十里北自海口以抵亭口一百八十里皆可通潮巡撫李世達卻謂南潮止及陳村閘距海口二十里北潮止及楊家圈距海口六十里間或至朱舖亭口者蓋

一年之內有大風迅烈潮流疾速則然不可以爲常也且潮水倏焉而長倏焉而落落則未免守候耽延踰時况潮之所及爲有限乎潮不足恃明矣又以中段所恃者張奴河至膠乃最下之地爲秋潦所歸十月以後日漸消耗至春月泉脈微細適糧運湧到之時雖置櫃建閘以時啓閉終不能使之源源而來滔滔不竭也至謂白河流沙爲害議建壩二座以遏水之入而謂水流壩下引以濟河秋漲水經壩上則沙必與水俱入而謂內以停沙又皆臣等所未喻也河不足恃亦明矣兩海口地方各有淖沙至謂爲淺沙客沙亦能爲害全河長亘二百七十里內沙洲頗多自王家丘至船路溝七里雖爲便路其下有沙與否亦未可知沙在海中者潮水湧進沙必隨之而入沙在地中者疏濬所及沙必隨之而出雖土沙相半土可蕩盡而沙則下沈日積日多愈挑愈有固非祛除所能絕亦非堤閘所能障也乘潮導河皆無足恃沙多水淺置舟則膠雖稍儉其制載糧三四百石亦非淺淺者所能勝也剝淺易舟建倉等議必將復起尙書劉應節亦謂善後之策難以逆覩竊恐所謂利者未必利而害將不止於什一矣國家舉事固不嫌於導河若無裨漕計亦奚以導河爲哉今以百萬之銀驅數十萬之衆而希冀不可必成之功殊非萬全之謀亦非二臣建議之初意也且尙書劉應節原奉有明旨會同徐栻等并該省撫按官虛心計議先將難處開濬試驗果否的有可行今撫按官李世達商爲正俱各親到地方公同開濬試驗而執論互異如此則劉應節所謂爲而可成成而可恃者詢謀原未僉同事體委多望

礙相應停罷以省勞費

河防權

是年五月漕撫吳桂芳題請委郎中陳詔殷建中兵備程學博知州吳顯修復高郵西湖老堤傍老堤  
綠圈田改挑康濟越河并築中堤糧運民生至今賴之按高郵捍湖老堤長亘四十里永樂年建至  
弘治間白昂於境內越民田三里鑿康濟越河通餉避河者爲東堤其捍隔民田者爲中堤中堤之中  
有田數十萬畝則圈田也嗣後圈田淹沒老堤傾圮萬歷三年泗水南下衝決清水潭等處故塞決後  
卽議修老堤甃砌磚石改越河廢東堤改築中堤以便牽挽湖堤迄今堅固越河利涉

南河全考

明神宗萬曆五年二月己卯總督漕運侍郎吳桂芳言高郵石堤工將底績宜及時開挑越河查先年侍  
郎白昂開康濟越河去老堤太遠河成之後人心狃於目前越河之安而忘老堤外捍之力年復一年不  
復省視遂致老堤與中堤俱壞而東堤不能獨存今宜倣侍郎王恕之議挨老堤十數丈取土成河使堤  
上往來共由人得照管不致蹈前頽圮旨下所司三月戊子朔工部覆給事中劉鉉奏丹陽一帶河身  
淺涸漕艘阻滯參政王敍果不行挑濬臨事倉皇倡爲開孟瀆河壩之議得旨奪俸二月孟瀆可開俟秋  
水落後興工爲來歲運計癸卯直隸巡按御史郭思極因京口漕河淺涸條上三吳水利一復練湖以  
永資蓄洩蓋江南漕河北高南下京口一帶地形高亢河流易涸雖奔牛呂城建閘起閉蓄水以待運船  
而實仰藉練湖爲之源也練湖北去丹陽城百步而近漕河繁遶其側周圍四十餘里仰受長山八十四

溪之水匯爲巨浸。唐宋以來，築有中梗、斗門、石閘。國朝天順成化間，屢常疏濬增修。夏秋戽水溉田，冬春放水濟運，故有湖水放一寸，河水漲一尺之諺。自往時守令狃於近利，令豪右告佃成田，寢失舊額，而傍湖之民私開涵洞，網取漁利。年涸一年，今且揚塵矣。爲漕河經久計，急宜請復。倘慮貧民失業，使佃湖之民轉佃於萬頃澤等處可也。一修孟瀆以旁通舟楫，奔牛、呂城二閘，應冬閉春啓，蓄水以待運船。然秋冬之交，回空運船與往來官船必取道於此，欲恪守成規，勢不可得。有不由二閘而可以間道達江者，爲武進之孟瀆河。河延袤六十餘里，外通長江，內資灌溉。自嘉靖間防倭入寇，築壩堵塞，於是河流漸微。日就阻塞，而船不復經行矣。全計開濬約費五萬餘金，取諸漕運衙門，無令獨累武進一縣。此河一開，既有私道以通舟楫，而運閘得啓閉之宜，又引江潮以進奔牛，而運河資接濟之力矣。部覆得旨，練湖并孟瀆河。撫按督同水利官修復開浚，責令秋間完報。爲來歲轉漕計，占湖阻運不行治罪，已是寬恩。如何又議勘償？如有抗拒阻撓，及司道因循苟且者，撫按參來重處。壬子巡按直隸御史陳世寶條陳河道江北四事：江南二事一復老黃河故道，先是河自三義鎮歷清河縣北出大河口，與淮水會流，出海運道，自淮安天妃廟亂淮而下十里，至大河口，從三義鎮出口，向桃源大河而去，謂之老黃河。至嘉靖初年，三義鎮口淤，而黃河改趨清河縣南，與淮會合入海。自是運道不由大河口，而徑詣清河縣北上矣。邇者崔鎮屢決河勢，漸趨故道。若仍開三義鎮口，引河入清河縣北，或令出大河口，與淮流合，或從清河西另開一河。

引淮水出河上游會合則運道無恐而淮泗之水亦不爲黃河所漲民難其永舒矣一修寶應湖堤補古堤以固其外于古堤東再起一堤以通越河而使運舟於此經行一請復上下練河一開復孟瀆河一增建儀真二閘因江口去閘太遠欲於上下江口迤邐十數丈許各建一閘潮始來預啓板以納之潮初退卽下板以閉之使出江之船盡數入閘以免遲滯一開瓜洲河港塢將屯船塢挑浚深闊使船之先入者屯聚於內又於鹽壩之東開一曲港與新閘外港相合使船之後至者續泊於內以免金山挂江之險部覆允行五月甲午孟瀆河以三月初興工至是報竣共用銀一萬六千五十餘兩閏八月壬辰禮科左給事中湯聘尹言京口水涸漕輓愆期近議開練湖矣然可以資丹陽不能資丹徒議開孟瀆矣然可以資江陰不能資京口也蓋京口與洲對壘而孟瀆去洲頗遙空船可以泝流糧艘難以涉險則運道必出京口矣宜於京口之傍另建一閘引江流內注低舊閘可丈許視冬間水勢而定之準焉潮長則開縮則閉可免涸轍之患章下所司庚戌御史尹良任條陳漕運事宜一通便道以速漕運孟瀆河口渡江入白堀河抵灣頭爲運道捷徑宣德七年平江伯開通至正統四年都督武興復閉今孟瀆河既開則自河渡江入黃家港水面雖闊江流甚平且由黃家灣至泰興以達灣頭高郵運河僅二百餘里可免瓜儀不測之患一開江道以泊運舟糧船自京口乘風北渡瞬息可達瓜閘但金山而下觸浪洶湧中流遇風則瓜鎮之收閘者未盡而京口之出口者難回難免漂沒之患惟鎮江城西北有甘露港約長十餘里夾

岸洲田宜挑使深闊以便回泊部覆二港可否踏勘行之報可。十一月癸巳漕臣吳桂芳奏高郵湖土石二堤新開越河南北二閘及老堤加高石層增設護堤木城各工竣事報聞。明神宗實錄

是年漕撫侍郎吳桂芳命主事張譽知府邵元哲等增築山陽運堤自板閘至黃浦長七十里閉通濟閘建興文閘及修新莊等閘築清江浦南堤以禦湖水加河岸以禦黃淮加清江閘以便運舟之牽挽。南河全考



# 行水金鑑卷第一百二十三

## 運河水

明神宗萬歷六年正月庚子戶科給事中李漸條陳治河五事。一曰多浚海口。入黃河二曰勤塞決口以濟糧運。

夫自徐邳以至瓜儀皆爲運河而皆賴堤以蓄水但自清口而濬至安東雲梯等地方多踰一二百里自徐呂至清河又不下三四百里山陽高寶諸湖必由多閘始洩而採辦閘石轉運亦難浚導之功旦夕未竟其不涸漕而妨運者幾希必多貯椿草相度水勢而急爲之備然後可以無患三曰宜以江北全効治漕河不當以瀕河窮困州縣治漕河臣嘗濫役寶應見其地道重傷而又有衝路之供應有養馬之煩費及觀揚州所屬或有地稍豐收而又無驛地養馬之累夫常賦之經各有定額未敢輕議若淺夫則因時增設且皆國事耳可無裒益以恤疲民四曰歲報錢糧以核疏鑿之功夫疏河浚海建閘築堤非百餘萬以上則難興輕費非五年七年之久則無以成功總理大臣每歲終將用過錢糧修過工程逐一奏報其築塞決水必視水勢注海之機以爲消息但能勤於補塞不妨飛輓者卽爲成功此於稽核錢糧之中而寓考成河渠之意也五曰優恤夫役以鼓勞人夫河工之苦胼胝狂瀾之中跋涉淤淖之上且地皆荒野濱海凡饔飧等需有費二錢不得一錢之濟者今宜從實估勘稍優其值以蘇小民之苦至應得工

銀必須委廉能官依時早給。仍察督小官不許假以別事。剝削夫役。章下所司。二月庚寅初河淮泛溢。漕糧甚艱。科道官及總河諸臣建議。或謂海運甚便。或謂河道無虞。紛紛不一。至是戶部覆議。謂先年海運事宜。一一規畫停妥。如每歲河道不梗。仍從河運。不然。卽照海運舊規成法。酌量舉行。不報。三月壬子朔。刑部主事管志道上言七事。六曰定河漕之策。今京師專倚江南四百萬石。而驅之冒不測於海運之中。其軍若民之稍愛身家者。必復轉倩海濱亡命以應役。何異借寇兵以齎盜糧。且示人以從海窺燕之路矣。臣謂河縱決溢。梗運不過一二年。而今西北尙寧。京儲可支數歲。曷若乘此機會。暫停一年糧運。約以若干資河工。以若干賑餓莩。存留若干以興三吳水利。蠲豁若干以蘇息窮民。倘次年尙未通漕。則量徵什伍。暫行轉搬。有何不可。然臣惟國家都燕。不宜專倚南稅。即使漕運愆期。而北方亦足自贍。乃無後虞。則屯田水利未可以爲迂而不講也。五月辛酉。以高郵湖堤告成。贈卹原任工部侍郎吳桂芳。如例准揚海防副使程學博等十員陞賞有差。七月乙亥。總督河漕都御史潘季馴等題。寶應湖於本年六月內。陡起暴風驟雨。將本工復行衝決。蓋由河上諸臣期以苟且了事。而但爲目前之謀。憚任勞者莫責之功。便侈大以競賞。脫有潰決之誤。則遮護以托逃。若不因此重加究治。何以示懲。上是其議。着河漕衙門着實參奏。八月癸未。開朱輝港鑰匙河。清江等處爲糧船灣泊。其工費卽於兩淮賦罰及河工銀。

兩動支。乙巳巡撫浙江兵部右侍郎徐栻題澈浦所至秦駐山一帶河道去海塘迤南聯屬縣治國初舊有土塘爲之屏障內河爲之洩流以致石塘可保而田畝歲登稱爲沃土商旅輻輳賴有生業向者淤塞坍塌旱澇無備舟楫不通糧運甚難乙亥潮災該所軍民被災特甚而石塘衝場殆盡者職此之由臣目擊時艱建議開濬荷蒙俞旨允行臣嚴督各官興舉今果能矢心協力督率勸相萬夫子來月餘告竣臣親詣閱視考成見新河深廣土塘高厚內外相維石塘益固永保異潮無衝突之患田疇得灌溉之資而糧運直達利益無窮所據効勞諸臣與臣終始塘河共事胼胝者臣不敢蔽如嘉興水利同知黃清等及海寧備倭把總王三錫等所當紀錄以俟優敘議下所司

明神宗實錄

是年九月總河侍郎潘季馴題准命官砌寶應八淺石堤共長八十五丈六尺修復淮安新舊閘壩遷通濟閘於淮安甘羅城南以納淮水故道盡復漕運通行山寶高興鹽等處沮洳之地盡爲稼穡之場

南河全考

明神宗萬曆七年三月戊申直隸巡按御史陳世寶條陳治河策約一添設新堤堰夫役河工雖已垂成但遙縷二堤已逾千里高家堰之堤凡六十里柳浦灣補舊增新將百餘里而黃浦八淺地雖咫尺反稱緊要若非集夫密守則盜決可虞宜增夫額畫地築居乃爲勝算一添設管堤官吏高家堰柳浦灣於淮安最稱緊要今修築告竣但二堤俱屬荒僻奸商漏稅利其直達揚州每行盜決宜增設大使官一員專

督衆役使之同居堤上密訪。七月戊申贈兩淮鹽運司同知黃清爲陝西行太僕寺少卿以河工効勞死事也。庚戌總理河道潘季馴總督漕運江一麟題稱淮安一帶黃淮灌入運渠高墊且閘水湍發啓閉甚難查照平江伯陳瑄所建清江、福興、新莊等閘遞互啓閉以防黃水之淤又於水發之時閘外暫築土壩遏水頭以便啓閉水退卽去壩用閘如常議欲修復舊規并請特旨垂示各閘使勢豪人員不敢任情阻撓部覆從之。壬戌工部奏敘開便河工次先是巡漕御史陳世寶議鑿瓜洲屯塢通浙直連船今又議開儀真便河以通江西湖廣等糧運欽命嚴督開挑至是總理河漕潘季馴管理糧儲道陳文燭、查原督揚州府知府虞德華、淮安府通判况于梧、儀真知縣侯應徵挑完便河工程將所挑河渠勘足丈尺所支錢糧開報數目會同漕運巡撫侍郎江一麟僉謂陳世寶功當優敘如陳文燭等四員官有崇卑勞無軒輊議行吏部敘錄其餘行漕院分別獎賞以示激勵從之。八月乙酉戶部題覆密雲漕糧俱屬額餉往時自通州水運僅止牛欄山又自牛欄山陸運抵鎮歲廢腳價繁多居民騷擾因潮白二河可以通漕節經督臣修治二水會合河流已盛又因同知衛重鑑建議自通州徑運至密鎮無倒卸起剝之煩插和偷盜之弊主事曹維新議添扁淺船二百一十隻新舊共船四百隻俱令經紀承管撐駕所運糧十五萬自牛欄山至鎮城每石四分內扣八釐抵作船價計年扣價還官以備十年一次更造之費計所給經紀脚價止一萬二千七百餘兩而每年省什物行糧等費共銀二千二百餘兩而十五萬漕糧僅以三

月通完費省而上下便之經久可行既經督撫梁夢龍、張夢鯉具題宜着爲成規仍請紀錄各効勞官運務者俱依議

明神宗實錄

黃清上饒人起吏員清勤積官嘉興同知加四品服俸築海塘有功後以運同治高寶河堤積勞死於寶應之寧國寺蓋上官忌而擠之水以沒也清在寶應築土石二堤支河工銀四萬餘兩錙銖磨算上下皆不得欺冒嫉之甚時已積勞得嘔血病水次謁所司令人密蹴其板墜下救起死矣尋復甦拔入城凡二日氣絕蓋萬歷七年六月初二日也年五十八奏聞有良工苦心難以名言之語

湧幢小品

明神宗萬歷八年三月乙巳工科給事中尹瑾陳河工善後七款一浚閘河以利運艘淮河一帶先年平江伯陳瑄開鑿時原恐阻淺剏立裏河歲一挑浚今狂流旣息積沙未除外河日深內河日淺宜照南旺事例三年兩挑挑期俱在通濟閘築壩之後動支歲修錢糧多募夫役限一月通完至於揚儀河道亦應時常撈淺以專責成以防衝決河水暴決勢在速治今後遇有水漲暴發非司道駐劄地方該掌印官竟自派募人夫動支物料多方防守如水勢異常夫料不足聽其借支貯庫別項銀兩一面通詳司道一面便宜築塞不必拘泥關白而後行事五月丙子命挑浚白溝河以便運船從科臣王道成請也丁亥總理河漕潘季馴奏復漕河舊規六月初旬於通濟閘築壩九月初旬開壩下所司知之庚寅工部奏請復舊規以清街道列爲六款一疏河渠以通水道京城北有海子南接玉河橋東有泡子河西有河

漕各街俱有長溝中城有臭水塘此皆各通脈絡今多壅塞且有侵占者乞逐一清查給銀開浚

明神宗實錄

是年總理河漕潘季馴題河工未盡事宜疏云又會議得淮南水患其源在淮黃其重在運道而民生利病實相關焉往年高堰不塞閘禁不嚴而淮水始南黃水又從天妃閘灌入以致淮揚一帶浸及城市興鹽等處之田廬盡成昏墊清口遂淤海口因塞羣議紛紛計將無出矣幸賴廟謨主持部院殫心經畫築高家堰改天妃閘復三壩嚴啓閉而淮黃二水竝免南奔之患塞黃浦八淺修復寶應土石堤而興鹽一帶俱有可耕之田清口因淮水衝刷而日深海口得淮黃合流而大闢運計民生殊爲永賴矣所據未盡事宜止有高寶江都山陽年例歲修之堤向緣錢糧缺乏工力不敷每歲止是支吾目前未能加幫高厚及興鹽高泰以裏洩水舊渠向因黃浦八淺潰決濁流浸灌淤墊頗多誠今日所當議者以湖堤言之除寶應大工堤岸俱各修砌完固惟當率夫防守無容別議外其卑薄殘缺之堤宜加土工椿木以減水閘言之除高寶江都新舊增置閘座可以宣洩者無容別議外高郵南門舊橋口應改建減水壩一座寶應子嬰溝舊閘及泰山廟後輒閘九淺石閘應改建減水壩三座并江都邵伯湖加高閘石九座錢糧俱應於見請歲修積貯銀兩動支如有不敷卽於大工餘剩銀內支補者也然減水閘僅可以洩尋常盈溢之水至於伏秋霪澇與天長六合諸山之水陡發共注於湖止憑瓜儀二閘宣洩不及查得揚州灣頭原有運鹽官河一道內由芒稻白塔二河直達大江勢甚通便年久淤淺先

年刑部侍郎王恕會議挑濬計長三百四十里道里遼遠工費不貲且議者又謂私販船隻潛度難防遂致中寢殊不知洩水之期每年止是五六七八四箇月喫緊若從壩口密佈椿柵就令白塔巡司防守自可禁絕其餘月分任從照舊築壩實爲兩利而無害也但虛錢糧不敷今止議先從灣頭濬起至泰州南門止計長九十七里挑深四尺面闊四丈底闊三丈併打壩合用夫工銀一萬零八百兩相應於巡鹽衙門挑河銀內動支又查得高寶江都堤內田地及興泰山鹽州縣地方外受各減水閘之餘瀝而內蓄時伏連綿之積雨皆由射陽湖經膠臘喻口出廟灣以入海迺其故道也渠道見存止宜疏濬先蒙總督兩部院據鹽城知縣楊瑞雲估勘挑濬淺處計長一萬二千六百丈合用夫役工費銀七千五百六十兩已經覆勘明確相應於原議大工扣存巡鹽衙門挑濬支河銀內動支者以上數事俱係歲修及原議未舉事宜亟應興舉務在明歲伏前報完方克有濟但道里遼隔時日不多必須分任責成庶可速就今議得高寶江都一帶湖堤及修建減水壩等工相應俱屬南河分司管理疏濬灣頭鹽河分屬海防兵備道管理疏濬射陽湖諸淺及清江浦外河堤岸分屬徐州兵備道管理庶事有專責而工可速成矣再照鹽城知縣楊瑞雲寶應知縣李贊揭內開稱寶應堤內重剏月河一節委與高郵康濟河事體相同節經部院題請勘議舉行但計工費不貲當此勞費之餘災傷之日恐有不堪相應暫停姑候時和年豐再圖興舉者也職等會勘無異理合呈報等因該臣會同兵部尙書凌雲翼

虛心講求逐細查覈除中河司道管轄地方自清及徐五百餘里黃河經行之處委已順流入海運道無梗居民頗安惟在查照部科題准事例防守不懈卽爲永賴之策無容別議外其寶應迤南諸湖聯絡清江浦外湍溜不多而關係內河不小各該堤岸雖係大工之所未及實亦運道之所必資循例歲修殊屬虛應尋常僅可支持暴漲不免衝場蓋人力固自有限錢糧亦所不敷無怪其然也所據司道勘議加幫堤岸修改閘壩濬灣頭河之淤淺以殺外湖之橫流疏射陽湖之故道以洩內地之積潦工費不煩於請發分任尤便於責成似應依擬以終前功伏乞敕下工部查議上請備行總督衙門悉照前議督行各司道查照動支前項銀兩嚴督各該掌印管河官務趁今冬天氣晴和分投修理併乞轉行兩淮巡鹽衙門將挑河銀兩查發濟用定限來歲三月中通行完報以備伏秋如有惰誤及苟且塞責不堪永賴者指名參奏庶未盡之巧區畫周備而運道民生端有攸賴矣奉旨工部知道

河防一覽

是年決高郵城南敵樓之北

堤南

上河田廬皆沒郎中張譽督塞之寶應決黃浦譽率夫堵塞堤下窟

得龍骨建脫龍亭

南河全考

舊志云

此印川公河上軼事也

王文肅撰公墓志云

黃浦下陰雨輒聞鶴鳴聲

居民

燭然在焉就視之鉢顱獨角

其顱骨似牛而長廣倍之

其角似龍之火帶而稍參差

舐之輒粘舌時以爲孽龍避

公而尸解云

喬萊寶應新志云

子昔修明史爲潘公作傳

蛟龍浮蛻之語

本之王文肅所撰志銘中

予以說近荒唐

未入正史今歸田里知有碑在黃浦廟中

明神宗萬曆九年五月戊子吏科給事中顧問言臣前待罪任丘日擊滹沱河每遇夏秋水漲漂流廬舍

渰沒民田不可勝紀而額糧現存百姓歲苦賠墊大半逃亡前撫按官計議疏浚或欲開故道或欲開新河未免此利彼害以隣國爲壑終非長計莫若將饒陽河間以下水占之地悉讓爲河動支該府節省并賚罰銀兩召募夫役挑鑿河身使水有所容瓶築堤岸使水有所束以圖永久之規毋爭目前之利其額征錢糧若必不可缺卽於府屬州縣每石量加分釐或有現淤沃壤清查照畝起科通融攤派部是其言請行撫按查看具奏從之六月丙辰巡倉御史顧爾行條議水次三事一謂小灘水次向因河南糧戶賚銀至彼買米致奸棍營求乞攬插和不堪宜行禁戢一謂遮洋海船年久損壞宜行修葺一謂運官率多衰老不堪宜加慎選部覆如議因言浙江杭嘉湖漕糧本部舊差主事一員監兌後因科臣建議停差以巡鹽御史事簡議令兼攝而御史不能親臨致糧米粗惡係乎國儲查有先差舊例相應議復得旨允行七月壬戌總督漕運凌雲翼奏稱儀真閘稅宜酌水勢不必拘泥取盈其瓜儀各閘壩應歸併南河郎中管理不必添設主事部覆如議因言河道歲修錢糧宜敕督臣照各邊軍餉事例歲費若干存留若干悉解工部貯庫遇河工缺乏通融請給從之雲翼又言茶城至留城一帶運道咽喉節因黃水倒灌停淤漸高運船率多淺阻臣已督行司道興工挑浚乞照往年事例暫停進貢船隻支用錢糧俟工完覈實具奏章下所司

明神宗實錄

明神宗萬曆十年三月己未朔增築保定府雄縣橫堤八里工食取諸修城餘銀造河間府任丘縣東堤

自滿堂村至呂公堡二十里工食取之裁省淺夫銀以滹沱水患撫按辛自修敖焜請也。辛巳先是河漕總督凌雲翼言清江浦河堤夾隣黃河邇來水勢南趨淤沙日被衝刷恐黃河決噬運道可虞欲於城南窯灣自馬家觜歷龍江至楊家澗出武家墩另開新河以通運道在司道張譽等初議則從武家墩折而東仍合通濟閘出口於是兵科給事中尹瑾議清浦之河其來已久河堤之外一望平田并無岡阜遮隔雖楊家澗新開河渠相距亦不過十餘里必清浦之堤無虞而後淮安無虞一河兩岸無虞而後楊家澗之新河無虞設清浦一決其害不止清浦而已且糧船經由淮城則夾帶違禁易以稽查若經由窯灣入馬家觜則中有一河之隔又有大湖之遙脫有頑軍梗悍作奸犯科失誤糧運咎將誰歸至武家墩出口尤爲可虞蓋本墩地勢高亢天將設之以屏藩淮河者墩內地高難爲挑空墩外湖闊難以灣泊冬春之交糧運緊急則苦洩涸伏秋之候淮水泛濫又苦奔冲且武家墩與高家堰共爲一堤相去甚近開武家墩是卽開高家堰則又害全河矣無已則通濟閘合流之議爲可從耳已而雲翼請遣官往勘給事中李廷儀吳信言今日治河之事宜開新河以避黃流守舊堤以固清浦武家墩不可開新壩不可築事勢昭然遣官覆勘徒滋道旁議耳部覆給事中言皆是上令雲翼計永利以聞四月戊戌戶部題漕糧遠者六七千里近亦四五千里往河道阻塞運糧多虞荷皇上軫念國儲歸併河漕督臣專責各省巡撫及添設御史通行巡察各兵備畫地分修故邇年道路疏通不踰春月俱達天津北至白河咫尺京師反不

能依期抵壩何也一則起剝甚難一則濬河不力蓋剝船僅八百每船不過百餘石每剝往返須兩日三百餘萬之糧必欲盡用剝船已盡河張無期轉盼秋雨時行陸運既阻於泥濘入倉又難於晒揚雖捐輕資而盡用之亦安望米色乾潔無浥爛耶宜令倉漕各衙門嚴行沿河承委州縣官令其晝夜駐劄臨河各分信地督催堤夫淺夫挑浚白河一帶平河漫流淺阻務期深闊無滯如原設夫役不敷許量動官銀雇募協助俟糧運完日報部議補仍將各官勤怠酌議題請以示勸懲報可六月壬子新開永濟河成長四十五里建閘三座費銀六萬餘兩總督尙書凌雲翼以聞上以其費省而功速賞銀幣有差七月辛未直隸巡按楊楫題入夏以來雨澤愆期濟寧臨清一帶閘河淺澀提督泉源工部主事馬玉麟將南旺迤北閘座閉塞借水南流致北流之水糧船淺閣兗州府管河通判詹謐一籌莫措阻誤糧運且本官物議沸騰官守有玷應分別罰處仍行各管河分司官將南旺馬場安山諸湖逐一清查原界集募人夫開濬深廣其減水閘壩查有損壞卽行修葺務要以時蓄洩永保運道如道府等官因循故套苟且了事聽其指實參奏疏入下部覆奪馬玉麟俸三月降詹謐閒散其修湖儲水係濟漕要務共依議申飭行十一月戊午維揚古稱沃壤而地形高下大海環其東諸湖遶於西所賴堤厚支河通斯田地可耕民竈俱利自范堤坍壞高寶堤亦衝決不守其中大小支河所在淤塞於是以高寶興泰四州縣爲壑而洩水無路民竈罷於昏墾矣河道尙書凌雲翼言臣等躬親勘視度地形探水勢其治之道有二惟疏上流

使入江洩下流使入海沿漕堤一帶之水爲上流沿范堤一帶之水爲下流如西引邵伯湖之水轉南至新安湖復東入運河至芒稻河入江有餘則聽其直瀉不足則引以濟漕則上流疏矣如牛灣河姜家堰廟灣爲三大海口引各支河東會於串場河北會於射陽湖俱入海則下流洩矣而興化之堂子鎮戴家窖海溝河白駒三十圍竈則牛灣河之支河也黃土溝皂角樹至岡門登瀛橋河則姜堰之支河也安豐鎮至清備灌鋪則廟灣之支河也其何垛場至白駒場一帶阻淺尤甚又河東一帶舊係糧鹽大河洪水衝決河身與岸相平故水軌道而淤溪秦漳艾陵葑子諸湖之水北淹民田億千萬頃處處俱當挑浚俱費經營惟是工有後先勢有緩急今將范堤數十里先行修築使外潮不得入串場支河六七道盡行疏浚使內外有所出果蓄洩利便積水可消則海口不開亦可如支河旣通之後水患如故卽并開海口置閘以備蓄洩其修築范堤該銀四萬二千四百餘兩浚支河六道該銀二萬一千四百四十餘兩俱於鹽價門租浚河存剩銀等支用部覆河臣策是定限今年十二月初興工明年十月報完務須費省工堅詔從所請

明神宗實錄

# 行水金鑑卷第一百二十四

## 運河水

明神宗萬歷十一年三月己亥工部覆漕運尙書凌雲翼題稱徐州戚字港溜急運艘難行開新渠建閘境山廢閘曰梁境閘新河中閘曰內華閘新河口閘曰古洪閘乞移咨吏部於梁境閘專設閘官一員內華古洪二閘共設閘官一員并鑄給條記從之十月戊午工部覆總督漕運戶部右侍郎傅希摯奏清江浦至西橋一帶堤岸當黃淮掃灣之衝近年黃流日刷堤根單薄萬一噬決則運道生民俱受其害今將舊堤亟爲修砌限萬歷十二年秋黃水未發之先報完完日將工費核實奏繳從之己未以漕河工完賜尙書潘季馴原任兵部尙書凌雲翼等賞賚有差

明神宗實錄

明神宗萬歷十二年七月壬午漕撫李世達恭報堤河工完部覆賞各銀兩有差八月丁巳吏科給事中陳大科言江南漕艘歷高寶抵淮寶應汜光一湖浩蕩無際槐角樓一帶據湖之中其形如兜兩翼向爲運道梗所司議開越河而一主圈田以防夾攻一主靠堤以省修築昔白侍郎昂康濟一湖圈田之制也比吳尙書桂芳靠堤開越河十餘年來未聞衝圮臣以爲靠堤便總督漕運李世達亦然其議部覆報可九月丙子南京右僉都御史趙煥奏高寶湖堤大壞乞敕憲臣督理章下都察院十月戊午漕運

總督王廷瞻奏寶應新開越河分爲三工每工司道二員相兼總管報可十一月甲申禮部儀制司主事陳應芳奏頃見漕臣開越河一疏其稱論方取土以丈計之約用工銀九萬六千有奇而木石之費十二萬其派夫必得五萬人而後可竊意夫以五萬每名日工食二分則當一日千金矣是所謂九萬六千者止可供五萬人三月之費借曰更番迭用亦止足供六月之食大約計之則九萬六千者可足一年夫役之募乎其不足者撫按自有處乎抑令民自爲賠也臣往見河工之舉撫按下之司道司道下之州縣州縣下之里甲里甲不足於是以家貲之上下爲出夫之等第籍名在官而趣之役牌票追呼之擾遍於閭閻叫號怨謗之聲盈於道路其狀有不可勝言者此籍名之苦一也及其不可脫而爲之辦夫一夫遠者月有一兩二錢之值近者月有九錢之值有稱是而計月以安家之值以一家爲率辦夫五名則月幾十金之費矣往往傾貲以償其費不則鬻產又賣子女數月之間閭閻一空此僱夫之苦二也及其以應僱之夫而往卽工所也多方影射百計索求一不遂則撻鞭之夫往往多逃去則以逃夫呈而移檄州縣逮之原籍名之人則又僱夫以補其額而就逮之費亦復如前是重困也至如官銀卽使盡所議者給之猶不足以償十分之一而况所給者受值之人非出值家也以故不才佐貳通同胥役恣意侵尅以故官徒有寡夫之名而害歸於籍名者之家利入於管工者之手此赴役之苦三也請以三策籌之與其使當事諸臣陽爲節省之虛名而閭閻小民陰受包賄之實害則孰若照糧起科明爲加派而以九年十年施

欠存留錢糧酌爲蠲免其舊而加派其新人情未有不樂從者。至於東南孔道各省協濟之銀揆之事理必不可無。昨撫臣議五萬臣以爲少奈何不允而使獨累淮揚赤子也。夫錢糧足則官操其值以募人如各驛遞等夫則非以利民而且養民此理之正策之上也。瓜儀巨商大賈往往有建寺修橋者向倭夷之變揚州外城俱係鹽商倡築不期月而集或縣旌表之令開事例之門或授以冠帶或給以旌匾必有應之者而往來商船除鈔關外量於湖口抽其稅課以佐急此事之權策之次也。如其不責名實而曰加派不可協濟不可事例抽稅又不可而忍聽民自爲賠焉此則可爲無策矣。工科右給事中馮露亦言總漕侍郎王廷瞻三議欲將舊堤備用之石加之新工以石砌潭原議者八今減而六反覆陳舊堤之石不可移八潭之砌不可已工部覆給事主事言皆是報可。明神宗實錄

是年三月高郵東通興化各場運鹽東河一道堤岸久圮不治民田一派汪洋鹽艘縛艤稽阻知州邵夢弼通詳河鹽各院瓶築東堤屹然高峙北下低田盡爲沃壤鹽船行人俱稱便涉商民誠兩利焉。九月都御史李世達會同按鹽二院題准命郎中許應達等挑寶應汜光等越河三十六里南北開二座往來船隻永避湖險先是郎中揚最曾奏開不果至是給事中陳大科上疏極言利害始有是役明年河成賜名宏濟後以閘水湍溜損船改平水閘。南河全考

明神宗萬曆十三年四月戊申以僉都御史張岳爲左副都御史協理院事如故時張岳進四議其論治

河謂夏鎮固當開而沾頭不可棄禮科給事中苗朝陽兵科都給事中王致祥交章駁之遂寢。六月壬子寶應越河工成先是寶應有汜光湖素稱重險國初平江伯陳瑄築石堤於湖之東蓄水以爲運道上有所受而下有所宣因決爲八淺匯爲六潭則興鹽諸場皆沒而淮水又間從周家橋漫入洶湧排空萬歷十年一日而斃者千人十二年糧艘溺者數十總漕李世達按臣馬永登鹽臣蔡時鼎議於石堤之東開越河以避其險乃命工科給事中馮露往視之河身長一千七百七十六丈凡爲石閘三減水閘二爲堤九千二百四十丈石堤三千三十六丈子堤五千三百九十丈費公帑二十餘萬民不知役總河王廷瞻以聞賜名宏濟七月戊子論寶應河功河道都御史王廷瞻陞戶部尚書兼官巡撫如故總督漕運太子太保靈璧侯湯世隆加少保中河郎中許應達加正四品服俸京堂內推補先任中河郎中陳英主事羅用敬兵備副使莫與齊各陞一級海防兵備按察使舒大猷陞一級照舊致仕故曹儲左參政馮敏功贈太僕寺卿淮安府知府張允濟陞服俸一級與向書楊兆王遴李世達何起鳴等各賞銀幣有差因詔以後河功邊功疏中不得敍內閣輔臣明神宗實錄

是年六月初十日漕撫王廷瞻等題奏寶應地方澤國委流汜光一湖尤居窪下上接淮泗長合七十二山之水下通興鹽新興伍祐等場之鹽由射陽湖穿廟灣東注於海地勢沮洳素稱險阻國初宣德間平江伯陳瑄築堤於湖之東蓄水以爲運道上有所受下無所宣一線之堤當萬頃之波是以決爲

八淺匯爲六潭。興鹽田廬竈蕩俱被淹沒。而糧運往來至不可以舟近來。高堰旣築。足禦伏秋之漲。而淮水間從周家橋漫入。則橫流白馬湖而直射寶應。亦勢所必至也。矧其東西相望。浩淼無涯。洪濤迅浪。不時常作。加以西風號起。洶湧排空。蕩擊石堤。摧殘舟楫。人人不能必命。而葬之魚腹中者。無月無之。無論其遠如萬歷十年間。一日而斃者千餘人。卽萬歷十二年間糧船沉溺者數十隻。漂沒漕糧至七八千石。殊爲運道之梗。遠近之民談此湖不寒而慄。且東南財賦轉輸。以充軍國之需。命脈所係。豈容梗噎若此。臣仰遵廟畫。殫力經營。夫役用銀募招。未嘗派擾里甲。木石差官採買。亦不干及有司。雖勿亟之令屢申。而胼胝之趨益勵。興工甫及八月。用費猶有餘銀兩堤並築。五閘屹然數十里之湖患屏之藩維。千百萬之生靈盡居衽席。且舊堤有重關之險。永無潰決之虞。不唯行旅藉之以爲安。而又居民恃之以無恐。萬口歡呼。咸稱不朽。再照先年高郵越河開成。得蒙欽定河名康濟。近年淮安新河開成。亦蒙欽定河名永濟。今寶應越河。視之二河尤爲緊要。自此而南。由高儀以達於江。自此而北。由淮浦以出於河。實爲運道咽喉第一之關。利害懸殊。事體更重。伏乞皇上特賜佳名。以光萬世無疆之業。部覆奉旨。是河名與做宏濟。宏濟河奏疏

李世達字子成。涇陽人。嘉靖三十五年進士。萬歷二年進右副都御史。總理河道未上。十二年總督漕運兼巡撫鳳陽。黃河南侵。淮安告警。世達請修石堤捍城。寶應汎光湖風濤險惡。歲漂溺。請開越河。殺

水勢俱報可。明史稿

王廷瞻字稚表黃岡人嘉靖三十八年進士以右都御史出督漕運兼巡撫鳳陽諸府寶應汜光湖堤蓄水濟運平江伯陳瑄所築也下流無所洩決爲八淺匯成巨潭諸鹽場皆沒淮流復奔入勢益洶湧前撫李世達等議開越河避其險廷瞻承之鑿渠千七百七十六丈爲石閘三減水閘二石堤三千三十六丈子堤五千三百九十九丈費公帑二十餘萬八月竣事詔旨褒賜河名宏濟進廷瞻戶部尙書巡撫如故。明史稿

敏功起復故官爲漕儲道淮之南故有邵伯寶應高郵三湖相連爲巨浸漕舟過者往往多漂溺因議濬內河通之御史大夫王廷瞻疏上得請而敏功任其轄敏功於河事故心通而役者皆習其能工以故大集敏功益不愛其精力水陸奔走凡七晝夜不休遂得疾臨卒且曰內河成於國計甚利第太逼湖湖善潰而堤薄萬一如瓠子數百里魚鱉矣幸語當事者別創堤以護之兩浙名賢錄·萬歷十年·任漕儲道·卒贈太僕寺卿

是年八月都御史王廷瞻行郎中許應達包砌高郵護城堤杭家觜六百丈又小湖口堤五百三十丈工成郵民至今永賴蓋以寶應越河大工剩有餘料從許應達之請也。南河全考

明神宗萬曆十四年正月己酉工部覆直隸巡按蘇鄧題少卿徐貞明奉命經略水患窮源溯委偏歷周諮惜處財用一一列款於畿甸水患大有裨益一疏浚深州霸州等處河道共該夫役銀一萬九千三百

一十三兩一錢。除霸州道屬現有塘勸官銀三千七百八十餘兩。於真定府存留贓罰銀內動支二千兩。  
保定府五千兩。河間府八千五百三十三兩一錢。湊足前數。委官及時興舉務要挑浚如法。河流通利。一  
疏浚安州雄縣保定等處河身及挑築束鹿深州河堤。所用人夫隨便役民其工食之費要於各府州縣  
積穀內酌量動支。仍勸諭富民有能慕義偶衆捐貲助役者。酌量旌異以示勸率。一修建河間任丘橋梁  
及墊築道路。共該銀三千六百八十八兩有奇。宜暫借該府官銀抵用。一挑浚河間獻縣滹沱舊行子牙  
河之故道。因路遠工多難以驟舉。宜行撫按轉行道府估工議費另行題請從之。三月庚子大學士申  
時行等陳安民之策。內云昔成化中議開通惠河京師訛言至以爲黑眚之應。遂命停止嘉靖初始復開  
浚成之。至今爲利臣等以爲墾田之舉但宜斟酌地勢體察人情其沙礫不堪之處不必盡開其見種黍  
麥之田不必改作應用夫役官爲僱募如滹沱等河既難疏治暫行停罷要在不拂民情不失地利乃爲  
謀國之長策若以此爲害民之事則臣等不敢以爲然也。上曰覽奏深切治理實議舉行癸卯福建道  
監察御史王之棟題尚寶司司丞徐貞明奉詔書興西北水利事其他不敢臆說以瀆天聽惟滹沱一河  
爲真定大患。詢諸父老謂此河不可以人力治者併貞明所建議別爲不可者十有二事。一謂水迅土沙  
難以修築徵派分出地方滋擾。二謂堙塞無定故道難復。三謂深州故道枉費無成且水澇漂湃流派難  
分。四謂挑浚狹淺難殺水勢且淤沙害田難資灌溉。五謂費少不敷必資剝削恐生民怨。六謂羣聚不遏。

勤勞不息，恐致他變。七謂引流入衛，恐妨運道。八謂三輔庫藏倉貯不可罄竭。九謂減價易地，奪民業生怨。十謂工夫鱗集，蹂躪爲害。十一謂不可侵擾附邑。十二謂供費浩繁，羽士募化非體。辨駁甚悉。上命會議。工部覆事無全利，亦無全害。徐貞明自奉璽書以來，勞瘁道路，已垂一年。續所報開墾成熟田數，則已三萬九千餘畝。其爲畿輔利不淺鮮也。但盧溝、滹沱二河之工，實有不便。如御史所言者，上曰：國家舉事當順人心。這墾田水利既稱不便，先前踏勘時何不題請停止，以致輕動擾民？建議各官本當追究，但本爲公姑恕之。水田事務着遵旨停罷。徐貞明卽便回京，先爲上覽。部覆欲罪建議諸臣，輔臣力爲救解，得免。五月癸卯，雲南道監察御史毛在題。臣巡按貴州事竣，報命路由運河見水道淺澀，糧艘壅滯，當事諸臣隨事料理，悉心計議。糧船之進不宜專急於過淮過洪，先須過其咽喉，使閘河無礙。上令該管稽查整理。十一月辛丑，河南撫按官裏貞吉等題。中土灾沴，百姓流離，欲將開封等府地方湮淤河渠，動支倉庫銀穀。小民願自出力者，通行修浚，并建設閘壩，以備旱澇，以爲興利聚民之政。工部議覆上從之。明神宗

宗實錄。

明神宗萬曆十五年四月乙亥，戶部覆兩淮巡鹽御史陳遇文條陳。海州舊有薔薇河一道，以通臨供興莊鹽運，乃年久淤塞，遂致繞道東海，方達淮安，中間苦難較前十倍。乃自窑灣起至周家堰，共長二千六百三丈五尺，工價銀共一千二百五十四兩九錢七分五釐。此處挑濬有便鹽運，上曰可。丁亥，工部奏

黃淮二瀆逼近祖陵關係甚重自寶應以下鹽河興化一帶海口應濬應通合咨漕撫巡按衙門管河司道議之淮揚水患西南有淮泗西北有黃河高寶江都有西山諸湖之水以衝動漕堤湮沒民田已非一日聞寶應至廣洋射陽興高郵江都各路皆有入海惟支河淤塞而不通湖水泛濫而無歸爲今之計又當備查疏通支河海口不患其不深矣七月庚子廣西巡按御史蔡系周陳鹽法七事六曰謹河道廣東至梧州水勢甚平梧州至桂林雖險亦易惟桂林至全州中經興安縣陡河原有陡門三十六座向係五年大修三年小修十餘年來廢弛弗舉舟楫難通遂致鹽運坐守日月所費不貲今查興安分水塘中間直下入中江原設大石減水陂一座一百餘丈截水不致直瀉要南一路自興安縣北門至三十六陡南岸衝壞去處估計修築計費不滿千金卽於鹽利內動支七曰專職守議將鹽務併之清軍同知章下戶部丁未蘇松常鎮所轄諸縣俱颶風驟雨數月不息洪水暴漲漂民廬舍無算詔各府錢糧蠲免停折有差戊申鳳陽撫按楊一魁等各題淮揚二府屬高郵等六州縣富安等十五場俱被湖堤積水渰沒田地議設建閘疏水計估工費共用銀五萬四千七百七兩議將兩淮運司歲修鹽河積年積貯在庫銀一萬四千七百兩淮安府庫原修歸仁堤節省支存銀七百七十兩及撫按鹽三衙門會批不應起解贓罰紙贖及原准工部題留徐州採辦花石料價等項銀內截流湊支戶工二部如議覆奏報可九月乙卯文書房口傳聖旨河道歲用多少錢糧如何常有淤阻沿河該管官員否開報着工部查職名來看

工部列名以奏得旨。近年河道安流。該管官不無懈弛。間有淤淺。亦不卽行開報疏濬。致有阻滯。仍通行嚴飭。有怠玩誤事者。該部科指名參奏。十二月丁卯。工部題。泉河閘壩事宜。將衛水先儘漕運。勿以灌漑相妨。茶城口務保萬全。勿以苟且塞責。坎河口作何捍禦。使蓄洩可恃。管泉官作何責成。使職守不隳。至閘河禁例。奉有累旨。一應官民船隻。待積水而行。有違抗爭先者。毋問官豪勢要。徑呈本部。以憑參治。從之。明神宗實錄。

明神宗萬曆十六年二月乙丑。工部題覆。沁水入黃河。衛水入運河。其來已久。頃者沁水決木欒蓮花口而東。督河楊一魁有因決濟運之議。謂沁水方決。其勢悍。塞之難固。而導沁入衛。其勢便。而助運易固。一說也。及科臣常居敬往勘會。撫臣袁貞吉按臣王世揚議。謂衛輝府治卑於河。藩封新建。恐決開而勢不可禦。有衝激之慮。且沁水多沙。善於入漕。恐反爲患。不知堅築決口。闢河身以吐南行之氣。而衛河急加疏濬。下民間引水灌田之禁尤完計也。詔從勘議。四月己未。工部覆科臣常居敬條上漕河事宜。一嚴啓閉。以杜淤淺。請申飭山陽通濟等閘。三月初運畢。卽爲封鎖瓜洲二閘。俟蘇浙運畢。封鎖官私船隻。照舊車盤。勢豪干撓者法無赦。一催糧運。以謹河防。謂四月黃水生。則河波驟發。漕糧俱二月終盡。數過淮。則壩可築。而白糧一運。每至愆期。不得不緩壩以待之。宜督所司填註限單。務令漕白二糧次第過淮。以便修築。一議錢糧。以助河工。謂河工銀歲額三萬。而費至六七萬。每以不敷停修。貽害不小。宜核所在逋。

負立限追解無爲墨吏積胥所沒以致匱竭無措一稽工料以資實用謂運河延袤千有餘里歲用椿草繩繖灰石之屬皆河工急須而名實不相覆上下因循恣爲奸弊宜慎加釐飭及修築未久旋報奔潰者追還料價一重修守以謹河防蓋治河如治邊防水如防虜邊臣守邊有敍勞之效而河臣奔走風濤拮据之苦視邊臣尤甚宜於歲終分別紀錄三年類題果有成勞予之優擢則人心競勸而河防益飭上依議

癸亥

勘理河道科臣常居敬會同督臣舒應龍再上河工一十四款

前二款入黃河

一築寶應西堤以束

流漕蓋寶應湖口運道所必經近來挑濬徒勞淺澀日甚緣水勢散緩泥沙易停議於山陽一帶培築西堤以束水勢令無壅淤則糧艘不阻一砌邵伯湖堤以免歲修蓋邵伯湖一淺二淺等處正當波濤衝擊

而排椿廂板其何能禦應盡包石以捍其銳一濬理河身以利長運自淮安至儀真內河舊三年一濬後歲一浚之久之且置勿濬矣合於重運過畢清口大壩工完之後乘時挑浚并查復淺船之制一酌議分

地以便責成以梁境至首閘屬之夏鎮主事茶城至清口黃河屬之中河郎中而夏鎮及南旺兩主事并給關防敕書視河道郎中例以重事權

中三款入黃河

一設山陽長夫以便河工蓋山陽河夫向皆市僧雇覓

故增減之弊滋而逃亡莫可禁議令諸僧入銀官雇註名立冊按冊撥夫實爲長便一寢開支河以防善淤蓋閘河水泉不多難分爲二宜寢其工一查議故道以損繁費蓋閘河出口無不與黃值卽改避而南亦難遠害况弱末之流不足以濕淤沙故道之議固應並寢

後二款入黃河

俱如議行五月丙戌勘科常居

敬疏。新運已臨。天時亢旱。再條八事。一濬泉源。以資灌注。一復湖地。以預瀦蓄。一築汶河。以防滲漏。一建閘座。以便節宣。一設閘官。以肅漕規。一給關防。以重事權。一嚴築壩。以便挑浚。一復夫役。以備修防。部覆如議。七月戊寅。工部尙書石星題。山東淮揚一帶河道應修應築。如總河潘季馴。勘科常居敬所議。添設鎮河閘。接築塔山縷堤。清江浦草壩。瓶築寶應西堤。石砌邵伯湖堤。疏濬裏河淤淺。增設柳浦灣料廠。此當在淮揚興舉者也。查復南旺、馬踏、蜀山、馬場四湖。建築坎河滾水壩。加建通濟、永通二閘。查復安山湖地。此當在山東興舉者也。地里寥遠。工程浩大。宜將郎中羅用敬、副使周夢暘等分地責成。御史不時稽察。而總河大臣仍親自查閱。工堅可久者。從實奏報。推諉誤事者。卽時參處。上是之。仍諭河工着各照分定地方用心管理。上緊完報。不許疎玩。九月丙辰。直隸巡按御史高舉奏報。魏縣頻年旱荒。今秋又被漳水渰沒。請蠲秋糧五分。仍酌行賑濟。上從之。甲子。駕幸石景山。欲觀渾河。趨召輔臣時行等三人。及定國公文璧。臨淮侯言恭。飛騎而至。上已御河岸幄次。叩頭畢。起乘橋。橋爲二道。諸臣從上異道而行。上命同道。後隨臨流縱觀。目時行前。曰。朕每聞黃河衝決。爲患不常。故欲一觀渾河。今水勢洶湧如此。則黃河可知。時行對。渾河來自西北。古稱桑乾河是也。從此出蘆溝橋。至直沽入海水漲時亦多洶湧。至如黃河發源崑崙。自積石龍門會淮入海。衝決之勢。不啻數倍。黃河每一潰決。遠至數千里。自徐州至淮安。屬當運道。所關最重。上曰。行河官應恪乃職。時行對。近奉詔委任責成。並知警惕。上曰。經理須要得人。時

行對。皇上留意河道，拔用舊人。一時在任，皆稱諳練，不敢輕率誤事。上首肯言，須得人者，再時行對。如諭立良久，乃下命從官先詣功德寺候駕，仍賜酒饌。丁卯，大學士申時行題臣等隨侍聖駕幸石景山，臨觀渾河。伏蒙皇上召臣至橋次，示以水勢，且言黃河衝決，經理須人。臣等承面諭，不勝歡躍。仰見皇上一遊一豫，莫不以國家爲心，民患爲慮。卽堯舜其咨之憂，俾乂之命，不是過也。倉卒應對，未及周詳。茲敢以河道利害爲皇上悉陳之。渾河來自西北，古桑乾河至天津直入沽海。當其泛漲之時，亦有衝決之患。然不關運道，亦不近城郭，猶未足爲深慮也。至若黃河發源崑崙，流入中國，至積石龍門已數千里。經陝西河南，則涇、渭、伊、雒諸水皆入其中。又經徐州至淮安與淮水合，當其壅淤，則數丈之渠一夕而成平地。及其潰決，則數千里之堤，一瞬而成洪流，湍激洶湧，比渾河不啻十倍。先朝時決時塞，皆命重臣經理。而後成功，未有數十年無事者也。今之治河者，爲鳳泗祖陵，則防其南決；爲漕糧運道，則防其西侵；爲淮安數百萬生命，則防其北徙。爲淮安數百萬生命，則防其南決。故功力鉅而責任難，未有不得人而成功者也。皇上得人之諭，於治河要務，一言蔽之。第臣等雖奉德音，而在廷及河道諸臣，或未能仰體。欲乞特降明旨，轉諭河臣，俾曉然知皇上憂勤之意，而從事河渠者，且惕然有夙夜奉公之心矣。報曰：朕聞黃河衝決爲害不常，欲觀渾河以知水勢。昨見河流洶湧，應知黃河經理，倍宜加慎。河道官應行文知會，務一勤永逸，勿以勞民傷財爲故事。至選用務要得人，吏工二部知之。

明神宗  
實錄



# 行水金鑑卷第一百一十五

## 運河水

萬歷十六年都給事中常居敬上查理沁衛二河疏云牌行該道看得此番行查係奉欽依事體重大駁行二府掌印官行令劉薛二同知及會委臨河汲新河武等七縣各掌印官勘議俱親詣沁衛二河踏勘間當據汲新輝獲等縣社里老等告稱衛河發源在於輝縣蘇門山下其水陡峻通流灌田不過步須並無淤阻其沁水河身寬一里有餘衛水河身寬不過三四丈先年曾遭沁水衝開木欒店蓮花池堤口附近地方俱受渰沒且流入獲新二縣城門用土屯塞漂流民舍渰沒民田一百二十餘里衛輝府關廂巷口行舟衝倒民房八千餘間壓死男婦陳可立等百十餘口等情各具告到官會看得引沁入衛固殺黃河之流且濟運道之便但恐沁水本大若一入衛河二水合流勢必滔害不惟各縣民居民田深有可虞况潞府新建方將高其堤預其防惟恐不固而敢引沁以貽不測之患等因到府又准本府同知劉應聘會同衛輝府同知薛應麟關稱各親詣衛河源頭踏勘得衛水流清土堅原無淤阻雖有軍民水田蓋爲水由地行故乘勢以資其灌溉非敢阻塞以專其利也前此雨暘時若源泉不枯河水盈溢漕舟無滯年來亢旱泉源不流而漳河以下諸水亦俱淺澀因此衛流愈覺細微此議者

不得不歸咎於居民灌田。至於引沁入衛謂於漕河有濟也。但查沁水原無支流可以通衛。今欲因衛決之道而遂挽之以入衛。則目前似足以助衛濟漕。而將來水緩沙停。其終必致淤塞。則既見其利。而又思其害。是不可不爲深長慮也。等因會關到府。尤恐不的。隨該本府知府趙以康會同衛輝府知府周思宸親詣前項河口逐一踏勘。會看得衛水枯澀。併沁於衛。則衛水大而漕舟可行。豈不曰運道有所裨益哉。但衛小沁大。則其勢難容。衛清沁濁。則末流必淤。如先年沁河一決。而臨清東昌等處。遂至淤塞。徵之往事。竊恐不減黃河之害。而又增運道之梗。斯時歸咎誰其任之。且沁衛地勢高下殊縣。必須創開河身。沿河築堤。此其費地費工。固爲不貲。而伏秋水漲。橫流滔天。則生靈城池。不可不爲之計也。此皆前人已有成說。利害較然。如曰姑舍是而輕試以建非常之功。非職等之所敢擅議也。至若引水灌田。誠當禁止。但末流之微細。實起於源頭之枯竭。卽今三年亢旱。泉源幾至不流。有如昨歲。運道阻澀。漕院差官守視衛源。盡導上流而管河道亦駐劄輝縣。親至泉所禁之非不嚴也。斯時田禾日槁。而衛水不增。則其故仍不係於淤阻也。惟是漕運重務。係關匪細。合無以後水源有餘。則從民之便。而不妨與民同利亦可也。如水源不足。則禁其引灌。而專以濟漕等情。該臣會同巡撫袁貞吉。巡按王世揚。議得古今論治水者。孰不曰順水之性。行所無事哉。然而地當中土。勢有重輕。利害所關。又非可以嘗試而漫爲者。沁河發源西晉。經帶河內。沛然東下。勢若建瓴。惟至武陟城東。復折而南。與黃河會流。

以故昨秋瀑漲東隴難行遂致潰溢直衝木欒店決蓮花口滔滔東注則引沁通衛其勢良便也但細查衛輝府治地既卑下河復狹隘狂流灌注容受爲難卽今獲嘉已成巨浸新鄉亦若浮孟該府城垣去河不遠衝決之患殊爲可虞况今藩封新建關係尤重昔人所謂不與水爭利者誠有不得而概論者矣且沁水沙多善淤一入漕渠淤墊閘座昔有左驗恐利未得而害且隨之也旣經道府勘議明悉又該臣等親閱相同仍應堅築堤壩寬闢河身務使南行無滯庶爲長策至於漳衛上源據稱天旱泉微誠有之矣但民間灌溉壅遏泉流致妨運道合行該道將一應私壩悉行拆毀如遇雨少泉微盡令導入漕渠以濟糧艘河北分巡道仍不時周行巡察禁治如有阻撓許巡漕御史拿究如是則沁不得以病衛衛又得以濟漕其於國計民生均有裨益矣已略見實錄再書其全疏於此

又查理河漕疏云照得國家定鼎燕京歲輸漕糧四百萬石運艘涉江淮經徐邳入運河抵京師濟寧以北必資汶沂泗沂諸水而徐邳以南必資淮黃二水濟之俱會淮安外河掠草灣歷雲梯關入海北高南下勢若建瓴淮弱黃強時有衝阻弘正以前姑不必論嘉靖末年河道日益多故歸德而下丁家等口忽然衝塞黃水不從小浮橋故道達徐初徙於溜溝再徙於秦溝三徙於濁河口於茶城相近全河逆行至嘉靖四十四年徐邳一望瀕漫不辨州里該先任尚書朱衡改建南陽新河運道復通自老黃河故道旣失雲梯海口未疏隆慶年間河決於崔鎮淮決於高堰寶應興鹽等州縣遂成巨浸水泛沙停轉運甚艱至萬歷六年先

任右都御史潘季馴創築遙堤盡塞諸決東水歸海使由故道民獲安堵漕得順利已逾八年其功昭昭在人耳目惟是支河既塞海沙尙高一帶河身日漸淤墊決塞之患比歲稍多在淮安上流不分全河直衝范家天妃等口通濟福興諸閘歲苦衝淤王公堤屏蔽清浦歲遭二瀆嚙射隨修隨圮勞費不貲在徐州下流不分黃水倒灌古洪內華諸閘淤塞日久今幸極力挑通萬一黃河暴漲不免復淤阻滯運道關係不小高寶一帶由淮引黃河渠日高雖有河堤越河足避風濤然邵伯寶應二堤尙未包砌土堤單薄巨浪乘風傾潰可慮善後之計不可不圖謹將淮揚應議應舉工程款列開呈等因到臣臣先同劉懷恕等自上而下由豐沛經徐邳以至桃清復同侍郎舒應龍等自下而上由清浦以至古洪梁境一帶或艤舟閱視或登陸荒度看得豐縣田劉口河勢掃灣原有縷堤坍入河中新築月堤一道堪以防禦郭家灣匙頭灣栲栳灣等處雖係迎溜見今修築埽壩亦無大害徐邳自桃源五百餘里河身就下河岸甚高遙縷二堤俱無衝決歸仁集高家堰范家口續修石工俱各堅厚寶應越河運艘甚便惟古洪河口去秋濁河倒灌今雖挑通尙屬可虞清江浦一帶運河與黃河僅隔丈餘王公堤二百九丈二瀆南徙衝刷日甚堤懸一線勢甚危急至於高寶西堤邵伯石堤俱屬要害委不容已一查閱明白議照我國家輓漕東南全賴河渠古洪以北必資汝泗諸水徐邳以南悉藉淮黃二瀆河雖不同利害相因故理漕必先於理河治黃卽所以治漕誠不可一日不講也然徐州以上之河恐其

潰而入。有衝決之患。徐州以下之河。恐其潰而出。有漫散之虞。審水性之順逆。酌時勢之緩急。要非可以執一而論者。往無論矣。嘉靖初年。河漸北徙。濟寧魯橋以下。河道淤墳。至嘉靖十三年。該副都御史劉天和挑濬河身。復修閘座。四十四年。河決沛縣舊河淤塞。該工部尙書朱衡開通南陽至留城新河。徐邳以上。河道賴之。隆慶以來。黃河決崔鎮等口。淮河決高堰等處。二瀆漫流水緩沙淤。運道艱阻。該右都御史潘季馴創築遙堤。盡塞諸決。兩河復合。沙刷水深。運道民生均有裨益。徐邳以下。河道賴之。雖先後河臣經略良畫。尙不止此。此其功之最著者也。惟自萬曆十四年以來。清河以下。一決范家口。而全河幾奪。一決天妃壩。而福興漸淤。徐州以上濁河灌注。古洪阻塞。要害之地委屬可虞。然則有思患預防之心者。安得不爲補偏救弊之謀哉。但據稱上源小浮橋之路久塞。故道當復也。支河當開也。下流之老黃河難復。三壩當拆也。草澗當濬也。此其計慮甚周。而用心良勤矣。臣等隨處查勘。虛心商度。故不敢曲徇以苟同。亦豈敢有心以求異。然而勢當酌其所急。功必期其可成。苟或心思雖竭。而經理實乖。議論雖多。而治效則鮮。於河道終無補也。今據司道會詳。臣等復加酌議。謹將應舉應停工程事宜。款列分別。上請其當行者。雖無新奇之見。而實切於事機。其當止者。雖嫌意見之殊。而實探之輿論。河漕重務。彼此何心。要皆求以便國計。謹題請旨。條上一十四款  
略見實錄又疏云。照得國計莫重於漕河。漕河必資乎水利。我成祖文皇帝定鼎燕薊。輓漕東南。自徐邳以北。臨清以南。千有餘里。全賴汶泗沂洸。

諸泉之水以濟運道雖祖元人會通遺意然壩戴村遏汶流分濟南北則尙書宋禮用老人白英之議也其間設官立法建閘築壩至精至備二百年來運道其永賴矣第泉源雜於沙礫則湮塞甚易湖地侵於豪右則清復爲難至於事權間多牽制法制廢於因循兼之天時久旱地脈漸微運艘經行不無遲滯乘時經理委不容緩茲者上厯聖懷特申聖旨臣等周行河上逐一查勘博采羣策列爲八事雖率循不外於舊章而經畫似關乎要務謹題請旨一濬泉源以資灌注查得會通河南北千里盡賴十八州縣百八十餘泉之流分爲五派至於新泰萊蕪平陰汶上蒙陰寧陽等九州縣入南旺者爲分水派泗水曲阜等四縣入濟寧者爲天井派其功最大其所需尤甚切也夫藉泉以資運則涓滴當惜必使源流充溢庶於漕渠有濟若養身者氣血周流無滯始無壅閼之患也乃平昔之疏濬既疎天時之亢旱又久是以泉政多弛通流無幾近據管濟寧道按察使曹子朝分守濟南道參政呂坤新濬出泰安州謝過城等六泉新泰縣劉官莊等五泉萊蕪縣韓家莊等五泉東平州源頭泉一處曲阜縣新跑泉一處發源頗盛導入汶河堪以接濟則自此之外安知無湮沒於沙礫而散漫於草莽者乎但濬泉雖易治汶實難蓋河廣沙深屈曲之流不足以潤久渴之吻臣等親見龍灣等泉源源而來至汶則一吸而盡猶無泉也又必督令撈淺等夫擇其積沙淤漫者濬爲河泓俾深五尺闊一丈則水得所歸而趨壑亦易矣然各泉坐落各府州縣近者四五里遠者三四百里管泉分司豈能遍歷近奉聖旨

各分守道兼管已爲得策矣臣以爲仍當責成各州縣掌印官督率夫老不時疏濬每年終分守道會同管泉分司將各官新泉搜出若干舊泉廢棄若干類報總河衙門分別獎戒庶人心有所警惕而泉流足濟運道矣一復湖地以預瀦蓄查得山東泉源有時微細故設諸湖積水以濟飛輓盜決有禁占種有禁誠重之也乃今則不然南旺安山蜀山馬場等湖始因歲旱水涸地屬閑曠當事者召人佃種徵租取息以補魚賸兩縣之賦於是諸河之地平爲禾黍之場甚至奸民壅水自利私塞斗門復倡爲湖低河高之說申禁非不嚴而占惱若故矣除安山湖批查未報外今勘得南旺湖周圍九十三里計地二千七百頃原有斗門一十四座止存關家大閘常明口二處其餘邢通口孫強口等十二處俱已湮塞合行修復本湖東邊高阜地量留護岸一里共計一百六十二頃南北留護岸地半里共計一百一十六頃一十畝令原主佃種納課其餘專備蓄水仍築子堤一道以爲封界湖內北高南低應於中亘築長堤一道自吳家巷天字號起至黃家寺止長一十四里根闊一丈五尺頂闊八尺高八尺界爲二區寺前鋪張住口建斗門一座以便上下接濟馬踏湖周圍三十四里零二百八十步計地四百一十餘頃俱應退出還官其東北空缺處長十里零二百四十步應築土堤一道約束湖水不使洩漏西岸原有王岩口滾水石壩年久渰沒合行修復蜀山湖周圍六十五里零一百二十步計地一千八百九十餘頃除宋尙書香火地六頃并高亢地八頃五十三畝照舊令民佃種納租外其餘地一千八

百七十五頃四十六畝二分俱築堤蓄水東岸季泰口閘以下十五里原有馮家滾水大壩相應修復馬場湖周圍四十里零三分內高阜地九十三頃二畝先年召種納課抵補魚牋縣糧今查前項補足責令退業還官并低窪地六百四十頃四十二畝九分俱築堤蓄水內有安居斗門三座合行修復至各湖占種麥田法應追奪但念年荒民貧且成業已久收成將近候麥熟之日令其芟刈照地退還以上各湖應修復斗門閘壩堤岸工料人夫等項細數冊報外通共該銀四千七百一十七兩七錢於兗州府庫河道銀內動支修完於湖口豎立大石明註界址斗門以杜侵占如是庶法紀明而漕河永有賴矣一築坎河以防滲漏查得汶合諸泉之水西流抵南旺分注南北以成漕而濟運故汶蓄則漕盈汶洩則漕涸夏秋之間水固有餘冬春之後不可使有涓滴他適明矣乃戴村以上有坎河口西趨鹽河爲入海故道沛然就下勢若建瓴先年總河侍郎萬恭堆集石灘蓋謂溢則縱之平則留之意甚善也但時久灘廢非不歲有修築而沙堤一線亂石數堆其走洩甚易矣萬一泉河盡趨則運道之涸可立而待豈得爲完計哉臣等督同管河同知陳昌言東平州判官張汝榮等會估得本口應修滾水石壩一座計長六十丈面闊一丈底闊一丈五尺深入土四尺出土三尺并鴈翅細石及椿木鐵灰工食等項除細數冊報外通共計銀八千一百六十七兩四錢一面辦料興工水溢則由頂以上任其宣洩水落則由壩以內盡資實用且以免鹽徒盜決之弊也汶其有全利乎或者以地多沙礪恐築之不

堅不知石灘之外原有老土石壩不高入土已深其勢自固且汝河隨漲隨消終非黃河比也又何衝決之患耶如是則一勞永逸而歲歲補石之費亦可免矣一建閘座以便節宣夫澇河之水名曰無源蓋謂其出有限而其流無窮所以撙節積蓄俾盈科而進全有賴於諸閘也故地有高下則閘有壅密要之勢相聯絡庶幾便於啓閉惟濟寧寺前鋪閘至天井閘則延長七十里東昌通濟橋閘至梁家鄉閘則延長五十里閘啓水洩積蓄爲難司河者每當糧運盛行之時排木堵水名爲活閘苟且一時終非久計甚至各幫運軍船一經過擗土築壩流入河中愈成灘淺連艘正行不便挑濬無惑乎舟行之艱也合於二處適中之所南則鉅野縣火頭灣地方建閘一座名曰通濟北則博平縣梭堤集地方建閘一座名曰永通俱照各閘事規啓閉濟運除各匠役工食候工完扣算外每閘估計粗細石料并木椿鐵麻船隻等項各該銀三千九十五兩八錢九分五厘於東兗二府河道銀內動支每閘閘夫三十名溜夫五十名卽於各縣停役夫內撥用如是則閘束有具節宣得宜水利有所停滯而連艘不致淺閘矣一設閘官以肅漕規國家之設官也有似大而實冗者裁之爲宜有似小而實切者增之爲便查得運河一帶閘座每閘設官一員統領夫役蓋啓閉有人責成良便頃緣新河告成棗林上下水平閘面不行啓閉遂將棗林閘官裁而不設間付之南陽閘官兼理之邇來天時久旱河流細微木閘水淺啓閉爲急尙可以南陽之官攝之乎夫一啓南陽一閉棗林互相閻關勢如呼吸一不得人直瀉

而盡矣。近且無官付之一二閘夫之手。在官船則莫敢誰何。在民船則大爲簸弄。既以病商。復以弊運。以故漕舟至此。殊費牽輓。而往來者亦稱不便也。不知閘官雖卑職掌猶在。且廩俸無多。國家亦何惜此五斗。而令河道要害之地爲無人之境哉。合於棗林。并新添二閘。各設官一員。俾司閘務。庶職守得人。而漕規不廢矣。一給關防。以重事權。國家之事。莫重於河漕。故於泉閘特設部臣經理。之所以重委任而專責成也。各管河郎中俱奉有敕印。是以文移稱便。惟南旺管泉主事。其設已久。關防未給。因循至今。夫管泉管閘。先年曾以二人理之。今并責之一官。其任亦重矣。督理乎十六州縣之泉。而相隔數百里之遠。止以空白文移臨之。卽旁午載道。鮮不以弁髦視河臣。欲其昭法守而一衆志也。難矣。且糧船過閘。例應十日一報。漕撫衙門相隔千里。無關防則驛遞不行。事多掣肘。殊非一端。夫以一閘官之微。尚有條記關防。何獨於部臣而反斬之也。至於漕河黃河二同知職守。旣專責任亦重。凡工程之勤惰。錢糧之出入。咸賴稽察。事緒孔棘。弊竇易生。使少失於防閑。未免稽違。河務近見邸報。楊村管河通判已奉明旨。給與關防。則兗州府管河同知事體相同。合無將管河主事并兩河同知均賜鑄給。庶文移便。而事權重矣。一嚴築壩。以便挑濬。照得汶水入湖。接濟運道。每歲塞沍之時。遂將河口築壩。合流分洩。蜀山、馬踏等湖。候來春冰泮之日。開壩受水。是冬則以河之水匯於湖。春則以湖之水濟於河。故南旺、臨清一帶。因得乘時挑濬。不致淤淺。法至善也。除隔歲大挑已奉有欽定期限外。其餘每年

當天氣漸寒正宜築壩絕流也。而往來船隻力以緩築爲請多方阻撓甚至十一月中尙不得築者不知天寒冰合乃驅荷鋤之夫裸體跣足鑿冰施工其將能乎及寒冰初解正宜固封蓄水也則又以速啓爲請百計催促至有正月初旬放水行舟者不知隔歲之水所蓄無幾三春無雨則運艘方至又將何以濟之乎法制未明事體掣肘管河官徒茹苦而不敢言也合無請賜明旨除大挑年分外每年定以十月十五日築壩絕流至次年二月初一日開壩行舟勢豪船隻不得橫擾該管官員不許阿徇違者聽督撫衙門參究大書刊石於南旺板閘二處以便觀覽如是則明旨森嚴人心惕懼不但便於挑河亦且足以蓄水一舉而兩得之矣。一復夫役以備修防山東河道淺深不一而汶河衝發淤塞爲多各項夫役俱不可缺查得兗州府屬如汶上鉅野嘉祥濟寧魚臺南陽利建等處原額設撈淺淺鋪堤夫名數不等共計二千四百五十二名後因河流稍順遂裁減一千一百三十三名扣銀入官以備支用止存見役夫一千三百一十九名不知扣存有節省之名而雇募起無窮之弊一時河道淤淺調度徵發爲難工之弛廢久矣今議於汶上縣量復撈淺夫七十四名淺鋪夫三十名鉅野嘉祥二縣量復撈淺夫三十八名淺鋪夫五名濟寧衛量復撈淺夫一十一名濟寧州量復撈淺夫三十二名淺鋪夫十二名魚臺縣量復撈淺夫十名淺鋪夫二十名南陽利建量復堤夫八名東平州量復泉夫二十名東昌府通濟橋閘量添閘夫十名庶挑河濬泉不致乏人矣然猾民之包攬肆意安閑管工之代替。

任情隱射甚至逃故不報。古怪私意種種情弊雖增猶弗增也。合行管河同知陳昌言通判王心逐一汰選嚴加稽覈庶工役得有實濟而河防不致稽違矣。部覆奉旨依議行。實錄止載欵目  
故於此備錄之又清復湖地疏云查得安山一湖周圍共一百里其間東北自通湖閘起至西北焦天祿莊止計長十三里自焦天祿庄起至西南王禹庄止計長七里零自王禹庄起至東南青孤堆止計長九里零自青孤堆起至通湖閘止計長七里零周圍共計三十八里此係水櫃堪以積水者也但湖形如盆碟高下不甚相懸水積於中原無堤岸東南風急則流入西北燥地西北風急則流入東南燥地未及濟運消耗過半且自許民佃種以來百里湖地盡成麥田先年總理河道傅都御史履畝分析除徵租銀二千六百五十三兩歲抵魚牋二縣秋糧外其低窪處所封爲水櫃法非不善但統籠無界禁例不嚴民情無厭漸至今日殆無曠土矣爲今之計應將水櫃三十八里築一高堤堤以外照舊佃種徵銀堤以內挑深蓄水管河通利等官不時巡歷庶堤界既明人無盜種之弊矣至於安山閘邊原無通濟積水二閘不便出水訪得萬歷九年有金把總曾於八里灣掘溝放水人甚稱便至今形迹猶存應於此處建閘一座又西北地名似蛇溝其地更低水勢散漫應於此處亦建閘一座庶於舊閘入者於新閘出蓄洩得宜澗河有賴矣等因臣等會議得設湖蓄水本漕政之良規清湖濟漕實治河之要務自南旺而下四百餘里始達衛河其間全賴安山一湖積水濟運所係之重何如也惟自召佃之弊政一行而豪民之侵占無

已變沮洳爲膏腴視官湖爲己業日侵月削久假不歸寸土無遺殊可痛恨卽今久旱河淺百計疏濬如抱漏卮沃焦釜傍徨無策皆緣水櫃未復之故也及今則清湖蓄水真若蓄艾豈非第一議哉侵盜奸民本應盡法重究概奪還官亦不爲過但私相授受其來已久展轉耕佃已非一人且四外高亢之地不便瀦蓄終成曠廢據勘將少窪之地三十八里周圍築堤封爲水櫃既可以免滲漏易竭之患又可以杜強梁無厭之謀似亦計之得也外八里灣似蛇溝二處便於放水委應建立閘座其築堤建閘之費初據各官議將盜種湖麥刈半入官以爲工料之需但恐饑民乘機起釁且非大公之體仍聽本主收割前項經費相應動支河道銀兩應用清理之後大堅石碑明立文冊又必嚴盜決之禁定巡視之法如是則一勞永逸而國朝水櫃之良規庶幾可復矣濟運通漕豈曰小補之哉謹題請旨發部議覆奉旨這湖地依議築堤仍畫定界限永遠遵守如有侵占盜決等弊照前旨着實參治其各處泉湖蓄水濟運的都着一體查清整理河防一覽

是年都給事中常居敬題准增修鎮口閘一座先是山東汶泗清流勢必假道茶城出口會黃自隆慶四年至萬歷十一年每爲黃流倒灌稽阻重運漕撫尙書凌雲翼議改漕河於古洪出口建內華古洪二閘遞爲啓閉以避黃淤前年黃水大發河興閘平淤塞甚遠挑濬稱難至是居敬請建前閘去河僅八十丈以行糧運自開泇後預行挑濬專備回空南河全考

是年開諸閘，月河板閘、清江、福興、通濟、新莊各閘，上隔黃河倒灌之患，下便節宣之勢。近來黃強淮弱，五壩不通，閘座不閉，以致泥沙內侵。伏秋水溜漕舟，上閘難若登天。每舟用縛夫三四百人，猶不能過。用力急則斷纜沈舟，故是年於各閘旁俱開月河一道，避險就平，以便漕輶。淮安府志

# 行水金鑑卷第一百二十六

## 運河水

明神宗萬曆十七年三月甲子工部言運河水源淺澀全賴南旺蜀山馬場等湖蓄水接濟嘉靖間兵部侍郎王以旂築大堤封爲水櫃年久圯廢往年科臣常居敬踏勘議於南旺湖築長堤蜀山馬場湖各築子堤今總理河臣潘季馴言水勢瀰漫長堤子堤俱在湖心難以施工宜將嘉靖年間舊堤培築高厚其納水處所不便築堤仍密栽柳樹以爲封界報可五月己未詔修守清江浦運道七月丙辰南京禮科給事中朱維藩言南京內城三山門直溯江流舟船如織而今已湮塞各府倉糧悉由水道用進今盡失其舊舍舟而徒費不可言臣以爲在倉糧則宜會計其數凡支幾年少則分投督催又不敷則於豐足處收糴在河渠則由城外以達城隅責成所司作速挑浚章下戶工二部議覆各府未完米糧除現災緩徵外餘嚴督徵解工覆河渠淤塞責成都水司及應天府水利官查勘設處俱允八月己卯漕運總督舒應龍等條議漕務五事一渡江限期下江浙江原有挑河銀一萬兩今則什不及一以致松蘇一帶裏河淺涸宜每歲秋盡築壩之時盡行疏導使漕艘得以如期渡江一遠船起剝糧船赴北向以張家灣爲住泊起剝之地至隆慶四年議由通惠河至石土二壩請自今到灣悉聽雇船起剝部議覆從之十一

月辛酉巡撫應天右副都御史周繼言上海縣李家浜老鶴觜築塘包石以捍海水不可已武進縣橫林等處淤淺已甚運河泥底盡露築濬之功不可緩據所用工費在築海塘計該銀八萬兩在開運河該銀六萬兩乞於南京帑銀內給發責令趁時興工工部覆內外匱乏大工並舉恐非所宜南京帑題發已四十萬兩亦難再請合候水利工完漸次舉行漕河果係淤塞應行挑濬卽於河道漕運衙門修河正項銀兩動支報可明神宗實錄

是年總河都御史潘季馴修建邵伯湖石堤一道長一千二百八十丈補舊石堤六百十三丈南河全考

是年築西土堤寶應縣之西十餘里有白馬湖於湖之東築八淺石堤長八十五丈六尺又兼漕水旁潰入寶應湖以致流緩沙停自黃浦至三官廟之西築西土堤長三千六百三十五丈東水由漕以省挑浚之費淮安府志

明神宗萬曆十八年七月庚申以南京河渠工完敍有功員役侍郎張標等陞賞有差仍詔以其餘銀歲修河渠明神宗實錄

明神宗萬曆十九年三月乙巳總理河道潘季馴議以鎮口閘去河甚近雖淤易爲疏通宜照舊道挑濬科臣復稱引衆議欲開月河以分水勢通蘇洵湖以導積水部覆上命河漕等衙門勘議妥當具奏聞三月己丑兵部題右都御史潘季馴議稱漕河自溜溝至姜家橋一帶堤岸係運舟牽挽必經之地因在

湖中屢遭風浪衝場。宜用石包砌每三里留水門一道。計用銀九千四百四十兩。於歲修并輕費米銀內動支。着如議行。七月丁卯。鎮口一閘遇挑濬時。糧艘民船停留數日。巡漕御史賈名儒請將本閘之東有新開支河處再開一口。建閘三座。名爲東鎮閘。與西閘遞相啓閉。使挑濬行舟各不相礙。其工費取辦歲修銀內。乞作速勘議。十一月癸亥。工部題河道都御史潘季馴條議。前四條分入黃淮二河。一浚河湖以利溝渠。謂自夏鎮閘迤南起經李家口等處。挑開裏河一道。計七十餘里。從滿家閘西築攔河一壩。使汶泗上源之水盡歸新挑河。不得洩入諸河。以致勢分力弱。又於李家口設減水閘。以洩沛縣積水。將仍前議新砌湖邊石堤移建東岸。以當風浪。則新河既可隔絕湖水。砌石又可捍禦河堤。於運道民生所利非淺。但功費浩大。合依所議備行淮揚撫按官查勘。另行題請着依擬行。明神宗實錄

明神宗萬曆二十年九月乙酉。工部覆總河舒應龍。漕撫陳于陸。勘河張貞觀。按臣曹楷。王明會題。先年議開鹽河海口。洩湖水固運堤分爲東西北三工。今東工告竣。北工有緒。惟南工錢糧缺乏未舉。而東工尙當濬港開支。北工改挑取直南工開新河。浚舊河。通計工廢一萬五千八百。議動運司挑河等銀及先復江都三塘。以驗灌漑。乞行總河督撫科院諸臣照限興工報完詔可。十月丁亥。兵部覆議給事中張貞觀言。淮揚連地咽喉。徐邳則繇海入江之徑道。宜再募土兵一千。合瓜儀等兵增一參將專駐揚州。再於徐邳募土兵一千五百量與各衛軍丁訓練。以備調發報可。明神宗實錄

或有問於馴曰清江浦一線之堤廣者不過三四十丈窄者僅二十餘丈兩河掃汎能無慮乎馴應之曰陳平江開鑿清江浦一帶通河濟運所留堤址原只如此問者曰何以徵之馴曰不觀車盤五壩乎五壩去河僅二十餘丈進船水溝每爲濁流所淤常事撈濬如更廣也何以能車盤也今河由草灣清江浦淤沙稍遠船遂不能進矣此正陳平江之妙用也又不觀之惠濟祠前之石堤乎乃宣德年間之所築也其廣亦不滿二十丈此古跡也豈亦剝削而然哉且各處遙縷堤面廣不過二丈餘尙欲恃以爲固矧於二十丈者乃云不能守乎若每歲埽護之工及磯觜壩之築則不可少耳或有問於馴曰泇河膠河與海運之議何如馴應之曰二河之不可成備載勘議諸臣之疏一覽自悉然馴之意則謂不當辨其可成與否也假令膠泇告成海運無阻將置黃淮於不治乎亦將併治之也夫治河之策莫難於我朝而亦莫善於我朝蓋自宋元以前惟欲避河之害而已故賈讓不與河爭之說爲上策自永樂以後由淮及徐藉河資運欲不與之爭得乎此之謂難然以治河之工而收治漕之利漕不可以一歲不通則河不可以一歲不治一舉兩得乃所以爲善也故宋元以前黃河或北或南曾無寧歲我朝河不北徙者二百餘年此兼漕之利也今欲別尋一道遂置兩河於不治則堯舜之時泛濫於中國者此河也縱使漕艘無阻民可得而食乎况膠河去河尙遠若泇河必從直河沂河等處出口復與黃合而中段相隔之地近者僅三四里每歲水漲勢必漫入可不治乎如欲併治則張官置吏設夫備料歲

費不貲一之不支其可再乎至於海運之說尤爲支漫往歲已有明鑑不必瀆陳卷查萬曆五年十二月內節奉聖旨近來河淮爲患民不安居朕何嘗一日不以爲念先年以運道梗塞不惜重費欲別求一道以利轉漕乃議者謂治河卽所以通漕遂降旨專責當事諸臣著一意治河欽此大哉王言可爲萬世蓍鑑馴又何容復贅問者曰夏鎮新河非別尋一道乎馴曰此河僅於閘河中直截一段至留城仍歸原河出茶城卽今鎮仍與黃會此與三沽舊河無異特欲避卑就高非棄黃河於不治也治河者審之或有問於馴曰濬睢河以爲通運旁行一道且可殺河流也其說何如馴應之曰考之括地志云睢水首受浚儀縣浪蕩渠水東經取慮縣入泗過沛浚儀取慮二縣皆隸河南漕河圖志云宿遷縣小河在本縣東南十里源自開封府黃河來流經歸德州虹縣宿州至睢寧縣東南流六十餘里至小河口以入漕河蓋括地志所載乃黃河入北海之時故止云睢水而不及黃河漕河圖志所載乃黃河南徙之後故直指黃河來流也淮安志云小河在宿遷東南十里以其淺狹故名查得弘治六年侍郎白昂曾導水自歸德小壩地方經睢寧至宿遷小河口入漕河比因河決河南之金龍口衝張秋勢甚危急故濬此河以殺水勢耳然不久遂淤蓋河不兩行徐邳之河與小河必無並行者今自徐溪口迤北直至永城縣一帶俱成平陸復之亦頗不難但恐此河一開則徐邳必塞若徐邳不塞則此河必復爲平陸且均一濁流也在徐邳大河則淤在新復之小河則不淤恐無是理也況小河口而南至清河

縣尙有二百三十餘里。假如近歲河決崔鎮桃清爲塞。不知南來運艘將從何路達睢河也。問者曰。止濬雙溝永涸湖一帶使艘從九里溝出小浮橋。倘徐邳正河淤塞此不通而彼通可無阻也。馴曰。此河原甚淺狹。且湖水常盈。濬工難施。若正河淤塞黃水盡從此河則泛濫無歸。非特牽挽無路而經行於樹椿基礎之間必致觸敗。與由決何異也。若正河不塞而此河僅分支流則徑由正河可也。何必去平就險爲哉。或有問於馴曰。改沁入衛以殺黃河之勢何如。馴應之曰。黃可殺也。衛不可益也。移此與彼不可也。衛漳暴漲元魏二縣田地每被渰浸民已不堪況可益以沁乎。且衛水固濁而沁水尤甚以濁益濁臨德一帶必至湮塞不可也。又問水集有引沁至長垣界經張秋出永通閘入運濟旱語亦未知沁之濁也。一溝之渠寧能當此濁流乎。沁可引黃亦可引矣。或有問於馴曰。五塘蓄水濟運先年設有隄閘今皆圯矣可不復舉乎。馴應之曰。馴初至之時亦嘗銳意求復反覆行勘查得小新塘與雷公上下二塘相接西去揚州郡城十餘里水由淮子河入漕河。句城塘西去揚郡幾三十里水徑奔儀真由響水閘出江四塘皆隸江都縣唐長史李襲譽所築也。陳公塘隸儀真縣其水亦奔響水閘出江漢廣陵太守陳登所築也。句城陳公二塘地形高阜水俱無源惟藉雨積小新上下雷三塘受觀音閣後及上方寺後并本地高田所下之水而局面窄小蓄水無多故漢唐二臣築塘積水以爲溉田之計非以資運也。今若慮漕渠淺涸借此水以濟之則應任其直下不宜築塘以障其流且冬春運河水淺。

彼先涸矣。若慮湖水漲漫，借此塘以障之，則諸水皆從揚儀徑奔出江，與諸湖了不干涉也。如欲復前人之故業，蓄水以溉高亢之田，於民未必無益。但民間承佃爲田，輸價不貲，歲納之課亦不貲，必須盡行償貸。築堤建閘，費尤不貲，必須大爲處分。矧田高之民，欲積田窪之民，欲洩，築堤建閘之後，盜決者多，必須添設官夫防守。當此勞費之後，災傷之餘，種種難於措辦，故馴謂其是尚可緩也。以上河議辨惑

湖堤岸見議加幫高厚，且多減水閘，尋常之水似可無虞矣。但或霪潦彌月，山水併發，則又不可不預爲之計也。查得沙壩并芒稻白塔二河俱可洩水，當事者應慮私販鹽徒潛通間道，每每築壩斷流，殊不知欲禁舟航，何須築塞？得必密布椿柵，仍委白塔巡檢嚴防，越渡船隻，瓜儀諸閘一體開放，閘口擋以木柵，則湖水可洩，而鹽政稅課亦無妨矣。

寶應縣之七十餘里，有白馬湖，其當湖心而東，卽所謂八淺堤也。往歲堤決，湖水奔逸，建瓴而下，舟楫過者少。遇西風輒沉溺，不可救。其決處闊八十餘丈，深且二丈五六尺，而水勢湍急，莫可名狀。雖不惜費，寧能與水角力哉？屢築無功，覆轍可鑒也。乃議從湖心淺處，先築西堤一道，以捍其外，仍於河之南北截壩二道，暫令運艘越湖而行。堤壩成則八淺正決，瀦水不流，捧土而塞之矣。是築西堤者，乃所以塞東決也。但東決雖塞，西堤終不可棄，必須歲加修築，仍密種柳茭葦之類，使其能當濤浪，則東堤不守而自固矣。此當於冬初預行，寶應縣掌印管河官料理可也。

寶應縣月河自黃浦至三官廟前，長二十里，水多旁潰入湖，是以流緩，沙停新閘一帶，淺

阻爲梗。今加築西土堤一道。長三千六百三十五丈。以束漕水。可省挑濬之費。須責夫看守。栽植菱柳。加意培護。歲修之工。可勿緩也。河口諸閘之設。先臣平江伯陳瑄殊有深意。蓋節宣有度。則外河之水不得突入。運河之水不得盈漕。非惟清江板閘一帶堤岸易守。而寶應諸湖亦緩此一派急流矣。但啓閉之法。非嚴不可。如啓通濟閘。則福清二閘必不可啓。啓清江閘。則福通二閘必不可啓。啓福興閘。則清通二閘必不可啓。河水常平。船行自易。單日放進。雙日放出。滿漕方放。放後卽閉。時將入伏。卽於通濟閘外填築軟壩。秋杪方啓。悉照先年舊規。與近日題准事例行之。其於河道關係不小也。舊通濟閘逼近外河。河形淺直。水勢洶湧。不便啓閉。而朱家口一帶堤岸尤爲難守。今移閘於甘羅城旁。改河於西南隅。而於舊閘內半里許築擋水大壩一道。置朱家口於度外。似爲得策矣。但大壩最爲喫緊。萬一傾圮。則新河與舊河之水併瀉入閘。勢必不支。每歲四月初。須專委一的當義民官撥夫十餘名。量備椿草守之。毋忽。毋忽。議者又謂從大壩迤東兩頭直接泰山築堤一道。僅三里許。則壩東與高堰七里墩迤北兩岸一帶堤岸俱不須守。而堤內之田皆可耕矣。冬涸之時。夫力稍暇。卽宜圖之。江南丹徒丹陽一帶河道原無水源。藉江爲源。潮長則開。京口閘以放舟。潮落則下板以蓄水。倘若水涸舟膠。則丹徒閘亦係通江支河。放水可濟。潮水既落。車戽亦可。須臨時斟酌。申嚴啓閉。守閘者勿弛禁也。徐北鎮口黃運交會之處。伏秋黃水大發時。多灌入本口。動至淤阻。原任中河郎中陳瑛創建古洪

內華二閘近該工科都給事中常題建鎮口一閘如遇水發下板謹閉俟黃水消落卽啓閘縱水外衝而漕河無淤墊之患啓一閉二悉如清江裏河事規與近日題奉明例行之其鎮口閘外東西兩堤原係挑河所積客土未堅內水湧出未免剝損伏秋之前密護椿笆堤固則閘無虞矣司閘者宜加慎焉

鎮口古洪二閘以東多傍山麓以西一望平曠濁河經流更無隄防黃水出岸橫截閘河腹心受病故於塔山支河接築縷堤九百四十二丈而牛角灣係茶城運河舊渠又築壩一道東接塔山西接長堤幾二里許以遏黃流傍入但壩地原係河身下多積沙創築卑薄連歲失守肘腋爲患已於本壩之南自舊縷堤支將軍廟起東接塔山增築長隄七百餘丈頗得重門禦暴之意冬春之際多加幫護伏秋之時晝夜防守預辦椿草以備不虞夏鎮第一要害宜殫心力勿忽

邳州東南六十里原有直河以宣泄蒙沂諸山之水近年因濁流倒灌直河遂塞諸山水俱迤邐由落馬湖經董陳二溝以出大河水勢紆迴則近郊田地常被淹浸湖波淼渺則候風舟楫遲滯艱危不特直河居民失市廩之利已也昔已開復通行而迤邐閭家集等口乃原通落馬湖故道復築長隄遏水此堤之堅瑕乃直河所視以通塞者每歲仍須加高加厚水發之時嚴行防守不令復出落馬湖庶直河可保不淤也奈何繼者失守長隄復決直河因之復塞矣務須查倣先年規制爲之此與耿車時灘之隄同一關捩在司河者加意耳

曹縣武家壩王家壩迎溜掃灣逼近老堤最爲險要而武壩險又甚焉萬一此壩潰決則城

武金鄉數邑悉成沮洳且逼近閘河甚爲可虞須於正月間多捲釘頭磯觜埽壩以遏直射及將老長堤幫厚增高伏秋防守官夫時刻勿懈萬歷十七年武家壩外忽成淤灘此亦一時之幸未可恃以忽修防也。汶水從陶泰而來就鹽河由博興車瀆入海自宋司空築壩戴村蜿蜒九里屹如天成迥狂瀾而逆之西會通河始得濟運此壩係全河屏障先年設夫增土植柳培護周密歲久弛以漸單薄萬一乘瑕復歸故道不無可慮宜令東平汶上管河官督夫培土栽柳悉如舊制此運河第一喫緊關鍵故首及之。坎河口與戴村壩無異蓋因戴村旣築之後水無傍洩歲久復衝此口泉水決入鹽河。運河每至淺涸萬歷十六年都給事中常會同撫按題請築壩馴於十七年剏築石壩一道長六十丈水漲則任其外洩而湖河無泛濫之患水平則仍復內蓄而漕渠無淺涸之虞利賴甚重防守當嚴必保萬全。馮家壩係蜀山湖之門戶地卑而水易洩故築壩以障之蓄可益運泛不病民何家口係南旺湖之尾閭此口稍卑汶水就西而下每決房家口而傷運河之堤南旺之水則涸矣今築石壩平時都給事中常會題剏築馴督築頗固真永賴也。坎河口石壩固爲完策但可以洩水而不可以通沙日久淤停沙填河內則能致水漲漫或沙觜橫射河灘則能逼水衝決宜督管河官乘暇集夫挑濬使

水不東逼，徑直南趨，誠爲保全石壩要務。運艘全賴于漕渠，而漕渠每資于水櫃。五湖者，水之櫃也。止因舊堤浸廢，界址不明，民乘乾旱，越界私種，盡爲禾黍之場。先臣兵部侍郎王原建土堤，南旺湖周圍隄長一萬九千七百八十八丈三尺。蜀山湖隄自馮家壩起，至蘇魯橋止，長三千五百八十丈。自蘇魯橋西至田家樓止，原係收水門戶，栽植封界高柳馬場。湖隄東面長一千六百二十丈，北面原留入水渠道，栽植封界高柳馬場。湖隄東面長一千六百二十丈，北面原留入水渠道，栽植封界高柳馬場。湖隄自弘仁橋起，至禹王廟止，長三千三百一十三丈。安山湖堤長四千三百二十丈，而斗門閘壩悉已完備，可收濟漕永利。萬歷十六年，又該都給事中常會題增修，因舊爲新，督築完固。但近湖射利之徒，覬覦水退，希圖耕種，盜決之弊，禁令當嚴。每年冬春管河官周廻巡閱，責令守湖人役投遞甘結，庶河防飭而水利無滲洩之患。疆界明而奸民杜侵越之萌矣。南旺分水地形最高，所謂水脊也。決諸南則南流，決諸北則北流，惟吾所用何如耳。當春夏糧運盛行之時，正汶水微弱之際，分流則不足，合流則有餘，宜效輪番法。如運艘淺于濟寧之間，則閉南旺北閘，令汶盡南流以灌茶城；如運艘淺于東昌之間，則閉南旺南閘，令汶盡北流以灌臨清，當其南也。更發濱南諸湖水佐之，當其北也。更發濱北諸湖水佐之，泉湖兼注，南北合流，卽遇旱暵，克有濟矣。此以智役水，以人勝天，力不勞而功倍，計無逾此。臨時酌之，南旺舊例，兩年一大挑築壩斷流，不通舟楫，始開月河，官民稱便。欲挑正河，必先挑月河，一時兩役並興，夫多苦累，時迫則工必略，工略則沙必淤。自今萬歷

十八年挑正河爲大挑。十九年挑月河爲小挑。以後著爲定規。庶舟楫往返既不阻於稽緩。夫役用工亦不病於煩難矣。閘河地亢。衛河地窪。臨清板閘口正閘。衛兩水交會處所。每歲三四月間雨少泉澀。閘河旣淺。衛水又消高下陡峻。勢若建瓴。每一啓板放船無幾。水卽盡耗。漕舟多阻。宜于閘口百丈之外用椿草設築土壩一座。中留金門。安置活板。如閘制然。將啓板閘先閉活閘。則外有所障。水勢稍緩。而于運艘出口易于打放。衛水大發。卽從拆卸。歲一行之。費無幾何。此亦權宜之要術也。衛水發源於河南輝縣蘇門山。名曰朔刀泉。經新鄉等處合淇漳二水。逾館陶至臨清合汶河之水。經德州。出天津直沽入海。板閘以下全賴此水濟運。夏秋之交。糧運盛行。每患淺澀。蓋因輝縣源頭建有仁義禮智信五閘。壅泉灌溉民田。以致水不下流。殊妨國計。宜行分巡東昌道。每歲糧運北行。衛水消潤。呈告總河衙門。移文河南管河道。速將五閘封閉。俾水盡歸運河。其餘月分或水勢充盈。仍聽民便。庶公私兩不相妨。而運艘不滯矣。按山東泉源屬濟兗二府。一十六州縣共一百八十泉。分爲五派。以濟運道。新泰、萊蕪、泰安、肥城、東平、平陰、汶上、蒙陰之西、寧陽之北、九州縣之泉俱入南旺分流。其功最多。關係最重。是爲分水派也。泗水、曲阜、滋陽、寧陽迤南四縣之泉俱入濟寧。關係亦大。是爲天井派也。鄆縣、濟寧、魚臺、嶧縣之西、曲阜之北、五州縣之泉俱入魯橋。是爲魯橋派也。滕縣諸泉近入獨山呂孟等湖。以達新河。是爲新河派也。又沂水蒙陰諸泉與嶧縣許池泉俱入邳州徐呂而下。黃河經行無藉於此。

是爲邳州派也。酌其緩急，則分水、天井、魯橋之派，均屬漕河命脈。每歲春夏，聽司道嚴督管泉官夫疏濬通達，俾源源而來，庶幾有濟。但數月不雨，其流必竭。萬歷十六年，漕渠乾涸，百計疏濬，卒無涓滴之流。至閏六月初旬，大雨連朝，諸泉俱湧，河渠遂盈，則地利未嘗不係于天時也。至于山泉沙磧頗多，汝河每爲淤墊，須于大挑之期，一併挑濬，使泉流無阻，亦一策也。  
通惠河發源于昌平州神山泉，會馬眼諸泉，經都城入內府，南出玉河橋，由大通橋至通州，而與通惠河合。勢並南流，楊村以北，通惠之勢峻若建瓴。白河之流淤沙易阻，夏秋水漲，則懼其潦冬春水微，則病其澀。浮沙之地既難建閘以備節宣，惟有濬築之工，殊爲吃緊。萬歷十五年，剏設管河通判專駐楊村，其爲修防計得矣。但查沿河兩堤，如搬罾口、火燒屯、通濟廠、東要兒渡口、王家務、華家口、閻家口、綿花市、猪市口、觀音堂、蔡家口、桃花口以上，堤岸坍塌卑薄，最爲險要。水發卽決，濱河州縣渰漫爲患，漕艘漂淌，人甚危之。應行司道督行管河官，每歲冬間，辦積椿草，春初率夫將前隄加高幫厚，真土實杵，不得雜沙塞責。糧運將至，設法疏濬，或築束水小壩，衝刷深廣，俾漕舟無膠滯之虞。民業免沮洳之害。以上河防險要。

一築順水壩，俗名雞觜，又名馬頭，專爲喫緊迎溜處所。如本堤水刷洶湧，雖有邊埽，難以久恃，必須將本隄首築順水壩一道，長十數丈，或五六丈，一丈之壩可逼水遠去數丈，隄根自成淤灘，而下首之隄俱涸矣。安埽之法，上水箱邊埽宜出，將

裹頭埽藏入在內下水埽宜退藏入裹頭埽內庶水不得揭動埽也如築長六丈闊四丈高一丈用埽兩面廂邊每邊用埽二行裹頭二行中間填土每行用埽三層共計用中埽十八箇每箇長五丈高三尺用草四百束柳梢八十束草繩四十條排椿簽椿共用椿木四根人夫二十五工共用捲埽隄夫四百五十工運土隄夫二百工俱不議工食共用草七千二百束該銀一十四兩四錢柳梢或葦一千四百四十束該銀一十四兩四錢草繩七百二十套該銀二十一兩六錢椿木七十二根該銀七兩二錢行繩十二條每條重四十斤共用繩四百八十斤該銀二兩四錢約共該銀六十兩如無柳梢以葦代之一造滾水石壩卽減水壩也爲伏秋水發盈澗恐勢大漫隄設此分殺水勢稍消卽歸正澗故建壩必擇要害卑窪去處堅實地基先下地釘椿木平下龍骨木仍用石楂楂鐵楂縫方鋪底石壘砌鴈翅宜長宜坡跌水宜長迎水宜短俱用立石攔門椿數層其地釘椿須劄鴈架用懸硪釘下石縫需用糯米汁和灰縫使水不入如石壩一座壩身連鴈翅共長三十丈壩身根闊一丈五尺收頂一丈二尺高一尺五寸迎水闊五尺跌水石闊二丈四尺四鴈翅各斜長二丈五尺高九尺用粗細石計長一千三百九十餘丈并地釘椿龍骨木鐵錠鐵銷煤炭木炭石灰糯米繫麻及各匠工食約共該銀一千九百餘兩其運石抬石搬料夫船并官夫廩糧工食臨期酌給一建石閘建閘節水必擇堅地開基先挖固工塘有水卽車乾方下地釘椿將椿頭鋸平櫛縫上用龍骨木地平板鋪底用灰麻艙過方砌底石

仍于迎水用立石一行。攔門椿二行。跌水用立石二行。攔門椿八行。如地平板鋪完。工過半矣。自金門起。兩面壘砌完。方鋪海漫鴈翅。金門長二丈七尺。兩邊轉角至鴈翅各長五丈。共用石三千一百丈。閘底海漫攔水跌水共用石九百丈。二項共用石四千丈。并鐵錠、鐵銷、鐵鍋、天橋環、地釘椿、龍骨木、地平板、萬年坊、閘板、絞關、閘耳、絞軸、托橋木、石灰、香油、鬃麻、柴炭等項。及各匠工食約。共該銀三千兩。有奇其官夫糜糧工食。臨期酌給。一建涵洞。涵洞以洩積水。基址亦擇堅實方可。下釘椿砌石。水多則建二孔。少止一孔。假如涵洞一座。口闊一丈五尺。身長二丈。中立石牆一堵。亦長二丈。寬五尺。分爲二孔。每孔寬五尺。兩邊四鴈翅各一丈五尺。共用石二百丈。并地釘椿、鐵錠、石灰板木。并各匠工食約。該銀一百八十餘兩。其夫役工食。臨期酌給。一建車船壩。先築基堅實。埋大木于下。以草土覆之。時灌水其上。令軟滑不傷船。壩東西用將軍柱各四。柱上橫施天盤木各二。下施石窩各二。中置轉軸木各二根。每根爲竅二貫。以絞關木繫箋纜于船。縛于軸。執絞關木環軸而推之。一挑河。凡挑河面宜闊底宜深。如鍋底樣。庶中流常深。且岸不坍塌。如不用堤。須將土運于百餘丈外。以免淋入河內。凡創開河者。每方廣一丈。每夫日開深一尺爲一工。挑濬泥水相半者。減十分之五。全係水中撈取者。減之七八。取土登岸就而築隄者。亦以半折算焉。一閘河偶淺。急疏之法。凡閘河淺處。如水溜在中。須兩岸築丁頭壩以束之。水溜在傍。將淺邊順築束水長壩以逼之。水由壩中。其勢自急。中溜自深。如淺

處不多或排板插下泥內逼水湧刷或排小船用杏葉杓挖濬必不得已則用椿草製活閘節水亦一策也。凡涵洞所以洩水本是無妨但須明設石閘以嚴啓閉若暗開隄址草木蒙叢便難覺察萬歷八年奸民私囑管河主簿將南岸遙隄暗開涵洞數座十七年伏水暴漲單家口水從涵洞洩出勢甚洶湧一鼓而開遂成大決此可謂明鑑矣司河者知之。以上修守事宜 河防一覽

# 行水金鑑卷第一百二十七

## 運河水

明神宗萬歷二十一年五月丁卯工部題覆漕河防守向在伏秋今不意春雨異常自濟寧暨淮湖一帶堤岸衝決關係非細近該河臣舒應龍奏在濟寧上下湖水漲溢則議築堽城閘壩以遏汶水之南開馬踏湖月河口以導汶河之北在淮揚之間則議開通濟閘旁月河土壩以及文華寺前一壩以殺水勢且欲幫築湖堤開洩涵洞廣募夫役早派委官及責成府州縣掌印官俱目前事勢所不容已者而科臣劉宏寶一疏尤有深慮疏內原擬各款逐一舉行以圖萬全從之明神宗實錄

明神宗萬歷二十二年正月丙午給事中桂有根言河工雇額月給銀一兩足以供事者少倘增額廣募自可計日告成至如性義嶺當兗徐之交河臣舒應龍議開渠洩昭陽等湖以免金魚各縣之淪漲杜運河隄岸之衝決令撫按速行勘報以數萬金量增雇直則興工隨以寓賑部覆從之二月癸亥直隸巡按綦才奏稱淮安通濟閘乃漕運咽喉請濬閘左舊河更開閘右新河三閘並出獲利而免害又請加培左畔大堤部議行總河相度從之九月戊戌韓莊新河成總督河道工部尙書舒應龍加太子少保賞銀幣管閘主事尹從教管河參政海淳參議邵以仁同知羅大奎等各陞賞紀錄有差明神宗實錄

舒應龍字時見全州人嘉靖戊辰進士萬歷二十年以工部尙書兼右副都御史總理河道河決汶上灌徐邳潰漕堤幾二百里應龍求通洩之途於微山湖東得韓家莊其地在性義嶺南不經葛墟嶺可引湖水由彭湖注之泇乃疏請開支渠四十餘里凡五閱月工成此開泇之首功也二十二年以河工成加太子少保山東全河備考

明神宗萬歷二十三年二月庚戌工部覆奏河防工竣經營各官會覈勤惰既明今將揚州等府同知等官劉不息等高郵等州正官許一誠等山陽等縣正官何際可等各優敍紀錄其各州縣佐領武職另行獎賞并失事應戒者俱請旨舉行從之明神宗實錄

是年決高郵中堤七顆柳郎中詹在泮等嚴督官夫築塞南河全閘

明神宗萬歷二十四年八月丁酉命管理河北郎中黃承廟諱避一  
前後九條俱入河淮漕楊一魁條議分黃導淮事宜十事一議放湖水以疏漕渠蓋高寶諸湖原係沃

壞自淮黃逆擁衝決汪洋卽歲加堤障猶多昏墊今入江入海之路旣浚分黃導淮之功已成應於涇河子嬰溝金灣河諸閘并瓜儀二閘並爲開治大啓湖水就湖疏渠與高寶越河相接旣避運道風波之險而水涸成田給民菽種漸議起科以充河費九月癸卯巡視蘆溝橋御史蔣汝瑚奏東西河商稅查閱地圖分別疆界謂陝商從小直沽河入者應報東河而山西商自五臺山運木由新落河至趙堡口謂之

西河與小直沽相去遼遠而前旨併入東河則西河之稅虛而御史可以不設與管河郎中格不報

明  
宗寶

陸化淳字居復號湛源□□人萬歷壬辰進士除工部郎中治濟上諸泉諸泉當漕渠淺則由鎮口奔注入漕漕仰泉給當漕渠溢則泛濫反涌入鎮口旁決不下時累歲適當其溢諸水櫃水壑所以備涸者多爲豪右所侵甚至鞠爲榛莽諸治泉夫皆供他調發公計河之盈縮不可期一值其縮則運艘何藉而北達具議於總河楊公一魁亟是之令行如議公昕夕乘櫬攢周視決壅導流不惜胼胝引繩批根不憚豪右諸泉畢理丙申工竣而徐呂以下多患漕梗濟上轉輸如故楊公大器公且議久任會已有代者遂寢諸閭夫苦於中官虐使公悉詳爲條教啓閉送迎皆有恆度約曰闌而出吾度者吾治之如吾教若不以聞吾而私笞掠人者吾治之當如所奉敕於是上下凜凜三年如一日也丁酉冬報命歷虔州知州

公化淳傳  
瞿汝稷撰

萬歷二十五年四月江都運河南門二里橋一帶水勢直洩無蓄爲鹽漕梗該巡鹽御史楊光訓題請檄揚州府知府郭光復開自二里橋河口起入西折而東從姚家溝以入舊河自四月興工八月告竣名寶帶新河民漕便焉

南河全考

萬歷丁酉歲二十五當糧運盛行之期漕河乾涸自桃宿而上至鎮口黃幾斷流三尺童子可攝衣而

渡糧船膠澀不前。探水稍深處，則移舟就之。河官乃築攔河壩，橫亘河中，蓄水濟舟，以緩須臾之急。少頃又涸，命去其船上竹木貨物，又涸，命運其米於兩堤，又涸，舟且漸裂，乃以繩繫其頭尾。至是人情洶洶，晝夜不得休息。有議僱車陸運者，有議易米納銀者，計無所從。運官羣聚告急，旗甲接踵潛逃。比時巡漕直指馬公駐節宿遷，親爲督促，無如之何也。乃上疏論劾，自總河司道以下皆被重參。時倭信且急，慮者謂從旅順口直抵廟灣，薄淮城，據糧爲餉，扼吭而拊背，則京師危矣。總河楊公及司道諸公皆倉皇莫措手足。先以萬人委州判程潮濬境山，引瀦水濟漕，不二日而水告竭。又移夫至梁家口，開挑支河，引微山湖水以灌漕。施工幾半，業費千金，忽飛騎召余，約三日抵鎮口。余如期赴召，覩公憂形於色，仰天歎曰：「今年運事大壞，疏導諸水，十無一濟。子素習河渠，且出余特簡，當以何策寬我耶？」因言見委程州判濬微山湖事，余啓公須往視可否，乃能定計耳。公許之，辭出至微山口，細觀形勢，幅員約二十餘里，令人探水淺深，僅二三尺許。及詢之土人，皆曰：「此湖係四面積水，並無源泉。」余曰：「此正所謂雨集皆盈，涸可立待者。豈足充六百里河身耶？」從此止工，可省銀萬計。轉之別圖不可乎？隨回鎮口。一復公，公曰：「子言良是。據子所見，孰可加工者？」余曰：「職昨趨召時，由小浮橋涉河中，有渾水一縫，涓涓不息，此黃流也。聞上源一決于黃堦，再決於義安山，上流既分，則下流自淺。浮橋水勢微細，宜然也。黃堦工力浩繁，未易輕舉。若調微山之夫，堵義安之口，再於小浮橋出口處闢開數十丈，則黃水盡歸小

浮橋沛達正河濟漕之策無逾此也。公曰：善。悉以微山之夫應之。而廩糧椿埽令取辦於徐州。是日辭總河返徐州。謁見道尊中菴徐公備道所以。公曰：此口趙運同曾知州塞之久矣。屢塞屢決。徒費貨耳。余曰：凡築決口塞而復潰者。以下流隘窄。水不能洩。必滿而逆行。上下搏激。勢必中潰。若上塞下闢。則隨來隨洩。奚潰之有。如人飲食下咽。而水穀道閉塞。小則腹脹。大則嘔逆。自然之勢也。公始領之。而尙在猶豫間。余復進曰：事急矣。再遲數日。則船裂米爛。縱治之無益也。請以千人闢小浮橋。以萬人築義安口。半月不效。願以身當。公方委心任之。時五月二日也。余正率夫興工。徐公忽奉總漕褚公命。往閱海州鹽城廟灣一帶城池兵馬。次日啓行。嗟嗟。漕事艱阻。勢如然眉。徐道業有專責。重比丘山。總漕公顧以不可必之倭。而易此不容緩之役。其意可概見矣。越三日。河工所需物料甚亟。而曾守靳而不發。衆夫嗷嗷。幾致脫巾奮呼。余親馳曾所面折之曰：君有治河責。今河壞漕阻。已被漕臺疏參。余此役爲君揀焚耳。不假一杯水。是自速禍也。請三思之。曾始悟。乃給發衆夫始定。曾因道尊行且迎合總漕公意。乃泄泄漫事如此。施工甫五日。水勢日漸東趨。再五日。水增三尺。再四日。義安口合河水頓高丈許。盡從小浮橋衝入運河前所築攔河壩數十處。頃刻衝刷如洗。數千金之費付之烏有。余前力言築非策。弗聽。今果驗矣。漕水既盈。旗甲將前所貯堤上糧米及前所撇竹木貨物仍裝置船上。且連日南風大作。揚帆銜尾而進。七日夜四百萬漕糧盡入鎮口。歡聲雷動。咸相慶曰：實更生我也。其他南北往來

縉紳士大夫得水而濟者不可勝紀。傳聞兩都諸大老移書相勞。漕臺馬公特疏薦之。當漕事岌岌時。徐道徐公日侍總河公經營邳宿間。分司樊公亦相從。後先區畫。大拂總漕公意。故徐有海州閱視之命。總漕甚且上疏自避。舉徐以代。徐益不自安。遂稱疾挂冠南歸。公清操亮節。世方倚重。無故而去。衆共惜之。兆元素愚懶觸忌。旋亦罷職。人謂以功爲過。奈公論何。樊公閱邸報。喟然歎曰。無罪而殺士。則大夫可以去。乃上數千言爲余力辨於當道。隨自乞休不允。至京察公亦挂名黜列矣。一時任事者解去殆盡。蓋亦理勢之必然也。兆元曰。士君子出處有命存焉。行止非人可尼也。忠直之迂於時。獨立之貞於俗。自古記之矣。晉李生有言曰。身可抑而道不可屈。位可排而名不可奪。此則吾人所宜自信者耳。併書之以告後之安義命者。張兆元濟  
運始末

明神宗萬歷二十六年三月庚子工部題覆工科給事中楊應文議開泇河之疏。大略謂頃自堌口一決。黃河南徙。徐呂而下。幾於斷流。於是開李吉小浮橋等處。及鎮口以下建閘。引水以通漕。目前似可無虞矣。然非永久之計也。泇河北接汶泗諸水。東受沂蒙諸泉。其源本不易竭。而岸高土堅。又能束其流而使之不漫。卽有湖也。而涯涘可循。卽有石也。而罅漏可鑿。隆慶間河臣翁大立。萬歷間河臣傅希摯。嘗議開而不果。若以河道歲修之費而用之於此。事半功倍。一勞永逸。臣固以爲泇河宜議也。科臣之言良有深見。但事在彼中。難以遙度。宜咨河臣及巡漕等各御史勘議可否。以爲行止報可。明神宗實錄

明神宗萬曆二十八年九月辛丑朔工科都給事中王德完條上漳流北徙二變二患三策言河決小屯東經魏縣元城抵館陶入衛爲一變其害小河決高家口斷二流於臨漳之南地俱至城安縣東呂彪河合流經廣平肥鄉永年至曲州入滏水同流至青縣口方入運河爲再變其害大滏水不勝漳而今納漳則狹小不足收束巨浪病溢而患在民衛水昔仰漳而今舍漳則細緩不能掃捲沙泥病痼而患在運塞高家河口導入小屯河費少利多爲上策仍迴龍鎮至小灘入衛費鉅害少爲中策築呂彪河口岸隄漳水運道固不資利地方亦不罹害爲下策中雜引漢事爲證而未復力薦原任知縣劉宇郎中樊兆程章下所司覆議三策總治漳之建畫與利害之更端容資漕河部院逐一從長計議務使國計民生一舉有賴報可十二月辛卯工部覆直隸巡按倪祺所奏三議其白塔河之復漕船向南既免風波之險又與鹽政關稅無妨復之誠便泇河之開蓋用黃河爲漕有利有害用泇河爲漕有利無害但泇河之外若繇微山呂孟周柳諸湖伏秋水發不無風波之險冬春水涸未免淺阻之虞必須上下另鑿漕渠建閘節水庶幾通漕悠利漳河之引已經具題奉旨咨河漕督臣會同保定河南撫臣督率司道查議具覆相應并

催務期引漳會衛以圖永濟允之

明神宗實錄

是年正月總督河漕尙書劉東星檄郎中顧雲鳳署道事揚州府知府楊洵督夫開挑邵伯越河長一十八里闊一十餘丈十一月又挑界首鎮越河長一千八百八十九丈七尺各建南北金門石閘二座

其邵伯越河。又建減水石閘一座。迄今官民船隻永避湖險。

南河全考

明神宗萬曆二十九年正月乙酉武英殿中書舍人管理山東礦務程守訓疏請改易漕渠繇高郵州達淮安府廟灣入海經數百里達山東膠州麻灣入新河至海倉復入海又經千餘里達天津省會通之勞而避海運之險工科給事中張問達劾其蠹國殃民且假稱明旨嚇騙賊數十萬乞亟爲罷斥并發諸臣論劾諸疏一一追究不報。四月甲申工部尙書楊一魁等言今歲經月不雨徐邳一帶糧運淺阻乞敕河道官員講求長策務期克濟從之。九月乙未朔工科左給事中張問達言漕運之期兌支過淮過洪各有定期抵壩抵灣不逾五月而回空之船亦無凍阻自黃壩口之決而南徙也徐邳三百里之間幾至斷流河臣乃議開趙家圈以黃河故道不及四十里接引黃流下通三仙臺支渠出小浮橋以入運河趙家圈告竣復採舊議開泇河舍黃流引汶泗山川泉源之水以爲運道便宜經久之謀心亦良苦然地多沙石工尚未就而趙家圈日就淤塞因而斷流徐邳間三百里河水尺餘糧船停閽不行者幾一月矣及入泇河又多淺阻臨清以北河流甚細此一萬二百七十有餘之艘相與爭一線之水而不能速進之故也夫糧船抵壩遲故交納遲交納遲故回空又遲入秋徂冬不可不及時治以爲明年接運之計也伏乞敕下該部設法起剝早令南還而河臣劉東星宜問其病之果否酌議去留則河道可通而漕務有賴矣章下所司已未直隸巡按張養志言治河之策不越理黃河開泇河之兩端而黃河之說有四泇河之

說亦有四。一曰塞黃烟口。以杜洩水之隙。蓋運道河身原淺。故蓄水不深。全賴黃水接濟。方可通運。自烟口一決。全河勢已南徙。見今口闊八十餘丈。水深二丈四五尺三丈不等。以致東河微細。濁河乾涸。徐邳一帶。年年淺澗。前年開趙家圈、三仙臺。今歲開李吉口。旋亦淤塞。職此之故。須將此口預爲堵塞。使水不南洩。盡向東注。庶運河之水常盈。而糧艘可免阻滯。二曰濬李吉口。以通引水之源。自趙家圈旣淤。所賴以引導黃水接濟運道。惟此口耳。黃烟口衝決日久。勢已深闊。須將此口大加挑空。深闊相等。始得分奪其勢。但此口至運河長三百里。工力浩繁。合於每歲運畢之日。自李吉口至堅城集。隸山東。自堅城集至鎮口。隸徐屬。併力興工。大加疏濬。近口處闊二十丈。以下闊十餘丈。俱深一丈四五尺。庶可引水一半東注。而宿邳之間。可免淺涸之患。三曰濬邳徐漕河。以爲受水之地。自邳宿以至徐呂。地高河淺。難以蓄水。每至春夏之交。率多淺涸。合于初冬以後。將北自珠梅閘。南自宿邳一帶。探勘淺處。卽以額設。撈淺二夫。大加疏濬三五尺。務俾深通。更於大浮橋迤北劉家灣建閘一座。鎮口閘迤北至玉皇廟建閘一座。以時啓閉。庶停蓄自深。節宣有具。四曰築永夏堤。以防決水之虞。此堤束水歸漕。關係甚重。先年原係土民接築。禦水後。因黃河南徙。水漲沙淤。前堤低矮單薄。去歲馬家溜、何家集衝決數口。水盡南奔。不惟徐邳運道淺涸。卽永夏田廬亦被淹没。今雖堵塞。尙未完工。近又衝決申家營三四十丈。若不上緊加幫。恐難捍禦。合于此堤幫修高厚。夯杵堅實。更接築大堤一道。直至大石山頭。俾南岸一帶。俱有堤禦。以上四款皆

運道之不可缺者也。一曰開黃泥灣以通入泇之徑。邳州沂河口入泇河之門戶也。進口六七里有湖名連二汪。其水淺而且闊。下多淤泥。糧船至此沾滯難行。欲爲挑濬。則無岸可修。欲爲埽壩。則無根可據。查得湖外有黃泥灣。離湖不遠。地亦頗低。自沂口至湖之北崖。約二十餘里。合於此處空河一道。以接泇口。不必拘定丈尺。惟以可通運艘爲度。湖水引以灌河。湖身棄而不用。所費不多。成功亦易。運舟從此可以直達泇口。一曰鑿萬家莊以接泇口之源。泇口遞北有地名萬家莊。以及臺家莊、侯家灣、梁城等處。原係山岡高阜之地。且多砂礓石塊。極難爲工。河臣劉東星併力疏鑿。業已成河。今歲輕小糧船已通行三十隻。但河身尚淺。水止二三尺不等。江浙湖廣糧船重大。難以通行。合於此處更加鑿削三五尺。俾韓莊之水下接泇口。並蓄水五六尺深。庶糧船不論大小輕重。沛然可達矣。一曰濬支河以避微口之險。韓莊之西有湖曰微口。上下三十餘里。水深丈餘。必測水勢深淺。插立標竿以爲向導。遇風揭帆。頃刻可過。偶遇暴風。不免漂流。今已於湖邊開支河一道。下接韓莊。上通西柳莊四十五里。不由湖中。挽拽有路。合將此河再加疏濬。庶可免漂沒之患。一曰建閘座以爲蓄洩之具。地勢原有高下。則水自有淺深。萬莊一帶。地勢原高。雖所開河身一二丈四五尺不等。較之泇河以南。猶爲高峻。北來之水。至此南下。必速合於此處。比照濟寧在城等處。或三五里。或十數里。相其地勢。建閘三五座。以時蓄洩。庶節宣有具。水可常盈。無淺澇之患矣。以上四款。皆泇河之不可缺者也。夫黃堌口先是。河臣以爲不可塞。而臣以爲可塞者。蓋彼

時徐呂二洪不患淺涸而患衝決故留之洩水以防衝運之患此時二洪不患衝決而患乾涸故塞之借水以成濟運之功泇河先此河臣以爲不可開而臣以爲可開者蓋前此疏鑿未至砂石已鑿深通頗易故謂其可開者惜成功之不可棄也此二役也理黃河乃萬世不易之經開泇河乃一時濟變之權譬之用兵黃河爲正泇河爲奇理黃河而並修泇河此奇正並用萬全之謀也若修泇河而遂棄黃河此舍正而用奇非長勝之道也非臣之所知也工部覆奏請命河道諸臣勘議得旨這河議着作速會勘來行毋得遷延推諉以誤漕計十一月辛亥河南道御史高舉疏言我朝奠鼎燕京數百萬衆待命漕渠乃今倉廩空虛漕河淺澀治河之人杳乎未有明年歲運可爲寒心臣試以治河之策與用治河之人言之夫漕艘北來出清口入古洪中間三百餘里實藉力黃流比因河臣溺職黃堌口開濁流南徙浮沙北壅歷徐邳抵宿遷昔之洪濤幾爲陸地以故糧艘至宿停閼彌月所幸大雨時行汙潦暴集僅完運事尚有糧二十餘萬迄未入倉卽入倉較之往年已遲幾月轉瞬冬殘水淺冰合回空何時赴兌何時過淮洪而輸倉亦又何時臣用抱杞憂廣詢衆口大約其策有三如新口大決黃堌口業淤其半宜乘此半淤大濬黃堌以下舊河務使深廣始引黃水而注之東遂塞黃堌而遏其南堵舊河之衝刷既深則南旋之水勢必殺方并新口而塞之來歲之運庶其有濟又如泇河之役費累巨萬而未奏成功聞近日糧運空船輕小貨船間有往來而竟難濟運者緣所挑河身狹而且淺又中有山一段攻鑿爲難故爾中棄似宜大加疏

鑿而底於成臣又查國初曾用海運南北無虞獨其中經黑水大洋內有礁石觸舟多覆迨淮揚漕河既成此河遂廢嘉靖間漕河氾濫復議及之此時王獻委崔引禮董治其事幾有成績故道見存東由麻灣海口入河北折蜿蜒僅四百里道經膠州高密出海倉口一日可抵天津旣脫風濤亦復徑捷據土人僉云每遇秋水溢糴販貿易之舟見在通行今但疏其壅去其塞事半功倍至便計也引禮之子同知崔淳曾與其事能道其詳且謂約其經費不至虛糜止須數萬夫不煩征調但借班軍假之二年可告成事事成當與河運遞相爲用彼塞則此通此塞則彼通兩利並存此亦一勞永逸之策也至先臣劉應節之旋開而旋罷者非河之罪以舍故道而鑿黃埠嶺膠人圖便之口誤之耳以上三策願當事熟計其便而審用之然欲奏河功宜先分職掌往年總河總漕設兩大臣分曹而理二百年來鮮有敗事往效可覩也頃因倭警防海責之巡撫乃以漕河兩事并之一人距不省費第未思昔之漕運河道緊要事務總在淮揚并奚不可今則漕運於江北而河決於中州二事並亟勢必不能騎牆而兩顧今卽不並設亦宜以漕務付鳳陽巡撫以河務付總河大臣姑待事完另議庶人有專責事有專功可不致顧左失右推諉誤事也夫職掌旣分會推宜慎職聞會推之日此推之彼甲諉於乙有德者疑于受德有怨者嫌于受怨舉有微疵者懼人之議其後舉有盛名者慚已之狃於徇此必無德無怨無咎無譽之人而後可於國家事未必濟也且今之會推三次推者七人雖俱一時之選第人各有能事難槩任如云人人有當于治河不敢信

也。且推而見用。或出都在道。任意遷延。屢任養尊。置身清遠。欲行一事。先會稿各臺。及會成一稿。復分委各道。各道委各府。各府委各州縣。而始行勘議。卽勘有肯綮。議有次第。又須會文申各府。各府申各道。各道申各臺。間有未妥者。必一再批駁。而議始畫一。卽議已妥矣。必各臺詳允。而事始舉。行動經數月少亦不下數旬。如此推諉玩愒。何日而可有治河之人。何時而可底治河之績哉。臣謂會推臣工。各宜計國務秉公心。無分朝野。略彼生平。但期於國事有濟。才品俱優者爲上。果才優而品非衆服者。亦在不遺。唯顧其人之精神力量足勝河任。以赤心行實事。念爲公家身甘勞瘁者。舉而用之。奉旨後。責之卽日登途。勿耽時日。到任之後。更責之遍歷河濱。所至詢之父老。參之輿論。以配己見。一面踏勘。一面議估。作速處置錢糧。鳩集夫役。刻期興事。計日省勞。仍復與以便宜。寬其文法。斯則人當其事。事宜於人。可屈指而奏效也。功成而兌運如期。則超擢示勸。并及舉者。祈敕該部查議。速行治河之臣。早賜簡用。得旨。往年河漕設兩大臣。今以兩事并於一官。應否並設該部院看議來說。這本言多可採。該部便看議來行。甲寅大學士沈一貫言。臣接御史高舉揭帖。內言河漕利害。竊謂其言可採。蓋京師受天下轉輸。歲以巨萬計。第恃一線漕河耳。今年春夏間。徐州一阻。而二十萬糧遂不入倉。若不急圖。妨害明年運事不小。三輔內地。所在告荒。太倉之米。不支一年。至于銀庫罄竭如掃。倘有脫巾而呼者。何以弭之。總河大臣已經屢推。伏承皇上垂問黃河事情。臣聞黃河謂之神河。衝徙不常。最難測度。先年所決之處。似難一一責問。今第宜及

早命官不惜財力以收後效。今日廷臣卽推河南鳳陽二巡撫。正因二臣見在地方。易於到任故耳。唯望聖明加意簡擇。原票臣難輕改。時上以黃河南決責問往日河臣。故一貫回奏云。

明神宗實錄

東星奉詔開泇河。泇界滕驛間。南通淮海。引漕甚便。前總督翁大立首議開浚。後尙書朱衡、都御史傅希摯復言之。朝廷數遣官行視。迄無成畫。河臣舒應龍嘗鑿韓莊工亦中輟。東星力任其役。初議費百二十萬。及工起費止七萬。而渠已成十之三。會有疾求去。屢旨慰留。卒官後。李化龍循其遺跡。與李三才共成之。漕永利焉。明史稿

# 行水金鑑卷第一百一十八

## 運河水

明神宗萬曆三十年正月己未增設漕河道一員以霸州兵備參政汪可受陞山東按察司專管其事從總河都御史李頤議也。壬午戶部尙書陳藻以河南修築汴堤徑留漕折賊罰事例等銀疏爭之曰。河防修築事隸工部應自設處若別部錢糧必移咨商確方可開許未有徑留之理。漕折賊罰事例等銀乃本部濟邊正額當此內帑極匱之秋日夕催償猶恐後時目今年例二百餘萬無銀可發萬一軍餉不繼倏有意外之虞誰當其咎歷稽往牒無以河務而徑留邊餉之例固萬萬難從者也。詔爾部錢糧旣稱缺乏難借河工正值緊急待用之時工部便計處來說閏二月甲午朔鳳陽巡撫李三才議治河緊急之策鎮口閘起至磨兒庄倣閘河之制每三十里建閘一座依時啓閉以濟新運及堅城集至鎮口閘止挑浚河渠約費銀一十九萬有奇須留漕糧乃克濟事工科駁因何留糧今太通二倉不足兩年支放萬一他變尤可寒心工部調停兩說覆請浚河建閘及留漕糧等事令總理巡撫悉心講求擔任行之許便宜處置動用興工毋得推延誤事癸丑工部尙書姚繼可疏言河南巡撫曾如春留戶部漕折等銀兩修築汴堤雖爲河道計實爲漕運計也查先年分黃導淮之工該部曾協濟銀十二萬兩則今日之議留正

與舊例相合。本部之未經咨會者。蓋緣春汛狂瀾橫溢陵運關係匪輕築隄之役。時刻難緩。若候會議可否。未免各徇己見。耽延時日。有失時機。且隄不築。則河不治。河不治。則運不通。運既不通。漕糧自不能飛渡。倉廩又何能充實。于時卽歸咎河渠之爲害。恐亦無及耳。以此推之。卽緩急相濟。固無不可者。但該部旣不欲通融。而河工又值緊急。豈有坐視待困之理。備查該省額解錢糧。如漕折之外。尙有別項堪動者。當另設處。無損邊儲設。或並無應用錢糧。則在總河便宜動用。以充堤費。俱非臣等所敢遙度者。詔是之曰。河工緊急。錢糧令總河及巡撫設處便宜動用。六月辛卯朔。工部尙書姚繼可以僉事汪光岸備陳開泇河之利。知州俞汝爲疏內又極言泇河不必開。請命總河總漕及巡按巡漕巡鹽各御史同勘議。果事半功倍。永賴可期。卽速鳩工以濟糧運。如或山多石梗。工鑿難施。不妨明白議止。并力故道。所節財力。詳妥具題報可。明神宗實錄

是年五月高郵北關小閘口潰決。長六丈。本公司郎中顧雲鳳築塞之。仍加磚石包砌堅固。南河全考

明神宗萬曆三十一年三月丁丑初。清口陡涸。運艘不前。御史蔣以化、淮撫李三才各疏聞。并請寬過淮過洪之期。許之。仍命行總河酌議。於是河臣曾如春言。水涸之故。大都因淮黃交匯。河底衝刷深且五丈。外低內昂。勢不能伏滬而上。陡涸病根皆原於此。今所恃淮南高寶諸湖之水。臣檄行封閉甚早。不令旁洩。北引接運。頗有餘資。以故司道諸臣欲因便於高寶湖水而建閘浚渠。節宣用之。正永樂中陳平江已

然之明效也。目前濟運似無踰此。工部如議覆上從之。四月戊戌巡按直隸御史楊廷筠以天降陰雨水勢增長清口可無淺阻之患上聞下部知之。五月二十五日風雨冰雹如祁州、成安、永年、肥鄉、安州、深澤等處漳、滏、沙、燕等河汎溢橫流衝決隄岸清海百川萃至田廬盡沒城垣傾壞乞查勘賑恤。七月丁丑戶部覆倉場總督議河流大溜勢必至於凍阻請先嚴諭沿途諸司限五日一報催督過糧船數目其邊糧出關即使提幫前進他船不得阻撓上可之。八月丁亥工部覆管通惠河主事議將通灣天津一帶白河委官調集各屬額派淺夫設法挑浚務深四尺五寸所挑沙土卽於兩岸築隄以防水發俟挑完果有成效後著爲令每年糧運將到預先料理疏浚其各淺夫依議裁減餘者徵銀貯庫至各屬額派椿草柳栽曠工等俱按季交收從之。十二月乙巳工科都給事中侯慶遠因河臣李化龍議開泇河屬之直河以避河險而商費頗嵩期功太速遂上疏曰泇之不可不開也明甚舒應龍劉東星業已再試之而利矣然開泇之工雖不得比績安平其視南陽之役則不啻等而過爲安平費至鉅萬南陽改浚百四十里爲費四十萬有奇泇河上下二百六十里殆又倍之費止二十三萬何其嵩也夫底闊三丈舟不得轉又不得方不太狹乎期以四月告成不太迫乎往以百萬開王家口而盡委之泥沙今尺寸見功而斲於二十萬不太失權衡乎則爭其深闊緩其事期倍其估數督河悉虛深計計部水部協力助輸陛下主其斷專任而責成之令其展布四體力圖永逸如所謂開崿頭經落馬北岸直指宿遷永謝河伯之梗。

勿徒托之空言也。又其地多岡麓。水行易迅。必岸深底平流緩而後水可停蓄。蓄極始爲溜以宣之。而仍攔以閘水。庶其不匱也。每閘必闊爲月河。令可容百艘。庶其可避水漲敗舟也。岡水易淺。必相其可以瀦水之處。令容納細流。以備接濟。庶其不一瀉而盡也。往議取道於湖。今避淺遵陸。宜多其入漕之口。仍遮以隄壩。今逶迤乃下。庶免暴漲之虞也。泇河成而治河之工可以徐圖。但不病漕與陵。則任其所之。稍防疏焉。而不必力與之鬪。然河不可縱之入淮。淮利則洪澤水減而陵自安矣。至所在隄防支口。與其張皇於臨期。何若預謹於平日。府臣宜歲六巡。其信地俟其當築導者。而早報之道。臣督臣道臣歲四巡酌。而早報之督臣。督臣歲二巡期。以春秋之杪以定一歲大計。而歲一一聞於陛下。以聽處分。而釋南顧。如漕規歲一會議例。著爲令可乎。下部知之。明神宗實錄

明神宗萬曆三十二年正月乙丑。工部題覆總理河道工部右侍郎李化龍疏請亟開泇河。酌浚故道。大要言。河自開歸而下。合運河入海。其路有三。由蘭陽道考城至李吉口過堅城集入陸座樓出茶城而向徐邳。是名濁河爲中路。由曹單經豐沛出飛雲橋泛昭陽湖入龍塘出秦溝而向徐邳。是名銀河爲北路。由潘家口過司家道口至何家隄。經符離道睢寧入宿遷出小河口入運。是名符離河爲南路。南路近陵。北路近運。惟中路既遠於陵。亦濟于運。前督臣排羣議以興茲役。竟以資用乏絕。不得竣事。然自堅城以至鎮口。河形尙爾宛然。故爲今之計。惟守行隄。開泇河。其善有六。其不必疑有二。泇河開而運不借河。有

水無水聽之善一以二百六十里之泇河避三百三十里之黃河善二運不借河則我爲政得以熟察機宜而治之善三估費二十萬金開二百六十里比朱尙書新河事半功倍善四開河必行召募春荒役興麥熟人散富民不苦賠窮民得以養善五糧船過洪必約春盡實畏河漲運入泇河朝暮無妨善六爲陵捍患爲民禦災無疑者一徐州城向苦洪水暴至泇河旣開徐民之爲魚者亦少無疑者二題請遵照施行及工科都給事中侯慶遠亦題稱共贊河漕大計事部議泇河應挑直河應建閘座及築堤應用錢糧係議取用如或原議所開河底不無欠闕期日果爾大迫經費果爾不敷不妨照依科臣條議再爲增益以圖久遠至科議歲巡歲報事規尤爲河工急切要務各該府道督臣悉宜一體申飭上曰泇河旣屢經料理端緒可成該總河身親籌度詳悉着及時上緊分工開浚所議經費如有不敷許其再爲增益務圖久遠之計其餘分河保隄等事都着用心兼舉毋得疎玩二月己酉河道總督李化龍題開泇分黃兩工並急上曰河工旣急所請錢糧原經題允數內者准就近借資以濟急用其餘令部議以聞五月辛丑河道總督曹時聘奏泇河一役肇於壬辰之洩河水關於辛丑之達沂河而避河鑿石遂成通津則河臣李化龍之議也上自李家港下至直河口計長二百六十里已於去年四月盡行開通糧艘之由泇而上者業五千餘隻矣祇緣張村集以下三十里直河因其舊以爲渠意在省費而不料水漲沙壅舟行稍滯兼之泇卑於直其水逆流土壩被衝其水旁洩遂不免爲全河之累耳續該前河臣督行司道等官相

度地形避高就下自張村西南創開支渠一道長三十里下接田家口去年所開舊河其毛窩一段橫穿浮沙二十丈見用椿板廂護內實老土王市口之減水閘臺頓二莊之節水閘與夫彭家口之滾水壩一切易之以石又自直河口以至劉家莊但係淺狹悉加闢浚今三月二十九日工役告竣放舟而入臣由曹單豐沛閱視黃流周咨挽回之策南趨鳳泗恭謁祖陵東出露邳至於直口見運船鱗集口外兩旁者不下數百艘督夫挽拽不兩日而盡臣尾之而行沿途測量渠水皆深六七尺以上不惟無去年沙淺之虞卽大泛口之溜亦已下建閘座有所節蓄而其勢轉平也近據各官揭報重船過王市口者至五月初三日已踰二千三十餘艘使此復魚貫而進無或脫幫則運事之早於往年當不止一兩月矣凡此皆前河臣李化龍經理就緒臣受事之始獲覩成功私竊慶幸除增設閘驛官員與一切善後事宜陸續奏請外謹先馳報以慰聖懷疏下所司八月丙午河道總督李化龍奏報分水河成糧艘由泇河者已過三分之二由黃河大溜者止三分之一舊者已壞新者未成而過洪曾不逾限國之福也章下所司庚戌河道總督曹時聘以淮徐道副使卜汝梁挂冠長往大挑在邇亟須得人議將漕河道按察司汪可受加銜改補其漕河一道卽行裁革以省糜費及可受以憂去復請以開封府知府馮盛明陞補下吏部覆議從之癸亥工科右給事中宋一韓以漕渠淤澱及論舊河臣李化龍開泇之誤因言曹時聘意主大挑庶幾近之乃責役於四百日之後爲計亦左且夫以募集恐難久恃乞下工部遣諭覆議施行從之

壬申工部覆李化龍分水河成故道漸復疏得旨分黃工役垂成一切築壩塞決等項正係喫緊各該撫按官務嚴行在河司道府縣等官速併力修築刻期完報以收一簣之功有稽誤工程致貽後患者不時參處工完之日自行優敍九月庚子工部尙書姚繼可言頃督臣所報分水河成故道漸復而又忽報單隄大潰豐沛蕩離魚濟運道危如累卵夫以此時報河工之就緒卽以此時報河流之橫決科臣所請在河之臣無不殫心籌畫以固守隄防又未及隨時呈報以早圖拯護宜行總河覆核上曰河患衝決不寧先着作速保護漕隄毋令妨運在河官員必因總河丁憂玩弛失事俱難逃責着河道嚴查分別以聞仍速行督率及今水落時從長疏塞以待新官之至十二月丁巳工部尙書姚繼可言泇黃之役不一勞則不永逸不捐四十萬之金錢二十萬之夫役必不能收萬全總河李化龍所議五河之支渠王市之石閘上緊挑砌大泛口之溜彭家口之淺作速浚治惟在新河臣速議上曰泇河着實浚治以資新運黃河應否大挑新總理酌議具奏宜速催赴任戊午原任陝西參政今調湖廣茶陵州知州范守己言國家漕輓仰給東南歲運四百萬石止賴惠通河一線之水耳而壅塞無常百年來非止一次往者議開膠萊河議通海運蒿目腐心迄無成功長慮卻顧卒無善策邇因河流南徙二洪淺澀至壅皇上宵旰之憂賴有智謀大臣議開泇河自邳州至於夏鎮軋出彭城之左軸輶無阻厥功良多乃不意河決單縣復有南陽之淤也欲護漕渠不得不急治黃河欲治黃河不得不大費工力聞河工之需用銀八十萬兩動

夫數十萬名過計者不無意外之慮況挑築於此處能保不橫決於他所河之遷徙無常漕之艱阻莫測何不別求便利以爲永久之圖也查嘉靖六年河決豐沛東溢逾漕漫入昭陽湖左都御史胡世寧自南京赴召上疏言國初漕運自淮達河由陽武起六百餘里至衛水入舟轉達至京又聞沁水至武陟縣紅荆口分流一派通衛近年始塞是河流因沁可以通衛也宜遣官踏視或紅荆口或陽武上下開通一河北達衛水以備徐沛之塞疏下工部詳議因河道都御史盛應期主開昭陽湖左新渠世寧之議不行久之新渠難成復濟故道因仍至今臣嘗往來沁口諸處見沁水自山西穿太行而南至武陟縣東南入河十數年前河沙淤塞沁口沁水不得入河乃自木蘭店東決岸奔流入衛則世寧紅荆口之說信矣彼時守土諸臣塞其決口築以堅隄仍導沁水入河而隄外遺有河形直抵衛滸固至今存也若於原決築隄處建一石閘分沁水一派東流入衛爲力甚易再將原衝河形補加修浚兩岸培爲纜道爲力亦易計其工費用銀不過二三萬用夫不過一萬餘名而大工告成矣乃引漕舟自鄧州遡河而上直抵沁口因沁入衛東達臨清則會通河可以不用也若謂遡河數百里或有灘溜之險無縫道之便則又有一河可由者查滎陽之東廣武山南一水東流經鄭州中牟之北祥符之西由朱仙鎮而南經尉氏扶溝西華之東沈丘之南在元史名爲鄭水土人名爲賈魯河者也南至周家口與潁水合流名爲沙河至潁州正陽鎮入淮直抵淮安今自正陽至朱仙鎮舟楫通行略無阻滯自朱仙鎮而北而西至鄭州西北惠濟橋地方

不及二百里。河身略窄。稍當修浚。若於惠濟橋西開一支渠分水。一派北入黃河。不及二十里。渡河而北。直入沁口。爲道甚便。如謂鄭水微弱。不任漕舟。則禁鄭之間。又有京水索水。須水諸泉。皆可引入鄭水。以濟漕挽。再每二十里建一分水閘。如會通河之北。則蓄洩有時。水自裕。如計其工費丁力。亦不過四五萬兩耳。若此道既通。則漕舟出天妃閘。即由洪澤湖入淮。遡淮入潁水。遡潁入鄭水。牽挽尤穩。黃河又可不用矣。雖衝溢萬變。何慮焉。如河流安妥。不致侵漕。則夏鎮南陽之間。仍加修浚。兩利而俱存之。分舟並進。可免守閘之困。如河流變遷。東道有梗。則專由鄭水而徐呂之道無問。便利之策。無逾此者。臣懷此已二十餘年。因會通河無阻。不敢輕言。今屢浚屢塞。而黃河又衝決無時。侵逼益甚。興其竭海內脂膏。以填不測之壑。孰若改絃易轍。就此易竟之功緒也。伏乞敕下工部及督河大臣。差官踏視。如果臣言可用。先將武陟迤東。至於衛水之滸。東西百餘里。原有河身故道。發夫萬餘名。及時挑浚。約深一丈。闊十丈。卻於木蘭店東築隄處所。修建石閘一座。分導沁水。一派東行入衛。舟至則啓閘以通漕舟。盡則閉閘以掩水。明歲春末。其功可成。姑將漕舟逆河而上。由沁入衛。以濟目前之急。卻議修浚朱仙鎮迤北。至惠濟橋迤西。分導鄭水。以通漕舟。則帑藏民力可省百倍。而國家之利賴無窮矣。或慮沁水入衛。恐獲嘉新鄉之間。不無泛濫之虞。不知建閘啓閉。節宣其流。止分十分之一二。東行耳。而沁之洪流。固自南入黃水也。如必思患預防。當多建閘三五處。相距或二十里或三十里。無事重重固閉。以防東流。舟到遞相啓閉。以爲蓄洩。

又何泛濫之足虞耶。或又謂大挑黃河欲除民害工不容已。臣非欲止其役。但今日急在漕運而民害次之。漕運一通國家之命脈已固。雖黃河遷徙無常。不過坍塌一二縣一二鄉之地耳。爲築長隄以捍其衝可也。如勢不可遏遷其城郭以避之有何不可。何必與河爭尺寸之地耶。下工部覆議行總河及河南撫按勘議具奏。

明神宗實錄

是年春正月總理河道侍郎李化龍請開泇河曰。河自開封歸德而下合運入海。其路有三。由蘭陽出茶城向徐邳名濁河爲中路。由曹單豐沛出飛雲橋向徐溝名銀河爲北路。由潘家口入宿遷出小河口。名符離河爲南路。南路近陵北路近運。惟中路既遠於陵亦濟於運。前河臣翁大立、舒應龍並創泇河之議。至劉東星大加開治。漕艘由泇行者已十之三四。至李化龍乃得竣事。漕運便之。苦上紀聞

是年總河尙書李化龍以爲黃侵緯道漕事可虞。於是大挑泇河。自直河口起至李家港止。開拓二百六十里。漕船始由泇通行以避黃險。本年秋河由昭陽湖穿李家口出鎮口全河上灌南陽北薄新店。

泇河全

考

先是萬曆三年部議開泇河。隨該科道勘議題寢。至是河決蒙墻。決黃莊淹城郭。病運道。於是李化龍開挑泇河以便行運。自王市口抵直河五百餘里。以避黃河三百里之險。

淮安府志

明神宗萬曆三十三年二月丁卯總理河道少保兵部尙書丁憂李化龍奏臣以過大行虧延禍臣母蒙

皇上憫其憂苦亟點新臣又以河漕事重命臣料理候代臣思泇河業已通漕但直河一段沙淺韓莊臺莊鄆山一帶尙多淺狹因行司道官督率各府佐於直河之南另挑支河三十里於王市等處建閘三座於彭家口臺莊等處各加展浚至一萬二千三百丈足行全運臣之料理泇河者如此又念徐邳之間黃河大溜至不通舟因行司道官督率各府佐將塘池馬家淺高家灘各挑月河一道栲栳灣大加疏浚牛角灣張孤山范家山等處俱大加開闢令黃水順流南下不復舊年景象矣臣之料理黃河者如此又念南陽西隄頻年爲黃水壅激湖水噬蝕已多恐湖身漸高則黃河漸北因而穿漕是又一李家口矣因令各官集料鳩夫將南陽運河西岸釘椿下埽實土築隄以遏湖波又將單縣陳燦樓決口堵塞以絕來源臣之料理南陽一帶漕隄者如此蓋臣身雖不能出而心則不敢不盡體雖已抱病而力猶不敢不竭今已得代故敢備述上聞少釋南顧之懷報聞三月丙申工部都水司員外考察浮躁潘大復奏臣奉命管理通惠河道自通州閱河至天津計程三百二十餘里沿途淺阻計五十餘處土人云河係浮沙隨浚隨淤故運艘至日近則自香河之黃家渡起剝遠則自武清之楊村以下起剝統計剝價之費大約十五萬餘兩而各旗甲之私貼不與焉至於投水插和種種弊端又未可縷指數也臣奉旨挑浚於三十二年四月開工本年六月止力役甫竣而大雨滂沱臣謂沙隨水來前功將盡棄矣至八九月間水消且盡運艘南來絲毫無阻彼時卽宜具奏恐人謂偶緣霪雨遂爾貪天竊計今年四月間再一淪疏倘仍復通行

便可報命。不意臣之不肖。挂名察典。故不得不明白一言。以畢前件也。報聞。丁酉總理河道工部右侍郎曹時聘奏。臣先任應天巡撫。蒙恩陞任於二月初二日渡江而北。沿途閱視儀揚高寶。以至淮安河道。俱各安瀾無恙。清江浦見修隄工完。及八分已上。出清河口。係淮黃交會之處。測量水勢甚深。桃源黃壩新成。可備減水之用。初十日至宿遷。與新撫臣周孔教面代。一意北行。十二日至邳州直河口。卽泇河之下流也。舊督臣李化龍咨送關防文卷。卽日接管行事。舍舟登陸。沿泇閱視。所有開渠建閘各工。亦俱完及八分以上。其未竟者。以水湧疆出。頗難施力。臣酌其多寡難易。限以日期。總之三月初旬工役俱竣。泇河可以通行也。復輓舟而上。逐程按視。如栲栳灣、牛角灣二處。跌溜甚險。督令設法疏治。務得其平。自牛角灣而上。卽夏鎮也。黃水自昭陽湖散漫而南。出李家口。至范家山。仍歸徐邳故道。第李家口外聯諸湖。一望無際。勢如滄海。又自珠梅閘而上。卽南陽也。一帶西隄。因被黃流蕩噬。殘毀甚多。前督臣已大加修築。護以椿埽。但四顧皆水。雇船運土。遠在二三十里之外。計日程工。須四月初旬乃能完事。彼時大幫始至。繩道已成銜尾。而行可保。必無梗阻耳。報聞。明神宗實錄。

李化龍字于田。長垣人。萬曆二年進士。三十一年四月起工部右侍郎。總理河道。與淮揚巡撫李三才奏開泇河。由直河入泇口。抵夏鎮二百六十里。避黃河呂梁之險。再以憂去。明史稿。

黃河在西北。土稍堅。患衝突難禦。在東南。土益鬆。患散漫難收。李霖寰決計走泇河。其言曰。黃河者。運

河之賊也。舍黃一里，卽避一里之賊。其苦之如此。湧幢小品。被論中轉。舊稿。明運道興廢不一。盛思徵既開新河。經夏鎮道留城出鎮口以避黃水之衝。功亦偉矣。乃泇河議興。則以三難二悔之說進。因此去官。尋泇河之役亦報罷。越三十年。而李少保公然奏績。甚矣哉天下之事。成功遲速。蓋有時數存焉。迨至本朝。靳文襄公與今相國遂寧公。凜承聖訓。開成中河。遂致東南歲漕數百萬貢糈。蘇淮渡黃。僅一十五里。挂帆如駛。安瀾無恙。三百年來。運道盡善盡美。之數公者。功不在宋尙書陳平江下矣。山東全河備考

梅守相字春寰。宣城人。萬曆己丑進士。任夏鎮分司。自劉東星開浚韓家莊。以及李化龍鑿泇河功成。皆守相爲之佐理。其有功漕河。不亞於二公也。

山東全河



# 行水金鑑卷第一百二十九

## 運河水

明神宗萬曆三十四年二月壬寅廣西道御史史弼言國家水患惟河爲急上關陵寢下關運道況今之河又非昔比漸徙漸北愈壅愈決陵患難寧運道日梗所在生靈廬舍沈淵浮苴棲木治河者迄無成功臣按先朝宋禮經營會通寢處河上始終數載揣高度低集思廣益兼以國初物力豐盛法令必行是以工成一舉利垂數世今則不然大役已興而議未決丁夫方集而料已窮驅饑疲之民於嚴寒之後枵腹墮指累累而是此不能慎始之故濱河守令半集河上沿河赤子悉赴工所徵發太煩期會太促淘淘生心憂在瓦解此不能防微之故昔挑王家口費金錢百餘萬今挑朱旺口又需金錢八十萬竭澤可虞勞薪難繼此不能長慮之過泇河之役亦一時權宜但河塞而後議泇則泇成宜必可以代河今導河而河流愈漫浚泇而泇河日枯二役並興一役莫竟此不能圖終之過爲今之計固當廣集方略而其要務則莫急於措處錢糧綏懷衆庶二者蓋集三省之衆於一方春深則溼氣蒸疫厲作宜析處分屯每屯相去里許於其中分任老壯多置居所分銀斗粟務沾實惠則應募者必衆應募者衆則可免調鄉丁彼鄉丁裹糧而赴千里之役去家而失農桑之期豈若應募就食者得斗粟分文之惠免流離饑凍之苦哉至於

錢糧內帑可捐外帑可借而漕糧必不可留蓋漕河固國家咽喉而漕糧尤國家命脈臣竊計每省協助不過三四萬則數十萬金錢一朝可集然金錢不可食必變爲粟米臣聞山東河南江北地方頗稔誠厚值以募米商而捐其稅米商必集米價自平轉三省粟以供數萬之衆何憂不及又臣觀今日諸臣人持一心山東諸臣利河南流河南諸臣利河東下兩議相持阻撓四出敗乃公事莫甚此曹乞亟選賢能同心戮力以幾平成之功不報八月辛酉河道總督曹時聘言國家二百餘年自徐而下大都以河爲運邇來遷徙不常數失其利非二洪告涸則諸溜難前內外臣工蒿目腐心莫不以無漕爲慮幸泇河一線先河臣舒應龍剏開韓家莊以洩湖水而路始通繼則劉東星大開梁城候行莊以試行運而路漸廣比至三十二年李化龍上開李家港鑿都水石下開直河口挑田家莊殫力經營行運過半而路始闢至十三年二月內該臣接管見得改挑經始運艘將臨立限嚴催多方鼓舞莫春首夏接踵告完是年行運者八千二十二隻今年糧艘七千七百六十五隻盡數渡泇則泇之可賴豈不昭昭在人耳目哉然漕渠成矣河官未設閘座建矣官夫未定轉輸通矣置郵未改萑苻警矣司捕未立兼之閘禁未嚴節宣失度水利一洩立覩膠舟臣不敢虧一簣之功廣集衆思謬畫善後六事以聞一議以兗東道加管河二字於原領敕書內管滕嶧二縣河務兗州府馬捕通判及嶧縣縣丞俱令兼管泇務以便責成一議以黃家閘官夫移之韓莊留城閘官夫移之臺莊馬家橋官夫移之頓莊專司啓閉一議趙村爲邳宿適中之地萬

家莊爲邳嶧適中之地。各添設一驛。以便應付。一議於嶧縣臺家莊地方添設巡簡司。置巡簡一員。弓兵四十名。以備干撢。一議禁勢要人員。不得恃強阻撓閘務。以節水利。一議補築殘隄。截削灣觜。展闢陋岸。疏浚淺沙。以收全功。皆從之。九月辛未。河道總督曹時聘。以朱旺決口既塞。疏聞。因條議十事。一移置專道。一增設河官。一瓶築隄防。一建立鋪廠。一分別賞罰。一久任責成。一申明職掌。一嚴禁那借。一議處河夫。一除豁占田。工部覆如議。上諭部臣。連歲公帑民力俱竭於河上役。不可再宜懷永圖。旣稱大壩已成。全河東注。必使盡出中路。方保無虞。趁此秋涸。將一應南北隄岸。儘力修築。屹如山峙。自然水得所歸。方堪永賴。所議十事。俱依擬。朝廷不惜懋賞。亦不事姑息。可卽行與河上諸臣知之。十月辛亥。詹原任總漕工部尙書劉東星。一子入監讀書。以議開泇河功成故也。明神宗實錄

明神宗萬歷三十五年二月癸卯。工部覆議泇河善後六事。俱依議行。從總河曹時聘之請也。去歲漕河再決蕭碭之間。以巨浸爲憂。自楊村集而下。黃堌口而上。再築再塞。凡用夫二十萬人。金錢八十萬緡。至是乃言全河旣已就軌。泇河委應厚終。開泇於梗漕之日。固不可因泇而廢黃漕。利於泇成之後。亦不可因黃而廢泇。兩利俱存。庶緩急可賴。如謂南陽之患已去。而徐邳之險可乘。異時有失。誰司其咎乎。因議築郗山之隄。削頓莊之觜。平大泛口之溜。浚貓兒渦等處之淺。建鉅梁首衝之閘。增王市徐塘之壩。以終泇河未就之功。又議設河官置官夫。建驛遞立巡司。嚴閘禁。加裁展以成新渠。其後之務。大率皆切近無

甚糜耗然亦自去歲冬月三請乃下。四月戊申河道總督曹時聘疏言夏鎮分司原管閘河上自珠梅下抵黃家運渠地方不過百里自梁境以下俱屬中河故責任差輕自萬曆十六年黃河盛漲倒灌鎮口遂議將梁境鎮口並丁家集縷隄盡屬夏鎮責任已倍矣然此不過百五十里之河耳今泇河既開自李家巷至劉昌莊則係沛縣自劉昌下抵黃林則入滕嶧之境延長一百六十餘里悉係漕艘使官仍主事則品秩未崇敕諭未頒則事權不重宜將夏鎮主事改爲郎中頒給敕書照中河事例庶事權重而臂指相聯漕渠永賴矣章下所司七月壬寅查核通灣所失糧艘自閏月甲申以前戊寅以後屢有漂溺凡損船三十三隻米八千三百六十石淹死運軍二十六名其沿河民戶漂沒者不復能稽畿輔通志祥異志考中是年並不紀及水災乃通灣漂沒人船糧米如此之多甚至沿河民戶被害者不復能稽而考不之及甚矣志乘之失載者多也十二月甲子總河曹時聘以泇渠告成核實工費再請錄効勞官員事下工部

明神宗實錄

明神宗萬曆三十六年二月乙丑工部再請覆覈泇河工費及効勞官員旨命巡漕御史查勘分別以憑激勸明神宗實錄

明神宗萬曆三十七年十月乙丑巡漕御史顏思忠條議申飭漕規一建閘壩以竟前工徐塘窓窯等處流沙爲患先河臣議於閻家集田家口吳家冲建閘三座以備蓄積於徐塘河王文溝王市溝建石壩以備分洩於張村長旺等口各築截河二壩以遏流沙至泇河之水全藉南旺蜀山安山諸泉須大加疏通

令泉脈湧注。又滄浪水改從針溝口入泇。自源槩委亦濟運之上策也。一設官建驛以保萬全。泇河南北二百六十里人舍稀少盜賊公行議將徐州水驛移之泇溝。邳州水驛移之田家口。以兗州泇河通判移駐臺莊。徐州管河同知移駐王市口。邳州管河同知移駐直河。每春夏行運之時。以徐州參將移駐貓窩。沙溝守備移駐韓莊。鄒山地方聲勢相倚。河溝爲之肅清矣。餘覈造船以資輓運修潞河以濟起納嚴法令以肅漕政。章下部。戊辰巡漕御史顏思忠直陳新河可開之狀。先是議者以國家漕運專恃會通一河。欲更開膠河以防不虞。會以人情不調報罷。思忠言膠萊新河。南自麻灣通南海。北自海倉通北海。地之相距計三百四十里。除麻灣南抵淮揚七百里。海倉北抵直沽六百里。商賈通行無容別議。中間河寬水深工力省便者。麻灣至抱浪廟等處約共百九十里。河窄水淺及全未挖修者。抱浪至陳村閘等處約共百五十里。分水嶺地形頗高尤宜深浚。約略其費可不及十五萬。大都小沽河可以灌中段。大沽河以灌陳村之南。白河以灌分水嶺南旺山河以灌新店之北。以及中間諸河泊之水以濟助之。凡有水來必挾沙至黃泇二河。豈無衝沙焉得一一躲避。唯當倣臨清濟寧事例建閘設夫。時常修浚於大小沽河上源修蓋土壩以障沙來。或建造斗門以防水漲。因勢利導隨機曲防。在臨時酌量行之耳。此一役也。沿岸而行萬無一失。旣非有黑海開洋之險。又非有黃河遷徙之虞。居恆則兩路兼行。遇變則此或有滯緩。彼尚可來國計民生無便於此。下工部議。明神宗實錄

明神宗萬曆三十八年七月甲子河道總督劉士忠奏糧船六月初十日盡數過洪報聞。九月丁巳直隸巡按蘇惟霖疏陳黃泇利害。請專力於泇。其略言。黃河自清河縣經桃源北達直河口長二百四十里。此在泇下流。水平身廣極力推運舟止日行十里。然以別無所經故必用之。自直河口而上歷邳徐二州。達鎮口長二百八十餘里。是謂黃河。又一百二十里方抵夏鎮東自貓窩泇溝達夏鎮止長二百六十餘里。是謂泇河。東西相對舍此則彼。黃河水在三四月則淺與泇同。若正月初旬後洶流自天而下一步難行。又其水挾沙而來。河口日高一日。七月初輒淺涸十倍。無一時可繇者。繇之溺人損儲害甚劇。泇河一水安流歲修有例。旣無溺溜終鮮風波率而繇之計日可達。卽河身稍狹則水不若鋪灘而淺其貓窩諸淺亦不必浚。蓋自河流至則閘水積山泉之脈止有此數河身高則高受低則低受深淺相隨非云水深則深水淺則淺水之多寡不係河身深淺也。或有稍宜拓而浚者但得實心任事之河官嚴其稽覈因利乘便不三五年缺略悉補可成數百年之利。唯於泇下流諸口謹嚴防禁而夏鎮之呂公堂邳州之沂河口更甚庶所藉蒙獨諸泉汎泗濟諸流不至隨到隨涸伏乞敕下工部詳酌利害一意修泇以濟新運留中十月壬申朔工科給事中何士晉等言。運道最稱險阻人力難施者無如黃河。先年水出昭陽湖夏鎮以南。運道衝阻於是開泇之議始決入直河口經猫窩抵夏鎮長二百六十里較黃爲近避淺澗急溜二洪之險建閘置壩聚諸泉河之水以時啓閉用之六年通行無滯今歲忽有舍泇繇黃之議卒致倉皇。

損傷糧艘。且有淪溺以死者。費人工牽輓。有至大浮橋。以閼塞復還蘇泇者。以故今運抵灣甚遲。汲汲有  
守凍之虞。由此言之。黃之害大略可見。然泇亦未竟之功也。河面闊八丈。底闊三丈。深一丈三尺至一丈  
六尺不等。節年雖有增修。大槩止此。地近湖山。厚泉引水。易盈易涸。全藉人工深厚。使有容受瀦蓄之勢。  
若河身太隘。伏秋則山水暴漲。旱乾則枯竭無餘。非策也。謂宜挑廣浚深。令與會通。河相等。重運回空。往  
來不相礙。廻旋不相避。卽時有亢潤。地有高下。而水常充盈。舟無留滯。計歲捐水衡數萬金。督以廉能之  
吏。爲期三年。可以竣工。然後循落馬湖北岸。東達宿遷。大興畚鍤。盡避黃河之險。則泇河之事訖矣。或謂  
泉脈細微。太闊太深。水不能有。不知泇源遠自蒙沂。近挾徐塘許池文武諸泉。大率視濟寧泉河略相等。  
呂公堂口旣塞。則山東諸水總合全收。加以閘壩隄防。何憂不足。或謂直抵宿遷。此功迂而難竟。是又不  
然。夫昔年不估以二百六十萬乎。不慮山水暴漲。河水泛溢乎。不慮石硼山礓難鑿。沙淤奔潰乎。王市場  
不再築再圮乎。夫荒度誠難。不無錯愕。及任用得人。綜理有法。功成晏如此。難與衆人慮始也。然近日蘇  
黃之說。蓋因泇河二百六十里曠野新開。人跡荒涼。萬艘蟻泊。公私旅困。恐生意外之虞。且計徐州一大  
都會。貿遷化居者。一旦有折閱之恨。然此害之小者。唯是飭郵傳設機防。蘇之旣久。漸成樂郊。何必徐土。  
此亦破紛紜之一說也。不報。十一月丙午。巡按直隸御史畢懋康議。請修保定清河閘座。其略言。保定  
清河源發於滿城。抵府而南十里。則湯家口爲上閘。又十里許。則青陽爲下閘。順流而東。直抵天津。細遡

長流一帶舟楫由玉河而北亦入於天津又迎水面西三百里至紫濱三岔口其一派通定興易州等處一派通新安雄縣安州等處中流至府清苑完唐滿慶五處此皆舟楫所到之地小民獲利之所查二閘創建於成祖定鼎初補修於世廟三十九年日久頽弛今上之三十二年曾一議及以物力殫耗報罷臣詢之彼中士民咸謂此閘之興有五利焉夫陸地轉輸一牛車運米粟不過十石而人牛又自齎食復費十之一二今以淺船裝載二人撐之可運七八十石是淺船一可當牛車之十力半功倍其利一滿城完唐等縣所出類多木石柴炭天津河間等處又饒蘆葦鹽米南貨種種若河道流通商販往來農末相資有無相濟地方卽不幸而遭水旱之災猶可仰給鄰封不致束手待斃其利二此中居民類窳媿相習不復知有江南水利灌溉之事自去歲大旱今歲自春徂夏不雨閘壩決裂蓄洩無資若此閘誠修則濱水斥鹵可爲沃壤其利三嘗考京東密雲京北昌平自萬曆元年總督劉斯潔楊兆議建疏通潮白二河、陵泉諸水歲漕山東河南粟米二十萬石以贍密鎮歲漕江北粳米二十萬石以贍昌平兩鎮軍士從茲免於脫巾之虞今若比例通州空運之例自清河閘抵河間一帶多設閘座廣造剝船總其事於天津部屬歲於臨德兩倉粟米內漕二十萬石以給保定易州紫荆各關軍士卽有水旱之災可以不苦軍國用饒士馬騰飽其利四凡民可與樂成難與慮始矧年來物力空匱庫藏殫耗倘規模大闊庸衆駭聽莫若先建此閘二座石柱木橋二座以觀河道流通居民利涉商賈往來之效倘公私上下曉然知此役之興有

益無損有利無害然後次第議及空運之事他日足食足兵之政實始基之矣其利五章下部部覆除空運事隸戶部聽該部議覆外所稱修閘事鑿鑿可行宜着該管地方從長措處次第興工完日將用過夫匠物料工價進冊奏繳清冊送部查考施行報可

明神宗實錄

明神宗萬歷三十九年二月乙酉工部題覆總理河道右僉都御史劉士忠泇黃便宜疏言泇梁歷春而夏沂武京河山水衝發有沙淤潰決歲終當如南旺例修治其水將置何所乎勢不得不塞泇河壩令水復歸黃臣議每年三月初則開泇河壩令糧運官民船繇直河口而進以便利往至九月初則塞之每年九月初則開呂公壩入黃所以便回空與官民船往來至次年二月中則塞之半年由泇半年由黃此兩利之道也乃黃河四驛而泇止一驛甚屬不均今地方勢難加設惟四驛止應付半年頗爲空閒於內裁革一驛移至趙村以便供億又泇河通判相應移置萬家驛左右以便查閱修築通泇二百五十里設兩驛一巡檢司又置一府廳行見成聚成都官民船當赴之如歸誠一勞永逸之計報可四月壬申工部侍郎劉元霖御史蘇惟霖言泇河之在直隸者有貓窩一淺爲沂下流河廣沙深不可以閘最爲泇患今觀河沙口門兩讓箭許掘一月河洄流卽清宜於此下二里許仍西掘一月河以通沂口之月河凡水挾沙來河性直走有月河以分之則洄伏之處沙所必儲就此二里特加撈刷比歲修十五丈之河難易較然而泇患可減矣又邳宿同知所管左黃右泇歲費三萬兩貯邳久之弊滋移貯淮庫而關支往返耗廢

誤工議將此項經解總河收發附近藏積每季河官先期赴領便宜給發季有報歲有稽則費不虛而工早集矣依議行十一月辛酉工科給事中馬從龍言今歲阻凍皆以水涸爲辭當令管河衙門預爲挑淺其山東地方泉源預加疏浚留中明神宗實錄。

明神宗萬歷四十年六月庚辰以通惠河衝決奪指揮馬鴻功等俸三月仍行河臣嚴飭挑浚修築八月己丑河道總督劉士忠言泇黃並用每歲三月開直河口壩又彭家壩閉呂公堂壩俾汶泗諸泉之水蘇泇專行重運及袍服鮮貢等船至八月終則塞之每年九月開呂公堂壩閉彭直二壩俾諸泉河入黃以利回空及官民船至次年二月終則塞之半年蘇泇半年蘇黃相資兩利章下所司部覆如河臣言上是之明神宗實錄。

明神宗萬歷四十一年十一月戊午巡按直隸御史潘之祥言臣巡歷燕趙梁宋之區日視滹沱漳河之水洪流洶湧隄岸潰拆民居頽圯行旅蕭條臣心憂之已自大雄駕小艇入齊魯之境夾岸悲號愁聲滿耳則皆濱海之竈民爲海水所漂溺逃竄者也今朔風戒嚴祁寒怨咨災傷之民無衣無食野棲露處可爲寒心伏乞皇上垂憐賑恤不報明神宗實錄。

是年十一月內該帶管道漕撫陳薦檄郎中何慶元揚州道熊尙文開寶應縣宏濟河北月河一道長一百三十丈南月河一道長一百五十丈又建近湖西隄九淺七淺滾水石壩二座于明年工完。

按宏濟河南北二閘。每遇夏秋。淮水漲發。二閘不及吞吐。行舟覆溺。至是開挑月河。剏建滾水二壩。分殺河怒。水溜遂平。南河全考。

明神宗萬曆四十四年三月丙申。戶科給事中商周祚言。今歲漕糧除改折截留外。亦宜如期輸運。而水淺舟膠。大爲運梗。所需河臣料理。其勢倍切。乞速用總河大臣。仍促其星夜赴任。以理漕事。不報。五月己卯。巡漕御史朱培言。漕政一修浚泉湖。國家歲漕由江河抵邳。水常虞溢。由泇入閘。歷閘抵衛。水常虞涸。此其大較也。自夏鎮而北。別無運道。不過賴閘河以利涉耳。此河半屬枯澀。先臣宋禮築壩戴村。奪二汶入海之路。灌此成河。復導洙泗沂諸水以佐之。汶雖率衆流出全力以奉漕。然行遠而竭。已自難支。至南旺復分其四。以南迎淮。六以北赴衛。無崑崙之源。多尾閭之洩。能無疲於奔命哉。況此泉遇夏秋而漲。遇秋冬而涸。遇雨而漲。遇無雨卽夏秋亦涸。先臣逆慮其不可恃也。乃於沿岸陂澤如所謂昭陽、南旺、馬踏、蜀山、安山諸湖。設立斗門。名曰水櫃。漕河水漲。聽其溢而瀦之。湖漕河水消。決其蓄而注之。漕積泄有法。盜決有罪。夫然後旱澇俱有恃而無恐。無奈法久弛。湖多曠土。人遂垂涎其間。昭陽一湖。以作藩田。其餘諸湖。高亢處半爲勢豪占種。其最窪下者。或有行潦。閘壩坍塌。地勢淤淺。蓄得幾許。所謂溝澗之盈涸耳。曾何濟於運哉。而職司儕餉者。不過受事之初。督令修浚。下亦以空文應之。頃山東半年不雨。泉流幾斷。職按圖而索水櫃。管河府佐茫然也。乞敕總河撫臣躬親踏驗。凡係先年濟運各湖。清查歸官。陽

壩斗門亟時修築處處蓄滯有餘漕臣不至遇旱而束手矣從之十月丁巳巡漕御史梁州彥上漕河事宜一修治黃泇自泇渠告成歲避徐沛之險而不虞黃河之近廢不復修廷臣以爲漕利而不知漕終以此受病也年來一決狼矢再決三山復決塔山壁馬空沈此塞彼潰今歲狼矢又見告矣以淤流漲發高興隄齊俯瞰徐城如累卵決於南則靈睢爲壑而泇虞徑瀉決於北則以泇爲尾閭運隄宛在水中漕舟不能飛渡也爲今之計宜議經久使徐城不憂建翎泇岸不爲黃據或于徐靈一帶護城舊隄增卑培薄繕治堅完庶幾不逢其害或于直口遞北運道砌築隄岸迤西縷河而止此隄既成有裨牽輓兼足爲田廬屏障不然旋塞旋決民勞已甚且濁流歲齧泇底告淤將無泇矣一修治東省以北漕河漕艘過洪必按例具報而過此則否豈非以一入東省便可順流北趨耶乃如汝如濟如衛昨歲旣苦膠淺而今歲白河更甚矣謂宜覈泉河之舊址而勿爲豪右所侵疏衛河之淤塞而勿爲私閘所閉浚白河之壅沙而勿爲淺夫所冒破夏鎮以北其通行無礙乎明神宗實錄

萬曆四十五年七月帶管總河陳薦檄郎中李之藻督揚州府通判馮乘雲築黃浦閘下南岸一帶至射陽湖止長五十里其明年郎中徐待聘復督淮安府同知劉天惠築北岸一帶長五千九百七丈至次年告成南河全考

# 行水金鑑卷第一百三十

## 運河水

明神宗萬歷四十六年五月庚寅山東巡按畢懋康陳東省急務在通海運國初漕運由海後以漂沒爲虞始開會通河然河徙不定莫若修膠萊新河與會通表裏而行繇淮之六套口入海至麻灣口入河繇海倉口出海至天津約可一千四百餘里沿崖揚帆不涉大洋善風不數日可達非若河道之迂艱居恆則兩路並進遇梗則此滯彼來庶轉輸不匱亦國家無窮之利也五月庚子調山東驛傳道副使陶朗先爲登萊道副使總理海運九月辛丑工部題汶上等縣地方淤淺先期挑浚以便新運從之十月丁卯直隸巡按董元儒奏陳漕運六議一曰議建閘座濟寧以北自戴家灣閘至臨清磚閘相距三十餘里河勢陡瀉宜於適中狄家樓處建石閘一座而又於王家淺回龍橋諸處各建一座於鰲頭磯前另鑿月河立小閘以資蓄洩庶回瀉一倒水勢自平一曰疏浚白河天津至通州計五十九淺每年額派各州縣衛淺夫一千七百餘名費工食萬餘金宜將額派銀兩解通惠河衙門轉發管河通判及四總委處募僱募充役庶夫無虛冒年終各官聽部臣舉功而又編選旗軍分別三等以正丁領運以餘丁幫貼庶漕夫浚築自潞河以至津門畫地分工勿令衙役經手卽衛軍亦以此法行之查無浚築之功卽扣留月米僱募充役庶夫無虛冒年終各官聽部臣舉功而又編選旗軍分別三等以正丁領運以餘丁幫貼庶漕

運有裨。該部是其策。上命俱依擬行。有司怠玩從事的。各御史據實參處。十一月乙卯。浙江道御史江日彩陳。救時四務。國家轉漕東南。賴盈盈一水。萬一水涸運乾。或有如前盜據淮揚。臨德而扼其吭。且奈何。聞浙江海船、松江太倉沙船、淮安雕船。時至山東寧海買米。離山海關不遠。宜令南京近海州縣有糧米者。衛所厚僱前船。歲運四五萬石。熟其路逕。以爲有事之備。則海運之議宜講也。明神宗實錄

明神宗萬曆四十七年五月己亥。總督倉場戶部尙書張問達言。邊氛猖獗日甚。運船轉輸可虞。謹擬沿途防護。京通起剝事宜。以固根本。稱漕糧四百萬石。由江淮達泇黃。由泇黃抵津墳。風濤阻險。與陽侯河伯爭權。萬一防護疎虞。起剝濡滯。致生他變。軍國可憂。乞嚴檄所司照先年水涸漕遲例。多僱民船幫運。其應得腳價。卽于通濟庫見行給支。不許短直。小民唯利是趨。自當樂從應募。而又嚴督淺夫隨時挑浚。務使河渠深廣。船不留行。庶於漕政有裨。奉旨。漕運關係匪輕。況今邊警戒嚴。護衛尤宜加謹。其防守加剝及支運等事。俱依擬着實舉行。應另議者。着再議具奏。明神宗實錄

是年八月。總河侍郎王佐檄行郎中徐待聘修高郵西門審港口起迤南石工五百九十八丈。於天啓元年六月築完其半。徐候另詳興舉。十月江都三汊河淤三百二十三丈。界首鎮南淤三百五丈。鎮北淤三百二十二丈。梗阻重運。郎中徐待聘嚴督官夫挑濬。糧運稱利。南河全考

明神宗萬曆四十八年三月癸未。工部覆巡漕御史毛一鷺所陳漕河三事。一。泇河之完工當議。謂漕運

河道前此惟治黃爲急。自泇河開而糧艘避險即安。真永賴之利也。唯是初浚尙多潦略。河身不無淺狹。至于崖岸衝缺。牽輓難前。則疏浚補葺之功皆不可已。泇河三百里內屬夏鎮者有閘九座。屬中河者止藉草壩。逐年費且不貲。而分司官亦有以直口等處建閘之議。又經漕臣參酌。以爲當及時修舉。須移咨總河臣及劄行管河司官。并前淺狹去處。委官覆勘。估費若干。動支何項錢糧。酌議詳妥。至如落馬湖之修砌隄岸。在漕臣亦以爲功頗浩繁似。當從緩酌議。一水櫃之清查當議。謂漕渠若濟寧等處去歲遇旱阻淺。運舟稽遲。蓋以一衣帶水涸可立待耳。先朝尚書宋禮曾於汶上東平濟寧沛縣有湖處所設立水櫃。可蓄可洩。河漲而洩。則水勢可殺。河涸而放。則涓流可濟。誠使計也。乃歲月既久。滄桑已變。豪右旣擅爲耕藝之常。官司復利其租稅之入。遂至不可問。亦不肯問矣。漕臣建議。欲得任怨任勞之人。擔當清查。循故道而復舊規。於以濟漕河之窮。誠爲有見。應敕總河臣嚴督各司道并力查復。勿阻於雌黃之浮言。務求臻黑白之實效。效則破格優處。不則無功議罰。一衛河之疏浚當議。謂衛河乃小灘運道。益以漳流始大。自漳河北徙。遂多壅遏之患。曾經道臣翟師雍查勘。欲於臨漳淤口起至小灘鎮止。約長二百餘里。大加挑浚。於近口處所築一橫隄。以障北流。使歸故道。然費至萬金。工亦非易。且大名臨清亦有受漳流之患者。似難輕議。唯小丹河自清化鎮起至合河鎮止。水流回以濟運。議欲挑濬深闊。費僅千金。較之障漳北流。爲力甚易。爲費甚省。宜敕總河臣行委山東河南兩道臣會議舉行。而處辦錢糧。則聽總河主持。

上命俱依議行。明神宗實錄

明光宗泰昌元年八月二十三日戊辰。颶風壞海運船。御史陳王庭疏議酌處。先是七月初。海運船開洋至馬頭觜。以風不便停泊。數日時聞海鳴。如金戈鐵馬之聲。百里間黑氣糾連天海。彷彿中見有物隱顯。搏擊波濤。潑天所泊糧船盡行拍碎。及查傷登屬運船八十五隻。僅完二十二隻。漂沒糧米二萬五千八百六十四石有奇。萊屬傷船一十六隻。漂沒糧米一萬三千八百一十石。水手溺死者無算。於是巡撫御史陳王庭具題。請敕該部將山東明歲應運糧數。從長酌處勘覆。其漂失糧米船隻。用過價費。行該道查明。造冊報部作正開銷。溺死人數酌量議卹。明光宗實錄

泰昌元年十一月己亥。熹宗已登極矣。工部覆總理河道侍郎王佐疏言。水匱濟用爲其汪洋瀦水。河身深下。而堤岸完固也。今計蜀山馬場、馬踏、南旺各湖界址既明。侵盜已復矣。昭陽一湖舊河盡廢。新河反低無容糜金錢以加修濬。獨安山湖延袤頗廣。向以三十八里爲水櫃。而歲月久遠。法弛弊生。故河臣復豪強之侵佔。濬河身之淤澱。并原額而廣之。共五十五里有奇。以至於隄外湖池俱清丈明白。額徵租銀。是目前之水誠可以利達漕舟矣。若夫歲修當固界限當定示禁當嚴。必須通計各湖歲加修浚。俟年終類奏而治河等官仍以水櫃之興廢分別殿最。著爲永利可也。上是之。十二月癸亥。工部覆總理河道侍郎王佐疏言。北河通漕專藉衛水。然上源未暢。則下流必壅。今漳河已徙。衛流已塞。獨有挽漳而引沁闢丹。

三策而已。顧漳水東下之處勢竟及泉挑浚難施未易挽也。若沁水之闢新汲一帶地方郵署相連廬舍鱗次必闢渠以受沁此地不爲丘墟乎。丹水湧溢雖勢與沁同然丹口旣闢則修武而下皆成安流此闢丹之議無容再計者其條列展河砌閘築堰平租示禁僱役動支經費各款河臣籌計不遺餘力循而行之可垂永利惟是河徙不常闢丹不無再阻則挽漳引沁不妨並存其議以待異日講求上然之明熹宗實錄

明熹宗天啓元年正月戊子戶科左給事中韋蕃條奏足餉六事并議通海運開膠河章下所司二月乙丑海運遭風遣山東撫臣及薊遼等處道臣致祭海神閏二月甲申巡按直隸御史張新詔言考通惠河卽元郭守敬所修故道國朝平江伯陳銳疏通之運船直達大通橋下彼時勢豪欲尅取腳價壞其事後因御史吳仲言乃命郎中何棟吳嗣忠仍濬裏河計費纔七千兩所省腳價十二萬此繇通州至大通橋省費之大較也若由大通橋至朝陽門尙有三里許其地平行闊曠有掘就河身現在倘導玉河之水稍迥而北至朝陽門量建閘座及剝船若干隻糧運到時徑于門下上車似爲便計蓋會典開載車戶腳價自大通橋至東倉每石銀一分六釐近又議加三釐至西倉銀二分三釐若復省路三里許則東倉腳價可減十之六七西倉腳價可減十之三四互而計之總減一半每歲京糧以二百六十萬爲率即可省腳價二萬六千餘兩彼從通州至大通橋凡四十里止費銀七千此三里許之地能費幾何卽除挑濬外建閘造船等費只消一年腳價之半便已寬然有餘一歲之後每歲省銀二萬六千以三十年之通計

遂得七八十萬入太倉矣。詔部議覆。十月辛巳。濬京城壕成。自東便、朝陽、東直、安定、德勝、西直、阜城、西便、正陽九門及重城共用夫一百五十萬八百九十名匠一千二百八十九名班軍積日三萬三千十二名費水衡銀六萬一千六百二十九兩。司農銀一千七百三十二兩米三千三百一石諸椿木灰磚繩斗百物及運價咸具而鍊鏹以歸盔甲廠收爲甲械之需。監工科道魏大中等因言壕之源出玉泉山徑高梁橋抵都城西北而派爲二。一循城之左而東而南。一循城之右而南而東。宜按舊閘爲地形高下次第布之未可以丈尺槩也。德勝門之水南入關周行大內出玉河近且北淤南壅而嘉靖庚戌所築重城地勢既高有掘未及泉而止者俟異日清其源審其勢疏其脈達其支以總匯於大通橋又須理葺諸閘節宣蓄洩以莊金湯而固風氣下工部丁亥授加銜都司黃允思都司僉書先是天津由北岸抵遼運道未有行者。自允思始開之嗣後歲可四五運遼餉因之不乏又督發水兵出海積有勞勳督餉戶部侍郎李長庚薦於朝請加實授從之。明熹宗實錄

是年黃淮漲溢決裏河王公祠外河十餘口淮安知府宋統殷山陽知縣練國事力塞王公祠明史稿

是年六月霖雨不止裏河隄岸衝倒水由二鋪灌入三城平地深一丈淮安府志

是年大水隄決九里北高郵州志

明熹宗天啓二年三月庚申工部尙書王佐題覆漕臣余合中疏飭漕政三款一漕之難難在淺澗舟行

遲速可以定地方殿最。今後務盡力挑濬管河都司總其成。沿河州縣分其任。隨淤隨濬。必期深土必遠。運無使復歸於河。以滋淺阻。違者以曠職參論。詔如議。六月辛未。刑科給事中傅繼言六策。一防隄堰。徐淮水高地下。民居如在釜底。萬一隄決。遂成魚鼈之宮。有司急行修築。以戒不虞。下部俱如議。乙亥妖賊陷夏鎮。河道總督陳道亨告急。請亟調鄰近省直官兵兼留援遼粵兵以護漕運。仍速下山東撫按二臣增兵加餉。上許。留粵兵三千以護運道。其添兵著該部卽議覆。道亨字孟起。新建人。萬曆十四年進士。光宗立。進工部右侍郎。總理河道。拜南京兵部尙書。七月庚子。差工部屯田司主事陸之祺管會通河。十二月戊子。督理遼飼戶部右侍郎畢自嚴言。朝鮮運道險遠。登萊假途便捷。乞速行該撫按轉行道府。及時措置海運事宜。章下該部。明熹宗實錄

是年四月。寶應西隄風浪衝卸。一淺等處石工六百餘丈。臣國盛督令河官整石補砌。加培土隄。盡塞低陷漏穴。本年十月工竣。是年興化知縣邊之靖。請修丁溪草堰、小海、白駒、劉莊攔潮五閘。并呈巡鹽御史房可壯。允發鹽餉修建。至明年湖河大漲。百川沸騰。匯流入海。海潮突高數尺。賴諸閘堵禦。而潮無內灌。河流亦迅駛入海。民田禾麥得以有秋。按高寶等處上河一帶。河隄閘洞及旁溢之水。俱由興化五場入海。若海口無閘以攔之。則潮入而河水壅阻。今建閘堵禦。潮退水洩。無泛濫渰田之患。更於每閘令場官僉百長保長二人著守。又于海邊修築舊壩十道。俱可通河禦水。復禁奸民盜壩行。

舟而場官依時啓閉嚴加防範俾水有所束而五閘亦得永久云。

南河全考

明熹宗天啓三年正月戊申督理遼餉戶部左侍郎畢自嚴以守備陳良策議改朝鮮運道於登萊因上疏極言其便言朝鮮海運必論道里之遠近覈地勢之險夷較腳價之省費計糧料之貴賤察事理之難易而後可從事今以天津與登州相提而論朝鮮運務必由津海抵登而後入鮮在登較近一千五百里是遠近不敵也由津抵登中多礪石及鐵板以觸舟立碎卽如今秋運甫至霑化卽損船十餘隻糧料千石若由登運此禍可免是險夷不敵也由津入鮮以登州爲半途天津登運每石腳價四錢若改登州便可減半給發是省廢不敵也津門逼近京師仰給截漕其餘糧料價頗騰翔登萊米豆皆無措處小民習用市斗每斗視津斛斗兩倍而贏之是貴賤不敵也登州陸續發運一年可二三次津門路遙以極西抵極東歲僅一次是難易又不敵也良策登運之說無煩再計但恐登以無船爲解及查運船有官民二種官船原用官錢自造計難猝至民船實貪腳價前來一呼可集再有不足卽於津門南船量行撥給上命戶部議登萊巡撫袁可立上疏爭之章下戶部併議戶部署部事左侍郎陳邦瞻覆言非便遂不果行二月丙子南京江西道御史陳必謙陳安攘六事一河上各閘河夫名存實亡宜清扣工食貯庫類解充餉十月癸亥差工部都水司員外郎吳昌期管理中河

明熹宗實錄

是年秋外河復決數口尋塞建清口磯觜築高郵中隄及露筋祠湖口石隄濬界首北淤沙其冬濬永

濟新河。自凌雲翼開是河未幾而閉。總河都御史劉士忠嘗開壩以濟運。已復塞。而淮安正河三十年未浚。故議先挑新河。俾運船回空由之。乃濬正河。自許家閘至惠濟祠。長千四百餘丈。復建通濟月河。小閘。運船皆由正河。新河復閉。時王家集、磨兒莊、湍溜日甚。漕儲參政朱國盛謀改濬一河。以爲漕計。令同知宋士中自泇口迤東抵宿遷陳溝口。復汎駱馬湖。上至馬頰河。往迴相度。乃議開馬家洲。且疏馬頰河口淤塞。上接泇流。下避劉口之險。又疏三汊河流沙十三里。開滔莊河百餘丈。浚深小河二十里。開王能莊二十里。以通駱馬湖口。築塞張家等溝數十道。以束水歸漕。計河五十七里。名通濟新河。五年四月工成。糧運從新河無劉口、磨兒莊諸險之患。明年總河侍郎李從心開陳溝地十里。以竟前工。明史稿

通濟新河卽駱馬湖也。時王家集、磨莊等七十里。有十三大溜阻運。漕儲道朱國盛、行邵宿同知宋士中詳勘議于董陳二口。入駱馬湖抵泇六十里。遂從馬頰口至陳家溝達宿遷縣北。西出大河。以上接泇流。下避劉口等險。運道比舊爲近捷而坦便。江南通志

高郵中隄長瓦四十餘里。歲久不修。每遇夏秋水漲。隄力不支。農田被潦。先惟塞南北金門二閘以爲障。而船由外湖以行。時遭覆溺。且以築壩擾民。天啓三年。臣國盛位任。清出揚屬曠夫銀八百兩。因會揚州海道郭士望。呈詳總河房公壯麗漕撫呂公兆熊修築之計。長六百四十四丈。前銀不足。佐以公

帑酌其緩急分年砌之其險工已完隄下田廬亦可恃以無恐矣。八月界首運河迤北一帶當高寶接界處河身仍淤水且涸先是市猾雍愛輩擅淺剝之利故雖屢經撈濬而無功至是悉置於理而令高寶河官于淺澗處先築草壩使得束水衝刷復加撈濬而重運無梗。九月修築露筋廟湖口石隄長一百六十丈俱從水中壘土砌隄工程堅鉅至四年十一月工完先是邵伯湖游浪一遇西風大作鼓浪拍隄行舟往往觸石覆溺臣國盛惻然憫之先於二月呈詳行委高江二處河官運土實基外砌磚石內用椿板隄外復栽茭柳以禦驚濤一切工料俱係設處夫曠并請部院賊罰以成之不動官帑。十一月會呈河漕部院詳允挑濬新河淤淺自楊家廟至文華寺止長七百一十七丈四閱月工完放水以行回空。按萬曆初年重運由清江出口稱艱漕撫凌雲翼開新河七十里自楊家廟至文華寺止行運一年而以部稅旋閉三十九年總河劉士忠開壩濟運一年復塞而淮安正河三十年來未挑故議先挑新河內有久湮荒涸者照段分挑深闊回空等船經行無阻。南河全考

天啓四年二月會挑淮安正河自許家閘至惠濟祠止長一千四百一十六丈八尺復堵許家閘埽工十餘丈建通濟月河小閘一座俱于四月工完漕船仍由正河新河復壩閉塞。按淮安正河年久不挑河夫雖冒領工食竟無實加勞濬者至是大淤臣國盛會同淮海道宋統殷拘集夫頭而庭詰之欲按工勘視諸夫伏辜遂革前季內工食一千一百五十兩貯庫會詳先開新河通回空次挑正河以行

重運。九月會築淮安包家園洋信港淮城護隄。磚石工長一千六百丈於十一月報竣。時物料夫匠先行齊備。故奏不日之工。按淮郡當漕輶輜輶之地。商賈畢集。而城堞如在釜底。惟恃一線土隄。禦淮黃諸湖滔天之勢。每年加埽護隄。包土塞城。人民惴惴焉。魚鼈是懼。臣國盛先於上年會詳漕河兩院預備物料。分調夫匠。是以工成最速。其詳具載記中。六月徐州黃水大漲。內灌州城。是時水由夜發平地丈餘。徐民若干渰溺。遂有遷城之議。南河全考

明熹宗天啓五年二月丙午。南工科給事中徐憲卿等以東南歲荒米貴條陳五款。一開瓜儀二閘。以通咽喉之地。命著實行。七月己巳。舊時小灘兌運。設有監兌都司。自裁革之後。督以糧道。顧河南糧道與東省衛弁原無統轄。往往跋扈咆哮。不受約束。巡撫河南都御史楊方盛以爲言。請將灘運移屬臨清道。俾督率本屬武弁。便於彈壓。其小灘舊有大名道公署一所。乞稍加修葺。以爲臨清道駐節之地。從之。

熹宗實錄

明熹宗天啓六年六月乙亥。河道總督李從心奏。我國家定鼎燕冀。歲運漕糈四百萬石。藉此運河一線轉輸。在邳以南。則資淮黃二水。在臨清以北。則資漳衛洹淇滏陽諸水。在直口至臨清。延袤八百餘里。則資汶泗沂沂。挾各州縣諸泉水灌濟。以達京通。關係最重。職二月謁陵行河。經宿遷崔淺劉口磨兒莊等處。中河分司趙濂及府州縣官稱。連年運船到此。一船挽拽夫以百計。一夫工食動以數錢。窮旗典鬻以

償官夫人力與水勢爭衡籬纜中斷前船橫下後船互相磕撞官儲民命須臾歸之逝波風激浪高竟日不能移一舟前阻後壓千艘俱皆等待各官會議要自馬頰口起下至陳瑤溝止計程六十七里另挑一河於靈睢宿桃邳五州縣募夫七千二百名協力併作或以濬兼築則計河工不計堤工或以築兼濬則計隄工不計河工或因勢順導或改曲從直河底沙礓用鋤鑿開使深水中隄下以船載土壘築使高隄之殘缺者加修河之沙淤者加濬陳溝十里平地濬與築兼舉計挑生河長一千九百一十八丈築木墩水占隄長二百八十丈又兩頭坍塌隄長四十五丈西岸平地築隄長一百八十丈王能莊前後雙河尾築隄長一百丈幫築殘隄長七百四十二丈濬深淺河長二千二百四十丈其根頂口底俱照覆估丈尺于五月初十全完從此運船改由陳口諸溜遠近公私幫拽之費可省漂蕩磕撞之虞以杜風波不能爲之阻而各船衝尾直進可以計日計程無復耽延阻壓之苦擇吉開龍門放水行舟直抵黃淮之河旱澇可無虞矣得旨是乙酉巡按直隸御史徐卿伯疏言運道所經每各有湖貯水以備旱涸故民間呼爲水櫃如汶上之南旺蜀山馬踏東平之安山濟寧之馬場沛縣之昭陽諸湖是也而丹陽有所謂練湖者周廣四十里納長山諸水八十四流爲石閘者七木函者十有六國家東南財賦浮運而北遇涸則啓閉以濟近湖民田數百頃遇旱則啓函以資灌溉夫何近年以來鄉宦人家侵者侵占者占遂舉此湖之制蕩然不可問所規者近所失者遠伏乞嚴敕諸臣留心治河至如練河有爲豪強占據者速請還官仍追

租正法得旨。運道淤淺。管河各官自當及時挑濬。練河蓄水備旱。豈容豪強侵占。著作速清查還官。追贓正法。戊子山東道御史袁鯨題頃見巡漕御史徐卿伯疏言。丹陽練湖水利被豪勢侵占。業奉旨清查還官。還租正法矣。第臣原丹陽令也。佃田抵餉。臣任內事也。丹陽舟車湊集之地。疲苦特甚。每年額編遼餉一萬一千二十六兩九錢二分。旣歲征不缺而已。難堪命矣。臣查上下練湖二處。上練湖延袤數十里。先年建閘瀦水。以防冬涸。後改春運。水盈無所須閘。以十之六七瀦水。以十之二三爲田。亦天地自然之利也。沿岸一帶陸續詳佃。共得八千三百一十三畝。每畝上田納價一兩。中者八錢。前後共得七千五百二兩六錢一分。後復搜括湖稅等銀三千五百二十四兩。共湊抵三年分額餉一萬一千有奇。毫未加派于民。每年所得租銀於本驛加馬四匹加支。應銀三百兩。請立循環簿。不許妄入公費。此練湖成田之始末也。自臣離任之後。聞水利蕩然非舊。乞將豪強倚勢無帖侵占者盡數追租正法。而居民帖內正佃者。令繳帖還官。抑或免繳加價。以助大工。俱非臣愚所敢擅議也。得旨。這豪強侵占者著遵前旨還官正法。小民繳銀給帖承佃的。仍著計畝加價助工。七月乙酉。以清口發水糧船速濟。加封河神護國濟運龍王通濟元帥。從總漕蘇茂相請也。舊說云。清口發水者。清水能刷黃也。不知治水之道。而徒詔媚於鬼神。且不遵祖制。妄加神號。德陵君臣。何不學無術至此。甲午戶部尚書郭允厚奏。漕糧以至壩爲實數。以進倉爲安堵。故往歲秋月必盡數償輸。自二年阻於妖賊。始不得依期前進。然其守凍者。纔三十餘萬耳。三年則有八十餘萬。四年則一百餘萬。而五年又且一百三十餘

萬矣今歲運河阻塞不常濡滯已極據今報實數進倉者僅得四十餘萬比往歲又少其半矣萬一寒風乍起河冰頓合則此二百萬漕糧勢必凍阻彼浩渺寥廓之地一切疎虞豈待問哉伏乞敕下經營地方衙門設法疏通及期償運其抵壩者行河西務鈔關速輸進倉不得抵壩者暫貯露圃仍令該道臣嚴法守護俟來春凍解輸運從之九月甲申巡漕御史徐卿伯奏運道歷淮安而上黃河水多而泥半之惟是淮流猛汛衝去泥沙不致壅塞故謂之以淮刷黃運道賴以無阻夫何入夏以來北地苦雨淮泗苦旱於是黃水暴漲淮流淺涸河身日高淮勢日弱而黃河竟以淮爲壑矣稽之父老皆以黃河倒灌爲患叵測今漕運難前勢在危迫但有撈淺起剝二義乞敕諸臣應動何項錢糧卽著就便支給刻期舉事工科給事中郭興治亦以爲言得旨撈淺起剝着漕河二臣相機料理以無誤運務明熹宗實錄

明熹宗天啓七年正月丙申河道總督李從心言三王舟行挑濬工程已畢但濟寧以北諸閘所以蓄養水力恐三王隨從人役不知規例擅自開閘或帶板而行或後水不繼船必淺閣速而反遲矣得旨據廠臣約束嚴明解銀內臣安靜不擾築壩挑河工程已畢三王行舟可以無滯朕心嘉悅設閘啓閉關係漕規隨從員役自應遵守恃強違擾的准指名參處二月壬子工部覆隄工查勘已明得旨覽奏河歸正脈大小諸臣拮据之勞祖陵運道實嘉賴之然聞淤塞尙多未盡疏濬卽今重糧尙阻回空猶滯藩舟國計朕與廠臣尙深軫慮還行河臣用心料理候王舟過日委無停淺去年漕事一切報竣方行敍賚以酬

勞績。五月甲申。總督漕運戶部右侍郎郭尙友題報。回空糧船盡數過淮過淮。得旨。今歲凍阻既多。又兼王舟鱗集。覽回空糧船過淮日期較往年倍早。這本說廠臣慮殫儲精計周。軍國補偏救敝。見今京通紅腐之積。朕所鑒知。兩內臣協力同心。分督淮濟勤勞可嘉。自總河以下有功大小諸臣都與紀錄。以後各省直督糧道臣照本內派定地方各押糧船盡數送訖。方許回任。其遲早完欠分別敍錄參處務要挽遲爲速。以濟國儲。七月丙子。總督漕河崔文昇報修築隄工得旨。漕糧轉輸全在河流順軌。這駱馬湖新隄初成。兼暑雨淹浸淺阻可虞。該監體廠臣綱繆徹桑至意多方設法。船行無礙。忠勞可嘉。其俟守凍空船裝糧到淮。親詣湖隄相度形勢。爲修築之計。待秋深水落卽勘估急修。以圖久遠。八月癸卯。總督漕河崔文昇題修築隄工事得旨。覽奏。河決由于隄薄。秋深相度地勢起工務爲一勞永逸。說是駱馬湖沙土難築。邳土堅凝。預督淺夫開掘。俟回空糧船帶取委屬可行。地方正官管河官有推諉耽閣回空船的。參來處治。還著總河衙門通行速舉。有衝決處。督河官勒限堵塞。其未完工的。刻期作竣。庶無誤運艘。以稱廠臣通漕速運綱繆徹桑至意。

明熹宗實錄



# 行水金鑑卷第一百三十一

## 運河水

愍帝已即位矣。

天啓七年十一月壬辰，中書舍人李不伐疏訟故兵部尙書李化龍開泇之功，言其議開泇也。廟廊之議紛如，臣叔化龍一力擔當于上，郎中梅守相以勤劬拮据于下，決百年未定之議于一旦，以二十萬之估省三四百萬之金錢，以二百六十里之安流代二百六十里之險道，不半年而錫圭告成，所謂計便一時，永賴百世者也。至今未蒙錄敍，懇乞皇上敕下所司核實覆奏，庶勞臣之功不至湮沒，從之。十二月乙巳，海運糧艘抵南海口，以不卽起駁致驟風壞船二十四隻，失米一萬一千餘石，戶部請議處各員役從之。戊申，直隸巡按何可及以漕運事竣疏陳四事：一催空船，一速兌運，一查河道，一查限單下所司。  
崇禎長編

崇禎元年正月癸未，戶部題覆巡按直隸監察御史何可及轉運告成疏言：河道通塞，漕運遲滯所關，祖宗設有總河專理于上，部道府佐諸臣分理于下，誠重之也。但以地遠界分，遂爾心力不協，致河道淤塞，絳路殘缺，如馬湖之決黃河之溜，可爲永鑒。河臣原以治河當漕糧盛行之時，正河臣盡職之日，所宜止宿河干，使洪夫、閘夫、溜夫、淺夫，一一各効其力，無敢偷安。而後金錢得以實用，卽於漕運可無

阻滯報可。二月丙午，敍開泇河功，磨故兵部尙書李化龍子中書舍人。三月甲申，巡倉御史李遵以倉差新復疏陳二弊四宜。一曰河道宜濬，遇有淺阻，河官親詣河干，督同閘官先期挑濬。二曰漂沒宜稽，在內地不許輕給印烙，在海運不許輕雜流，方可稽查實數從之。八月乙巳，戶科給事中張承詔言，漕運稽遲，請改巡漕御史爲大差，待兩運告竣，方許報命旨以償運官改差兩年，未協祖制。今後巡漕御史自九月內具題，卽赴通濟到任，一面督催回空，隨卸隨發，一面移文各省直州縣，趁禾稼初收，民力充裕之日，將本年應解漕糧盡征在倉來春正月以內悉行起兌，務漸復祖宗朝三月過淮舊制，應行未盡事宜，漕臣奉命之日，悉心條奏，各司道州縣官有奉行怠玩及該管河道官不先行修濬，致稽重運者，許不時參奏處治。俟明歲運完，果無凍阻，紀錄示優，永爲定例。丙辰，原任吏部文選司主事沈景初爲父南京吏部尙書沈應文請卹典。應文餘姚人，隆慶元年進士，由推官歷藩臬府尹、刑部尙書，署工部時，通惠河決，噶陵梗運，委曲協濟，河臣得以奏功，後起南吏部，以疾辭卒，年八十有三。

十月甲寅，總理河道侍郎李若星報過洪漕船六千七百七十一隻，運糧除南京截留外，凡三百四萬六千五百二石二斗零。十一月壬戌，封護漕河神張六五爲靈應英濟侯。崇禎長編 菲菴云

按此封典爲溢號。

崇禎二年五月丙午，禮部左侍郎羅喻議等疏言，前大學士張居正作相之日，其限防陵運則請開泇河，開衛河、膠河，復練河築石土隄，修減水各閘壩計八百餘里，核省工價十四萬。崇禎長編

崇禎三年五月丙午廣西道御史劉士禎上言查運河自密雲直達天津實爲京東天塹但由津至通二百餘里由通至密一百三十餘里中間水勢高下參差淺深不一遂未能槩限戎馬而我無可恃耳今誠興工浚築于上水挑濬使深築壘以壅其下流使三百餘里河水俱深丈餘人馬卽難飛渡或五里或十里或數十里隨勢高卑建閘蓄水每閘內又量地遠近爲分兵之多寡設船以作遊兵船之兩傍各開破眼增以遮牌船內實以火器擇船軍士俱擇習練火器者充之俾借船爲城因河爲塹用火器以及遠既可以阻戎馬長驅而糧運無虞戰守有地非特神京永無薄城之憂而密雲通津咸可聯爲臂指仗爲犄角是誠今日急著也或謂此時徵調已空挑濬之役派軍難而騷民亦未易也不知通州以下戶部原有空運夫各州縣原有淺夫通州以上尙有欽依把總領軍八百駐牛欄山以供挑濬今誠用空運之夫役牛欄之卒加以省直班軍而又移中東二協修工班軍之行糧鹽菜以給之量加犒賞以爲鼓舞軍固不煩調募糧亦不必多增而事可舉矣然責任不專則推卸易課督無法則收效難今密雲有裨將通州有大將天津有額兵額將沿途又有援兵援將若畫地分工責之各裨將使擇諸軍之強者磨勵以待敵弱者荷鋤以治河而統提衡于通州一大將又令原設河廳往來巡督淺夫州縣同心協濟總責成于地方之撫按廉其勤惰而黜陟賞罰行焉數月即可報竣秋防庶幾有賴矣章下部議覆上帝命分任責成仍嚴限報竣直隸巡按董羽宸上疏爭之曰通州上下一河若帶誠神

京左臂第一重扼塞也臺臣建議欲挑河堆土因高就深使東顧有天塹之形擊騎無衝突之患臣躊躇終日有不能必其決成者謹按京左漕河發源塞外匯萬山泉源以入密鎮又從頑石溜沙以抵潞河自密至通州計二百四十餘里爲淺五十九則純沙無土沙之挑積岸際者皆浮盈靡漫日炙風吹乾如細麪若游塵揚于空中復飄水底旋淤旋空且時際亢陽涓滴一溜驟遇霖雨浩淼無涯甚而河道改徙平陸成淵通流倏涸向名自在流沙此地勢然也祖制自密而下戶部空運差轄之由通而下工部通惠差疏之止能因勢利導未聞有開掘丈許之深堆土數尺之高者非謀不出此勢不能也今以五六百里之長渠當千萬糧艘之湧至河流既不可堰雨涸又不可期畚鍤諸夫何處著脚加以額設空運夫淺夫但可併力空淺不能處處興工部覆謂用力既倍于平時工食豈沿于常格淺夫議增漕餉省直班軍胥令其竭蹶以從不知漕餉見在不敷何術增設省直班軍修邊正急何得撤外障以事內濠況今郡邑初復自各城濠以及關牆堡屯延綿數千里秋防轉眼撫道拮据不遑顧安得置此急務而皇于旦暮莫效之功哉漕河一帶軍國命脈攸關目前宜嚴責河職極力濬空淺阻必罪勿宥不言高深而高深自在其中其密通挑濬雖奉有分任責成之旨然熟察時勢恐未易按程而責也倘徒勞人力徒費金錢濬之終不成深堆之終不成高異日皇上責諸臣之不用命地方撫按自無所辭而糜去金錢已不可返臣今日安得默默而處此乞敕所司再加酌議直截條奏若以成命難回乞

敕臺臣親行踏勘與撫院道部確商可否以取進止。

崇禎長編稿

是年淮安蘇家觜新溝大壩並決沒山鹽高泰民田。

明史稿

崇禎四年八月戊午河道總督朱光祚以江南連月大雨淮黃驟漲高郵寶應江都儀真山陽清河六州縣大水泛溢害及陵寢漕運具疏奏聞并陳疏濬障隄大略帝以修築疏濬事宜俱命朱光祚率屬籌度力行十月辛丑直隸巡按饒京疏奏江南水利以河漕爲先而灌田次之漕河之水利以鎮江之丹徒丹陽爲先而他邑次之何也長江之水自京口分入鎮江爲運河河水歷丹徒九十里達丹陽又九十里達常州之武進由無錫以及蘇州之吳江而通于浙凡浙之運船與松蘇常之運船總由此河溯流而上達京口以出江此河乃運船之孔道也然地形有高下而水勢亂流有若建瓴易洩易涸南去數百里皆無水源而冬春幾成陸地臣嘗聞丹陽有上下二練湖蓄其水可以濟運河之窮而利漕艘之涉臣於七月杪出巡丹陽卽爲詢訪親歷其地見其汪洋浩瀚無異于汝上之南旺東平之安山濟寧之馬場沛縣之昭陽等湖是天于無水處生此湖以貯水濟運非等閒也臣考練湖又名練塘仰受長山驪山八十四溪之水匯而爲湖卽古之曲汲湖也他不具論卽以本朝言之洪武三十四年太祖命鎮江知府劉辰重修練湖以丹陽令周復昌董其事始塞上湖三斗門一石礮引水入下湖塞二石礮理廢礮之石先修中斗門次修下斗門最後上斗門隨湖勢崇卑板爲五級以洩水歷一年餘

功乃成。正統中令耆民築梗植櫛修東埂二斗門成化宏治中復修斗門至嘉靖中丹陽知縣李道學復修治之另開運河引水入漕蓋上練湖在丹徒高下湖數尺而下練湖卽仰流焉下練湖在丹陽高運河數尺而運河卽承流焉勢亦若建瓴上練湖中埂有石閘三座蓄水以濟下湖之涸下湖亦有石閘三座蓄水以待運河之涸水出丹陽防其下洩又于水之下流離丹陽四十里地名呂城有石閘一座過呂城二十里名奔牛亦有石閘一座以護其外水滿又恐上洩又于水之上流京口有石閘二座前人之制可謂甚備亦總爲此運船計耳迨至萬歷年間漕船移爲夏秋之運不苦無水所以每年兩湖棄置空曠之地變爲桑田上下之石閘與奔牛呂城京口之石閘俱成虛設矣然而閱其故址固宛然星列也今漕規已復起運在冬每苦無水奈何不復修祖宗舊政而乃勞民費財臨時挑濬將無已時也則臣得倡言曰二湖之水當蓄而旣壞之諸閘當理也閘能止水而涵洞爲尾閭之洩傍湖之馬林上新等處十三涵洞當議也湖水蓄而臨期不過一啓閉之勞浙直漕船可無遲悞之慮而數萬生民每年無浚掘之苦真天地生成水利古今獨擅勝場修容可緩乎或謂棄置已久一旦復修未免廣費金錢臣聞浙直有協濟鎮江修河銀鎮江府庫貯在外省國家頻年之冒破勞民一載而可省百姓每歲之咨嗟正所謂一勞永逸暫費永寧者也惟聖明採納焉上謂所奏深於漕務有裨所司確議以

是年夏雨五六尺。隄決南北共三百餘丈。南門吊橋閘崩。城市行舟。人多溺死。

高郵州志

崇禎五年十一月丙辰。直隸巡按趙振業疏奏。河道與漕運相表裏。漕之遲。速以河之安危。河有安流。斯漕無滯艘。則治河正所以理漕也。臣於查歷河南河道後。卽馳至張秋。遍閱汶濟一帶。南旺河口居南北之脊。一水貫注。潺湲如縷。每遇春旱。涸竭可慮。目前正當大挑之候。速敕挑濬所關甚鉅。倘淺處不濬。濬後不深。挖挑僅循故事。重運其何以濟。至于北河口。尤汶水北瀉之衝。今歲大水沒隄。此口必塞。始能挽汶全力而注之漕。此中又有馬踏、蜀山諸湖。名爲水櫃。時其盈詘而節宣之。斯可借潤。特患經過內外官員。倚勢決壩。湖水洩漏。則蓄積不厚。何以待運。臣與管河諸臣約嚴。禁放決力飭修築。倘有犯者。卽據實奏請定奪。若夫上源諸泉派分流遠。而導之湯湯。皆濟運洪波。國家特設泉部之臣。其職誠重。邇來歲久事湮。水利盡歸佔籍。泉夫幾爲虛設。源之湮矣。流遏能遂。臣移文泉部等官。親行踏勘修復。倘諸臣以急公爲務。濬河身蓄水利。疏泉源一一實做。北河自不患於淺阻。而近日最可患者。莫如駱馬一湖。此湖至陳窯口。清流安瀾。繩挽最便。賜名順濟。歷歲賴之。不意今年黃水突決。自清墩隄漫黃草湖。出駱馬而歸宿遷。直河故道。一望平原。陳窯新口。細流就淤。轉盼明春重運。踵至迴流而上。繩挽安施。則所謂力塞決口。復河故道。尤當及時鳩工。卽投壁沈馬似亦未可深惜也。乞亟敕總河督臣嚴飭中河分司。及管河道府。早辦物料。多發丁夫。刻期竣工。無誤新運。此萬不可緩之役。毫不可

省之費也。

崇禎長編

是年決建義北壩總河尙書朱光祚濬駱馬湖避河險十三處名順濟河。

明史稿

崇禎六年五月壬辰鑄總督河道朱光祚級以漕艘愆期也。

崇禎長編 江陵人 萬曆乙未進士 天啓四年任 崇禎四年再

任

崇禎七年冬十一月漕運總督楊一鵬議濬泇河從之。

崇禎八年秋九月逮總理河道尙書劉榮嗣。

明紀事本末

本末

初榮嗣以駱馬湖運道潰淤創挽河之議起宿遷至徐州別鑿新河分黃水注其中以通漕運計工二百餘里費金錢五十萬而其所鑿邳州上下悉黃河故道浚尺許其下皆沙挑掘成河經宿沙落河坎悉平如此者數四迨引黃水入其中波流迅急沙隨水下率淤淺不可以舟及漕舟將至而駱馬湖之潰決適平舟人皆不願由新河榮嗣自往督之欲繩以軍法有入者輒告淤淺弁卒多怨巡漕御史倪于義劾其欺罔誤工南京給事中曹景參復重劾之逮問坐贓父子皆瘐死獄中郎中胡璉分工獨多亦坐死其後駱馬湖復潰舟行新河無不思榮嗣功者當是時河患日棘而帝又重法懲下李若星以修濬不力罷官朱光祚以建議蘇觜決口逮繫六年之中河臣三易給事中王家彥嘗切言之光祚亦竟瘐死而繼榮嗣者周鼎修泇利運頗有功在事五年竟坐漕舟阻淺用故決河防例遣戍煙瘴給事

中沈允培刑部侍郎惠世揚總河侍郎張國維各疏請寬之乃獲宥免云。是年榮嗣被劾得重罪侍郎周鼎繼之乃專力於泇河浚麥河支河築王母山前後壩勝陽山東隄馬蹄崖十字河攔水壩挑良城閘抵徐塘口六千餘丈。明史稿·山東全河備考云·劉榮嗣·字敬仲·號半舫·曲周人·萬曆丙辰進士·崇禎六年任·周鼎·字寔甫·宜興人·萬曆癸丑進士·崇禎八年任

是年東河水淺運復由徐參議徐標於徐洪上流剗開月河北與舊運河接連運得無滯明年漕運復由東河徐運道又廢。徐舊漕河·卽泗水也·泗水經流州界·凡二百餘里·自沙河至謝溝一百六里·爲沛縣境·自鳴臺·東小河·在州境者四·曰留城小河·曰境山溝·曰溜溝河·曰烏幫溝·至州城北·則受汴水合流·歷二洪下接於淮·其後汴挾黃河之勢·決墮隣岸·爲漕之患·至萬曆三十二年·都御史李化龍·浚泇河口·漕漸移而東北·以避黃河衝突·及三十八年·化龍開東運河告成·而徐之運道遂廢·本朝康熙初·閉鎮口開·自是黃專合汴·而交流之所·墊爲平壤·泗自入會通河·不復達徐矣·徐州志

### 崇禎九年夏四月泇河重濬成

明紀事本末

是年夏泇河復通由宿遷陳溝口合大河周鼎又修高家堰及新溝樣田營限增築天妃閘石工去南旺湖彭口沙礓凌劉呂莊至黃林莊百六十里而是時黃淮漲溢日甚倒灌涸漕鼎在事五年卒以運阻削職繼之者侍郎張國維甫蒞任卽以涸漕被責。明史稿·

崇禎九年八月庚寅天津河道淤阻帝諭姚應翀戴罪晝夜督濬再違定行拿究并諭督臣回奏。十二月辛卯總理河道周鼎疏報挑河據司道府州再四確勘于陵無礙于運有裨州治民生所全甚大冊開上自茶庵迤西舊欄壩入口起下至顧家莊後出口止共計應挑河長二千一百丈俱口闊十二

丈底闊六丈深一丈五尺計土二十八萬三千五百方共銀三萬四千二十兩又截河大壩一百丈合用銀三千六十三兩零工部酌議上從之

崇禎長編

崇禎十年正月戊午敍泇河工周鼎朱大典張任學張宸極等敍賚有差劉遵憲賞銀幣蔡國用鍾炌賞銀

崇禎長編

崇禎十一年四月丁未倉場總督李遇知疏稱淮限已逾河流淤淺帝令嚴飭各糧道嚴押飛挽照限赴幫德州桑園一帶責成管河各官晝夜疏濬毋得徇悞壬戌河道總督請旨立榜帝以聞禁其嚴權要擅啓洩水周鼎何不立糾殊屬瞻徇榜牌卽行修復五月戊子巡漕楊一俊疏報東溝口一帶漕船淺阻帝令經管官先行革職戴罪星夜挑濬自贖楊一俊嚴督各河道躬住河干上緊催價作速運行十一月癸亥工部主事于穎疏言臣管理淮安天妃閘以江南至儀真一帶河道挑濬自崇禎十年正月起至本年十二月終止將年例清冊呈送部科備照

崇禎長編

崇禎十二年正月壬戌總理河道周鼎疏言臣身在行間河工勢難兼理請專敕管河司道各官晝地分治無悞急工以濟新運帝以河當大挑不及時興工殊屬延玩卽著分地勒限速濬以濟新運三月己未戶科給事中傅鍾秀疏言漕艘往以津途延滯釀弊叢奸但今日河濟用兵其水次觀望中途趨避此情理之必然者然則三月過淮四月過洪之限果能一一如期乎若夫萑苻乘間保無沿途疎

虞之患則提調防護亦當十倍疇昔伏乞申飭漕河諸臣悉心料理早抵通灣帝是之七月庚申工科右給事中宋之普疏言臣家沂州西泇河東涑河入漕運泇河之處俱在泇口原自通行年久湮淤每致有河身高於平地者是在疏通河身使諸水盡歸于河引之既以濟漕而屯田民田皆可爲沃壤實兩利之道也至沂河之爲臣州患者總之在落馬湖下流湮淤但得湖流疏通則沂水之患自淺全漕之利思過半矣帝命河臣酌議以聞九月戊寅戶部李侍郎疏言海運一議所以濟河漕之不及漕臣朱大典籌度加詳焉然國初備邊每在西北故海上徑行無礙今日之患輒在東方帆檣粟米皆可以啓戎心運道一通海禁彌弛保無有交通爲難者臣仰窺聖明建久長之慮當不以全漕之大倚辦海若而早計豫圖以此爲不然之畫亦一策也今漕臣先募大海船數隻自維揚至津門各攜工役詳錄島嶼往來審視以圖經始蓋途有所必經而後不失于迂事有所必習而后能審其便此乘風破浪之要務實長慮卻顧之極思也帝命所司確奏以聞

崇禎長編

崇禎十二年二月太監曹化淳議京城外開河以通漕糧自是年三月十九日起至辛巳六月所開河自廣渠門起至大通橋運糧河北岸挑河長三千八百六十二丈又東直門外關帝廟挑月河長二百七十丈關虎營至關帝廟大石橋挑河長三千一百五十一丈命內監于躍爲河工總理而以兵部官司輪督班軍共用班軍二百三萬二千餘工五城兩縣募夫二萬九百餘名兵部侍郎吳甡視工以爲

勞費無益且傷地脈抗疏止之。

春明夢餘錄

崇禎十三年閏正月辛亥登萊巡撫徐人龍疏言國家歲漕百萬所道會通河一線以達京師而洪闢停留則苦搬運黃河衝塞則苦推移甚至臨清德州屢聞烽警亦岌岌可憂矣臣見有議復海運者夫海運危險安可以國脈輕付之不可知之地若膠口以北海倉以南元運舊河儼然在焉臣出巡膠萊自南海口麻灣至海倉北海口共二百七十里或塞或淺計工可開若修而復之既近且安利害較著而說者謂分水嶺馬家濠難于開鑿大姑河小姑河易于壅沙欲自黃埠巔云河口諸所創開一道以接之而臣以爲不然夫馬家濠兩岸阻石舟不可觸近經削治海船大行不煩人力一易也二姑衝沙爲害然廢越二百年沙僅尺許冬春水涸歲加澇刷二易也分水嶺地勢固高然河底泉水可儲河旁支流可引更修閘壩蓄洩有備三易也而且沿岸而行萬無一失旣非黑海之險疏浚一通經久可賴又無黃河之虞居恆則兩路兼行遇變則此或有滯彼尙可來無意外隔絕之患有裨國計亦可通商係河運非專海運係疏導非專開鑿可用海船亦可用河船有益西河非欲廢西河也計淮口開洋由安東入麻灣海口行三百三十里由海倉至直沽沿海岸行三百五十里較漕河之速捷速十倍而中間所道新河又且安利疏挑之費度不過數十萬此會通河剝淺一歲之所費耳倘可議行另疏以請帝謂河漕儘可轉輸安用海運若遇變復由膠萊仍與漕無異且疏挑與海船河船爲用不下數十

萬可否著所司詳確酌議以聞。四月己未工部主事姜天樞以運河膠淺疏濬不時糾劾博平縣知縣錢銓署清河縣印同知辛志諤管河通判張鶴齡帝命削籍戴罪督挑候工完定奪。五月己酉巡視漕儲盧世灌言以漕艘鱗集膠滯難前管河水利道副使葉重華管河同知譚系并濟寧州魚臺縣等官泄緩誤漕帝命將葉重華譚系并濟寧魚臺印官俱先削籍令戴罪作速通浚盧世灌職在巡漕著沿河星夜嚴催不得徒請申飭取罪。七月壬辰帝諭漕糧關軍國命脈乃今時已入秋津南尚無片帆如此違玩國儲何賴總河漕儲及管河分司州縣正印把總等官俱先降一級仍各戴罪盡赴河干催儻依限早抵京通不得延玩致干重譴。己酉帝以自五月至今雨澤未降運河涸淺漕糧阻滯命順天府總河等官并各撫按一體潔虔祈禱。八月庚戌巡漕御史盧世灌疏報開放馬踏湖樁口使湖水北流以濟漕運未及一夜濟北臨南刻期利涉卽德津間亦沾灌注糧艘銜尾而進報聞。十月乙丑河道總督張國維疏言衛河發源輝縣之蘇門山拗刀泉合漳沁淇洹諸水北流至臨清會閘河以濟運爲功甚大續因漳河返跳而衛流遂弱先年雖有挽漳引沁之議終亦未行致歲歲苦淺興其浚之于委又孰若導之于源也今歲大旱臨德河流枯澀臣遣東昌府通判張鶴齡前往彼處清理而水卽稍漲此非明效大驗歟今臣請于輝縣地方南旺事理特設泉司一員專董浚導衛河泉源并令細察漳水沁水之可復可引丹水開支與滏洹三水之入衛與否將一切疏通搜浚事務悉令專致

料理以濟糧運。凡有泉州府廳州縣印河等官皆暫轄其所駐分署察彼處空閒衙舍俱可棲止供應。輿皂夫役所費約亦不多此固不難於增置者。命河南撫按踏勘酌妥以聞。

崇禎長編

